

अंगिका साहित्य

केरों इतिहास

डॉ० डोमन साहु 'समीर'

डॉ० तेजनारायण कुशवाहा : डॉ० अमरेन्द्र



♦ हिन्दी अकादमी हैदराबाद

१९९८ ई०

# अंगिका साहित्य केरों इतिहास

□ लेखक

डॉ० डोमन साहु 'समीर'

डॉ० तेजनारायण कुशवाहा : डॉ० अमरेन्द्र

हिंदी अकादमी हैदराबाद,

१२०/ए, नेहरू नगर पूर्व, सिकन्दराबाद

(आ० प्र०) - ५०००२६.

१९९८ ई०

## अंगिका साहित्य केरों इतिहास

लेखक : डॉ० डोमन साहु समीर (आमुख)  
डॉ० तेजनारायण कुशवाहा (पद्य—खंड)  
डॉ० अमरेन्द्र (गद्य—खंड)

प्रकाशक : श्री विनोद कुमार चतुर्वेदी  
महामंत्री, हिंदी अकादमी हैदराबाद,  
१२०/ए, नेहरू नगर पूर्व, सिकन्दराबाद,  
(आ० प्र०) — ५०००२६.

प्रथम प्रकाशन : श्रावणी पूर्णिमा, १९९८ ई० : १००० प्रतियाँ।

मूल्य : एक सौ पच्चीस रुपये मात्र।

© : लेखकत्रय।

प्राप्ति स्थान/वितरक :

१. महामंत्री, हिंदी अकादमी हैदराबाद,  
१२०/ए, नेहरू नगर पूर्व, सिकन्दराबाद (आ० प्र०) — ५०००२६.
२. अभिराम प्रकाश,  
समीर कुटीर, टी—विलासी, देवघर (बिहार) — ८१४११७.
३. डॉ० तेजनारायण कुशवाहा,  
गान्धीनगर, ईशीपुर (भागलपुर, बिहार) — ८१३२०६.
४. डॉ० अमरेन्द्र, अंगिका संसद, ज्ञानेन्द्रनाथ मुखर्जी पथ,  
भीखनपुर, भागलपुर (बिहार) — ८१२००१.


कम्पोजिंग एवं मुद्रण :

स्वर्ण कम्प्यूटर प्रेस,

डावर चौक, देवघर — ८१४११२ फोन : २५३३२

## समर्पण

उद्योगवीर, धर्मवीर, दानवीर, पद्मश्री  
डॉ० बी० वी० राजू  
के कर-कमलों में,  
जिनमें बिहारी ग्रामीण जनता  
के लिए अपार स्नेह और सहानुभूति है  
तथा  
जिनका कला और साहित्य-प्रेम अतुलनीय है,



यह पुस्तक सादर समर्पित है।

— डॉ० समीर, डॉ० कुशवाहा, डॉ० अमरेन्द्र

## प्रकाशकीय

आरण्यक संवादों से लेकर बौद्ध-धर्म के सूत्रों तक लांकायत स्तर पर अंगिका का अपना महत्वपूर्ण स्थान रहा है। अथर्ववेद, शक्तिरागमंत्र, बौद्ध-ग्रंथ अगुतरनिकाय, जैन-ग्रंथ भगवतीसूत्र, लौकिक संस्कृत के कथासारित्सागर आदि प्राचीनतम ग्रंथों में जिन सोलह महाजनपदों का उल्लेख है उनमें एक समृद्ध महाजनपद के रूप में अंग भी है। बौद्धकालीन महाजनपदों में गांगेय संस्कृति के इतिहास में भी अंग का विशेष महत्व रहा है।

मौर्य-गुप्त-काल के पश्चात् पालवंश के उत्कर्ष-काल में जब बौद्ध विश्वविद्यालय विक्रमशिला की स्थापना हुई तब से अंग भाषा की प्राचीन गरिमा जाग गई। बौद्ध आचार्यों ने अपने धर्म के जिस विशिष्ट वाङ्मय को सुदूर दक्षिण-पूर्व तथा तिब्बत-चीन तक पहुँचाया उसका माध्यम अंगिका ही था। अंगिका, निःसन्देह बिहार की लोकाश्रित बोली है जिसकी सुमधुर भाव-भंगिमा, शब्द-निधि और शाश्वती ललित पदावली इतनी अभिव्यक्ति-समर्थ रही है कि देश-काल के प्रभावों से मुक्त उसने अपने आद्य रूपों, विंबों और प्रतीकों को सहज ही अक्षुण्ण रखा है। उसकी साहित्यिक परंपरा में युगानुकूल जीवन-पद्धति, सामाजिक मूल्यों की प्रतिष्ठा और व्यापक मानवीय प्रवृत्तियों की आग्रह-प्रीति उसके अविच्छिन्न इतिहास की परंपरा बन गई है।

पूर्ववर्ती बौद्धकालीन अंगिका दर्शन और चिंतन की सशक्त वाहिका थी, किंतु, देश-काल की प्रवृत्ति के अनुकूल आज के नव्य-प्राचीन संघर्ष में, वह अधुनातन आकांक्षाओं के प्रति सहज संवेदनशील भी हो उठी है। उसके स्वातंत्र्योत्तर-साहित्य में प्रगतिशील विचारधाराओं का भी प्रतिविंबन हुआ है। साहित्य की हर विधा में संप्रति अंगिका एक गहन त्वरा और जागरूकता के साथ भारतीय संस्कृति के गौरवशाली स्वरो को दिगन्तव्यापी बनाने में संलग्न है।

हिंदी अकादमी हैदराबाद (आ० प्र०) के अध्यक्ष डॉ० बैजनाथ चतुर्वेदी ने, जिन्होंने बिहार की अन्यान्य बोलियों के व्याकरण, साहित्य और इतिहास को अपनी पत्रिका 'संकल्प' में अन्यान्याश्रित संबल दिया, लोकाश्रित बोलियों को भाषायी चेतना के साथ नवनिर्माण के लिए प्रश्रय दिया तथा

उनके मूल्य-समर्थन के साथ-साथ विकास-प्रक्रिया को भी प्रेरित किया है। अंगिका से संबंधित अपनी सहधर्मिणी दिवंगता चतुर्वेदी प्रतिभा मिश्र की आकांक्षा-पूर्ति में विशेष अभिरुचि का परिचय दिया है। तदनुसार, उनके आग्रह पर डॉ० डोमन साहु 'समीर', डॉ० तेजनारायण कुशवाहा और डॉ० अमरेन्द्र ने प्रस्तुत 'अंगिका साहित्य केरों इतिहास' के प्रणयन में अपना अमूल्य योगदान किया है। यह ग्रंथ अंगिका-साहित्य का प्रथम प्रामाणिक इतिहास है। भारतीय साहित्येतिहासों में यह ग्रंथ एक अमूल्य उपलब्धि है।

'अंगिका-हिंदी-शब्दकोश' और 'अंगिका-व्याकरण' के बाद यह ग्रंथ अंगिका के क्षेत्र में हिंदी अकादमी, हैदराबाद (आ० प्र०) का तीसरा प्रकाशन-पुष्प है जिसके प्रकाशन में पद्मश्री डॉ० बी० वी० राजू (आ० प्र०) की उदार दानशीलता अविस्मरणीय है।

गन्धमादन,

१७-६-१७६/ए,

कूर्मागुड़ा, हैदराबाद,

(आ.प्र.) - ५०००५६.

**डॉ० वसंत चक्रवर्ती**

उपाध्यक्ष, हिंदी अकादमी हैदराबाद।

(पूर्व-अध्यक्ष, हिंदी विभाग,

उस्मानिया विश्वविद्यालय)

## प्राक्कथन

हिंदी प्रचार सभा, हैदराबाद के हीरक जयन्ती के समापन के दोसरो दिन २६ अगस्त, १९९६ के डॉ० बजरंग बांगरे 'कार' लै के हमरा कन काकतीय होटल, नामपल्ली (हैदराबाद) ऐलात आरो हमरा लै के प्रो० डॉ० वसंत चक्रवर्ती से मिलैते होलो प्रो० डॉ० बैजनाथ चतुर्वेदी के सिकन्दराबाद-स्थित आवास पर उतारलकात। डॉ० चतुर्वेदी महाभागें हमरा लै लें गाड़ी भेजने छेलात। वै दिन डॉ० चतुर्वेदी महोदय नें आपनों साध्वी धर्मपत्नी महाप्राण वाणीमुक्ता चतुर्वेदी प्रतिभा मिश्र (दिवंगता) के अंतिम इच्छा, कि अंगिका साहित्य के अध्ययन लेली एक ऐहनों ग्रंथ के निर्माण करलो जाय जै में अंगिका साहित्य केरो इतिहास के समीकृत समग्र सामग्री, साहित्य केरो परंपरा आरो प्रवृत्ति-आर के वर्णन कुछ विस्तार से रहें, के चर्चा करलकात। हुनी दिवंगता वाणीमुक्ता जी के मनसा पूरा करै लेली अंगिका साहित्य केरो इतिहास-लेखन के भार हमरा आरो डॉ० अमरेन्द्र पर आरो संगे-संगे अंगिका-व्याकरण-लेखन के भार डॉ० डोमन साहु 'समीर' पर देलकात। तखनी 'समीर' जी के 'अंगिका-हिंदी-शब्दकोश' छपै के प्रक्रिया में रहै। तदनुसार, ऊ शब्दकोशों के लोकार्पण के दिन (१४ अप्रिल, १९९७ ई. के) हमरासिनी तीन्हू देवघर में मिललां आरो के की लिखतै, एकरों निर्णय लेलां।

फरू, श्रद्धेय चतुर्वेदी जी नें हमरासिनी तीन्हू के संबोधित आपनों २२ अक्टूबर, १९९७ के चिट्ठी में ऊ इतिहास-लेखन जल्दी-सें-जल्दी पूरा करी दै के आग्रह करलकात। बीचों-बीचों में हिंदी अकादमी हैदराबाद के प्रकाशन-मंत्री श्रीमती रेखा पाण्डेय के चिट्ठीयो ऐतें रहलै, जें हमरासिनी के झकझोरी के जगैतें रहलै। आखिर, १५ दिसंबर, १९९७ के अपेक्षित इतिहास-लेखन पूरा करी के हममें आरो अमरेन्द्र जी, टंकण, संयोजन, मुद्रण आरो प्रकाशन लेली, डॉ० समीर के दै ऐलियै।

आभी ताँय अंगिका साहित्यों के कुछेक विधा पर कयेक-टा छोटों-बड़ों लेख 'नवकल्प', 'अंगप्रिया', 'आंगी', 'वाङ्मयी' -आर पत्र-पत्रिका अथवा 'भारतीय जनपदीय साहित्य' (डॉ० रमण शाण्डिल्य-संपादित), 'गीत-गंगा' (डॉ० अमरेन्द्र-संपादित), 'अंगिका गद्य-संग्रह' (डॉ० विनोबाला सिंह-संपादित) ओगैरह एक-आध संकलनों में छपलों मिलै छै। डॉ० अभयकान्त चौधरी आरो डॉ० नरेश पाण्डेय 'चकोर' के 'अंगिका साहित्य के इतिहास' आरो ईसिनी पंक्ति के लेखक (डॉ० कुशवाहा) के 'अंगिका : संपूर्ण भाषा, संपूर्ण साहित्य' प्रकाशित

होलो छै। ई दोन्हू कृति हिंदी में छै। अंगिका साहित्यों के अध्ययन संपूर्ण रूप से करै लेली ई-सब पर्याप्त नै मानलौ जाय परै।

यै लेली हमरासिनी वैज्ञानिक ढंगों से अंगिका साहित्य केरो शृंखलाबद्ध इतिहास लिखै के प्रयास करने छियै। यै में शुरू से तै के आय तलुक के अंगिका साहित्यों के सब्भे मुख्य साहित्यिक विषय, परंपरा आरो प्रवृत्ति, प्रतिनिधि कवि-लेखक आरो हुनकासिनी के प्रतिनिधि कृति पर प्रकाश डाललौ गेलो छै। आयको अंगिका-साहित्य कविता, कहानी, उपन्यास, नाटक, एकांकी, निबंध, समीक्षा, संस्मरण, जीवनी, साहित्यशास्त्र, शब्दकोश, व्याकरण, शोधकार्य, अनुवाद, पत्रकारिता आरनी कते नी दिशा में विकसित होय के प्रगति-पथ पर बढ़ी रहलौ छै। यै लेली सब्भे अंगों के क्रमिक विकास आरो विशेषता के विवेचन जरूरी समझलौ गेलो छै।

लिखित या नागर (तथाकथित शिष्ट) साहित्यों के अलावा अंगिका के लोक-साहित्यों के विवेचनो ई इतिहास-ग्रंथों के विशेषता मानलौ जाय परै। शुरू से अंगिका भाषा के अस्मिता आरो पहचान के उजागर करै लेली बहुभाषाविद् डॉ० समीर के 'आमुख' एकरा में छै।

ई इतिहास-ग्रंथ महासाध्वी महाप्राण वाणीमुक्ता चतुर्वेदी प्रतिभा मिश्र के लाखसा पूरा करै छै। हुनी अंग-सवासिन छेली, जिनको असामयिक निधन ई ग्रंथ देखी तै के पहिन्हें (१६ जनवरी, १९९६ ई० के) होय गेलै। विश्वास छै कि है ग्रंथों के प्रकाशन से हुनको आत्मा के शान्ति मिलतै। हुनको प्रति हममें तमाम अंगिका-भाषी, अंगिका-प्रेमी आरो अपना ओरी से हार्दिक आभार प्रगट करै छियै।

सबसे बड़ो बात ई कि वाणीमुक्ता प्रतिभा देवी के जे इच्छा भाव-जगतों के अमूर्त संपत्ति रहै ओकरा हुनको श्रद्धेय पतिदेव प्रो० डॉ० बैजनाथ चतुर्वेदी महाभाग ने रूप दे लेली हमरासिनी के उत्प्रेरित करी के है काम पूरा करवैलकात। यै लेली चतुर्वेदी जी के प्रति जत्तो आभार प्रगट करलौ जाय, कम्मे होतै। हिनको आदर्श अनुकरणीय छै।

है इतिहास-ग्रंथों के प्रकाशन लेली प्रख्यात उद्योगपति पद्मश्री डॉ० बी० वी० राजू (आन्ध्र प्रदेश) ने आपनों साहित्य-प्रेम आरो दानशीलता से हम-सब के उपकृत करने छोट, जेकरो लेल हम-सब हुनका प्रति कृतज्ञ छियै आरो ई ग्रंथ हुनके समर्पित करी रहलौ छियै। हुनको संक्षिप्त जीवनवृत्त यै ग्रंथों के आवरण-पृष्ठों पर प्रकाशित करते हुए हम-सब के बड़ी आनन्द होय रहलौ छै। अंगिका के विकास आरो संवर्द्धन में हुनको महती भूमिका सदाय याद करलौ जैतै, एकरा में कोय दू बात नै छै।



है ग्रंथों के गद्य-खंड लिखे में अपेक्षित सामग्री-संयोजन में तै के विषय-विवेचन, कृतित्व-विश्लेषण ओगैरह में डॉ० अमरेन्द्र ने आपनों अपूर्व अध्यवसाय, कौशल आरो श्रमशीलता के जे परिचय देने छै ऊ अकथनीय छै। ई बात दोसरो छेकै कि परिस्थितिवश ई 'प्राक्कथन' हमरहै लिखे नै पडलौ छै, मतरकि अमरेन्द्र जी के लिखलौ गद्य-खंड है इतिहासों के अविच्छिन्न अग छेकै जेकरों संपूर्ण श्रेय के अधिकारी हिनीये छौत। हिनी तै एकरों भागीदारे छेकात।

है ग्रंथों के शुरू में अंगिका भाषा आरो व्याकरण पर डॉ० समीर के लिखलौ 'आमुख' लागलौ छै, जेकरा से है ग्रंथों के महत्ता आरो उपादेयता बढ़ी गेलौ छै। एतने नै, है ग्रंथों के सजावै-सँवारै आरो छपवावै में हिनके हाथ रहलौ छै। हिनका प्रति कृतज्ञता की जापित करलौ जाय, हिनी तै अंगिका के प्रति समर्पित छौत।

सब तै सब, मतर है ग्रंथों के प्रकाशक जों हिंदी अकादमी हैदराबाद नै होतियै तै सब लिखलका धरले रही जैतियै। अंगिका भाषा-साहित्यों के महती सेवा लेली हम-सब हौ हिंदी अकादमी आरो वै से जुड़लौ सब्भे लोगों के प्रति कृतज्ञ छियै।

हुएँ सकै छै कि कुछेक रचनाकारों के प्रकाशित पुस्तक या स्फुट रचना उपलब्ध नै रहला के कारणे हुनका आरो हुनको कृति पर अपेक्षित प्रकाश यै ग्रंथों में नै पडलौ रहै। वै लेली हुनका-सब से हमरों विनम्र क्षमा-याचना छै। साथे-साथ, है ग्रंथों के निर्माण में जे-सब इतिहासकार आरो रचनाकारों के रचना से सहयोग आरो सहायता मिललौ छै हुनकासिनी के प्रति हममें आभार स्वीकार करै छियै।

आखिर में, है ग्रंथों के मुद्रक स्वर्ण कम्प्यूटर प्रेस, देवघर (बिहार) के हार्दिक धन्यवाद देबौ हममें आपनों कर्तव्य समझै छियै। वै प्रेसों के स्वत्वाधिकारी श्री आलोक कुमार मल्लिक के सहयोगिता आरो सक्रियता के बिना एतें जल्दी आरो एतें सुचारुतापूर्वक एकरों मुद्रण-प्रकाशन होबौ संभव नै रहै। साधुवाद।

तेजनारायण कुशवाहा

कुलसचिव,

विक्रमशिला हिंदी विद्यापीठ।

गान्धीनगर, ईशीपुर

(भागलपुर, बिहार) - ८१३२०६

१५ दिसंबर, १९९७ ई०

# विषय-सूची

आमुख

(डॉ० डोमन साहु 'समीर')

१. अंगिका भाषा आरो व्याकरण केरों रूपरेखा  
-अंग-लिपि आरो अंगिका भाषा ; ध्वनितत्व, रूपतत्व ;  
शब्द-भंडार ।

1-13

अंगिका साहित्य केरों इतिहास

खंड-१ : पद्य

(डॉ० तेजनारायण कुशवाहा).

काल-विभाजन :

१. प्रारंभिक युग (५००-१२२० ई०)

सहजयानी कविता : सिद्ध-साहित्य ;  
नाथ-पंथ आरो अंगिका केँ नाथ-पंथी कविता ;  
अंगिका केरों गीति-गाथा-प्रबंध काव्य ;  
अंगिका केरों लोकोक्ति कविता ।

16-35

२. अंगिका साहित्यों केँ मध्य-युग (१२२०-१८५० ई०)

35-49

१. पूर्व-मध्य-युग (१२२०-१६५० ई०) ;
२. उत्तर-मध्य-युग (१६५०-१८५० ई०) ;
३. अंगिका केँ साधु-पंथी कविता ;
४. मध्ययुगीन अंगिका गीति-गाथा-प्रबंध ;
५. अंगिका लोक-नृत्य ।

३. अंगिका साहित्यों केँ आधुनिक युग (१८५० ई० सेँ)

49-62

- क. मंच-पूर्व-युग (१८५०-१९५० ई०) ;
- ख. मंच-युग (१९५०-१९८५ ई०) ;
- ग. मंचोत्तर-युग (१९८५ ई० सेँ आय ताय) ।

४.	आधुनिक युगों के कवि आरों कविता केरों संक्षिप्त परिचय	62-141
५.	अंगिका काव्य-संसार	141
६.	निष्कर्ष	143

**खंड-२ : गद्य**  
(डॉ० अमरेन्द्र, संपादक, "आंगी")

१.	अंग-जनपदों के पिछलका स्थिति-परिस्थिति ।	149
२.	अंगिका-साहित्यों के काल-निर्धारण आरों नामकरण ।	163
३.	कथा-साहित्य (कहानी-सामान्य, व्यंग्य-कथा, अणु-कथा) ।	166
४.	उपन्यास (नया सूरज नया चान, छाहुर, सुभद्रांगी, परबतिया, अन्तहीन वैतरणी, भाग्यरेखा, तुलसी मंजरी, जटायु, हम सुरमुखदास नैं छिकियै, गुलबिया, मरगांग, पियावासा, केन्द्रावती) ।	
५.	नाटक (रिडियो नाटक, रंगमंचीय गद्य-नाटक) ।	207
६.	आत्मपरक (आत्ममूलक) साहित्य (आत्मकथा, जीवनी, संस्मरण) ।	215
७.	निबंध (शब्दचित्र/रेखाचित्र, साक्षात्कार) ।	222
८.	आलोचना (समीक्षा) ।	228
९.	लोक-साहित्य (गद्य) : (लोक-कथा, लोकोक्ति-मुहावरा) ।	236
१०.	अभिज्ञान-साहित्य (इतिहास-भूगोल, भाषा-लिपि-व्याकरण, शब्दार्थ-संचयन आरों शब्दकोश) ।	241
११.	पत्र-साहित्य ।	250
१२.	पत्र-पत्रिका-साहित्य ।	252
१३.	उपसंहार ।	259



## जीवनवृत्त

नाम - डोमन साहु 'समीर' ।

जन्म - ३० जून, १९२४ ई०, पन्दाहा (गोड्डा, बिहार) ।

माता-पिता - पियासी देवी (स्व०)/दयाल साहु (स्व०) ।

शिक्षा - बी० ए० (ऑनर्स), एम० ए० (हिंदी),

डी० लिट्० ; बी० एल० ; विशारद ।

मानद उपाधियाँ - विद्यासागर ; काव्य-शास्त्री ;

अंग-आदर्श ; भोजपुरी-भारती ; गुरु गोमके (आचार्य) ।

सम्मान पुरस्कार - राजभाषा विभाग (बिहार सरकार) ; जन-जातीय एवं क्षेत्रीय भाषा विभाग (राँची विश्वविद्यालय, राँची) ; नागरी लिपि परिषद् (नई दिल्ली) ; साहित्य अकादमी (नई दिल्ली) ; विक्रमशिला हिंदी विद्यापीठ (ईशीपुर, भागलपुर) ; हिंदी अकादमी हैदराबाद (सिकन्दराबाद, आ० प्र०) ; अ० भा० भोजपुरी परिषद् (लखनऊ) ; साहित्यकार-संसद् (समस्तीपुर/देवघर) ; संताली साहित्य परिषद् (दुमका) ; जिला संताली साहित्य परिषद् (पुरुलिया, प० ब०) ; अ० भा० संताली लेखक-संघ (जमशेदपुर) ; बिरसा मेमोरियल सोसाइटी (जमशेदपुर) ; समय-साहित्य-सम्मेलन (पुनसिया, बाँका) आदि द्वारा ।

प्रकाशित ग्रंथ - अंगिका-हिंदी-शब्दकोश ; अंगिका-व्याकरण ; समीक्षात्मक निबंध (अंगिका) ; हिंदी-संताली-शब्दकोश ; हिंदी और संताली : तुलनात्मक अध्ययन (शोध) ; संताली-प्रवेशिका ; संताली-प्रकाशिका ; संताली भाषा और साहित्य : उद्भव और विकास ; एक दीप मेरा भी (हिंदी कविता-संकलन) ; सेताक् (संताली कविता-संकलन), माताल (संताली कहानी-संग्रह) आदि, करीब एकावन-टा ।

संपादन - 'होड़ सोम्बाद' (प्रथम संताली साप्ताहिक पत्र : जून, १९४७ से जून, १९८३ ई० ताँय) ; 'स्मारिका' (जिला सांस्कृतिक परिषद्, देवघर) ।

प्रसारण - आकाशवाणी पटना, राँची आरु भागलपुरों से समय-समय पर ।  
अन्यान्य लेखन - हिंदी, संताली आरु अंगिका के पत्र-पत्रिकासिनी में तीन सौ से बेसी लेख, कविता आदि प्रकाशित आरु आकाशवाणी से प्रसारित ।

संस्थामिनी में संबद्धता - अध्यक्ष, भारतीय संताली साहित्य परिषद् (देवघर) ; अध्यक्ष, उदित अंगिका साहित्य परिषद् (देवघर) ; उपाध्यक्ष, हिंदी अकादमी हैदराबाद (सिकन्दराबाद) ; उपाध्यक्ष, साहित्यकार-संसद् (समस्तीपुर/देवघर) ; सचिव, सं० प० हिंदी साहित्य सम्मेलन (दुमका/देवघर) ; आजीवन सदस्य, नागरी लिपि परिषद् (नई दिल्ली) आदि ।

संपर्क - समीर कुटीर, टी-विलासी (देवघर, बिहार) - ८१४११७.  
फोन - ०६४३२/२२१९६.

## अंगिका भाषा आरो व्याकरण केरों रूपरेखा

अंगिका भारतवर्ष केरों प्राचीन अंग-महाजनपद आरो आधुनिक बिहार राज्य केरों भागलपुर, बाँका, मुंगेर, सहरसा, कटिहार, अररिया, किशनगंज, पूर्णिया, साहेबगंज, गोहा, पाकृड, दुमका, देवघर, जमुई आरो बेगूसराय जिला केरों अधिकांश लोगों केँ मातृभाषा आरो यै क्षेत्रों केँ एकटा मुख्य जन-भाषा छेकै। अंग-महाजनपद केरों नाम यै देशों केँ प्राचीन ग्रंथ अथर्ववेद, रामायण, महाभारत, वायु पुराण, ब्रह्म पुराण, विष्णु पुराण, मत्स्य पुराण, शिव पुराण, कथासरित्सागर, शक्ति-संगम-तंत्र, भगवती-सूत्र, कल्पसूत्र, अंगुत्तरनिकाय आरनी में ऐलों छै। जैन-ग्रंथ भगवती-सूत्रों में यै देशों केँ जौनसिनी सोलहटा महाजनपदों केँ नाम ऐलों छै वैसिनी में एक नाम अंग-महाजनपदों केँ छै। रामायण आरो महाभारत-काल्हौ में अनेक प्रसंगों में अंग-राज्य केरों चर्चा भेलों छै। महाभारत-कालों में तँ अंग एकटा प्रसिद्ध राज्य छेलै, जेकरों राजधानी राजा चम्प द्वारा स्थापित चम्पा नगरी में छेलै। हुनके वंशज राजा अधिरथ ने कुन्ती-पुत्र कर्ण केरों लालन-पालन करने रहै, जिनका कौरव-युवराज दुर्योधन ने अंग देशों केँ राजा घोषित कैने रहै। रणवीर आरो दानवीर केँ रूपों में राजा कर्ण केरों प्रसिद्ध इतिहासों में छै। कहलौ जाय छै कि वर्तमान भागलपुर शहरों से सटले चम्पा नगरों में जौन कर्णगढ़ केरों खंडहर छै ऊ राजा कर्ण केँ गढ़ (किला) छेलै। मतलब ई कि अंग-जनपदों केँ प्राचीनता आरो प्रसिद्धि इतिहासों से प्रमाणित छै।

## अंग-लिपि आरो अंगिका भाषा

(२) अंग-महाजनपद नाखी अंग-लिपि आरो अंगिका भाषा, जेकरों पुरानों नाम 'आंगी' रहै, इतिहास-प्रसिद्ध छै। बौद्ध-ग्रंथ 'ललितविस्तर' (ई पू. छठी-पाँचमी शती) में यै देशों केँ जेसिनी ६४ लिपियों केँ नाम ऐलों छै वैसिनी में ब्राह्मी, खरोष्ठी आरो पुष्करसारी केँ बाद चौथों स्थानों में अंग-लिपि केरों नाम छै। तात्पर्य ई कि ब्राह्मी आरो खरोष्ठी - जेन्हों यै देशों केँ पुरानों लिपि नाखी अंग-लिपियो सुप्रसिद्ध छेलै। बहुत संभव छै कि बादों में मिथिलाक्षर, वंगलिपि आरो असमिया लिपि केरों विकास अंग-लिपिये में भेलों रहें। कैथी लिपियो केँ विकास अंग-लिपिये में होलौ रहें तँ कोय आश्चर्य नै। बादों में कैथी लिपि केरों

## 2 □ अंगिका साहित्य केरों इतिहास

प्रचार-प्रसार सौसे बिहार प्रदेशों में भेलों रहै । आय-काल अंगिका भाषा लेली नागरी लिपि केरों प्रयोग होय रहलौ छै जे कि समयों के तकाजा के अनुसार बिल्कुल उपयुक्त छै ।

(३) यै देशों के पुरानों साहित्यों में इहाँकरों भाषासिनी केरों भौगोलिक नाम प्राच्या, प्रतीच्या, उदीच्या आरो दाक्षिणात्या के रूपों में ऐलौ छै आरो प्राच्या के अंतर्गत 'आंगी' भाषा केरों उल्लेख होलौ छै -- 'आंगी वांगी पांचाली वैदर्भी मागधी एते प्राच्याः' । वेहें 'आंगी' आयकों 'अंगिका' भाषा छेकै, जे कि बोलचाल के रूपों में 'छिका-छिकी' कहावै रहै । अबें 'अंगिका' नाम सुप्रचलित होय गेलौ छै । भिन्न-भिन्न क्षेत्रों के भाषा के रूपों मे वज्जिका आरो मल्लिका (भोजपुरी) के साथें 'अंगिका' महापंडित राहुल सांकृत्यायन द्वारा देलौ नाम छेकै, जेकरों विकास मध्य-कालीन भारतीय आर्य-भाषा 'अर्द्धमागधी' सें भेलौ छै आरो जेकरों उत्स प्राच्या 'आंगी' (भाषा) छेकै । कालक्रमों में पुरानों 'वांगी' केरों विकास तें 'बँगला' भाषा के रूपों में होय गेलै, मतरकि 'आंगी'- भाषीसिनी शिक्षा-दीक्षा में हिंदी भाषा अपनाय लेलकै । बीचों में ईस्वी सन् केरों ८-मी सें १२-मी शती ताँय विक्रमशिला महाविहार अंग-जनपदों के सुप्रसिद्ध विश्वविद्यालय छेलै, जहाँ सरहपा, कण्हपा, लुइपा, ढेण्डणपा आदि सिद्ध-कविसिनी नें कतें नी चर्यापदों के रचना करने छै । वैसिनी चर्यापदों में अंगिका भाषा केरों स्वरूप सुरक्षित छै -- 'चीअ थिर करि धरहु रे नाइ : आन उपाये पार ण जाइ' (सरहपा), 'बलद बिआअल गबिआ बाँझे : पिटा दुहिअइ ए तिणा साँझे' (ढेण्डणपा) ओगैरह ।

(४) यै समयों में जौन अंगिका यै जनपदों में प्रचलित छै ऊ यै क्षेत्रों के दू करोड़ों सें बेसी लोगों के मातृभाषा छेकै, जेकरा में लोक-गीत, लोक-कथा, लोकोक्ति, बुझौवल, फेंकड़ा ओगैरह के रूपों में प्रचुर लोक-साहित्य विद्यमान छै आरो अबें तथाकथित शिष्ट साहित्यो काफी लिखाय गेलौ/लिखाय रहलौ छै । एतना दिन तें राजनीतिक प्रपंचों के चलतें अंगिका केरों उपेक्षा होतें रहलै, मतरकि अबें अंगिका-भाषी लोगों में जागृति आबी गेलौ छै जेकरों फलस्वरूप अंगिका भाषा-साहित्यो के विश्वविद्यालयों में स्थान मिली गेलौ छै । आकाशवाणी केरों भागलपुर केन्द्रों सें तें अंगिका भाषा में कयेक तरहों के प्रसारणों होय रहलौ छै ।

## ध्वनितत्व

(५) अंगिका भाषा नागरी लिपि में लिखलों-पढ़लों जाय रहलों छै । यै लिपि केरों ऋ, ण, श आरो ष वर्णों के छोड़ी के आरोसिनी वर्ण अंगिका बास्ते बिल्कुल उपयुक्त छै ; मतरकि यै भाषा केरों दुइटा विशिष्ट ध्वनि बास्ते दुइ ठो लब्बों लिपि-चिन्हों के जरूरत होय छै । यै दुहू के बास्ते प्रसृत ए-कार = ऐ ( ~ ) आरो प्रसृत अ-कार = औ ( ौ ) केरों प्रयोग करलों जाय रहलों छै ; जेना कि -- लें, दें, जौं, तबें, आबें आदि में प्रसृत ए-कार आरो आबों, बैठों, पढ़ों, लिखों, हमरों, तोरों आदि में प्रसृत अ-कार (औं-कार) । वैज्ञानिक दृष्टि से सामान्य ए-कार आरो प्रसृत ऐं-कार तथा सामान्य ओ-कार आरो प्रसृत औंकार में स्पष्ट अन्तर छै, जेकरों चलते शब्दार्थ बदली जाय छै ; जेना कि -- ले, दे आदि (अवज्ञार्थक), मतरकि लें, दें आदि आदरार्थक तथा हमरो, एकरो आदि (समावेशी), मतरकि हमरों, एकरों आदि (संबंधार्थक) इत्यादि । संस्कृत केरों जेसिनी तत्सम शब्द अंगिका में प्रयोगों में आबै छै वैसिनी में ऋ, ण, श आरो ष केरों प्रयोग करलों जाय छै आरो करना चाहियों ; जेना कि -- ऋण, शेष, ऋषि, शंकर इत्यादि । अंगिका में न्, म्, य्, र् आरो ल् केरों महाप्राण ध्वनियो छै ; जेना कि -- कैन्हें, नान्हों, हम्हें, ठाम्हें, ऐय्हों, करिय्हों, तोरूँ, ओकरूँ, कल्हे, बल्हों इत्यादि में । 'एकरों', 'ओकरों' -जेन्हों शब्दों में 'ए' आरो 'ओ' केरों उच्चारण ह्रस्व (एकमात्रिक) होय छै, मतरु यै दुहू लेली कोनो विशिष्ट लिपि-चिन्ह प्रयोगों में नै आबी रहलों छै ।

## रूपतत्व

(६) आरो-आरो भाषा नाखी अंगिकाओ में शब्दों के संज्ञा, सर्वनाम, विशेषण, क्रिया-विशेषण, संबंधसूचक (अनुसर्ग/परसर्ग), समुच्चयबोधक आरो विस्मयादिबोधक शब्दों के रूपों में पद-विभाजन छै । इहाँ वैसिनी के विस्तारों में नै जाय के संक्षेपे में वैसिनी केरों विशेषता के बारे में नीचे बात करलों जाय रहलों छै ।

(७) संज्ञा -- अंगिका में संज्ञा केरों दू रूप होय छै -- सामान्य आरो विशिष्ट अर्थात् सामान्यार्थक आरो निश्चयार्थक ; जेना कि -- गाय, लोटा, धोती, बुतरू-आर सामान्यार्थक आरो गैया, लोटवा, धोतिया, बुतरूआ -आर निश्चयार्थक । विशिष्ट याने निश्चयार्थक संज्ञापदों से ऐन्हों संज्ञा- शब्दों के बोध होय छै जेकरों

बारे में पहिन्है से कुच्छ-ने-कुच्छ जानलों-सुनलों रहै है -- गैया, लोटवा, धोतिया आरो बुतरुआ याने अमुक गाय, अमुक लोटा, अमुक धोती आरो अमुक बुतरु, जबै कि गाय लोटा, धोती आरो बुतरु याने कोय गाय, कोय लोटा, कोय धोती आरो कोय बुतरु। स्पष्ट है कि सामान्यार्थक संज्ञापदों में '-आ' केरों याय होला पर उ- संज्ञापद विशिष्ट याने निश्चयार्थक बनै है ; मतुर ओकरों पहिन्है इ/ई-कार आरो ए/ऐ-कार रहला पर हौ '-आ' केरों जघों पर '-या' तथा आ-कार, उ/ऊ-कार आरो ओ-औ-कार रहला पर हौ '-आ' केरों जघों पर '-वा' होय जाय है। एतनै नै, हौ '-आ' के चलतें पूर्ववर्ती दीर्घ स्वर इस्व होय जाय है और संयुक्त वर्ण सरल होय जाय है ; उदाहरण -- काड़ा = कड़ा, गाडी = गडिया, रोटी = रोटिया, लेरू = लेरुआ/लेरुवा, कोदो = कोदवा आरो सुग्गा = सुग्वा, कुत्ता = कुतवा इत्यादि।

(८) कारक -- कर्ता कारकों में संज्ञापदों के रूप अकर्मक क्रिया के साथे अविकारी रहै है ; मतुर सकर्मक क्रिया के साथे विकारी होय जाय है ; जेना -- बरदा चरै है (अकर्मक), मतुर बरदाँ खैलकै (सकर्मक)। स्पष्ट है कि अकर्मक क्रिया 'चरै है' के साथे कर्ता 'बरदा' केरों रूप अविकारी है, मतरकि सकर्मक क्रिया 'खैलकै' के साथे कर्ता 'बरदाँ' केरों रूप विकारी होय गेलों है अर्थात् ओकरा में अनुस्वार लागी गेलों है। है अनुस्वार काँहीं-काँहीं 'ने' के रूपो में आबै है। आरोसिनी (तिर्यक्) कारकों में पैसिनी कारक-चिन्ह प्रयोगों में आबै है ; कर्म -- के ; करण -- से ; संप्रदान -- ले, लेल, लेली, बास्ते ; अपादान -- से, संबंध -- के, केरों, रों, -कों ; अधिकरण -- में, पर आरो संबोधन -- हे हो ! (पुल्लिंग, आदरार्थक), हे रे ! (पुल्लिंग, अवज्ञार्थक), हे हे ! (स्त्रीलिंग, समतार्थक या आदरार्थक), हे गे ! (स्त्रीलिंग, अवज्ञार्थक) इत्यादि।

(९) वचन -- अंगिका में वचन दुइटा है -- एकवचन आरो बहुवचन। बहुवचन केरों प्रत्यय (चिन्ह) छेकै -- -सनी, -सिनी, -सब ; जेना कि -- बुतरु (ए व), बुतरूसनी/बुतरूसिनी (ब व) ; नुँगा (ए व), नुँगा-सब (ब व) इत्यादि।

(१०) लिंग-भेद -- पुल्लिंग आरो स्त्रीलिंग अंगिका केरों लिंग-भेद छेकै। पुल्लिंग आरो स्त्रीलिंग रूप प्रायः दोसरों-दोसरों शब्दों से प्रगट करलें जाय है ; जेना कि -- पुल्लिंग में बाप, भाय, बरोंद, काड़ा ओगैरह आरो स्त्रीलिंग में क्रमशः



माय, बहिन, गाय, बैस ओगैरह ; मतरकि काँहीं-काँहीं -ई, -इन, -नी, -आइन, -एन आदि प्रत्ययों के गोगो से पुंलिंग से स्त्रीलिंग शब्द बनै छै ; जेना कि -- बाछा, बाघ, मोर, ओझा, जोल्हा आदि (पुं ) से क्रमशः बाछी, बाघिन, मोरनी, ओझाइन, जोल्हैन आदि (स्त्रीलिंग) ।

(११) सर्वनाम -- एकवचन/बहुवचनों के क्रम से अंगिका केरो सर्वनाम नीचे लिखलौ जाय रहलौ छै --

(क) पुरुषवाचक -- हम, हमे, हम्में/हमरासिनी (उत्तम पुरुष) ; तों, तोय/तोरासिनी (मध्यम पुरुष, समतार्थक/अवज्ञार्थक), आपनें/आपनेंसिनी (मध्यम पुरुष, आदरार्थक) ; ऊ/ओकरासिनी (अन्य पुरुष, समतार्थक/अवज्ञार्थक), हुनी/हुनकासिनी (अन्य पुरुष, आदरार्थक) ।

(ख) निश्चयवाचक -- ई/यैसिनी, एकरासिनी, ईसिनी ; है/हैसिनी, हेकरासिनी (निकटवर्ती) ; ऊ/वैसिनी, ओकरासिनी (दूरवर्ती) ; हौ/हौसिनी (बेसी दूरवर्ती) ; इनी, हिनी/इनकासिनी, हिनकासिनी (निकटवर्ती, आदरार्थक), उनी, हुनी/उनकासिनी, हुनकासिनी (दूरवर्ती, आदरार्थक) ।

(ग) अनिश्चयवाचक - कोय/कोय-कोय (व्यक्तिवाचक) ; कुछू, कुच्छू/कुछू-कुछू, कुच्छू-कुच्छू (वस्तुवाचक) ।

(घ) प्रश्नवाचक -- के ?/के-के ? (व्यक्तिवाचक) ; की ?/की-की ? (वस्तुवाचक) ।

(ङ) संबंधवाचक -- जे/जे-जे, से/से-से ; जौन/जौन-जौन, तौन/तौन-तौन ।

(च) निजवाचक -- आपने ।

(११.१) अंगिका केरो सर्वनामों में लिंग-भेद नै होय छै ; मतरकि समतार्थक या अवज्ञार्थक आरो आदरार्थक या सम्मानार्थक केरो भेद होय छै, जेना कि ऊपरों में देखैलौ गेलौ छै, आरो ओकरों चलते क्रियापदों में रूपान्तरो होय छै ; जेना कि -- तों (तोय) जाय छें (समतार्थक/अवज्ञार्थक), तोहें जाय छों/आपने जाय छियै (आदरार्थक) ; ऊ आबै छै (समतार्थक/अवज्ञार्थक), हुनी आबै छोंथ/आबै छथिन (आदरार्थक) इत्यादि ।

(११.२) उत्तम पुरुष, मध्यम पुरुष आरो अन्य पुरुष सर्वनामों के रूप

निश्चयार्थक रूपों में कमश हमरहै, तोरहै आरो ओकरहै तथा समावेशी रूपों में हमरहौ, तोरहौ ओरा ओकरहौ (जोर दै में) होय छै।

(११३) अंगिका में सर्वनामसनी रों रूप एकवचन कर्ता कारकों में 'हम, हमें, हम्मे' (उ. पु.), 'तों, तोय, तोहें' (म. पु.), 'ऊ, हुनी' (अ. पु.), 'ई, हिनी' (नि. वा.), 'कोय' (अनि. वा.), 'के ?, की ?' (प्र. वा.) आरो 'जे, से' तथा तिर्यक् कारक (कर्म, करण, संप्रदान आदि) में 'हमरा/हमरों', 'तोरा/तोरों', 'ओकरा/ओकरों', 'हुनेका/हुनकों', 'एकरा/एकरों', 'हिनका/हिनकों', 'केकरा', 'केकरो/केकरो', 'किनका/किनकों', 'जेकरा/जेकरो', 'तेकरा/तेकरो' आदि होय छै।

(१२) विशेषण -- अंगिका में विशेषणों के रूपों में प्रायः नीचें लिखलें शब्द प्रयोगों में आबै छै :--

क. गुणवाचक विशेषण -- अच्छा, खराप, बढ़ियाँ, घटिया, बड़ों, छोटों, लाल, कारों, लब्बों, पुरानों, हलुक, भारी, नम्मा, खाँटों, उजरो, हरियरों, बलगरों, बुधगरों, तेजाल, बुडबक, सोझों, टेढ़ों, कुबड़ों, चालाँक ओगैरह।

ख. परिमाणवाचक विशेषण -- एतना, कतना, जतना, ततना, ओतना, एत्तें, कत्तें, जत्तें, तत्तें, ओत्तें, थोड़ों, बेसी, ढेरी, कनीटा, तनीटा, जरीटा, तनटा, कम, बहुत, कुच्छू ओगैरह।

ग. संख्यावाचक विशेषण -- एक, दू, तीन, चार, पाँच, छों, सात, आठ, नों, दस, गारों, बारों, ..... बीस, तीस, चालीस, पचास, एकौन, साठ, सत्तर, अस्सी, नब्बे, सों, हजार, लाख, करोड़ ; ...पहिलों, दोसरों, तेसरों, चौथों, पाँचमों, .....एक्के, दुय्यो, तीनों ओगैरह।

घ. सार्वनामिक विशेषण -- ई, ऊ ऐन्हों, कैन्हों, जेन्हों, तेन्हों, वोन्हों, हमरों, तोरों, एकरों, केकरो, ओकरों, किनकों, जिनकों ओगैरह।

ङ. कृदन्त विशेषण -- आबी रहलें, लिखलें, पढ़लें, ऐलें ओगैरह।

(१२.१) लिंग-भेदों के चलतें अंगिका में काँहीं-काँहीं रूपान्तर होय छै ; जेना कि -- बड़का बाबू (पुं.), बड़की माय (स्त्री.), कारों कुकुर (पुं.), कारी कुतिया (स्त्री.) ओगैरह।

(१२.२) अंगिका विशेषणों के एकटा विशेषता ई छेकै कि निर्दिष्ट याने

निर्वाचक रूपों में विशेषण-पदों में प्रायः पुल्लिंग में '-का' आरो स्त्रीलिंग में '-की' प्रत्यय के रूपों में लागी जाय है, जेकरों कारणे पूर्ववर्ती दीर्घ स्वर प्रायः ह्रस्व होय जाय है अथवा हटी जाय है ; जेना कि -- पुल्लिंगों में लाल (सामान्य), ललका (निर्दिष्ट), बड़ों (सामान्य), बड़का (निर्दिष्ट) आरो स्त्रीलिंगों में लाल = ललकी, बड़ों = बड़की ओगैरह। निर्दिष्ट अथवा निर्वाचक रूपों में प्रयोगों में ऐलों विशेषणों से कोनो खास याने निश्चित विशेषणों के बोध होय है -- ललका नुंगवा, करकी गैया ओगैरह।

(१३) क्रिया -- अंगिका में क्रिया केरों साधारण रूप धातु में '-बों' प्रत्यय जोड़ला से बने है ; जेना कि -- धातु लिख्, पढ़्, उठ्, सुत् से क्रिया केरों साधारण रूप (तुमन्त) होय है क्रमशः लिखबों, पढ़बों, उठबों, बैठबों आरो सुतबों।

(१३.१) अंगिका केरों मूल क्रिया (भर्ब सब्स्टेण्टिभ) दुइ रकमों के है -- अस्तित्व (सत्ता) -सूचक 'है' आरो विकारसूचक 'छेकै' ; जेना कि -- 'एकरा में पानी है' (अस्तित्वसूचक) आरो 'ऊ पानी छेकै' (विकारसूचक)। हिंदी में ये दुहू के जग्यों पर 'पानी है' केरों प्रयोग होय है, जेकरा से अस्तित्वमूलक आरो विकारमूलक अर्थ स्पष्ट नै होय है। भूत कालों में 'है' आरो 'छेकै' दुहू केरों रूप 'छेलै' बनै है -- 'एकरा में पानी छेलै' आरो 'ऊ पानी छेलै'।

(१३.२) 'है' (भूत कालों में 'छेलै') केरों प्रयोग दुइ तरहों से होय है -- १. स्वतंत्र क्रिया के रूपों में -- 'ओकरा पैसा नै है' (भूत कालों में -- 'ओकरा पैसा नै छेलै') आरो २. सहायक क्रिया के रूपों में -- 'ऊ आबै है', 'ई बैठलों है' (भूत कालों में -- 'ऊ आबै छेलै', 'ई बैठलों छेलै') ओगैरह।

(१३.३) उत्तम, मध्यम आरो अन्य पुरुषों में 'है' केरों रूप छी, छियै ; छें, छों ; है, छोंथ (आदरार्थक) -आर होय है (भूत कालों में -- छेलाँ, छेलियै ; छलें/छलें, छेल्हों ; छलै/छेलै, छेलात/छेलाथ) ओगैरह।

(१३.४) अंगिका में अकर्मक-सकर्मक अथवा एकवचन-बहुवचनों के कारणे क्रियापदों में कोय खास रूपान्तर नै होय है, मतरकि लिंग-भेदों के कारणे काँहीं-काँहीं किंचित् रूपान्तर होय है ; जेना कि -- हममें ऐलियै/हमरासिनी

ऐलियै (अकर्मक, एव/बव) ; के देखलकै ?/के-के देखलकै ? (सकर्मक, एव/बव) ; मतरकि 'ऊ ऐलों छै' (पुं.), 'ऊ ऐली छै' (स्त्री.) इत्यादि।

(१३.५) धातु में '-आवै' प्रत्ययों के योगों से अंगिका में अकर्मकों से सकर्मक आरो सकर्मकों से द्विकर्मक तथा '-वावै' प्रत्ययों के योगों से अकर्मक या सकर्मकों से प्रेरणार्थक क्रिया बने छै ; जेना कि -- बैठे छै (अकर्मक), बैठावै छै (सकर्मक), बैठवावै छै (प्रेरणार्थक) आरो पढ़ै छै (सकर्मक), पढ़ावै छै (द्विकर्मक), पढ़वावै छै (प्रेरणार्थक) ओगैरह।

टिप्पणी -- क्रिया केरों साधारण रूपों (तुमन्तो) में '-आवै' आरो '-वावै' प्रत्यय क्रमशः '-ऐबों' आरो '-वैबों' के रूपों में रहै छै -- चलबों (अकर्मक), चलैबों (सकर्मक), चलवैबों (प्रेरणार्थक) आरो सुनबों (सकर्मक), सुनैबों (द्विकर्मक) सुनवैबों (प्रेरणार्थक)।

(१३.६) क्रिया केरों रूपावली -- अंगिका में क्रिया केरों अकर्मक आरो सकर्मक रूपावली सब्हे कालों में लगभग एक्के प्रक्रिया से बनै छै। इहाँ एक-एक ठो अकर्मक आरो सकर्मक क्रिया केरों रूपावली देलों जाय रहलें छै :--

(क) कर्ता उ.पु. (ए.व.)	अकर्मक क्रिया- 'ऐबों'	सकर्मक क्रिया- 'सुनबों'
(काल)	(रूपावली)	(रूपावली)
१. सामान्य वर्तमान	आबै छीं ; आबै छियै।	सुनै छीं ; सुनै छियै।
२. तात्कालिक वर्तमान	{ आबी रहलें छीं ; आबी रहलें छियै।	{ सुनी रहलें छीं, सुनी रहलें छियै।
३. संदिग्ध वर्तमान	ऐतें होबों ; ऐतें होबै।	सुनतें होबों, सुनतें होबै।
४. सामान्य भूत	ऐलां ; ऐलियै।	सुनलां, सुनलियै।
५. आसन्न भूत	ऐलों छीं ; ऐलों छियै।	सुनलें छीं ; सुनलें छियै।
६. पूर्ण भूत	ऐलों छेलां ; ऐलों छेलियै।	सुनलें छेलां ; सुनलें छेलियै।
७. अपूर्ण भूत	आबै छेलां ; आबै छेलियै।	सुनै छेलां ; सुनै छेलियै।
८. अपूर्ण तात्कालिक भूत	{ आबी रहलें छेलां ; आबी रहलें छेलियै।	{ सुनी रहलें छेलां, सुनी रहलें छेलियै।
९. संदिग्ध भूत	ऐलों होबों ; ऐलों होबै।	सुनलें होबों ; सुनलें होबै।
१०. हेतुहेतुमद्भूत	ऐतियां ; ऐतियै।	सुनतियां ; सुनतियै।

११. सामान्य भविष्यत् ऐबों ; ऐबै । सुनबों ; सुनबै ।

१२. संभाव्य भविष्यत् आबों । सुनो ।

टिप्पणी -- आबै छीं, आबी रहलौं छीं, ऐतें होबों, ऐलां, ऐलौं छीं ओगैरह रूपावली आत्मनेपदी नाखी आरो आबै छियै, आबी रहलौं छियै, ऐतें होबै, ऐलियै, ऐलौं छियै ओगैरह परस्मैपदी नाखी प्रयोगों में आबै छै । येंहें रड सकर्मक क्रियाओं के बारे में जानलौं जाय ।

(ख) कर्ता म.पु. (ए.व.): अकर्मक क्रिया- 'जैबों': कर्ता अ.पु. (ए.व.): अकर्मक क्रिया- 'सुतबों'

१. सामान्य वर्तमान जाय छें ; जाय छों । सुतै छै ; सुतै छोंथ (छथिन्) ।

२. तात्कालिक वर्तमान जाय रहलौं छें ; सुती रहलौं छै ;  
काल { जाय रहलौं छों । सुती रहलौं छोंत (छथिन्) ।

३. संदिग्ध वर्तमान जैतें होबे ; जैतें होभें । सुततें होतै ; सुततें होतात (होथिन्) ।

४. सामान्य भूत गेले ; गेल्लें / गेल्लौ । सुतलै ; सुतलात / सुतलाथ ।

५. आसन्न भूत ऐलौं छें ; ऐलौं छों । सुतलौं छै ; सुतलौं छोंत (छथिन्) ।

६. पूर्ण भूत ऐलौं छेल्लें ; ऐलौं छैल्लों । सुतलौं छेलै ; सुतलौं छेलात (छलथिन्) ।

७. अपूर्ण भूत जाय छेल्लें ; जाय छेल्लों । सुतै छेलै ; सुतै छेलात (छलथिन्) ।

८. अपूर्ण तात्कालिक जाय रहलौं छेल्लें ; सुती रहलौं छेलै,  
भूत { जाय रहलौं छेल्लों । सुती रहलौं छेलात (छलथिन्) ।

९. संदिग्ध भूत गेलों होबे (होभें) ; सुतलौं होतै ; सुतलौं होतात (थ) ।  
{ गेलों होभें (होभो) ।

१०. हेतुहेतुमद्भूत जैतियहें ; जैतियहौ । सुततियै ; सुततियात (थ) ।

११. सामान्य भविष्यत् जैबे ; जैभें । सुततै ; सुततात (थ) ।

१२. संभाव्य भविष्यत् जो ; जा । जाय ; जात (थ) ।

टिप्पणी -- (१) यैसिनी रूपावली में जाय छें, जाय रहलौं छें, जैतें होबे, गेले, गेलो छें (म.पु.) आरो सुतै छै, सुती रहलौं छै, सुततें होतै, सुतलै, सुतलौं छै (अ.पु.) ओगैरह समतार्थक/अवज्ञार्थक तथा जाय छों, जाय रहलौं छों, जैतें होभें, गेल्लें, गेलों छों (म.पु.) आरो सुतै छोंत (थ), सुती रहलौं छोंत (थ), सुततें होतात, सुतलात (थ), सुतलौं छोंत (थ)/छथिन् (अ.पु.) ओगैरह आदरार्थक (रूपावली) छेकै ।

टिप्पणी -- (२) अकर्मके नाखी लगभग सकर्मको केरौं रूपावली होय छै । वही सें इहाँ ओकरो विस्तारों में जाय केरौं जरूरत नै समझलौं जाय छै ।

(१३.७) अंगिका केरों एकटा महत्वपूर्ण विशेषता ई छेकै कि समापक क्रियापदों केँ सर्वनामीकरण होय जा छै ; तात्पर्य ई कि (क) कर्ता आरो कर्म केँ रूपों में आरो (ख) संबोधी आरो संबन्धी केँ रूपों में क्रियापदों में सर्वनाम मिललें रहै छै ; जेना कि -- (क) देखलियो = हम्में (कर्ता) तोरा (कर्म) देखलियो आरो (ख) ऐल्हौं = ऊ, जे कि तोरों/आपने केँ कोय छेक्हौं, ऐल्हौं । संक्षेपों में ये रकमों केँ रूपावली नीचे देलें जाय रहलें छै :--

(क) कर्ता-कर्म केँ रूपों में --

१. कर्ता उ. पु., कर्म म. पु. (समतार्थक/अवज्ञार्थक) -- देखैछियो, देखी रहलें छियो, देखतें होबो ; देखलियो, देखलें छियो, देखलें छेलियो, देखै छेलियो, देखी रहलें छेलियो, देखलें होबौ, देखतियो ; देखबौ ओगैरह ।

२. कर्ता उ. पु., कर्म म.पु. (आदरार्थक) -- देखैछिय्हौं, देखी रहलें छिय्हौं, देखतें होभों ; देखलिय्हौं, देखलें छिय्हौं, देखलें छेलिय्हौं, देखी रहलें छेलिय्हौं, देखलें होभौं, देखतिय्हौं ; देखभौं ओगैरह ।

३. कर्ता उ. पु., कर्म अ.पु. (समतार्थक/अवज्ञार्थक) -- देखै छियै, देखी रहलें छियै, देखतें होबै ; देखलियै, देखलें छियै, देखलें छेलियै, देखै छलियै, देखी रहलें छेलियै, देखलें होबै, देखतियै ; देखबै ओगैरह ।

४. कर्ता उ. पु., कर्म अ. पु. (आदरार्थक) -- देखै छियैन्ह, देखी रहलें छियैन्ह, देखतें होभैन्ह ; देखलियैन्ह, देखलें छियैन्ह, देखलें छेलियैन्ह, देखै छेलियैन्ह, देखी रहलें छेलियैन्ह, देखलें होभैन्ह, देखतियैन्ह ; देखभैन्ह ओगैरह ।

टिप्पणी -- 'छियैन्ह', 'लियैन्ह' -आर केरों 'न्ह' केँ जगघों पर 'न्' -ओ चलै छै ।

(ख) संबोधी आरो संबन्धी केँ रूपों में --

१. संबोधी म.पु. (समतार्थक/अवज्ञार्थक)/संबन्धी अ.पु. (समतार्थक/अवज्ञार्थक या आदरार्थक) -- आबै छो, आबी रहलें छो, ऐतें होतौ ; ऐलो, ऐलों छो, ऐलों छेलौ, आबै छेलौ, आबी रहलें छेलौ, ऐलों होतौ, ऐतियौ ; ऐतौ ओगैरह ।

२. संबोधी म.पु. (आदरार्थक)/संबन्धी अ. पु. (समतार्थक/अवज्ञार्थक या आदरार्थक) -- आबै छौं, आबी रहलें छौं, ऐतें होत्हौं ; ऐल्हौं, ऐलों छौं, ऐलों छेल्हौं, आबै छेल्हौं, आबी रहलें छेल्हौं, ऐलों होत्हौं, ऐतिय्हौं ; ऐत्हौं ओगैरह ।

३. संबोधी आरो संबन्धी अ.पु. (समतार्थक/अवज्ञार्थक) -- आबै छै, आबी रहलें छै, ऐतें होतै ; ऐलै, ऐलों छै, ऐलों छेलै, आबै छेलै, आबी रहलें छेलै, ऐलों

होते, ऐतियै : ऐतै ओगैरह ।

४. संबोधी अ. पु. (आदरार्थक)/संबंधी अ. पु. (समतार्थक/अवज्ञार्थक या आदरार्थक) -- आबै छैन्ह, आबी रहलौं छैन्ह, ऐतें होतैन्ह ; ऐलैन्ह, ऐलौं छैन्ह, ऐलौं छेलैन्ह, आबै छेलैन्ह, आबी रहलौं छेलैन्ह, ऐलौं होतैन्ह, ऐतियैन्ह, ऐतैन्ह ओगैरह ।

(१३.८) ऐन्हों सर्वनामीकरणों से एक्के क्रियापदों में एकटा सौंसे वाक्य समैलौं रहै छै ; मतरकि कर्ता, कर्म आरो संबंधी केरों कोन-कोन अंश क्रियापदों में मिललौं रहै छै वैसिनी केँ बिलगैबों सहज नै होय छै, मतलब कि क्रियापदों में सार्वनामिक अंश नीर-क्षीर नाखी समैलौं रहै छै, तिल-तंडुल नाखी नै । स्पष्ट छै कि क्रियापदों केँ सर्वनामीकरण अंगिका केरों एकटा विशेषता छेकै, जे कि हिंदी में नै होय छै ।

(१३.९) विधि क्रिया -- ऐबों' क्रिया केरों प्रत्यक्ष विधि अंगिका में (क) समतार्थक/अवज्ञार्थक 'आव' आरो 'आवे/आबें' तथा (ख) आदरार्थक 'आबों' आरो 'आबियै' होय छै । वेहें रड समतार्थक/अवज्ञार्थक परोक्ष विधि 'आबियहैं' तथा आदरार्थक 'आबियहौ' आरो ऐलौं जाय' होय छै ।

(१३.१०) पूर्वकालिक क्रिया -- धातु में '-ई केँ' केरों योग करला से अंगिका में पूर्वकालिक क्रिया बनै छै ; जेना कि -- आबी केँ, बैठी केँ, देखी केँ, सुनी केँ इत्यादि ।

(१३.११) संयुक्त क्रिया -- एको से बेसी याने दू-तीन क्रिया एक्के साथे प्रयोगों में ऐला पर संयुक्त क्रियापद बनै छै ; जेना कि -- आबी रहलौं छै, आबी जैतै, गिरी पड़लै, देखी लेलकै, जाय लागलै, ऐलौं करै छै, लिखे पड़तहौं इत्यादि ।

(१३.१२) क्रियार्थक संज्ञा -- जबे कोय क्रिया संज्ञा नाखी प्रयोगों में आबै छै तबे ओकरा क्रियार्थक संज्ञा कहलौं जाय छै ; जेना कि -- गुलाब फूल देखै में बड़ी अच्छा लागै छै, सुतला पर आराम मिलै छै, हौ रड करबों उचित नै छेकै इत्यादि । हैसिनी वाक्यों में 'देखै', 'सुतला' आरो 'करबों' क्रियार्थ संज्ञा छेकै ।

(१३.१३) कृदन्त विशेषण -- वर्तमानकालिक आरो भूतकालिक क्रियापद काहीं-काहीं विशेषण नाखी प्रयोगों में आबे छै ; जेना कि -- सड़कों पर खेली रहलौ बच्चा, ओकरों पढ़लौ किताब, गाछों सें गिरलौ आम इत्यादि। इहाँ 'खेली रहलो', 'पढ़लौ' आरो 'गिरलौ' क्रियापद क्रमशः 'बच्चा', 'किताब' आरो 'आम' केरों कृदन्त विशेषण छेकै।

(१४) क्रिया-विशेषण -- अंगिका में प्रायः नीचें लिखलौ क्रिया-विशेषण (क्रिया केरों विशेषतासूचक शब्द) प्रयोगों में आबै छै :--

१. कालवाचक -- आय, काल, परसू, तरसू, नरसू, ऐसकाँ, पोरकाँ, आबें, तबें, जबें, अखनी/एखनी, कखनी, जखनी, तखनी, कहिया, जहिया, तहिया, बिहाने, साँझें, रातीं, दिनें, कखनूँ, कहियो इत्यादि।

टिप्पणी -- एखनी, कखनी, जखनी, तखनी सें 'समय' केरों, मतरकि कहिया, जहिया, तहिया, कहियो, सें 'दिन' केरों बोध होय छै।

२. स्थानवाचक -- इहाँ/यहाँ, उहाँ/वहाँ, जहाँ, तहाँ, कहाँ, कन्ने, जन्ने, तन्ने, हिन्ने, हुन्ने, उपरें, नीचें, कन, लग/लुग, ठियाँ, तरें, हेँठें, ताँय इत्यादि।

३. परिमाणवाचक -- एत्तें, कत्तें, जत्तें, तत्तें, ओत्तें, एतना/एतने, कतना, जतना, ततना, ओतना/ओतने, खूब, बेसी, थोड़ों-टा, जरी-टा, तनी-टा, ढेरी, बहुत इत्यादि।

४. रीतिवाचक -- कलें-कलें, धीरें-धीरें, धीरें-सुस्तें, हबर-हबर, धथर-पथर, मार-मार, ठीकों सें, कोनो रड, ऐन्हें, ऐन्हों, कैन्हें, जेन्हें, तेन्हें, केना कें, काहे, कथी लें, की रड, रसें-रसें, ओरियाय कें, इत्यादि।

(१५) संबंधसूचक शब्द (अनुसर्ग/परसर्ग) -- नें, कें, सें, लें, लेल, लेली, कें, केरों, रों, -कों, में, पर, ऊपर, हेँठें, नीचें, माझें, धारें आदि अंगिका केरों संबंधसूचक शब्द (अनुसर्ग या परसर्ग) छेकै।

(१६) समुच्चयबोधक शब्द -- कयेक-टा शब्दों या वाक्यों कें जोड़ैवाला शब्दों कें समुच्चयबोधक शब्द कहलौ जाय छै। अंगिका में नीचें लिखलौ समुच्चयबोधक शब्द प्रयोगों में आबै छै -- आर, आरो, तथा, मतुर, मतरकि, मजकि, बलुक, जों, जदियो, तैय्यो, लेकिन, आकि, या, अथवा, कि, जे, जे कि, इत्यादि।



(१७) विस्मयादिबोधक शब्द -- जॉनसिनी शब्दों से अतरज, खुशी, अफसोच ओगैरह केरों बोध होय छै वैसिनी शब्दों के विस्मयादिबोधक शब्द कहलौं जाय छै ; जेना कि -- एह !, अरे !, इस्स !, उह !, ओह !, हाय !, हाय-हाय !, हे हो !, हे रे !, हे हे !, हे गे !, बाह !, अच्छा ! इत्यादि।

(१८) निपात -- तें, नी आदि अंगिका केरों निपात छेकै ; ऊ तें बैठलें छै, ऊ उहाँ जाय तबें नी, इत्यादि। हिंदी केरों 'ही' बास्ते अंगिका में शब्दों के आखेरिसों में '-ए' अथवा '-है' आरो 'भी' बास्ते '-ओ' अथवा '-हौ' निपात प्रत्ययों के रूपों में आबै छै। उदाहरण -- 'ई' से 'एकरे', 'एकरहै' ; 'राम' से 'रामे', 'रामहै' (के) आरो 'ऊ' से 'ओकरो', 'ओकरहौ' ; 'राम' से 'रामो', 'रामहौ' (के) इत्यादि। 'हम' से 'हम्हीं(ही) आरो 'हम्हूँ' (भी) तथा 'तों/तोंय' से 'तोहीं'(ही) आरो 'तोहूँ' (भी) रूप बनै छै।

### शब्द-भंडार

(१९) अंगिका में संस्कृत, प्राकृत, अपभ्रंश, हिंदी -आर स्वदेशी आरो अरबी, फारसी, अँग्रेजी, तुर्की -आर विदेशी भाषासिनी से ऐलों, मतुर आपनों ध्वनि-प्रक्रिया के अनुरूप बदललौं शब्द प्रयोगों में आबै छै। साथे-साथ आपनों ठेठ शब्दो यै भाषा में काफी छै। दिन, देह, देवता, शब्द, क्रिया, केश इत्यादि संस्कृत केरों (तत्सम) शब्द, रात, दाँत, हाथ, आगिन, सुरुज, चाँद (चान) इत्यादि संस्कृत केरों रात्रि, दन्त, हस्त, अग्नि, सूर्य आरो चन्द्र से बनलौं (तद्भव) शब्द, अकिल, अरज, करजा, लहास, जरिबाना इत्यादि अरबी-फारसी केरों अक्ल, अर्ज, कर्ज, लाश आरो जुर्मानः से बनलौं आरो लुटिस, लोट, पुलिस, पाकिट इत्यादि अँग्रेजी केरों नोटिस, नोट, पोलिस आरो पॉकेट से बनलौं शब्द छेकै, जे कि अंगिका में प्रयोगों में आबै छै ; मतरकि लेरू, पठरू, बुतरू, ढेंकी, गोड, घेंचों, ढढ़नचों, हरकुच्चा, सुरफुरैबों, ओरियैबों इत्यादि अंगिका केरों आपनों अथवा यै देशों के आरो-आरो भाषासिनी से ऐलों (दिशज) शब्द छेकै। संक्षेपों में, सर्वनाम, क्रियारूप, अनुसर्ग ओगैरह अंगिका केरों आपनों ढंगों के छै, जॉनसिनी से यै भाषा केरों आपनों पहचान बनै छै।

# अंगिका साहित्य केरों इतिहास

(खंड - १ : पद्य)

डॉ० तेजनारायण कुशवाहा

कुलसचिव, विक्रमशिला हिंदी विद्यापीठ  
गाँधीनगर, ईशीपुर (भागलपुर, बिहार) - ८१३२०६.

# जीवनवृत्त



- नाम** तेजनारायण कुशवाहा ।
- जन्म** २४ अप्रिल, १९३३ ई० ; सिंघाड़ी (गोड्डा ; ननिहाल में) ; आपनों गाँव- भंगावान (भागलपुर, बिहार) ।
- माता/पिता** दासमती देवी (स्व०)/ब्रजनन्दन सिंह ; धर्मपत्नी - वदमावती कुशवाहा (श्रीमती) ।
- शिक्षा** एम० ए० (संस्कृत/हिंदी), पी-एच० डी०, डिप-इन-एड; साहित्यालंकार, आयुर्वेदाचार्य ।
- मानद उपाधि** हिंदीरत्न, साहित्य-वाचस्पति (त्रय), विद्यावाचस्पति, काव्य-शास्त्री, भारतीय भाषा-भूषण इत्यादि ।
- भाषा-ज्ञान** हिंदी, संस्कृत, अंग्रेजी, बँगला, मराठी, गुजराती, नेपाली (न्यूनाधिक), भोजपुरी, अंगिका इत्यादि ।
- लेखन/प्रसारण** हिंदी, अंगिका आरों भोजपुरी में करीब दू दर्जन किताब आरों कर्त्तनी लेख, वार्ता, कविता-आर पत्र-पत्रिकासिनी में प्रकाशित आरों आकाशवाणी/दूरदर्शन के भागलपुर आरों पटना केन्द्रों से प्रसारित ।
- ग्रंथ-प्रकाशन** (क) अंगिका में - सवर्णा, अंग-दर्शन, अंगिका के महायात्रा-गीत, महर्षि मेंहीं से मिलों ; (ख) भोजपुरी में - गीत चिरई के ; (ग) हिंदी में - श्री भद्रेश्वर माहात्म्य, प्राच्य-दर्शन, ओमा आदि ।
- सम्मान/पुरस्कार** कर्ण-पुरस्कार, भवप्रीता-पुरस्कार, बलिनारायण-पुरस्कार, अनूप-पुरस्कार, ग्रियर्सन-पुरस्कार, डॉ० अम्बेदकर राष्ट्रीय सेवा-पुरस्कार आदि - क्रमशः समय साहित्य सम्मेलन (पुनसिया), अ० भा० अंगिका साहित्य-कला-मंच (भागलपुर), भाषा-संगम (दुमका), साहित्य-कुंज (फलका, कटिहार), बिहार-सरकार (पटना) आदि से ।
- संपादन** 'हिम शिखर', 'जन-स्वास्थ्य', 'अंग-धारा', 'वाङ्मयी' आदि ।
- संस्थासिनी से संबद्धता** कुलसचिव, विक्रमशिला हिंदी विद्यापीठ (गान्धीनगर, ईशीपुर, भागलपुर) ; अध्यक्ष, अ० भा० अंगिका साहित्य कला-मंच (भागलपुर); संस्थापक महासचिव, अ० भा० अंगिका भाषा सम्मेलन ओगैरह करीब दू दर्जन संस्थासिनी से ।
- संपर्क** कुलसचिव, विक्रमशिला हिंदी विद्यापीठ, गान्धीनगर, ईशीपुर (भागलपुर, बिहार) - ८१३२०६.

# (१) अंगिका साहित्यों के प्रारंभिक युग

(५००-१२२० ई.)

१. अंगिका साहित्यों के इतिहास कबे से शुरू भेलै, ई सुनिश्चित करबो आसान तें नै छै, तबे अंगिका भाषा केरो पूर्व-रूप (तखनको 'आंगी') संहिताकालीन ग्रंथ आरनी में मिलै छै। अंग-जनपदों के दीर्घतमस्, कक्षीवत, घोषा आरनी कवि-कवयित्रीसिनी के कविता ऋग्वेदादि ग्रंथों में संपादित छै। यै लेली हुनका आरनी के कविता में स्थानीय भाषा 'आंगी' के शब्दों के रहबो स्वाभाविक छै। फनू, महर्षि ऋष्यशृंग, अष्टावक्र, कहोल प्रभृति ऋषि के दार्शनिक भाषा में आरो पालकव्य मुनि के हस्त्यायुर्वेदों में 'आंगी' (अंगिका) केरो प्रारंभिक प्रवृत्ति के दर्शन होय छै। ओकरो हौ रूपों के श्री परशुराम ठाकुर ब्रह्मवादी ने 'अंगिका के उद्भव आरो विकास' में उजागर करने छोट। संस्कृत साहित्यों के एक दोसरो विद्वान् डॉ० श्रीधर मिश्र 'विनोद'-हो वेदों में अंगिका के देखैने छैन।

जैन आरो बौद्ध साहित्यों के बहुत बड़ो अंश अंगिका केरो पूर्व-रूप 'आंगी' अपभ्रंश में लिखलो गेलो छै। विशाल ग्रंथ 'मज्झिम निकाय' के पोतलिय सुतंत, लकुटिकोपम सुतंत आरो सेलि सुतंत आंगी अपभ्रंश के ग्रंथ छेके। 'अंगुत्तर निकाय' के कयेक भागों के संपादन अंग-क्षेत्रे के चम्पा, भद्रिय, अस्सपुर आरो आपण में भेलो रहै। काव्य के दृष्टि से तें नै, भाषा के दृष्टि से तथा दार्शनिक भाव आरो विचारों के दृष्टि से यैसिनी ग्रंथ आगस्त केरो पंथों के साफ-सुथरा बनावै छै।

आगू के परंपरा में जिनदत्त चरिउ, सुदंशन चरिउ, काकंड चरिउ आदि में आंगी अपभ्रंश काव्य-कृतियों के काव्यात्मकता असंदिग्ध छै। सुदंशन चरिउ (१.३.४-८) में अंगदेशों के सुषमा के वर्णन में आंगिक संस्कृति झलक मारै छै --

“अंखड भूमि रयणयं णिहाणु रयणयरोव्व सोहाय भाणु,  
एत्थत्थि खणउ अंगेदेसु महिमहि लइणकिउ दिव्व वेसु ;  
जहिं सरवरि उग्गय एक या इणं अधिरणि वयणि गयणुल्लाई,  
जहिं हालणि एवणिवद्धे णह सल्लहिं जकखन दिव्व देह ;  
जहिं बाल हिरक्खिय सालिखेत मोहेविनु जीयएं हरिण खंत खत ।”

## २. सहजयानी कविता : सिद्ध-साहित्य

महायाने बोधिसत्व केरो अर्थ बोधि चित्त के पावैवाला जीव आरो शून्य केरो अर्थ निरात्मा करने छै। निरात्मा (एक) देवी मानली गेली छै। बोधिसत्व निरात्मा देवी के आलिंगन करी के अनन्त सुख - महासुख -- पावै छै।

वही महासुखवादों के फॉल वज्रयान कहलैलै, जै में कोय तरहों के भोजन-पान अभक्ष्य नै रहलै ; मांस, मदिरा, मत्स्य, मैथुन आरो मुद्रा (पंचमकारों) के निषेधो नै ।

वज्रयान-पंथों में कुच्छू ऐहनों संत होलै जिनका आपनों-आपनों साधना में सफलता मिललैन् । वैसिनी सफल वज्रयानी साधक 'सिद्ध' कहलैलै । मंत्रयान आरो वज्रयान से आपनों संबंध-विच्छेद करी के कयेक सिद्ध महायान दिस बढ़लै । सिद्ध आरनी ने साधना केरों हौ सचकरुओं सरूपों के 'सहज' कहलकै, जेकरा से 'सहजयान' पंथ चललै । सहजयानों में जीवनों के परिष्कार पर विशेष बोल देलें गेलै । सिद्धसिनी के नामों के पीछू में जुड़लें 'पाद' शब्द हुनकासिनी के सम्मान के सूचक छेकै आरो ओकरहै विकसित रूप भेलें छै -- 'पा' (सरहपा, शबरपा आरनी में) ।

सिद्ध कविसिनी कोनो एक स्थानों के नै रहै । हुनकासिनी के काँहीं कोनो स्थायी निवास या आश्रमों नै छेलै ; बलुक हुनकासिनी के साधना-स्थली मुख्य रूपों से आन्ध्र प्रदेश-स्थित श्रीपर्वत तथा अंग-क्षेत्र-स्थित विक्रमशिला, मगध क्षेत्र-स्थित नालन्दा आरो बंगाल-स्थित पहाड़पुर (राजशाही) महाविहार छेलै । कुल सिद्ध ८४ ठो छेलात । ईस्वी सन् केरों आठमी शती के उत्तरार्ध से बारहमी शती के मध्य-काल ताँय हुनकासिनी के समय छेलै । वैसिनी में अनेक सिद्ध अच्छा कवियो छेलात । वैसिनी में सरहपा, मेकोपा, धर्मपा, वेलुकपा, जयानन्तपा, पुत्तलिपा, चम्पकपा, लुचिकपा -आर १३ क्षेत्रीय सिद्ध कविसिनी के सीधा संबंध विक्रमशिला से जुड़लें छेलै, मतुर आरोसिनी सिद्ध-कवियो विक्रमशिला महाविहारों से संबद्ध छेलात । हुनकासिनी विक्रमशिला में रही के सहजयानी कविता करने छेलात । वैसिनी में सरहपा, शबरपा, लुइपा, दारिकपा, कणहपा, धर्मपा, नारोपा, शान्तिपा, ढेण्डणपा आरनी विशेष रूपों से उल्लेख्य छेंत ।

“सहजे सहजहु बूझै जब्बे, अंतराल गति टूटै तब्बे ।

जब्बे मणु अंथु मणु जाइ, तनु टुट्टइ बन्धन ;

तब्बै समरसहि मज्जे ना सुद ना ब्राह्मण ।”

ई कविता छेकै सरहपा के । हुनी आदि- सिद्ध कवि छेलात ।

### सरहपा

सिद्ध सरहपा केरों जन्म-स्थान आरो जन्म-काल केरों बात विवादों से भरलें छै । डॉ० विनय घोष भट्टाचार्य हुनको जन्म-काल सं. ६९० वि. मानलें छै,

मतुर महापंडित राहुल सांकृत्यायने ७६० ई. मानले है। सरहपा केरो इतिहास बंगाल के पालवंशी राजा धर्मपाल से कुच्छू जुड़लौ होलौ है। धर्मपाल केरो शासन-काल ७६९-८०९ ई. छेलै। लुइपा हुनको राज्य-सचिव रहै, जे कि पीछे सरहपा के शिष्य शबरपा के शिष्य बनलै। लुइपा ८०० ई. में सिद्ध कविसिनी में सबै से ऊँचो स्थान पाबी चुकलौ छेलै। ये से लागै है कि ८०० ई. के पहिन्हे सरहपा ने संसार छोड़ी चुकलौ रहै। ये तरहें हुनको समय आठमी शती के पूर्वार्ध मानलौ जाय पारै है। मगही अकादमी, गया (बिहार) आरो विक्रमशिला हिंदी विद्यापीठ, ईशीपुर (भागलपुर) ने सरहपा के जन्म-तिथि १० जुलाई, ७३३ ई. निश्चित करने है।

सरहपा केरो जन्म 'भंगल' (अखनीको भागलपुर) -क्षेत्रों के एक गाँव 'राजी' बतैलौ गेलौ है। लागै है, 'राजी' (गाँव) विक्रमशिला महाविहार से लगभग सटले 'रानी' दीरा (गाँव) छेलै, जे कि गंगा नदी के कटाव से हिन्ने-हुन्ने होतें रहै है। कुछ विद्वाने 'राजी' केरो अवस्थिति 'भंगल' (भागलपुर), 'वारेन्द्र' (आधुनिक नाम 'राजशाही') आरो 'पुण्ड्रवर्द्धन' (उत्तरी बंगाल) के सीमा पर मानै छौत; मतुर, सच कहलौ जाय तें, आभी 'राजी' केरो पहचान ठीक-ठीक नै होलौ है। डॉ० डोमन साहु 'समीर' केरो अनुमान है कि 'बरारी' पहिलको 'राजी'-ये हुए पारै है।

सरहपा केरो पहिलको नाम 'राहुल' रहै। हुनको शिक्षा-दीक्षा विक्रमशिला आरो नालन्दा में होलौ रहै। हरिभद्र हुनको एक शिक्षक छेलात। हुनी विक्रमशिला के शान्तरक्षित केरो चेला छेलात। शान्तरक्षित ने जबें तिब्बत केरो यात्रा करने रहै तबें हरिभद्रे दर्शन-विभागों के अध्यक्ष बनलौ रहौत। कहलौ जाय है कि हुनीये 'राहुल' के आगू 'भद्र' शब्द जोड़लें छेलै। जबें राहुलभद्र तंतर-मंतर से प्रभावित भेलै तबें राहुलभद्र 'सरोजभद्र' के नामों से जानलौ गेलै। हुनी नालन्दा महाविहार छोड़ी के शबर आरनी के बस्ती में रहें लागलात। वही हुनी एक 'शर' (वाण, काँड़) बनावैवाला के बेटी पर मोहाय गेलात आरो ओकरे संगे 'शर' बनावें लागलात। हुनी शबर के गीत गावै : शबर के बेटी वै में सुर दै। हौ शबर-कन्या के संगे सरोजभद्र केरो बढ़लौ प्रेम आरो ओकरो परिणति बीहा में देखी के लोगे ओकरो पक्ष आरो विपक्षों में चर्चा करे लागलै। केकरहौ नीको लागै, केकरहौ नै।

सरोजभद्रे बौद्ध धर्मो में घुसलौ ढकोसला के खिल्ली उड़ावें लागलै; लोगे के सहज मार्ग सुआवें लागलें। विरोधीसिनी हुनका 'सरहा' (सर = वाण, हा =

बनावैवाला) आरो अनुयायीसिनी 'सरहपाद' कहें लागलै। 'पाद' सम्मानसूचक शब्द छेकै। 'सरहपा' वेहें 'सरहपाद' केरों संक्षिप्त रूप छेकै।

सिद्ध सरहपा केरों कविता पुरानों 'आंगी' (आयकों अंगिका) में फुटलौ छै। यै देशों के कयेक ठो आधुनिक भाषासिनी हुनका आपनों कवि मानै छै। बंगलां कहै छै कि सरहपा हमरों आदि-कवि छेकै। वेहें रङ असमियाँ, उड़ियाँ, मैथिलीं आरो भोजपुरीं हुनका आपनों आदि-कवि मानै छै। हिन्ने मगहीं आरो अंगिकां आपनों दावा हुनका पर पेश करै छै। सच पूछलौं जाय तें हुनका पर अंगिका आरो मगही केरों दावा ज्यादा सही छै। सरहपा भागलपुरों में या भागलपुरहै के कोनो गाँवों में भेलों छेलात। हुनकों समय विक्रमशिला आरो नालन्दा महाविहारों में बितलौं छेलैन्। यै लेली हुनकों रचना में अंग आरो मगध के तखनीकों बोली के पुट छै। खाली सरहपाये नै, आरोसिनी सिद्ध-कविने जौन कविता करने छै वैसिनी में अंग आरो मगध के भाषा केरों स्पष्ट छाप छै। निश्चित छै कि सिद्ध-कविसिनी के भाषा पर पूरब के जौन भाषासिनी आपनों प्रभाव डाललें छै वैसिनी भाषा में अंगिका आरो मगही पहिलों स्थानों पर छै। ओकरहौ में अंगिका पहिने आबै छै। यै विचारों से अंगिका रों आदि-युग सिद्ध-साहित्यों से शुरू होय छै आरो ओकरों आदि-कवि केरों विशेषण सरहपा के संग लागै छै।

महापंडित राहुल सांकृत्यायन ने सरहपा के लिखलौं सात-टा संस्कृत ग्रंथों के उल्लेख कैने छै। भोटिया देश (तिब्बत) केरों 'तन्जुर' में सरहपा रों रचनासिनी के रूपान्तर मिलै छै। मूल रूपों में हौ-सब पुरानों आंगी में वज्रयान पर लिखलौं गेलों छै। वै-सब में एक-टा 'दोहाकोश' -गीति आपनों मूल रूपों में मिलै छै। हुनकों आरो -सब रचना छेकै -- कायाकोश, अमृतवज्रगीति, डाकिनी गुह्य वज्रगीति, दोहाकोश, उपदेशगीति, महामुद्रोपदेश दोहाकोश, वसंततिलका दोहाकोशगीति, तत्वोपदेश शिखर दोहा गीतिका, चर्यागीति दोहाकोश, सरहपाद गीतिका, भावनाफल दृष्टिचर्या दोहाकोश आदि।

सरहपा ने परममहासुख पावै लेली जौन मार्ग देखैले छै ऊ परममहासुख मोक्ष छेकै। एनाके तें हमरा-आर जानै छियै कि एकरा में गुरु के स्थान पहिलों होय छै। वही संत-महात्मा आरो भक्त लोगों के दुआर खोलै छै। सरहपाओं गुरु के महिमा बतैने छै। गुरु के परमेश्वर मानलौं गेलों छै। हुनीये साधकों के समुन्दर से पार उतारै छै ; जहाँ परम महासुख छै। साधक लेली खटिया उँसाय (पारी) के राखै छै --

“णदह विन्दुह अन्तरे जो जाणइ तिय भेऊ।

सो परमेश्वर परम गुरु उत्तारई तइ लोऊ।।”

गुरु केरों वचनों पर भक्तों के बड़ा विश्वास रहै छै; जीवन सहजे हलसित होय छै --

“गुरु वयणे दिह भक्ति करु, होइअहि सहज उलास।

गुरु वयण संसिद्ध जब्बे, इन्दिजाल सब तुट्टइ तब्बे।।”

सरहपा सहज पंथ के संस्थापक छेकै। ऊ सहज पंथ सहज जीवन आरो सहज समाधि के दू रूपों में बँटलें होलें छै। सहज जीवन बाल-जीवन छेकै, प्रकृति-जीवन छेकै। सहज समाधि देहों के भीतरी आरो बाहरी शक्ति के साधना छेकै। सरहें पहिली के सुरुज आरो दोसरी के चान केरों साधना के रूपों में वर्णन करने छै --

“चन्द सुज्ज घलि घालइ घोट्टइ, सो आणुत्तर रत्थु पइट्टइ।

अध-उद्ध मागवरें पइसरेइ, चन्द-सुज्ज वेइ पडि हरेइ।।”

सरहपा के परवर्ती संतसिनी ओकरे इड़ा आरो पिंगला के साधना कहने छै। आयकों भाषा में ओकरा ‘धनात्मक शक्ति’ (पॉज़िटिव पावर) आरो ‘ऋणात्मक शक्ति’ (नेगेटिव पावर) कहलें जाय छै। पहिलकी साधना में अंतराल के गतिभंग होय छै। मौन ‘अन्धमणु’ (स्थाणु/उन्मन) स्थिति में पहुँची जाय छै।

सहजावस्था के अगलका सोपान छेकै समरसता के। समरस स्थिति केरों वर्णन सरहें हें रड करै छै --

“सहजे सहजउ बूझै जब्बें, अंतराल गति टूटै तब्बें।

जब्बें मणु अन्धमणु जाइ, तनु टुट्टइ बन्धन।

तब्बें समरसहि मज्जे ना सुद्ध ना ब्राह्मण।।”

ई समरसता के स्थिति हिंदी के महाकवि जयशंकर प्रसाद के ‘कामायनी’ में रूपक के भाषा में अभिव्यक्त होलें छै।

सरहपा के नजरी में परम महासुख के स्थिति में जबें साधक-मौन निरन्तर सहज के पाय लै छै तबें सांसारिक विषयों लें ओकरों ललक जैतें रहै छै, साधक संसारों के आवागमनों से मुक्त होय जाय छै --

“जइ मण सहज निरन्तरे पावइ, इन्दी विसअहि खनवि न धावइ।

जइ पुणु अहणिसि सहज पइट्टइ, अमण-गमण ने तेहिणे वाट्टइ।।”

सरहपा के विचारों में ‘सुण्ण निरंजन परमपउ’ -- परमपद/मोझ --



शून्य आरो निरंजन छेकै। ऊ समरस छै। जीवात्माओ समरस स्थिति के पाबी लै छै।

है संसारों से अलगे एक दोसरो संसार छै, जहाँ शून्य निरंजन-स्वरूप ख-सम बसै छै। सरहें आपनों निरंजनों के शून्य कहै छै ; अप्पा के शून्य कहै छै ; संसारों के शून्य कहै छै --

“सुन्न निरंजन परमपउ, सुइणे भाअ सहाण।

सुन्नवि अप्पा सुण्ण जगु, घरे-घरेहु अक्खाण।।”

सरहपा के कविता केरों मुख्य विषय छेकै सहज पंथ -- सहजवाद। हुनी सहज-पंथ के प्रतिपादन लेली मंतर-तंतर, कर्मकाण्ड, देवता-पितर आरनी के बेकार बतैलें छै। रहस्यवाद योग से निर्वाण के पैबों, गुरु महिमा जेन्हों विषयो सरहपा के कविता के विषय छेकै। कर्मकाण्ड पर चोट करलें गेलें छै --

“बह्मणहि म जाणन्तहि भेउ, एवइ पढिअउ ए चउ बेउ।

महिपाणि कुस लइ पठन्त, घरहि वइसी अग्गि हुणन्त।।”

वेहें रड, तंत्र-मंत्रों के व्यर्थ बतैने छै --

“मन्त ण तन्त ण धेअ ण धारण।

सब्ब विरे बढ विब्भम कारण।।”

काया के वैनें एक-टा महान् तीर्थ मानने छै --

“एत्थु से सुरसरि जमुणा, एत्थु से गंगा साअरु।

एत्थु पआग वणारसि, एत्थु से चन्द दिवाअरु।।

खेतु पीठ उपपीठ, एत्थु मइँ भमइ परिट्ठु ओ।

देहा सरिसउ तित्थ मइँ सुह अप्पा ण दिट्ठुओ।।”

सरहपा युगान्तरकारी कवि रहै। आइयो हुनको कविता प्रासंगिक छै। हुनको कविता में अंगिका केरों रूपरेखा सुस्पष्ट छै।

### शबरपा

शबरपा, सरहपा के शिष्य रहै। शबर या कोल-भील आरनी के नासी रहन-सहन के कारणे ऊ ‘शबरपा’ कहैलै। ओकरो बेसी समय विक्रमशिला में बितलें छेलै। वाँही रही के वें २६-टा किताब लिखलें रहै। ओकरो रचना मे चित्त गुह्य गंभीरार्थ गीति आरो महामुद्रवज्र गीति मुख्य छै। महासुख केरों स्थिति बतैतें हुँ कवि कहै छै --

“मेरुदंड केरों सब्भै से ऊँचों चोटी पर स्थित त्रिधातु के खटिया पर

बिछलों महासुख के बिछौना पर नैरात्मारूपी दारिका लेटली है। ओकारों अंग मोरपंखी से सोहै है। गला में गुंजा के माला है। शबरपा ओकरा पावै लेली पागल होय रहलौं है। ऊ वहाँ पहुँची के ओकरा संगे विहार करै है।”

### लुइपा

लुइपा शबरपा के शिष्य छेलै। ऊ राजा धर्मपाल के आश्रित कायस्थ-लेखक छेलै। कुच्छू दिनों के बाद ऊ शबरपा के चेला होय के विक्रमशिला में रहे लागलै। विक्रमशिला के कविसिनी में लुइपा के बड़ा महत्व छेलै। ‘तन्जूर’ में अनूदित ओकरों ग्रंथों के संख्या सात-टा बतैलौं गेलौं है। ओकरों कविता में गुरु-महिमा आरो चित्तवृत्ति के निरोध के उपाय बतैलौं गेलौं है।

### दारिकपा/डेंगिपा

दारिकपा आरो डेंगिपा उड़ीसा के छेलै। वै दुहू में एक तें राजा छेलै, दोसरो मंत्री। जबे लुइपा धर्म-प्रचार लेली उड़ीसा गेलौं रहै, दारिकपा ओकरा से प्रभावित होलै आरो आपनों मंत्री (डेंगिपा) के संगे लुइपा के शिष्य बनी गेलै। गुरु के आदेशों से दारिकपा कांचीपुरी जाय के, कयेक बरिस ताँय वहाँ रही के, एक गणिका के सेवा कैलकै। सिद्धि मितला पर ओकरों नाम दारिकपा होलै। बादो में दारिकपा आरो डेंगिपा विक्रमशिला में रही के कविता कैने छेलै। दारिकपा के कविता के नमूना लिखै --

“राआ राआ राआ रे, अवर राअ मोहे रे वाधा।

लुइपा ऊ परा दारिक द्वादश भुअणे लाधा।।”

### कण्हपा

कण्हपा कर्नाटक-निवासी रहै। ओकरों रूप-रंग करिया रहै ; ओही से ऊ ‘कृष्ण-पाद’ (कण्हपा) कहलै।

राजा देवपाल-कालीन कण्हपा पहिने सोमपुरी विहारों में रहै छेलै। पीछू जालन्धरपा के शिष्य बनलै आरो सिद्ध-समागम लेली विक्रमशिला ऐलौं छेलै।

कण्हपा सिद्ध-कविसिनी में बड़ी मान पावै रहै। सात ठो सिद्ध-कवि ओकरों शिष्य होलौं रहै। राहुल जी ने कण्हपा के दर्शन संबंधी छौं-टा आरो तंत्रों पर लिखलौं ७४-टा ग्रंथों के उल्लेख करने छै। कण्हपा दोहा छंद आरो कर्ते नी राग-रागिनी में रचलौं आपनों कविता में सहज मार्ग पकड़ै के उपदेश

देले छै। वेद, पुराण, आगम आरो पंडितसिनी केँ निन्दाओ करने छै --

“आगम वेद पुराणे रही पंडिअ भाण वहन्ति।

पक्व सिरी फले अलिअ जिअ बाहेरीअ भमन्ति।।”

## तिलोपा

राजकुलों में उत्पन्न भेलों तिलोपा भृगुनगरों केँ निवासी रहै। विरक्ति होला पर विक्रमशिला में पहिन्हें सें रहैवाला विजयपा केँ शिष्यत्व ग्रहण करी केँ सिद्ध बनलै। ओकरे शिष्य नारोपा छेलै, जे कि बहुत बड़ों कवि आरो गंभीर विद्वान् रहै। हौ विक्रमशिला केँ पूरबी दुआरों केँ ‘द्वारपंडित’, फनू वहेँ महाविहारों केँ ‘कुलपति’ होलों छेलै।

## शान्तिपा

सिद्ध आरनी में सबसें बेसी विद्वान् कवि शान्तिपा छेलै। ऊ ‘कलिकाल-सर्वज्ञ’ विशेषणों सें विभूषित रहै आरो विक्रमशिला केँ सर्वोच्च प्रशासको छेलै। ओकरों यात्रा उदन्तपुरी, सोमपुरी, मालवा आरो सिंहल तक भेलों रहै धर्म-प्रचार लेली। शान्तिपा नें सहज मार्गों केँ स्वसंवेदन आरो स्वानुभूति केँ मार्ग कहने छै --

“सहज मार्ग माया-मोह केँ सागरों में जलयान छेकै जौनी पर चढ़ी केँ हौ पार उतरलों जाय छै।”

भावों केँ खुलासा करै में शान्तिपा केँ कविता में रूपक केरों योजना देखतहें बनै छै। रूओं धुनै केँ एक-टा रूपक देखियै --

“भव निर्वाणे पड़ह मादला, मन पवन वेणि करण्ड कशाला।

जअ जअ दुन्दुहि साद उछलिला, कान्ह डोम्बी विवाहे चलिला।।

डोम्बी बिवाहिआ आहारिउ जाम, जाउतुके किउ आणुतु धाम।

अहनिसि सुरअ पलंगे जाअ, जोइणि जाले रअणि पोआअ।।

डोम्बीएर संगे जो-जोइ रत्तो, खणइ न छाडअ सहज उन्मत्तो।”

कुक्कुरीपा, भूसुकपा, कंबलपा, गुंडरीपा, कंकणपा, विरूपा, डोम्बिपा, गोरक्षपा, तंतिपा, महीपा, धर्मपा आरनी सिद्ध-कवियों केँ आंगी कविता भुलैलों नै जाय पारें।

सिद्ध-कविसिनी केँ रचना केरों वर्ण्य विषय तंत्र-मंत्र, कर्मकाण्डों केँ खंडन आरो धार्मिक मत-तत्वादि केँ प्रतिपादन छेकै। हुनकासिनी केँ कविता अध्यात्म आरो उपदेश केँ कविता छेकै। रूपक-योजना, रहस्यमयी भाषा केँ प्रयोग, दोहा

आरो मुक्तक गीतिशैली हुनकासिनी के लब्धों देन छेकै। वैसिनी सिद्ध-कवि के प्रवृत्ति बादों में कबीरदास आरो हुनको अनुगामी संत-कविसिनी के निर्गुण ब्रह्मोपासना पद्धति, रहस्यवादी भावना, रूपक-योजना, तंत्र-मंत्रादि के खंडन, जाति-पाँति के विरोध, गुरु-महिमा, शान्त रस आरो हृद्गत भावों के अभिव्यक्ति लेली दोहा आरो पदों के उपयोग आदि में परिलक्षित होय छै। कबीरदासों के उलटबाँसी आरो सूरदासों के कूटपदों पर सिद्ध-कविता के प्रभाव मानलें जाय पारें। खाली हिंदीयें नै, बँगला, उड़िया आरो असमिया काव्यधारा ताँय सिद्ध-कविसिनी के भाव-सँपदा आरो गीति-परंपरा सें जुड़लें छै। अंगिका के लोक-गीति-गाथा परंपराओ पर सिद्ध-कविसिनी के रचना के प्रभाव पड़लें छै, जेकरों बारे में आगू में लिखलें गेलें छै।

सरहपा नें तखनीकों आंगी (भाषा) के, जे कि यै जनपदों के जन-भाषा के रूपों में रहै, आपनों अभिव्यक्ति आरो संप्रेषणों के माध्यम बनैलें छेलै। ओकरा लेली नया-नया छंदों के प्रयोगो करने रहै। वैसिनी सें साहित्यों के विचार-धारा बदललै, जेकरा कि सरहपा के समकालीन आरो उत्तरकालीन कविसिनी अपनैलकै।

सिद्ध-कविसिनी के रचना 'चर्यागीत' या 'चर्यापद' कहावै छै। वैसिनी के रचना में अंगिका के स्वरूपों पर डॉ० डोमन साहु 'समीर' नें 'सम्मेलन-पत्रिका' (भाग-८१ : संख्या-४ ; आश्विन-मार्गशीर्ष, १९१८ शक ; पृ. १-१४) इलाहाबाद (उ.प्र.) में छपलें आपनों 'सिद्ध-साहित्य, अंग-जनपद और अंगिका भाषा' शीर्षक निबंधों में विस्तार सें प्रकाश डालने छै।

### ३. नाथ-पंथ आरो अंगिका के नाथ-पंथी कविता

सहजयानी सिद्ध-कविसिनी के बाद नाथ-पंथ के साहित्यों में अंगिका के स्वरूप-दर्शन होय छै। नाथ-पंथी अंगिका कविताँ पहिलकों सहजयानी सिद्ध-कविता आरो ओकरों बादों के अज्ञातनाम कविसिनी के रचलें गीति-गाथा आरो कबीरदास आरनी संतसिनी के कविता के जोड़ै छै।

वज्रयानों के सहज साधना आरो शैव साधना सें विकसित होलें नाथ-पंथों के योगीसिनी के 'कनफटा जोगी' या 'दर्शनी साधु'-ओ कहलें जाय छै। नाथ-पंथों के कत्तें नीं परंपरा चललै, जेकरों विशेष अध्ययन डॉ० हजारी प्रसाद द्विवेदी आपनों 'नाथ-संप्रदाय' नामों के ग्रंथों में करने छोट। वै संप्रदायों में गोरखनाथ, जालन्धरनाथ, नागार्जुन, सहस्रार्जुन, दत्तात्रेय, देवदत्त, जड़भरत,

शदिनाथ आरो मत्स्येन्द्रनाथ भेलों छोट जिनकासिनी केँ क्रमों में भिन्नता पैलों जाय छै ।

डॉ० द्विवेदी जी नेँ गोरखनाथ केरों आविर्भाव-काल विक्रम-संवतों केँ दसमी शती स्थिर करने छोट आरो हुनकों कविता केँ भाषा केँ लोक-भाषा बतैलें छोट । हुनी लिखलें छोट --

“यद्यपि उपलब्ध सामग्री से यह निर्णय करना बड़ा कठिन है कि इनकी भाषा का विशुद्ध रूप क्या था तथापि इसमें संदेह नहीं कि इन्होंने अपने उपदेश भोजपुरी में प्रचारित किये थे ।”

हमरो देखला में गोरखनाथ जी केँ काव्य-भाषा जतें भोजपुरी केँ नगीच छै ओकरा सेँ काहीं बेसी अंगिका केँ नगीच छै : जेना कि --

“हसिबा, खेलिबा, धरिबा ध्यान, अहनिसि करिबा ब्रह्मा गियान ।

हँसै, खेलै, न करै मन भंग, ते निहचय सदा नाथ के संग ।।”

गोरखनाथ जी केँ वै कविता केरों रूप आयकों अंगिका में है रड होय छै --

“हँसबों, खेलबों, धरबों धियान, निसिदिन करबों ब्रह्मा गियान ।

हँसै, खेलै, नै करै मन भंग, ते निहचय सदा नाथ केँ संग ।।”

स्पष्ट छै कि भाषिक आरो व्याकरणिक दृष्टि सेँ ई विशुद्ध अंगिका केरों उदाहरण छेकै । नाथ-पंथों के आरोसिनी कवियों केँ रचना तखनकों अंगिका सेँ सजलों-सँवरलों छै ।

नाथ-पंथी अंगिका काव्य में भाषा तें बड़ा सहज आरो लोक-रीति केँ अनुकूल छै, लेकिन दर्शन केँ भाषा में सामान्य पाठक लेली ओतें संप्रेषणीय नै छै । भाव-तत्व चिंतन में खपैलों गेलों छै । आपनों मान्यता आरो स्थापना केँ व्यावहारिक रूप दै में उपमानों केँ प्रयोगो पैलों जाय छै । जे हुए, नाथ-पंथी कविता अंगिका केँ प्राचीन कविता छेकै जे कि भाव, योग आरो दर्शन सेँ भरलों-पुरलों छै आरो भाषा में अंगिका केरों पुट सुस्पष्ट छै ।

## ४. अंगिका केरों गीति-गाथा-प्रबंध काव्य

वहें युगों में आल्हा-ऊदल, लोरकैन, सोरठी-बृजभार, कुँवर विजयमल, शोभा नायक बनजारा, राजा भरथरी, राजा मान्जिकचंद, राजा गोपीचंद आदि आरोसिनी गीति-गाथा-काव्य लोक-भाषा में प्रचलित भेलै । हौसिनी

गाथा-काव्य अज्ञातनाम कविसिनी दसमी शती के उत्तरार्ध से लै के तेरमी शती के मध्य-काल ताय लिखने छै। यहाँ कुछेक लोकगीति-गाथा-प्रबंधों के बारे में लिखलें जाय रहलें छै।

### आल्हा-ऊदल

‘आल्हा’ वीरगाथा प्रबंध-काव्य छेकै। पहिने यै में अठारों ठो लड़ाय के वर्णन छेलै, मतुर पीछूँ ऊ संख्या में हरे-फेर होय गेलै।

आल्हा केरों कथा महोबा राजों से जुड़लें छै। महोबा उत्तर प्रदेशों के हमीर जनपदों में पड़ै छै। ऊ छोटकासिनी राजों में अगुवा बनी गेलों रहै। पृथ्वीराजों के समकालीन परमाल महोबा के शासक छेलै। कन्नौज के राजा जयचंद से ओकरो गाढ़ों दोस्ती रहै। आल्हा आरो ऊदल राजा परमाल के सेनापति रहै। राजा परमालों के पत्नी रानी मल्हान (मल्हना) के आदेशों से आल्हा-ऊदल ने ढेरसिनी लड़ाय लड़लें रहै जेकरों वर्णन ई गीति-गाथा-प्रबंधों में बड़ी मौलिक आरो प्रभावकारी ढंगों में छै।

कयेक इतिहासकारें जगनिक के ई गाथा-काव्यों के रचयिता मानलें छै, जबे कि सौसे गाथा में काँहीं जगनिक केरों कोय चर्चा नै भेलों छै। आल्हा गाथा-काव्यों के मूल-भाषा चाहे जे रहलें रहें, लेकिन सौसे उत्तर भारतों में कतें नी क्षेत्रीय भाषा में ई गाथा मिलै छै। डॉ० ग्रियर्सन ने लिखलें छै -- “ई गाथा-काव्यों के पूर्वी पाठान्तर खाली देश-दुनिया घुरै-फिरैवालासिनी के कंठों में आजो विद्यमान छै आरो बिहार के बोली में गैलें जाय छै।” (इंडियन एण्टिक्वैरी, भाग-१४ ; १८८५, पृ. २०९)।

### लोरिकैन

ऐतिहासिक आरो तत्कालीन सामाजिक व्यवस्था के नजरी से, लागै छै कि, लोरिकैन के रचना १२-मी से १४-मी शती के बीचों में होलें रहें। ‘लोरिकैन’ गीति-गाथा केरों एक-टा विशाल महाकाव्य छेकै। ई चार खंडों में बाँटलें छै। पहिलका खंडों में ‘समरू’ के बीहा, दोसरका में लोरिक-मंजरी के बीहा, तेसरका में लोरिक-चनमा के बीहा आरो चौथका में लोरिक-जमुनी के बीहा केरों वर्णन छै। लोक-परंपरा में लोरिक-मंजरी आरो लोरिक-चनमा के प्रसंग बेसी प्रचारों में छै। लोरिक-चनमा के कथा ‘चनमा के उद्धार’ के नामों से ख्याति में छै। लोरिक केरों कर्म-स्थान सुपौल जिला मुख्यालय

सैं सटले हरदी गाँव रहै ।

स्व० रासबिहारी पाण्डेय नें 'लोरिकैन' कें जातीय काव्य कहने छोट । हुनको कहनाम छै कि खाली भोजपुरी क्षेत्रे में नै, उत्तर भारतों कें आरो कत्तें नी क्षेत्रों में एकरा अपना दिगिर में माँगलिक आरो शुभ संस्कारों के समय बडा प्रेम, उत्साह आरो श्रद्धा सैं अहीर लोगें गावै छै । ('भोजपुरी भाषा का इतिहास', पृ. ३५) ।

लोरिकैन कें विषय-वस्तु कोय सहृदय कें सहजें प्रभावित करैवाला छै । ई वीररस-प्रधान महाकाव्य छेकै, मतुर आरोसिनी रसों कें उदाहरणों एकरा में मिलै छै ।

"तोहें हमरा जबें कादाँ दाबिये नें देल्हे हो,  
हे गे मैयो दुरगा, कादाँ जबें दाबिये देल्हें रे सोढ़रा,  
तिरिया तोरों देखी होतौ मनझमान भाय रे ।" ('लोरिकैन', 'चकोर') ।

### शोभा नायक बनजारा

'शोभा नायक बनजारा' एक-टा बड़ों-रड गीति-गाथा-प्रबंध काव्य छेकै । एकरों रचयिता कें नाम अज्ञात छै । ई गाथा-काव्यों कें रचना-काल १२-मी शती कें अंतिम दू दशक मानलों जाय पारै छै ।

शोभा नायक (नयका) केरों बीहा 'बारी' (कन्या) सैं होलों रहै । गौना कें बाद बारी जौन दिना ससुराल ऐली व्हें दिना शोभा बनजौ लेली मोरंग पयान कैंलकों रहै ; रात होला पर रस्ते में एक-टा गाछी तर सूती रहलै । वै गाछी पर एक जोड़ा पंछी रहै । वै दुहू कें बातों सैं शोभा कें मालूम होलै कि आयकों रातीं जें आपनों पत्नी सैं सहवास करतै वें बड़ा गुनी बेटा पैतै ।

हौ बात जानी कें शोभा उठलै आरो आपनों घोर घुरी चललै । आपनों पत्नी कें साथें सहवासों कें बाद, ओकरों पहिचान लेली कि ऊ आपनी पत्नी भिरी ऐलों रहै, वें एकटा औगठी ओकरा दै कें रातिये मोरंग चललों गेलै, आरो वहाँ बारों बरिस ताँय व्यापार करी कें ढेरसिनी सौर-सामान लै कें घोर घुरलै । हुन्ने ओकरों पत्नी बारी कें पाँव भारी होलों देखी कें ओकरा पर लोकापवादों कें प्रहार हुँएँ लागलै । भारी यातना दै कें ओकरा ओकरों सास-ससुरें घरों सैं निकाली देलकै । बारी कें दियोरो कें हौसिनी बात कुच्छू-कुच्छू मालूम रहै । वें बारी कें अपना'हाँ राखी लेलकै ।

शोभा कें घोर घुरला पर ओकरा सब-टा खिस्सा मालूम होलै । दुन्नों

पति-पत्नी खुशी से खाय-पीये आरों रहे लागलै ।

डॉ० ग्रियर्सन ने एक-टा पत्रिका जेड. डी. एम. जी. में 'द सिलेक्टेड स्पेसिमेन्स ऑफ द बिहार लैंग्वेज -- द गीत नयका बनजरवा' नामों से आपनों आलेख छपवैने रहै । ऊ गीत ६२९ पाँती में छै । यहाँ 'बारी' के विरह देखलौ जाय --

“रामा देखल रहतै मोरंग शहर भला रे ना ;

रामा असकर लगीच सामी केँ जैतियै रे ना ।

रामा केना केँ खेपब दिन-रात भला रे ना ?

रामा केकरा सेँ भेजब संवाद भला रे ना !

रामा सामी केँ करबै खबर भला रे ना ;

रामा जहर - माहुर खाय केँ मरबै रे ना ।

रामा डूबी जैबै कुइजा ते पोखर भला रे ना ।” (‘भोजपुरी भाषा

का इतिहास’ : स्व० रासबिहारी पाण्डेय) ।

स्पष्ट छै कि एकरा में अंगिका भाषा भरलौ-पुरलौ छै, जबे कि एकरों रचना-काल आय सेँ कयेक सौ बरिस पहिलकों छेकै ।

## सोरठी बृजाभार

‘सोरठी बृजाभार’ नाथ-संप्रदायों केँ समय लिखलौ एक-टा बृहद् गीति-गाथा-प्रबंध काव्य छेकै । एकरों रचयिता केँ नाम अज्ञात छै । यै में सोरठी (नायिका) आरो बृजाभार (नायक) केरों कथा छै ।

‘सोरठी-बृजाभार’ केरों वर्ण्य-विषय गुरु गोरखनाथ-प्रतिपादित यौगिक चमत्कार आरो हुनकों समयों केँ कर्ते नी मान्यता छेकै । यै में वज्रयानी विचार आरो मान्यता पर गुरु गोरखनाथों केँ ज्ञान-मार्गों केँ चमत्कारिक घटना केँ विजय देखैलौ गेलौ छै । जादू-टोना, तंतर-मंतर केँ जरिया सेँ बृजाभार केँ मार्ग-में नाना रकमों केँ बिधिन-बाधा खाड़ों करलौ गेलौ छै, जेसिनी केँ गुरु गोरखनाथों केँ कृपा सेँ काटते हुएँ ऊ आगू बढ़लौ गेलौ छै ।

ई काव्यों केँ नायिका सोरठी साध्य छेकै । ओकरा लेली साधक बृजाभारें यात्रा करै छै । रस्ता में हौ योगी कर्ते नी नायिका आरनी केँ उद्धार करै छै ।

यै में बृजाभार केँ ब्रह्मचर्य-व्रत-धारण आरो ओकरों बिहैली पत्नी हेमन्ती केँ पातिव्रत-धर्म केँ दरसैलौ गेलौ छै ।



## कुँवर विजयमल

'कुँवर विजयमल' अंगिका केँ एक-टा प्रतिशोधात्मक गीति-गाथा काव्य छेकै। एकरों मूल प्रति नै मिलै छै आरो नै तें एकरों रचयिता रों नामे मिलै छै।

एकरों कथा-वस्तु में राजपूतकालीन मान्यता लौकै छै। यै सें लागै छै कि ई काव्य राजपूत-कालों में लिखलों गेलों छेलै। कथा-वस्तु में मुरार खाँ पठान केँ नाँव आवै छै। यै आधारों पर एकरों रचना पठान-कालों में होवै केँ संभावना बुझाय छै।

विजयमल गाथा अंगिका केँ अलावा आरो कयेक-टा क्षेत्रीय भाषाओ में गैलों जाय छै। डॉ० ग्रियर्सन नेँ शाहाबाद (आयकों भोजपुर, रोहतास, बक्सर आरो कैमूर) जिला में वहाँकों भाषा में प्रचलित विजयमलों केँ गीतं संकलित करी केँ एशियाटिक सोसाइटी, कलकत्ता केँ पत्रिका-५३, भाग-१, १८४ ई. में 'द साँग ऑफ विजयमल' केँ शीर्षकों सेँ छपैने छेलै जेँ कि. ११२८ पाँती में छै। वें ओकरा पूर्वी भोजपुरी केँ श्रेष्ठ उदाहरण मानने छै। है बात निश्चित छै कि ग्रियर्सन भागलपुरों केँ कलक्टर रहतियै तें यहाँकों भाषा में प्रचलित विजयमल केँ गीतों केँ बतैतियै जे कि, सच पूछों तें, अंगिका छेकै।

है गाथा-काव्यों में विजयमल नेँ आपनों ससुर आरो साला सेँ आपनों माय-बापों केँ बदला लेने छै। ई गीति-गाथा लोक-लय आरो सुरों में छै। छंदों मे मात्रा-दोष मिलै छै।

## राजा भरथरी

'राजा भरथरी' केँ रचना-काल १२-मी शती छेकै। एकरा में गोरखपंथी योगी-आर सारंगी पर गीत गावै छै आरो भीखों में गुदड़ी माँगै छै। ई गीत बिहार केँ जौनी-जौनी भाषा में गैलों जाय छै तौनी-तौनी भाषा केँ रूपो एकरा मे मिलै छै।

'राजा-भरथरी' गाथा में दुइ-टा कथा आवै छै। एको में राजा भरथरी (भर्तृहरि) वैराग्य लै केँ चलै लें चाहै छै ; मतुर पत्नी सामदेई मना करै छै। वै पर रानी पिंगलाँ सामदेई केँ पहिलों जनमों केँ कहानी सुनावै छै। दोसरो कथा छै कि राजा भरथरी शिकार लेली बोन जाय छै। वाहीं हुनका वैराग्य होय जाय छै आरो हुनी बाबा गोरखनाथों सेँ दीक्षित होय जाय छै।

सामदेई राजा भरथरी केँ पत्नी रहै। हुनकरी एक बहिन रहै मैनावती,

जेकरा से गोपीचंदों के जनम भेलों छेलै। राजा भरथरी के गुरु गोरखनाथों के शिष्यत्व ग्रहण करी लेबों आरो आपनी पत्नी सामदेई के 'माय' कही के भीख माँगबों ई गीति-गाथा-प्रबंधों के मुख्य घटना छेकै। सामदेई आरो भरथरी के संवाद बड़ी मर्मस्पर्शी छै।

## मानिकचंद

'मानिकचंद' गीति-गाथा-प्रबंध काव्य छेकै, जे कि अंग, बंग, मगध आदि के जनपदीय भाषा में प्रचलित छै। एकरो नै तेँ मूल प्रतिये मिलै छै आरो नै तेँ कवि रों नामे उपलब्ध छै। डॉ० ग्रियर्सन नेँ एशियाटिक सोसाइटी, कलकत्ता के पत्रिका-१३, १८७८ ई. में 'द साँग ऑफ मानिकचंद' के नामों सेँ एक-टा लंबा लेख लिखलें छै। मूल गीतों के शुरू में वैनें १४ पन्ना में मानिकचंद के जन्म, जन्म-स्थान, वै समयों के बात, पत्नी मैनावती आरो बेटा गोपीचंद के बारे में बहुते जानकारी देने छै।

मानिकचंद के रों गीत अंग क्षेत्रीय योगी आरनी के कंठों में आइयो सुरक्षित छै।

## गोपीचंद

गोपीचंद गीति-गाथा-प्रबंध नाथपंथी योगी के सारंगी पर उत्तरैवाला एक दोसरो ढंगों के मार्मिक गाथा छेकै, जे में गोपीचंद आपनों राजपाट आरो धौन-दौलत छोड़ी के गृह-त्याग करै छै। हौ समय माय मैनावती रों पुत्र-प्रेम आरो बहिन वीरम रों भ्रातृ-प्रेम हृदयों के झकझोरी दै छै ; लेकिन गोपीचंद पर ओकरों कोय असर नै पड़ै छै, ऊ वैराग्य-पंथों सेँ जरियो-टा विचलित नै होय छै।

गोपीचंद गीति-प्रबंधों के रचना १२-मी शती में भेलों रहै। हिंदी के विद्वान् डॉ० हजारी प्रसाद द्विवेदी नेँ लिखलें छै कि, "गोपीचंद्र बंगाल के राजा मानिकचंद के बेटा रहै। मानिकचंदों के संबंध पालवंशों सेँ बतैलों जाय छै, जे कि १०९५ ई. ताँय शासनारूढ़ रहै। एकरा बाद हुनकासिनी पूरब दिस हटै लें वाध्य होलै। कयेक पंडितें यै पर अनुमान करने छै कि हुनी ११-मी शती के शुरू में भेलों छेलात। हम्मं मत्स्येन्द्र नाथों के समय निर्धारित करै के प्रसंगों में तिरुमलय सेँ मिललों शैल-लिपि सेँ गोपीचंदों के समय ११-मी शती के आस-पास होबों अनुमान करने छियै।

डॉ० ग्रियर्सन ने कलकत्ता के एशियाटिक सोसाइटी पत्रिका संख्या-५४, १८८५ ई. में 'टू वर्सन्स ऑफ द सांग ऑफ गोपीचंद विथ ट्रान्सलेशन' छपवैने छेलै। भोजपुरी आरो मगही क्षेत्रों में प्रचलित गोपीचंद संबंधी गीतों के भिन्न-भिन्न पाठ एके पन्ना पर आमने-सामने देलों गेलों छै। वै से पता चलै छै कि गोपीचंदों के गीतों के विभिन्न पाठ अलग-अलग क्षेत्रों के भाषा में प्रचलित छेलै आरो ओकरा में अंगिका पाठो अंग-जनपदों के योगी आरो नाथ-पंथीसिनी के कंठों पर छेलै जे कि अभियों वर्तमान छै।

\* गोपीचंद गाथा-काव्य एक-टा संवेदनशील महाकाव्य छेकै। वै में भाव-पक्ष आरो कला-पक्षों के बढ़िया संयोजन छै। अंगिका गीति-गाथा-प्रबंधों के पाठ करला पर नीचूँ लिखलों तथ्य मिलै छै --

१. अंगिका के पूर्व-मध्य युगों के है-सब गाथा के काव्य-रूप प्रबंध-काव्यों के छेकै, जेकरा मे महाकाव्यों के संख्या बेसी छै।

२. रचना ११०० ई. से लै के १४०० ई. ताय भेलों छै। एकरों पुष्टि गीति-प्रबंधों में वर्णित तखनीकों ऐतिहासिक, सामाजिक आरो धार्मिक स्थिति से होय छै।

३. नाथ-पंथों के मान्यता के व्यावहारिक रूप देबों गीति-गाथा-प्रबंधों के दृष्टि रहलों छै।

४. प्रायः सब्भे-टा गीति-गाथा-प्रबंधों के शुरुआत देवी-देवता के मनौन से होलों छै।

५. सब्भे गीति-प्रबंधों के चयितासिनी अज्ञात छै।

६. लगभग सब्भे गाथा विभिन्न क्षेत्रों में विभिन्न भाषिक पाठों में प्रचलित छै।

७. गीति-गाथा-प्रबंधों के मौखिक परंपरा चललों आबी रहलों छै।

८. सब्भे-टा छंदबद्ध छै। कंठ-परंपरा के कारणे छंदों में त्रुटि आबी गेलों छै, जेकरा लय आरो सुरें भरै छै।

९. गीति-प्रबंधों के संरचना में लोक-तत्वों के समावेशों पर रचनाकारों के नजर रहलों छै।

१०. गीति-गाथा-प्रबंधसिनी से तत्कालीन ज्ञात-अज्ञात ऐतिहासिक तथ्य आरो सामाजिक, आर्थिक आरो राजनैतिक स्थिति पर प्रकाश पड़ै छै।

## ५. अंगिका केरों लोकोक्ति-कविता

उत्तर-मध्य युगों में कविता के रूपों में लोकोक्ति, या कहों, कहावतो लिखलें गेलै। लोकोक्ति अज्ञातनामा लोक-कवियों के होय छै ; मतुर अंगिका लोकोक्ति-काव्यों के रचयिता घाघ, भड्डरी आरो डाक केरों नाम, अनेक लोकोक्तियों में लागलें भोग (भणिता) से ज्ञात होय छै। हिनकासिनी के लोकोक्ति खास करी के कृषि, भूगोल अथवा समाजों से संबंधित होला के कारणे देश-भरी में प्रचलित छै आरो वैसिनी लोकोक्ति के भिन्न-भिन्न संस्करण या पाठो निकललें छै।

### घाघ

घाघ बादशाह अकबर (१५४८-१६०५ ई.) के समकालीन छेलै। भड्डरी आरो डाक घाघ केरों समसामयिक रहै। घाघ केरों जन्म-स्थान, माय-बाप आरो परिवारों के बारे में विद्वानसिनी में मतभेद छै। पं० रामनरेश त्रिपाठी ने घाघ के जन्म छपरा जिला में काँहीं भेलों बतलें छै जबे कि घाघ भागलपुर जिला के घोघा के निवासी छेलै।

घाघ केरों जन्म एक कनौजिया ब्राह्मण परिवारों में भेलों रहै। हौ दिल्ली दरबारों में रहै छेलै। बादशाह अकबरें 'घोघा' जागिरों में घाघ के देने रहै। घाघें कहलगाँव में आपनों घोर बसैने रहै। ओकरा गंगा जी रों महालो मिललें छेलै। घाघ के उत्तराधिकारी चौधरी कहलै। आइयो कहलगाँवों के चौधरी टोला आरो वहाँकेरों चौधरी लोग घाघ केरों स्मृति के उजागर करै छौत। डॉ० ग्रियर्सन ने आपनों 'पीजेण्ट्स लाइफ. ...' में घाघ के लोकोक्ति के स्थान देने छै।

### भड्डरी आरो डाक

यै दुहू के जन्म-कथा एक्के रड के मिलै छै। वै से लागै छै कि डाक आरो भड्डरी के चिन्है में विद्वानसिनी कुच्छू भूल कैने छै। ~~डाक~~ केरों लोकोक्ति में 'भल्लरी' संबोधनों मिलै छै। वेहें 'भल्लरी' असल में 'भड्डरी' छेकै। हिनकासिनी के लोकोक्ति के भाषा अंगिका छेकै। यै दुहू अंग-जनपदे में काँहीं निवास करै छेलात। श्री कपिलेश्वर शर्मा (शुभंकरपुर, दरभंगा) ने आपनों 'डाक वचनावली' (१९४२ ई.) के लोकोक्ति में किंचित् मैथिली के पुट भरै के चेष्टा करने छौत, जबे कि डॉ० ग्रियर्सन ने आपनों 'पीजेण्ट्स लाइफ' में उद्धृत डाक के कहावतों

कें भोजपुरी से प्रभावित मानने छै।

घाघ, भड्डी आरो डाक कें कहावतसनी से अंगिका धन्य होली छै। हिनकासिनी तीन्हू खास करी कें कृषि-वैज्ञानिक आरो ज्योतिर्विदो छेलात। हिनकासिनी कें कहावतों में काव्य-सौंदर्य ओतें तें नै मिलै छै तैयो वैसनी में कुच्छू ऐहिनों तत्व छै जे कि विशेष रूपों से मुखर छै। छंद कें दृष्टि से हिनकासिनी कें लोकोक्ति-काव्यें दोहा आरो चौपाई कें परिधान धारण करने छै। कुछेक उदाहरण लेलों जाय --

- एक बून जों चैत में परें, सहस बून सावन में हरें।
- कच्चा खेत नै जोतें कोय, नाही बीज में अंकुर होय।
- खाद परें तें खेत, नै तें कूड़ों रेत।
- चमकै पच्छिम-उत्तर ओर, तब जानों पानी कें जोर।
- ढेला ऊपर चील्ह जों बोलै, गली-गली में पानी डोलै।
- पूरब धनुही पच्छिम भान, कहै घाघ बरसा नियरान।
- तितिर पाँख मेघा उड़ै, ओ विधवा मुसुकाय ;  
कहै डाक सुनु डाकिनी, ऊ बरसै ई जाय।
- कातिक सुदी एकादसी, बादल बिजली होय ;  
तो अखाड़ में भड्डी, बरखा चोखी होय।

### फेंकड़ा आरो लोरी

फेंकड़ा आरो लोरी छोटों-छोटों बच्चा-बुतरू कें खिलावै, पिलावै आरो सुतावै में अथवा कोनो क्रिया या कामों में रिझावै लेली सुनैलों जाय छै। फेंकड़ा केरों विस्तार ढेरसिनी काम-धंधा में छै जबें कि लोरी बच्चा-बुतरू कें सुतावै कें गीत छेकै। लोरी केरों सीमा माय-बाप, भाय-बहिन या सगा-संबंधी द्वारा बच्चा-बुतरू कें सुतावै तके छै जबें कि फेंकड़ा बच्चोसिनी पढ़ै छै।

फेंकड़ा आरो लोरी हमरासिनी कें सास्कृतिक धरोहर छेकै। वैसिनी में हमरासिनी कें जीवनो कें सौंसे इतिहास, भूगोल, खगोल आरो समाज झलक मारै छै। फेंकड़ा बच्चा-बुतरू लेली मनोरंजनों कें साधन होय छै। ओकरो लय आरो धुन कुच्छू-कुच्छू अपने ढंगों कें रहै छै।

फेंकड़ा आरो लोरी लोक-जीवनो कें उद्घाटित करै छै। वैसिनी से कविता सुनै आरो पढ़ै कें आनन्द आवै छै। वैसिनी में स्थानीय रंजन होय छै। बच्चों प्राकृतों आम देखी कें कहै छै -- 'कौआ रे कक्का, आम दे पक्का।' लुक्खी-बिलैया

(गिलहरी) कें हेरी कें पढ़ै छै -- 'लुखी-बिलैया दाल-भात खो ; सैयाँ बोलैलको, पटना जो ।'

लोरी में जे संगीतों कें आनन्द आवै छै वै सें बच्चा-बुतरू कें नीन जल्दी आबो जाय छै । माय-बहिनों कें लोरी -- 'आबें गे निनिया निनान बोन सें, ...', 'सुतों-सुतों रे बाल बलना ; माय-बाप गेलों छो चिचोर कोड़ना' -आर में यहें गुण देखलें जाय छै ।

## (२) अंगिका साहित्यों कें मध्य युग

(१२२० ई. सें १८१० ई. ताँय)

१. ऐतिहासिक दृष्टि सें अंगिका साहित्यों कें मध्य युगों कें दू भागों में बाँटलें जाय छै --

(क) पूर्व-मध्य युग (१२२० सें १६५० ई. ताँय) आरो --

(ख) उत्तर-मध्य युग (१६५० सें १८५० ई. ताँय)

पूर्व-मध्य युगों में अंगिका आपनों पुरानों रूप 'आंगी' सें क्रमशः आधुनिक स्वरूप (अंगिका) कें पकड़ै छै, जेकरों दर्शन साधु-संतों कें धार्मिक भजनों में या हुनकासिनी कें लोक-प्रचलित सूक्ति-आर में होय छै । वै लेली पूर्व-मध्य युगों कें 'साधु-संत-कालो' कहलें जावें पारै छै । वै काल-खंडों में भक्ति-भाव कें भीतर श्रृंगार सें भरलें गाथा-गीतों कें परंपरा चललै । परम तत्व या प्रकृति/ब्रह्म कें संख्या आरो स्वरूपों कें निरूपण होलै । निर्गुण आरो सगुण ब्रह्म कें पाबै लेली ज्ञान आरो भक्ति कें माध्यमों कें स्थापना भेलै । गीत आरो गाथा कें विषय-वस्तु में बदलाव ऐलै । साधु-संतसिनी सहजयानी सिद्ध आरो नाथपंथी योगीसिनी सें अलग हटी कें निर्गुण आरो सगुण ईश्वरों कें लीलोपासना आरो गुणानुवादों कें, पुराकथा कें आधार-भूमि बनाय कें, करबों शुरू केलकै ।

पूर्व-मध्य युगों कें प्रवृत्ति उत्तर-मध्य युगों में बनलें रहलै । यहाँ संक्षेपों में वै मध्य युगों कें साहित्यिक विशेषता प्रस्तुत करी रहलें छियै । सबसे पहिने महाकवि विद्यापति कें लेलें जाय ।

### विद्यापति

विद्यापति कहियो बंगला भाषा कें कवि मानलें जाय रहेंत । हिंदी मानै छै कि हुनी हमरों कवि छथिन । मैथिलीं यै सबसे फरके हुनका पर आपनों अधिकार

जमावै छै । सच पुछलों या कहलों जाय तें विद्यापति आंगी = अंगिका केँ कवि छथिन । हिंदी केँ एक विद्वानेँ कहै छोट -- “बँगला से अधिक पूर्वी हिंदी अथवा अवधी और बैसवाड़ी इत्यादि से उनकी (विद्यापति की) पदावली की भाषा का सादृश्य है ।” हुनी यहो मानै छोट कि, ‘पदावली की भाषा का जितना मेल अवधी से है उतना बँगला से नहीं । विद्यापति की भाषा का शरीर हिंदी है, परिधान बँगला है ।’ एतना सच छै कि आधुनिक मैथिली केँ पूर्व-रूप आंगी रहै । विद्यापतिं हौ आंगी केँ ‘देसिल बअना’ नाम देने छथिन ; ‘कीर्तिलता’ में हुनी लिखलें छथिन -- “सैक्कय षाणी बहुअ न भावइ, पाउँअ रस को मम्म न पावई ; देसिल बअना सब जन मिट्ठा, तें तैसन जम्पओ अवहट्ठा ।” तखनी ताँय भाषा केँ अर्थ में नैं तें ‘मैथिली’ शब्द प्रचलित छेलै आरो नैं तें ‘अंगिका’ शब्द प्रचलन में ऐलों छेलै ; मत्तुर ई तें स्पष्टे छै कि हुनी ‘देसिल बअना’ केँ नामों सेँ तखनकों अंगिकाये में कविता करने रहथिन ।

विद्यापति केँ जन्म, डॉ० उमेश मिश्र केँ अनुसार, सं. १४२५ वि. ठहरै छै । हुनकों पिताश्री पं० गणपति ठाकुरनेँ ‘गंगा-भक्ति-तरंगिणी’ लिखने छोट । विद्यापति कयेक राजा केँ आश्रित छेलात । सन् १४०० ई. में राजा शिवसिंहेँ ताम्रपत्र केँ जरिया सेँ उपहारस्वरूप विसफी गाम आरो मानद उपाधि ‘अभिनव जयदेव’ विद्यापति केँ देने रहै ।

विद्यापति संस्कृत, अवहट्ट आरो प्राचीन अंगिका भाषा में रचना करने छोट । ‘पदावली’ हुनकों कोय स्वतंत्र ग्रंथ नैं छेकैन्ह ; आपनों जीवन-कालों में समय-समय पर हुनी जेसिनी पद रचने छोट वेहेँसिनी पदों केँ संग्रह बादों में करी केँ ‘पदावली’ नाम देलों गेलों छै । ‘विद्यापति’ नामों एक्के नैं, अनेक कवियों केँ मिलै छै । यै लेली ई कहबों मोस्किल छै कि ‘पदावली’ केरों कोन ठो रचना कोन ‘विद्यापति’ केँ रचलों छेकैन्ह । जे हुएँ, विद्यापति केँ पद तीन तरहों केँ मिलै छै -- (क) शृंगार संबंधी, (ख) भक्ति संबंधी आरो (ग) समय संबंधी ।

शृंगार संबंधी पदों में राधा-कृष्ण केँ प्रेम-प्रसंग संबंधी पद आवै छै । संस्कृत गीतकार महाकवि जयदेव सेँ प्रभावित विद्यापति केँ कविता में वयः-संधि, नख-शिख, अभिसार, मान, विरह आदि केँ वर्णन भेलों छै ।

भक्ति संबंधी पदों में गंगा, शिव, माय भैरवी आरनी केँ मनौन आरो भक्ति-परक पद आवै छै । हुनकों लिखलों शिव जी केँ नचारी उत्तरी अंग-क्षेत्रों में आइयो प्रचलित छैन् । गंगा जी केँ मनौन में हुनी कहै छोट --

“कत सुख-सार पाओल तुअ तीरे,  
छोड़इत निकट नयन बहु नीरे।  
कर जोड़ि बिनमऔं विमल तरंगे।  
पुन दरसन होए पुनमित गंगे।।”

काल (समय) संबंधी पदों में तखनकों परिस्थिति के चित्र मिलै छै।

विद्यापति के कविता गीति-काव्यों के अंतर्गत आवै छै। अलंकार स्वाभाविक रूपों में प्रयुक्त छै। अंगे विद्यापति के आपनों अंगों से लगैने छै।

## २. अंगिका के साधु-पंथी कविता

है युगों के कविसिनी में निर्गुण पंथों के अंतर्गत ज्ञानमार्गी संत कवि आरो सगुण पंथों के अंतर्गत राम आरो कृष्ण के चरित-गायक भक्त कवि आवै छै। निर्गुण-सगुण पंथों के संगे-संग सरभंग (औघड़) पंथ, सखी पंथ, शिवनारायणी पंथ, बावरी पंथ -आर पनपलै। निर्गुण पंथों में कबीरदास के नामों पर कबीर-पंथ, संत दरिया साहेब के नामों पर दरिया-पंथ, दादूदयाल के नामों पर दादू-पंथ आदि के परंपरा विकसित होलै। आगू चली के संत-परंपरा में संतमत-सत्संग के आविर्भाव होलै, जेकरों प्रवर्तक संत देवी साहेब आरो उन्नायक महर्षि मेंहीं परमहंस जी महाराज भेलात। आय हुनके आसन संतश्री शाही बाबा आरो संतश्री संतसेवी बाबाने लेने होलें छैथ। हिनकासिनी में महर्षि मेंहीं आरो संत शाही बाबा ने अंगिका में पद आरो भजन लिखने छैथ।

यहाँ जे-सब पंथ आरो संतों के चर्चा होलै वै-सब में संत कबीरदास, संत दादू, संत दरिया, संत पलटूदास, संत रैदास, सहजोबाई, दयाबाई, बाबा कीनाराम, श्रीकनराम आरनी कवियो छेलात। हिनकासिनी के कविता के भाषा तखनकों विकसित भाषा केरों मिललें-जुललें रूप छेकै ; मतुर वै पर बेसी अधिकार बनै छै पूरबी जनपदों के। कबीरदासें साफ-साफ कहने छै --

“भाषा हमरी पूरबी, हमको लखै न कोय।

हमको तो सोई लखै, जो पूरब का होय।।”

कबीरदासों के सधुक्कड़ी भाषा में पूरब केरों भाषासिनी के सम्मिश्रण होलें छै। कोय भाषा के पहिचानै में ओकरों क्रियापदों के खास भूमिका रहै छै। अंगिका के क्रियापदों के उपयोग कबीरदास जी के कविता में देखलें जाय पारें ; जेना कि --



“ जागै (है), तागै (है), देखै (है), लाबै (है), राखै (है), आवै (है), लाँघै (है), व्यापै (है), डूबै (है), मिटै (है), तजै (है), कहै (है) - जैन्हों सैकड़ों वर्तमान अपूर्ण निश्चयार्थक (घटमान वर्तमान) क्रियापद प्रयुक्त होलें है। ऐन्हों प्रयोग आरो कत्तें नी मिलै है। यही भाव-धारा में रचलें दरिया साहेब आरो दोसरोसिनी संत-कवियों कें कविता में अंगिका भाषा केरों शब्द-संभार मिलै है।

कबीरदासों कें जीवन-चरितों कें पक्का पता तें नैं चलै है, मतरकि बेसी विद्वानों कें मतों से हुनकों जन्म १४५६ ई. आरो मृत्यु १५७५ ई. में होलें मानलें जाय है। हुनी अंगिका कें ज्ञानमार्गी शाखा कें पहिलों कवि छेकात। 'बीजक' हुनकों प्रामाणिक ग्रंथ छेकै। हुनकों 'वाणी' कें चार भागों में राखलें गेलें है :- बीजक, शबद, साखी आरो रमैणी। हुनी एक सुधारक कवि छेलात। खाली धर्म-सुधारके कें रूपें नैं, समाज-सुधारकों कें रूपों में हुनी आपनों कविता करने छेंथ। जात-पाँत, छुआछूत, ऊँच-नीच, बाहरी आडंबर, ढकोसला, पूजा-पाठ-आर कें हुनी खंडन करने छेंथ। कबीरदासों पर सिद्ध-कवि सरहपा कें स्पष्ट छाप पड़लें है। लागै है कि कबीरदास सरहपा कें औतार छेलात। हुनके नाखी कबीरदासनें रहस्य केरों बात करने है। अंगिका साहित्यों में रहस्यवादी कविता कें पहिलों कवि कबीरदासे कें मानलें जाय पारै है। जानलें बात छेकै कि हुनी कविताये लेली कविता नैं करलें छेंथ, बल्कि हुनकों कविता ह कें उद्गार छेकै, जें हृदयों कें छुवै है, शकशोरबो करै है। कविता करै के ऊँचाई हुनकों भावों में मिलै है। हुनकों उलटबाँसी में कुच्छू-कुच्छू जटिलताओ है।

कबीरदास जी प्राचीन आंगी अपभ्रंश भाषा में प्रचलित दोहा छंदों कें महत्व देने है। हुनकों 'साखी' दोहे छंदों में लिखलें गेलें है। हुनकों रचनासनी लय-सुरों में बँधलें है आरो अलंकार सहज रूपें ऐलें है। हुनकों एक-टा अंगिका-पद उदाहरणस्वरूप यहाँ प्रस्तुत है --

“हंसा ई पिंजरा नैं तोरों।

कंकड़ चुनी-चुनी महल बनैलों, लोगें कहै घर मोरों।

नैं घर मोरों, नैं घर तोरों, चिड़िया रैन बसेरों।

बाबा दादा भाय-भतीजा कोय नैं चलै संग तोरों।

माता-पिता स्वारथ कें भागी करै रे मोरों-मोरों।

कहै कबीर सुनों भाय संतो, एक दिन जंगल डेरों।।”

-- 'अंगिका कें महायात्रा गीत' से।

मध्य कालों के सगुण-भक्तिपंथी कविसिनी में सूरदास, नंददास, मीराबाई आदि कृष्ण-भक्ति-धारा में आगे तुलसीदास, केशवदास आदि राम-भक्ति-धारा में होलें छौंथे। तुलसीदासों के छोड़ी के आरोसिनी भक्त-कवि आपनों काव्य-भाषा में ब्रजभाषा के अलावे अवधी, बुंदेलखंडी, भोजपुरी के संगे-संग अंगिका-जैसनों सहेली भाषा के शब्दों के उपयोग करने छै। तुलसीदासों के भाषा एनाके तें अवधी आगे भोजपुरी-प्रधान छैन्, तैयो काँहीं-काँहीं अंगिकाओ मिलै छै।

मुंगेर के कवि भृगुराम मिश्र (१४-मी शती ई.) केरों कृति 'रासबिहार' वही युगों में लिखलें गेलें छेलै। 'रासबिहार' केरों भाषा आयकों अंगिका नाखी लागै छै। हुनको एक दोसरो किताब 'सुदामा-चरित' आगे तेसरो 'दानलीला' के उल्लेखो मिलै छै, जेसिनी के निश्चित रूपे अंगिका केरों कृति मानलें जाय पारें।

भृगुराम मिश्र पुरानीगंज (मुंगेर) में रहै रहौत। हुनको बारे में है जानकारी बुकानन साहेबों के पूर्णिया जिला के सर्वेक्षण-विवरणों में मिलै छै। बुकानन साहेबें भृगुराम मिश्रों के रचना 'रासबिहार' के भाषा मैथिली से भिन्न मानने छै। 'रासबिहार' में कृष्ण के रासलीला के वर्णन छै। दुःखों के बात ई कि आभी ताँय भृगुराम मिश्र के रचना-आर नै मिललें छै। ओकरों खोज होना चाहियो। निश्चय छै कि हुनको रचना मिलला पर अंगिका के क्रमिक इतिहास १४-मी शती ईस्वी से अच्छा बनतियै।

भृगुराम मिश्र -जेन्हें सोम कवि, अचल कवि, बनवारी मिश्र, मधुसूदन -आर कर्ते नी कवियों के उल्लेख मिलै छै, बाकिर हुनकासिनी के नै तें जन्म-स्थानों के पता चलै छै, नै तें समयों के आगे नै तें रचनासिनी के। हुनकासिनी पर खोज होबों बहुत जरूरी छै।

### ३. मध्य-युगीन अंगिका गीति-गाथा-प्रबंध

हिंदी के आदि-युगों में जे रड वीरगाथा-कविता रचलें गेलें रहै वेहें रड अंगिकाओ में गीति-गाथा लिखै के परंपरा कौनी शती से चललें रहै, ई कहबों तें कठिन छै, मतर एतना तें कहले जाय पारै छै कि सिद्ध आगे नाथ कविसिनी के आंगी अपभ्रंश के रचनासनी के बाद आल्हा, लोरिकैन, सोरठी -बृजाभार, नयका बनजारा, कुँवर विजयमल, राजा भरथरी, राजा मानिकचंद, राजा गोपीचंद -आर से संबधित गीति-गाथा-प्रबंधों के परंपरा में उत्तर-मध्य युगों में कयेक-टा नें प्रेम आगे शृंगारपरक गीति-गाथा-प्रबंध अंगिका में लिखलें गेलै। हौ-सब गीति-गाथा

पौराणिक, ऐतिहासिक, जातीय, रोमांचक आदि कयेक तरहों के मिलै छै, जौनी-सब पर विशेष खोज के जरूरत छै।

अंगिका के उत्तर-मध्य युग (१६५० ई. से १८५० ई. ताँय) में लोक-तत्वों के अंतर्गत शृंगारिक गीति-गाथा-प्रबंध रेशमा, राजा ढोलन, नेटुआ दयाल, घुघली-घटमा, सलेल भगत, सती बिहुला, बीसू राउत, जोति तपस्या आदि लिखलें गेलै। यै लेली वे युगों के शृंगारिक प्रेम-गाथा-युगो नाम देलें जाय पारै छै।

हैसिनी प्रेम-गाथा-प्रबंधों के रचना-तिथि ठीक-ठीक निर्धारित नै करलें जावें पारै छै, मतरकि हैसिनी के वर्ण-विषयों के आधारों पर एतना मानबें बिल्कुल ठीक बुझावै छै कि हैसिनी के रचना मुगल-शासन-कालों में भेलों होतै। वै युगों में खाली शृंगारपरक प्रेम-गाथा-प्रबंध के रचना नै भेलै, बलुक बिरह, झूमर, कजरी, जँतसार, बारहमासा, चैतावर, फगुआ -आर शृंगारी गीतो कम रचलें गेलै। है तरहों के रचनासिनी के मौखिक परंपरा खूब चललै आरो अभियें चली रहलें छै।

## रेशमा

'रेशमा' गीति-गाथा-प्रबंधों के कथा-वस्तु से प्रतीत होय छै कि एकरों रचना मुगल-कालों में भेलों छै। एकरों रचयिता केरों नाम अज्ञात छै। एकरा में रेशमा आरो चूहरमल के कथा वर्णित छै।

अनिंद्य सुंदरी रेशमा चूहरमलों के खूबे चाहै रहै। वै चूहरमलों के आगू आपनों प्रणय-प्रस्ताव राखलकै। चूहरमलें कहलकै कि ओकरों भाय हमरों (चूहरमलों के) गुरु-भाय छेकै; यै लेली हौ संबंध नै हुएँ पारें। रेशमा भागली-भागली आपनों भाय लग ऐली आरो चूहरमलों के बात हुनका कन राखलकी। तबें की? रेशमा के भाय आरो चूहरमल में लड़ाय लागी गेलै। वै में रेशमा के भाय मारलें गेलै। हुन्ने चूहरमलें समाधि लै लेलकै। रेशमा योगिन भै गेली आरो चूहरमलों के समाधि लगें आपनों प्राण-त्याग कै देलकी। वै घड़ीं चूहरमलों के समाधि से बोल निकललै -- 'बहिन रेशमा के पूजा पहिने करियहौ, बादों में हमरों।' वही से आभी ताँय रेशमा के पूजा अंग-क्षेत्रों में पहिने होय छै, तबें चूहरमलों के।

रेशमा संयमों के गीति-गाथा छेकै। है कथा से वैदिक यम-यमी के पुरा-कथा याद आबी जाय छै। वहाँ यमी आपनों भाय यमों से प्रणय-याचना करने रहै, जेकरा यमें ठुकराय देने रहै। ई कथाँ प्रेमों पर निव्वार देय

जाय केँ भावो भरै छै ।

रेशमा आरो वीर चूहरमल लोक-देवता केँ रूपों में प्रतिष्ठित छै । 'रेशमा' काव्यों में शृंगार रसों केँ भीतर शान्त रसों केँ प्रतिष्ठा भेलों मिलै छै । युद्ध-वर्णनों में वीर रसों केँ दर्शन होय छै ।

## राजा ढोलन

राजा ढोलन अगिका केँ उत्तर-मध्य-युगों केँ एक दोसरो महत्वपूर्ण गाथा-काव्य छेकै । वै में राजा ढोलन आरो मोरवा केँ कथा कहलौ गेलौ छै । दोन्हू केँ बीहा बचपन्हें में होलौ रहै, जेकरो पता हुनका-आर केँ नै छेलै । सयान होला पर जबे हौ बात मालूम होलै तबे दोन्हू एक-दोसरा सेँ मिलै लेली व्याकुल होय गेलै आरो मिलै केँ चेष्टा करै लागलै । मिलन केँ रस्ता में कते नी रकमों केँ विघ्न-बाधा पड़लै, लेकिन राजा ढोलन सब्भै केँ काटते हुँ गौना कराय केँ मोरवा केँ आपनौ घोर लानलकै ।

'राजा ढोलन' प्रेम आरो विरह केँ गाथा छेकै । एक दिस जहाँ ई गीति-गाथा-प्रबंध तहियाकरो समाजों में प्रचलित बरले बीहा आरो ओकरो दुष्परिणामों केँ संकेतित करै छै वाँही दोसरो ओर प्रगाढ़ प्रेमों दरसावै छै ।

## नेटुआ दयाल

'नेटुआ दयाल' कोनो अज्ञात कवि केँ रचना छेकै । एकरों नायक नेटुआ दयाल आरो नायिका अमरौतिया छेकै । 'नेटुआ दयाल' प्रबंधों केँ 'बहुरा गोढ़िन' आरो 'कमला माय' केँ नाम्हौ सेँ जानलौ जाय छै ।

नेटुआ जातों केँ नेटुआ छेलै । दुखरन केँ बेटा हौ व्यक्ति गरीब दयाल सिंह केँ नामों सेँ जानलौ जाय छेलै । ओकरो बीहा बारों बरिस पहिने बहुरा गोढ़िन केँ बेटी अमरौतिया सेँ भेलौ रहै । अमरौतिया केँ नाम काँहीं-काँहीं धनिया मिलै छै । अमरौतिया केँ बीहा केँ पहिने ओकरी जतेँ बहिनसनी केँ बीहा होलौ रहै हौसिनी केँ दूल्हा केँ भौरा गोढ़िनी 'खाय' गेली रहै । पै लेली नेटुआ गौना लै लें नै जाय केँ कामरू-कामाख्या सिद्धि लै लें गेलै आरो सिद्धि मिलला केँ बाद अमरौतिया केँ विदाय कराय केँ आपनौ घोर लानै लें ससुरार जाय रहलौ छेलै । रस्ता में नाना रडों केँ विघ्न-बाधा पड़लै, मत्तुर देवी माय केँ कृपा सेँ सब विघ्न-बाधा केँ काटते होलौ वै आपनौ पत्नी केँ घोर लै आनलकै ।

नेटुआ दयालों के कथा-वस्तु जादू-टोना से भरलें छै । नायक देवी सा के महिमा से असकरे जादू के लडाय में विजयी होलै । कथा-वस्तु में साग लोक-संस्कृति के झाँकी मिलै छै ।

नेटुआ दयाल के पाठों में नेटुआ के पत्नी के नाम अमरौतिया आवै छै । कुइयाँ पर पानी भरते नेटुआ आरो अमरौतिया के बातचीत जरा देखलें जाय-

-- किए तोरों नाम, कहाँ केरों वासी, के तोरों छेकौ रे बाप ?

काहाँ जाय छें, येहो बताय दे, काहाँ से आवै छौ पाप ?

लागतौ पाप रे तोरा छौड़ा, सूनो में करै छें रे बात ;

डूबै रे चललै आबें सुरुज देव, होलों जाय छै रे रात ।

-- नाम नटुकवा, भदरा के वासी, दुखरनमल हमरों बाप ,

गौना कराय लें जाय छीं हम्में कमला सुमिरि आलाप ।

आपनों बताय दे नाम गे बारी, छने में भरतो गे घैलिया ;

बगलों में ठाढ़ी के छेको तोरी अँचरा ढापने बदनिया ?

-- सोनामंती भौजो हमरी, हमरों नाम अमरौतिया ;

काहाँ में पैबों पानी रे दैबा, सुन्ना भै गेलै कुइयाँ !

बारी मैयो कमला नें गे, बारी मैयो कमला नें,

एतना सुनिए मारलक बान जे रे झमकौआ ;

छने में भरी लेलकी पनिया लुंगा पेन्हीं फलकौआ ;

पेन्हीं पटोरिया छतिया सटी के वितपै छै अमरौतिया ।”

काव्य के लक्षणों पर ‘नेटुआ दयाल’ अंगिका के एक-टा रत्न मानलें जाय पारै छै । एकरा में नेटुआ आरो बहुरा गोंढिन तें उभरले छै, दुखरनमल, भीमलमल, मानिकचंद गोंढी, भागोमंता, नौकर मधुरिया आरो मैनमा के चरित्रो खोललें गेलें छै ।

### घुघुली-घटमा

‘घुघुली-घटमा’ के कवि के नाम अज्ञात छै ; मतर कंठ-परंपरा में ई अभी ताँय चली रहलें छै । यै में छतरी चौहान के शौर्यो के वर्णन होलें छै । वही से ‘घुघुली-घटमा’ काव्य ‘छतरी चौहान’ के नाम्हौ से जानलें जाय छै । संक्षेपों में, एकरों कथा है रड छेकै --

शिशुपाल नामों के एक राजा छेलै । ओकरों बीहा घाटमपुर के शासकों कन होलों रहै । घाटमपुर के कुटी केरों साला सात भाय छेलै । शिशुपाल आरो

सालासिनी में नै पटै रहै । सालासिनी शिशुपालों कें हत्या करी देलकै । शिशुपालों कें पत्नी कोय तरहों से भागी निकललै । होकरों गोड़ भारी छेलै । एक बच्चों जनम लेलकै । नाम पड़लै छतरी चौहान । जबें ऊ सयानों भेलै तबें होकरा मालूम भेलै आपनों बापों कें हत्यारासिनी कें बारे में । हौ आपनों तेज सँभारें नै पारलकै । मामासिनी कें मारी कें आपनों बापों कें हत्या कें बदला लेलकै ।

‘घुघुली-घटमा’ में जहाँ-तहाँ साहित्यिक सौंदर्य निखरी उठलों छै । उपमा में स्थानीय रंजन देखला में आवै छै ।

## सती बिहुला

‘सती बिहुला’ अंगिका भाषा कें महत्तम उपलब्धि छेकै । कथा-वस्तु, भाव आरो भाषा कें विचारों से ई अंगिका कें पहिलों महाकाव्य छेकै । एकरों रचयिता चम्पावासी भीमसेन कें समकालीन केशो साव अंगिका कें पहिलों महाकवि छेलात, है बात मानै में कोय आपत्ति नै । ‘सती बिहुला’ महाकाव्यों कें दोसरों नाम ‘बिहुला-विषहरी’ छेकै । दुहू नामों से है महाकाव्य प्रसिद्ध छै ।

‘बिहुला-विषहरी’ महाकाव्यों कें गीति-गाथा अंग-जनपदीय सीमा से पार सौसे भारत देश आरो विदेशों में प्रचलित छै । ई सगठे कहलों, गैलों, सुनलों आरो गुनलों जाय छै ।

‘सती बिहुला’ बनाम ‘बिहुला विषहरी’ कें रचना १७-मी शती में होलों छै । कवि केशो साव कें प्रामाणिक जीवनवृत्त आरो सती बिहुला महाकाव्यों कें रचना-तिथि पर विशेष शोध करै कें जरूरत छै ।

नौ खंडों में बँटलों ‘सती बिहुला’ महाकाव्यों में महासती बिहुला आरो बाला लखीन्दर कें कथा कहलों गेलों छै । है कथा कें पौराणिक आख्यान ‘सावित्री-सत्यवान’ कें दर्जा मिललों छै । यै महाकाव्यों कें कत्तें नी संस्करण निकली गेलों छै । एकरा में नाग-पूजा, शिव-पूजा-आर कें संगें भारतीय नारी महासती बिहुला कें आदर्श चरित्र उजागर भेलों छै ।

बिहुला कें गीतों में काव्य-कला आरो संगीत-कला कें मौलिक प्रयोग भेलों छै । यै गीतों में शृंगार, करुणा आरो शान्त रसों कें सुंदर समायोजन देखतहैं बनै छै । है गाथा में मध्यकालीन समाजों कें सच कें भाषा मिललों छै । सौसे प्रबंधों कें एकतानता निर्दोष छै । यै आधारों पर हममें एकरा प्रबंध-प्रगीति कें कोटियो में राखै छियै ।

कथा छेकै कि चाँदो सौदागर बड़ा भारी शिव-भक्त छेलात । हुनका से

शिव जी के मानस-पुत्री मनसा विषहरी आपनों पूजा ले ले चाहे छेलै, मतुर वै लेली चाँदो सौदागर राजी नै छेलात । वही लेली साँपों के देवी मनसा (विषहरी) नै चाँदो सौदागरो के छों पुत्रों के साँपों से कटवाय-कटवाय के मरवाय देने रहै । सातमो पुत्र बाला लखीन्दरो के बीहा बिहुला से होला पर सोहाग रात लेली एक-टा जबरजस्त लोहाघोर बनवैलों गेलों रहै ; मतरकि मनसा माँय वाँहूँ एक मनियार साँपों के प्रवेश करवाय के बाला लखीन्दरो के डँसवाय के मरवाय देने रहै ; मजकि सती बिहुला नै आपनों सतीत्वों से खाली आपनों पतिदेव बाला लखीन्दरे के नै, आपनों छवो भैसुरो के जीवित करवाय लेले रहै । चाँदो सौदागरो के आखरिसों में हारी-पारी के मनसा माय के पूजा गछै ले पड़लों रहै । चम्पा नगर (भागलपुर) में आइयो वहाँकरो विषहरी थानों में हर साल नागपंचमी के औसर पर मैना विषहरी (मनसा माय) आरो महासती बिहुला केरों पूजा बड़ी धूमधामों से होय छै ।

लौह-निर्मित गेहों (घरों) में बिहुला के नया बिहैलों बोर बाला लखीन्दरो के डँसै लेली जबे नाग बाबा गेलों छै तबे ऊ (नाग बाबा) ओकरो रूप देखी के मोहाय जाय छै । तखनी नाग बाबा के मुँहों से बाला लखीन्दरो के रूप-वर्णन कवि नै है रड करवैने छै --

“होरे हमे नै डँसइ ले चाहे छियै बाला लखीन्दर के रे ।

होरे राम जे सुमिरि नागा देह परीखै रे ।

होरे केश तोरो देखौ बाला रे चौर ढरकै रे ।

होरे कोन अंग डँसौ बाला रे, माया लागी जाय रे ।

होरे सिर तोरो देखौ बाला रे नारियर फोल रे ।

होरे भौआँ तोरो देखौ बाला रे चढ़लों कमान रे ।

होरे गला तोरो देखौ बाला रे सोबरन कलस रे ।

होरे सीना तोरो देखौ बाला रे मयैन केरों पात रे ।

होरे दाँत तोरो देखौ बाला रे बिजुली छटकै रे ।

हारे मोँछ तोरो देखौ बाला रे भौरा गूँजै रे ।

होरे बाँह तोरो देखौ बाला रे कुन्दल-कुन्दल रे ।

होरे पेट तोरो देखौ बाला रे अरथ भंडार रे ।

होरे आठो अंग देखौ बाला रे अगर चंदन रे ।” -- बिहुला-विषहरी से ।

(काँही-काँही 'तोरो' के बदला में 'तोर' शब्दों के प्रयोग मिलै छै । -ले०)

बाला लखीन्दरों के मृत देह लै के प्राण-दान करावै लेली जैतें हुएँ बिहुलो के मुँहों से बाला के सौंदर्य-वर्णन कवि केशो सावे है रड करवैने छै --

“सिर तोरो देखौं हे सामीनाथ नारियल फल हे ।

भौहाँ तोरो देखौं हे सामीनाथ भमरा के झुंड हे ।

नैना तोरो देखौं हे सामीनाथ चढ़ल कमान हे ।

नाक तोरो देखौं हे सामीनाथ बरछी के नोक हे ।

मुँह तोरो देखौं हे सामीनाथ पुरनिमा के चान हे ।” इत्यादि ।

येहें रड आरो कर्ते नी प्रसंग ये महाकाव्यों में ऐलों छै -- काँहीं कारुणिक, काँहीं शान्त, काँहीं आरो कुच्छू रस ।

### सलेस भगत

‘सलेस भगत’ उत्तर-मध्य युगों के अंगिका गीति-गाथा-प्रबंधों में सबसे बेसी लोकप्रिय छै । ये में राजा सलेस (सहलेस) के त्याग-तपस्या आरो एक लोक-देवता के रूपों में ओकरो प्रतिष्ठित होवै के कथा कहलौं गेलौं छै । ई कथा अंग-जनपदों के अलावा बिहार के आरो-आरो जनपदहो में भिन्न-भिन्न रूपों में प्रचलित छै ।

‘सलेस भगत’ गाथा-काव्य कयेक खंडों में मिलै छै । कथा आवै छै कि पकड़िया के राजा सलेस बारों बरसों से आपनों नैहरा में रही रहली बिहैली जनानी के गौना कराय के जे दिना घोर लानै छै वही दिना राती देवी माय के सपना में मिललौं एक आदेशों पर ऊ मोरंग देश जाय छै, जहाँ पचिया धामिन आरो ओकरी सखी-सहेली सलेसों के आगूँ बीहा केरो प्रस्ताव राखै छै । हौ प्रस्तावों के ठुकराय देला पर पचियाँ सलेसों के बेंतों से पीटै छै आरो बाँसों के चोंगा में बंद करी के एक-टा पोखरी में गाड़लौं लाटों के नीचूँ गाड़ी दै छै ।

ओकरो बाद माय दुर्गा से सपना में हौ घटना के सूचना पाबी के सलेसों के छोटका भाय गोपीचंद, भैगना कालीकंठ आरो छेछना डोम मोरंग जाय छै आरो सब्भे धामिनसनी के विधवा बनाय दै छै आरो पचिया के टुकड़ा-टुकड़ा करी के लाटवाली दुधिया पोखरी में डाली दै छै । कालीकंठें जादू-मंतरों से सलेसों के चोंगा से बाहर करै छै ; मतुर सलेस अंग-देश नै लौटै छै, मोरंगे में रही के विधवा धामिनसनी के देख-भाल करै छै । ओकरा देह छोड़ला पर कालीकंठ, मोतीराम आरो छेछनाँ वाँहीं सलेसों के पिंडी बनाय दै छै । वहाँ आइयो सलेसों के पूजा होतें आबी रहलौं छै ।



अंग-मगधों के सीमा पर सलेस भागतों के एक-टा दोसरो गाथा प्रचलित है, जेकरा में सलेस आरो दबना मालिनो के खिरसा मिलै है।

राजा सलेस खास करी के दलित वर्ग (पासवान जाति) के लोक-देवता के रूपों में पूजित है। मनोकामना पूरे लेली लोगों मनौती मानै आरो पूजै है।

अंगिका केरों सलेस भगत गाथा केरों भाव-संपदा, प्रकृति-चित्रण आरो भाषा-शैली काव्य-शास्त्रीय दृष्टि से साहित्यों के ग्राह्य है। उपमान चुनै में स्थानीय रंजकता भरलौं है। हे गीति-गाथा-प्रबंध केरों लोक-तात्विक महत्व दरसावैवाला एक स्थल यहाँ देलौं जाय रहलौं है --

“छेछन पहलवाने डमरू बजैबे तें करै है ;

कालीकंठें जादू देखैबे तें करै है।

कखनू बानर बनैबे तें करै है ;

कखनू बाघ बनैबे तें करै है।

पैसा - कौड़ी झड़बे तें करै है ;

खूब खेल देखैबे तें करै है।”

. --‘सलेस भगत’ : संपा. डॉ० चौधरी/डॉ० चकोर ; पृ. ३४.

## बाबा बिसू रॉथ (राउत)

‘बाबा बिसू रॉथ’ गीति-गाथा-प्रबंधों के रचना-काल १८-मी शती ईस्वी के उत्तरार्ध मानलौं जाय है। डॉ० रमेश मोहन ‘आत्मविश्वास’ ने १९९१ ई. में बाबा बिसू रॉथ के लोक-गाथा छपैने छोट। हुनी ई लोक-गाथा के नायक बिसू रॉथ के आविर्भाव-काल मुगल बादशाह मुहम्मद शाह के शासन-काल (१७१९-१७५८ ई.) मानने छोट। बाबा बिसू रॉथ गीति-गाथा-प्रबंधों के कथा-सार यहाँ देलौं जाय रहलौं है --

बिसू रॉथों के पिताश्री बालजीत गोप छेलात आरो माताश्री छेलीत चम्पावती। एक बड़ी बहिन छेलीत भागोमन्ती। एक छोटों भाय रहै मन्हौना। बिसू रॉथों के घोर भिट्टी चनेरी सबौर नगरी रहै। बिसू रॉथ आपनों भाय मन्हौना आरो एक दोसरो व्यक्ति नन्हुवाँ के संगे गंगा जी के हौ पार कोशी किनारों के बड़ी पचरासी में बथानी पर रहै रहै। आभी हाले में बिसू के गौना भेलों रहै। कनियैन के लानिये के ऊ फनू पचरासी चललौं गेलै। वहाँ पाँच रास गोरू-माल से नब्बे लाख गाय-गोरू बढैने छेलै।

बड़ी पचरासी के बगलों में एक दोसरो गाँव गढ़ी लोआ लगाम रहै।

जहाँकरों मँडर छेलै मोहन। वै गामों में वें सात सौ गोंढी कें बसैलें छेलै, जेकरासिनी कें मछरी कें धंधा चलै रहै।

मोहन कें माय भौरा मोहन आरो बिसू कें बढलों दोस्ती पर बड़ी खुश छेली। मोहनों कें यहाँ घघरी छौंकी जेवनार उत्सव होवैवाला छेलै। टोला-परोसा कें लोगों कें खिलावै लेली ओकरा दूधों कें जरूरत छेलै। ऊ गेलै बथानी पर। नन्हुवाँ से दूध माँगलकै। नन्हुवाँ कहलकै कि आयकों दूध लै कें मन्हौन भिट्टी चनेरी सबौर चललों गेलै। कहलकै -- “दूधों लेली अनचित नैं करों ; जौनारों बेरी में हमरी गाय चरी कें लौटी जैते धने नरवे लाख हे गाय, लौटिये नी जैतै हो... भाय। सेय हो दादा मालिक ! तों दूधों कें लेली अनचित नैं करों।”

नन्हुवाँ कें वै बातों पर मोहन मँडर खिसियाय कें भरलों-पुरलों खुट्टा पर खाली चुक्का बजारी कें चललै कि बिसू ओकरा पकड़ी कें मारै लें कहलकै। मोहन पिटाय गेलै। बादों में मोहन मँडर आरो ओकरी माय भौरा कें मनौन पर कमला माँय लिलिया बाघिनों कें बिसू कें मारै लेली भेजलकै। लिलिया बाघिनें बौरुनी गाछी तर सुतलों बिसू रॉथों पर आक्रमण कैलकै। बिसूनें माय गहेली कें सुमिरी कें आपनों प्राण तेजलकै।

हुन्ने गढ़ी लौआ लगामों में छाया कें रूपों में बिसू सात सौ बाघों कें लै कें घुसलै। सौसे गामों में हंगामा मची गेलै। सब्भे गोंढी मिली कें बिसू कें बथानी पर गेलै आरो नन्हुवाँ से बोललै --

‘हे रे भाय नन्हुवाँ ! जे भेलै से तें भेबे नी करलै,

आबें हमरा दादा भाय कें मनाय तें देबे नी करें रे... भाय।

नन्हुवाँ बाबा बिसू कें आगू गोंढीसिनी कें गोहार सुनैलकै। बाबा बिसू से जे सनेस मिललै ऊ नन्हुवाँ ओकरासिनी कें कहलकै --

‘हे हो भाय ! तों-सब बाबा बिसूनाथों कें गहवर बनाय कें गाय कें पहिलों अमनियाँ दूध गहवर में चढ़ैबे नी करों हो.... हो भाय !”

तबें, गोंढीसिनीं बाबा बिसू कें मंडप बनाय कें वही दिनों से पूजे लागलै। “तखनीये से सब्भे गोंढी बाबा बिसूनाथों कें ऊँची पचरासी बथानी पर पैहिली गाय कें अमनियाँ दूध चढ़ावें नी लागलै रे... हो... भाय !”

‘बाबा बिसू रॉथ’ लोक-देवता कें प्रतिष्ठा रों काव्य छेकै। वै में बाबा बिसू रॉथों कें लोक-देवता कें रूपों में प्रतिष्ठा मिललों छै। लोक-तात्विक दृष्टि से ई गीति-महाकाव्यों कें महत्व तें छेबे करै छै, एकरा में साहित्यिकताओ कम नैं छै।

## ज्योति तपस्या

'ज्योति तपस्या' लोकदेव-प्रतिष्ठा के एक दोसरो गीति-गाथा-प्रबंध छेकै। ज्योति तपस्या केरों जन्म धर्म-रक्षा लेली भेलों रहै। ओकरों परीक्षा लै लेली देवता लोगें ओकरा कोढ़ी के रूप दै देलकैन्ह। देवता लोगों से अभिशप्त कुष्ठ रोगाक्रान्त ज्योति केनुलिया बनों में जाय के घोर तपस्या कैलकै। बारों बरिसों के तपस्या के बाद ओकरा सरापो से छुटकारा मिललै। तबे ऊ फनू धर्मों के प्रतिष्ठा में लागी गेलै।

ज्योति एक सिद्ध-पुरुष छेलै। दलित वर्ग (पासवान जाति) के एक प्रतिष्ठित लोक-देवता ज्योति के गीत, राजा सलेस नाखी, नै खाली जातीय, बलुक आरो-आरो जाति के गीत छेकै। है गीति-प्रबंधों में झौआ बोन, पोपीपुर, जेहुली बोन, केनुलिया बोन आदि बनों बारो स्थानों के बड़ा मनोहारी वर्णन होलों छै।

अभिशप्त ज्योति के केनुलिया जाय खिना ओकरी पत्नी कुलवन्ती आपनों सामी से की रड कविता के भाषा राखै छै, से देखलों जाय --

“आबे हम्में ऐलियै हे सामीनाथ, बिहौआ ऐलियै तोहरो रे घोर ;  
तोहे तें आबे हे सामीनाथ बिहौआ, केनुलिया बोने हे बास।  
मैया तोरी बिरधा है सामीनाथ, हम्हू तरुनी हे जवान ;  
केनाके हम्में खेपबै हे सामीनाथ, खेपबै जवनियाँ के हे बैस ?”

-- 'प्रदीप प्रभात' संपादित 'ज्योति तपस्या' से।

## ४. अंगिका लोक-नृत्य, लोक-गीत आदि

अंगिका लोक-नृत्यों के साथे गाथा-गीतों के गहिरों संबंध छै। सोरठी-बृजाभार, कमला माय आरनी गीति-गाथा-प्रबंध नाचों में अच्छा उतरै छै। संगीत आरो नाच (नृत्य) कोनो परिश्रमों के काम करै खिना श्रम-निर्भार (परिहार) आकि परिश्रमों से होलों थकौनी के दूर करै के क्रम में जन्मलों चीज छेकै। परोब-तेवहार, उत्सव-आर के औसरो पर हँसी-खुशी आरो उल्लास मनावै के सुंदर माध्यमों के रूपों में नाच-गान (नृत्य-संगीत) उभरै छै। अंगिका भाषा के अध्ययन करला पर लागै छै कि नाच-गान अंगिका के उत्तर मध्य युगों में बेसी करी के रचलों गेलों होतै। वहे समय लोढियारी नाच, जट-जटिन नाच, गोड़िन नाच, करमा नाच, मालिन नारगी, नन्ही-बिन्नी, हिरनी-बिरनी, रमखेलिया, देवलो आदि नाच-गान लिखलों गेलै। तंतर-मंतर के परिवेशों में लोगों में देवी-देवता लेली ललक वैसे तें

अंगिका के प्रारंभिक युग (५००-१२२० ई.) में अस्तित्वों में ऐलै, बाकिर उत्तर-मध्य युग (१६५०-१८५० ई.) में कत्ते नी लोक-देवता-आर के अवतारणा भेलै। हौ-सब तरह-तरह के देवी-देवता के मनौन के नृत्य-गीत वही समयों में लोक-प्रचारों में ऐलै। हौसनी गीत मनौन गीत-गायकों के ढोल, झाल आर कंठ तथा ओझा-गुनी या सयाना या जौनी पर देवी-देवता के भाव आवै छै वैसिनी के आंगिक चेष्टा में बनलौं होलौं छै। पँवरिया या भाट-भाटिन के गीतों के जन्म-कालो येहें छेकै। बीहा, गौना आदि के औसरों पर महिलासिनी गीतों के बोल पर नाचै छै। ऐसनो गीत-नाद वेहें युगों के उपलब्धि छेकै। इहाँ जग्घों के कमी के कारणे हौसिनी नाच-गानों के उदाहरण देबों संभव नै छै। आबें तें हौ रडों के ढेरेसनी प्रकाशन होय चुकलौं छै। एक लोक-गीतों के नमूना लेलौं जाय --

“कोनी गलीं रोपबै ऐली-फूल-चमेली ? कोनी गलीं रोपबै अनार, सखी हे ?  
 कोनी गलीं रोपबै कागजी रे नेमुआँ देखै में जे लागतै सोहान, सखी हे ?  
 बाबा गलीं रोपबै ऐली-फूल-चमेली, भैया गलीं रोपबै अनार, सखी हे ;  
 सामी गलीं रोपबै कागजी रे नेमुआँ, देखै में जे लागतै सोहान, सखी हे ।  
 कोनी मोरी तोड़तै ऐली-फूल-चमेली ? कोनी मोरी तोड़तै अनार, सखी हे ?  
 कोने मोरा चीखतै कागजी रे नेमुआँ, देखै में जे लागतै सोहान, सखी हे ?  
 अम्माँ मोरी तोड़तै ऐली-फूल-चमेली, भौजी मोरी तोड़तै अनार, सखी हे ;  
 सामी मोरा चीखतै कागजी रे नेमुआँ, देखै में जे लागतै सोहान, सखी हे ।।”

परिवारिक-सांस्कृतिक परिवेशों में है गीतों के भाव-सौंदर्य अनूठा छै, एकरा में दू मत नै।

### (३) अंगिका साहित्यों के आधुनिक युग

अंगिका साहित्यों के आधुनिक युग १८५० ई. से आरंभ होय छै। अंगिका भाषा-साहित्यों लेली संगठित विभिन्न मंचों के आधारों पर हममें आधुनिक युगों के नीचे लिखलौं रूपों में विभाजित करै छियै --

- (क) अंगिका साहित्यों के मंच-पूर्व-युग (१८५० ई. से १९५० ई. ताँय) ;
- (ख) अंगिका साहित्यों के मंच-युग (१९५० ई. से १९८५ ई. ताँय) आर--
- (ग) अंगिका साहित्यों के मंचोत्तर-युग (१९८५ ई. से आय ताँय)।

## (क) अंगिका साहित्यों के मंच-पूर्व-युग

मंच-पूर्व-युगों में अंगिका के विकसित भेलों रूप मिलै छै । श्रीमती सोफिया वर्ग के अनुसार, लोक-वार्ता (फोकलोर) के क्षेत्रों में तीन बात आवै छै --

(अ) लोक-साहित्य -- लोक-गीत, लोक-कथा, लोक-गाथा, लोकोक्ति (कहावत), मुहावरा, फेंकड़ा, लोरी, पिहानी (बुझौवल) आदि ।

(आ) लोक-जीवनों के रीति-रिवाज -- संस्कार, अनुष्ठान, पर्व, व्रत, उत्सव, प्रथा, परंपरा, आचार-विचार, मेला-ठेला आदि ।

(इ) लोक-विश्वास आरो मान्यता -- मंत्र-तंत्र, टोना-टोटका, झाड़-फूँक, दुआ-ताबीज, भूत-प्रेत, देवी-देवता, शकुन-अशकुन, मनुष्य-निर्मित चीज, डैन-जोगिन, दिशाशूल, परी-कथा, सपना, भविष्यवाणी आदि ।

अंग-क्षेत्रों में लोक-वार्ता (फोकलोर) के जतें कुल सामग्री मिलै छै हौसिनी से अंगिका भाषा, साहित्य आरो संस्कृति के विशेषता आरो शब्द-संपदा उजागर होय छै । वैसेनी सामग्री में जन्म, छठियारी, मुंडन आदि संस्कारों के गीत, फगुआ, चैतावर, कजरी, बारहमासा गीत, रोपनी, सोहनी, जंतसार आदि के श्रम-परिहार गीत, तीज, जितिया, पिड़िया, छठ, चौकचंदा आदि पर्व-त्योहारों के गीत, लोक-देवता संबंधी गीत, झूमर, झूमटा, झूला, डोमकच, जोगीड़ा आदि के लीला-गीत, विरहा, पँवरिया आदि जातीय गीत, प्रभाती गीत, 'गोरे-गोर बहिया गे लिलिया, कारे सोहो बदनमा रे' -जेन्हों गोदना-गीत, भूत-प्रेत उतारै के गीत, बिख-माहुर झारै के गीत, फेंकड़ा आरो लोरी गीत, क्रीड़ा-गीत, तीर्थ-यात्रा-गीत, मामा-भैगना व्रत-त्योहारों के गीत, झिझिया, सामा-चकेवा के गीत, गोंद-नृत्य-गीत, सँपेरा के गान, सुगना, झरकी, चमाचोटी, बिखझरकी, रेहुआ, जलुआ आदि के स्वाँग-गीत-आर आवै छै । है तरहों के गीतसनी पूर्व-मध्य-युगों के देन छेकै, मध्य-युगों में वैसेनी के विकास भेलों छै । वैसेनी में काव्यों के गुण, रस आरो वृत्ति साफ-साफ मिलै छै । अंगिका केरों अलिखित काव्य-साहित्यों के अनमोल निधिस्वरूप हैसिनी गीतों में जन-जन के सुर मिलै छै, युग-युगों के रंग आरो मन-मनों के तरंग मिलै छै ।

ऐसनो गीतों में देवी-देवता के मनौन, मंगल-कामना आरो आशीर्वादों के उदात्त भाव मिलै छै । प्रकृति के क्षेत्रों में बिखरलें वनस्पति-आर के पूजा, भैरो बाबा, कारू दानो, काली माय, दुर्गा माय, भगवती देवी, वीर हलुमान ऐहनों स्थानीय देवी-देवता के स्तुतियों मिलै छै । मनो-मनों के कसक, टीस, प्रेम, रीति,

हास-परिहास, मनौन, अनुनय, रूप-सौंदर्य आदि के भाव मिले हैं। इहाँ एकरो उल्लेख करी देबो अप्रासंगिक नै होतै कि डॉ० 'समीर' ने १९४८ ई. में, आपनों गामों लग अवस्थित 'सिंहवाहिनी' थानों के देवी के स्तुति में २५ पदों के 'सिंहवाहिनी-स्तुति' लिखी के प्रकाशित कैने रहै जेकरों दोसरों संस्करण १९७१ ई. में छपलौं छै। वै स्तुति के तीन-चार पद देखलौं जाय --

“अनादि अनन्त अम्ब ! अगोचर अतिशय,  
महिमा अपार तोरों, देवी सिंहवाहिनी।  
भगत अनेक नित, विविध कामना चित्त,  
पूजत चरण तोरों, देवी सिंहवाहिनी।  
करै छौं पवित्र मन, आपन भगत जन,  
हरै छौं पातक घोर, देवी सिंहवाहिनी।  
दया के भूखलौं तोरो कण पियासलौं हम,  
कुछू तें करुणा करों, सिंहवाहिनी।  
माँगत 'समीर' वर, हृत्प उज्ज्वल करों,  
गावल स्तुति तोरों, देवी सिंहवाहिनी।”

-- 'श्री श्री सिंहवाहिनी-स्तुति' (डॉ० 'समीर') से।

वै सिंहवाहिनी-थानों में हर साल चैतों में यज्ञ-संकीर्तनों के आयोजन होय छै। मालूम होलौं छै कि वै आस-पासों में है 'सिंहवाहिनी-स्तुति' बड़ी लोकप्रिय छै।

## मंच-पूर्व-युग

है इतिहास लिखै के पहिने हम्मं 'अंगिका : संपूर्ण भाषा, संपूर्ण साहित्य' में अंगिका साहित्यों के प्रारंभिक युग आरंभ से १६०० ई. ताँय, मंच-पूर्व-युग १६०० ई. से १९५० ई. ताँय, मंच-युग १९५० ई. से १९८५ ई. ताँय आरो मंचोत्तर-युग १९८५ ई. से आय ताँय देखैने छियै। अबेँ हौ काल-विभाजनो मे किंचित् संशोधन करी के प्रारंभिक युगों के ५०० ई. से १२२० ई. ताँय मानलें छियै आरो १२२० ई. से १८५० ई. ताँय के अंगिका साहित्यों के दू भागों में राखने छिये -- (क) पूर्व-मध्य-युग (१२२०-१६५० ई.) आरो (ख) उत्तर-मध्य-युग (१६५०-१८५० ई.) ताँय। है काल-खंडों में १८५० ई. से आधुनिक युग शुरू होय छै। सुविधा लेली, यही वास्ते कि १८५० ई. से १९८५ ई. ताँय जनपदीय भाषा-आन्दोलनों के क्रम में अंगिका भाषा-साहित्यों के विकास लेली ढेरसि

मंचों के निर्माण होलै जेतिनी कि आपनों-आपनों स्वतंत्र कार्यक्रम लै के उद्देश्यों के पूरा करै लेली प्रयास कैलकै आरो करी रहलौ छै, कयेक-टा बालो घेरानों में राखी के १८५० ई. से १९५० ई. तक के समयों के अंगिका साहित्य केरों मंच-पूर्व-युग आरो १९८५ ई. के बादों के समयों के मंचोत्तर-युग कहलौ गेलौ छै। बीचों के १९५० ई. से १९८५ ई. के समय मंच-युग कहलौ छै।

## मंच-पूर्व-युग

अंगिका के मध्य-पूर्व-युग (१२२०-१८५० ई.) में अंगिका के जौन सोल बहै रहै ओकरों गति बादो में बनलौ रहलै। १९-मी शती के अंत होतै-होतै अंगिका के पाँच कविरत्न होलौ छौत -- पं. काली प्रसाद पाण्डेय, पं. दर्शन दुबे, पं. बाजितलाल मिश्र, सदुपाध्याय भवप्रीतानन्द ओझा आरो पं. भुवनेश्वर चौधरी 'भुवनेश'।

पं. काली प्रसाद पाण्डेय, पं. दर्शन दुबे आरो सदुपाध्याय भवप्रीतानन्द ओझा पै तीन्हू के कविता के मुख्य आधार रहलै राधा-कृष्ण के प्रेम प्रसंगों के संयोग आरो वियोग शृंगार-भाव। पाण्डेय जी के 'बारहमासा', दुबे जी के 'कृष्ण-लीला' आरो ओझा जी के झूमर आरो घैराँ आइयो आपनों प्रभाव राखै छै। ओझा जी द्वारा लिखलौ शिव-भक्तिपरक झूमरो बड्डी लोकप्रिय छै। पं. बाजितलाल मिश्र भक्त-कवि छेलात।

## पं. दर्शन दुबे (स्व.)

पं. दर्शन दुबे जी के जन्म वर्तमान गोड्डा जिला के वंदनवार गामों में १८७६ ई. में होलौ रहै जिनको निधन १९१२ ई. में होय गेलैन्ह। हुनको पितृश्री के नाम पं. श्रवण दुबे आरो माताश्री के श्रीमती चम्पा देवी छेलै। दर्शन दुबे जी के शिक्षा तें साधारणे मिललौ रहै, मतुर पं. अम्बिकादत्त व्यास-ऐन्हों आपनों शिक्षकों के सान्निध्यों से हुनी संस्कृत, हिंदी आरो काव्य-शास्त्रों के अच्छा ज्ञान प्राप्त करी लेने रहौत। हुनी आपनों जीवनो के कम्मे समयों में हिंदी आरो संस्कृतों में १९-२० टा किताब लिखलें छौत जे-सब अब ताँय अप्रकाशिते छैन। एतने नै, हुनी आपनों बोली अंगिकाओ में 'कृष्ण-लीला' नामों के एक-टा किताब लिखलें छौत, जेकरों प्रकाशन हुनको अग्रज पं. महाराज दुबे के पोता श्री गंगाधर दुबे आरो डॉ० जटाधर दुबे द्वारा जून, १९९७ ई. में करलौ गेलौ छै।

स्व. दर्शन दुबे-विरचित 'कृष्ण-लीला' ८-टा सवैया आरो १९-टा कवित्त जाने कुल २७-टा छंदों में है। आरंभ, मंगलाचरणस्वरूप, एक-टा 'दोहा' से होलें है -- 'वंदि विनायक चरण-युग, श्री शारद सिर नाय ; लिखन चहै छी कृष्ण के, लीला काव्य बनाय।'

'कृष्ण-लीला' के अठमा छंदों के छोड़ी के बाकी सब्हे कवित्त/सवैया में कवि 'दर्शन' के नामों के भोग (भणिता) लागलें है। हुनकों समयों में अंगिका नामों के पहिचान नै होलें रहै। यही से हुनी आपनों 'कृष्ण-लीला' काव्यों के 'निज बोली' के रचना कहने छैन्। हुनकों 'कृष्ण-लीला' ने रीतिकालीन हिंदी कविता के याद दिलावै है। एकरा में राधा के आलंबन बनैलें गेलें है। राधा-कृष्णों के प्रेम-प्रसंग, चीरहरण, वसंत-वर्णन, होली-वर्णन आदि से लागै है जेना दुबे जी ब्रजभाषा के रीतिकालीन कविता के मात करी देने छै। हुनकों होली-वर्णन पद्माकर कवि के होली-वर्णनों के बराबरी पर छै। पद्माकरें देखैने छै --

“फाग के भीर अभीरन में गहि गोविन्द लै गयो भीतर गोरी ;  
भाय करी मन की पद्माकर ऊपर नाई अबीर के झोरी ।  
खोलि पीतांबर कम्मर तैं सुविदा दियो मीड़ि कपोलन रोरी ;  
नैन नचाय कह्यो मुसुकाय लला फिर आइयो खेलन होरी ।।”

कवि दर्शन दुबे जीं देखावै छोट --

“कालिंदी तीर रचि होरी गोप की किसोरी  
झोरी भरि रोरी पिचकारी रंग घोरी छै ;  
धाय श्याम जू के पट छीनि रंग बोरी  
बरसाने बीच लायो गहि बाँह बरजोरी छै ।  
सारी जरि बारी कटि माँहि पहिराइ प्यारी,  
माँग को सँवारि दई भाल लाल रोरी छै ;  
दर्शन जू गाल मली बाँह शकझोरी कहै,  
खेलो श्याम होरी आज, होरी आज, होरी छै ।।”

यै कविता में अनुभाव के कर्ते सुंदर चित्र उतरलें छै। रचनाकारें ब्रज के होरी के बहाना से अंग-क्षेत्रों के होली दरसैने छै।

भाव-संपदा के दृष्टि से सुकवि दुबे जीं एक ओर जहाँ संभोग सिंगारों के संयमों में राखने छै (उदाहरण ऊपरवाला कवित्त) वहाँ दोसरो ओर वियोग सिंगारों में कामिनी के पीर उभारने छै --



“गामन मे गाँवन धमार धधकात धूम,  
घूम-घूम अबीर-गुलाल रंग बरसै ;  
दर्शन जू कंत बिनु कामिनी के तन्त अति,  
पीर के न अंत ई वसंत जिय तरसै ।”

x x x x

“विरह वियोगी तिय लैबै को मलैज पौन  
चाहै तन लागै लगे दाहक विष छावै छै ;  
पंचम नवल राग सरने कोक के कलान  
कुंजन में पुंज-पुंज कोकिलन गावै छै ।”

-- कृष्ण-लीला

राधा-कृष्णों के खिंचाव में काँहीं-काँहीं भावों में ब्रजभाषा के प्रभाव झलक  
छै, मत्तुर काव्य शुद्ध अंगिका भाषा के छैकै।

### बाजितलाल मिश्र (स्व.)

पं. बाजितलाल मिश्र के जन्म संताल परगना (आबे गोड्डा) जिला, महागाना  
(आबे मेहरामा) थाना (बिहार) के अंतर्गत प्रतापपुर गामों में १९०३ ई. में  
होलों रहै।

हुनी अंगिका के विख्यात लोक-कवि छेलात। हुनको कविता झूमर के  
भिन्न-भिन्न धुनों में मिलै छै जेसनी के विषय छेकै लोक-जीवनों के चित्रण। वै  
में भक्ति आरो सिंगारों के परिपाको भेलों छै। शिव जी के भक्ति में लिखलें  
हुनको झूमर अंग-जनपदों के महिला-समाजों के कंठों में लहरै छै --

“शिव जी योगी बनी ऐता हे, ई नै जानलौ ;

भोला योगी बनी ऐता हे, ई नै जानलौ।

शिव जी के बीहा सुनी के आनन्द-उछाह हे,

ब्रह्मा विष्णु इन्द्रदेव चललै बारात हे, ई नै जानलौ ।”

### भवप्रीतानन्द ओझा (स्व.)

वैद्यनाथधामों के नगीचे कुंडा गामों में १८८६ ई. में जन्मलें पं. भवप्रीता-  
नन्द ओझा ने श्रीमती नूना देवी (माताश्री) आरो श्री त्रिपुरानन्द ओझा (पिताश्री)  
के गोदी के उजागर कैने छै। हुनको निधन १९७० ई. में होलैन।  
‘झूमर’ ऐन्हों गीत-विधा छेकै जे कि लोक-जीवनों से जुड़लें रहै छै। ई

सहजे भावों से उभरें है। धुनों के आधारों पर झूमरों के कर्तों नी भेद होय है। ओझा जी झूमर-रचना में पारंगत छेलात। वै में हुनका बराबरी करैवाला कोय नै भेलों है, कहियो होतै तें होतै।

हुनको कविता के मुख्य विषय रहलै राधा-कृष्णों के लीला-गायन, जे कि लोक-जीवनों के दुहू पक्षों -- सुख आरो दुःखों -- के छूवै है --

‘विनती रिझावै कि पिरिती बुझावै, निकुंज बौने ;  
साँझें मिलै लें बोलावै, निकुंज बौने ।’

हुनको गीतों में स्थानीय भाव अनुरजित है। जे कुछ हुनका आगूँ ऐलै वहें-सब गीतों के अंग बनी गेलै। प्रकृति के जतें रूप होना चाहियो, सब्हे हुनको गीतों में उतरलों है। वहें रङ, नारी-मनों के जतें दशा हुएँ पारें, वोहो-सब हुनको झूमर-गीतों में उभरलों है। हुनको झूमर-काव्यों से क्रिया के आधारों पर जो नायिका के भेद-प्रभेद करलों जाय तें ऊ पचासों से ऊपरे होतै। खूबी ई कि सिंगारों के बीचें कवि ओझा जी भक्ति में विभोर आरो तन्मय होय गेलों छोट--

“सपना सगुन देखी, हरखी उठली सखी, दूती से कहथी बतिया ;  
फरकी उठलो बाम अँखिया, आजु रे आवत कालिया।  
उरेखी बाँधली जूरा, लगावली पानक बीरा,  
बिछावली झारी सेजिया, जागी रहली धनी रतिया।  
आजु रे आवत कालिया ।।”

ओझा जी बाबा वैद्यनाथ (देवघर) के सरदार पंडा छेलात। वही से शिव जी लेली हुनको समर्पण के भावों से भरलों कर्तें नी पद छैन् जे कि शुद्ध भक्ति-भावों के कविता छेकैन्ह। हुनको काव्यों में ऐलों अलंकार घिसलों-पिटलों लीकों पर नै लौकै है, बलुक जे कोय अलंकार मिलै है ऊ अनायासे आबी गेलों हेनो बुझावै है। काँहीं-काँहीं उपमा, रूपक, उत्प्रेक्षा, समासोक्ति, लोकोक्ति आदि के समावेशों बड़ा अच्छा भेलों है। हालहै में श्री शंकर मोहन झा ने ओझा जी के काव्यों पर शोधपरक अनुशीलन करी के भागलपुर विश्वविद्यालयों से पी-एच.डी. डिग्री हासिल कैने छोट।

### भुवनेश्वर चौधरी ‘भुवनेश’ (स्व.)

पं. भुवनेश्वर चौधरी ‘भुवनेश’ के जन्म सुल्तानगंजों से १० किलोमीटर दक्खिन ‘बाथ’ गामों में २६ नवम्बर, १८९० ई. में होलों रहै। हिंदी, संस्कृत,

बंगला भाषा के विद्वान् कवि-भूषण 'भुवनेश' जी मारवाड़ी पाठशाला, भागलपुर में १९२० ई. से १९६० ई. तॉय अध्यापन-सेवारत रहलात आरो हिंदी-संस्कृतों के कयेक-टा नें ग्रंथ लिखलकात । आपनों गाँव 'बाथ' में हुनी १५१ पेजों में 'भारती' नामों के एक-टा हस्तलिखित अंगिका-पत्रिका के संपादन करने छोट (१९५७ ई. में) जे कि हुनकों एक विशिष्ट उपलब्धि छेकैन्ह ।

सुकवि 'भुवनेश' जी भक्ति-काव्यों के अंतर्गत शिव, दुर्गा, भगवती आदि के स्तुतिपरक रचना कैने छोट । एक रचना देखलें जाय --

"मैया के महिमा अपार हे, कोय पारो नैं पावै ;

सब सुख-सम्पत्ति-सार हे, सुर-नर-मुनिं गावै ।"

हुनकों कर्ते नी रचना गान्धी जी आरो सुराजों पर छैन् । अंगिका में बाल-साहित्य लिखैवाला पहिलों कवि छोट हुनी । अंगिका में बुझौवल आरो अंतर्लीपिका लिखै के शुरुआत हुनीयें करने छोट । एक अंतर्लीपिका के उदाहरण लेलें जाय जै में सात-टा प्रश्नों के उत्तर एक्के छै --

"कौन शिवाप्रिय पुष्प कौन मुददायक अव्यय ?

के सब जग के नाथ क्रिया छै की निषेधमय ?

के सब जग के प्राण कथी से उड़ै कबूतर ?

के भारत सर्वस्व वहे वर वीर 'जवाहर' ।"

स्पष्ट छै कि एकरा में एक्के शब्द 'जवाहर' में सब्भे प्रश्नों के उत्तर छै : जेना -- 'जवा' (अढ़ौल फूल), 'वाह' (खूब !), 'हर' (महादेव), 'रह' (उल्टाय के), 'हवा' (उल्टाय के), 'वाज' (उल्टाय के, एक पक्षी) आरो 'जवाहर' (सं. जवाहरलाल नेहरू) ।

मंच-पूर्व-युगों में सुकवि 'भुवनेश' जी के शास्त्रीय आरो लौकिक दोन्द छंदों पर समान-अधिकार रहैन् । हुनकों रचना में भाव-प्रकाश यति-गति के अनुरूप मिलै छै --

"होतै सुभग प्रभात रात बितला पर निश्चय ;

पाबी के रवि-किरण झूलतै नलिनी निर्भय ।

यहे सोचते रहै कमल में भौरा जखनी ,

रौंदी देलकै कमल-कुंज हाथी नें तखनी ।।"

-- 'एक साहित्यकार-परिवार' : संपादक-डॉ० 'चक्र' ।

## उमानन्द ओझा (स्व.)

वैद्यनाथघाम (देवघर) के पं. उमानन्द ओझा सदुपाध्याय भवप्रीतानन्द ओझा के समकालीन सुकवि छेलात। एना तें हुनको रचना बेसी करी के बंगला भाषा में छैन्, मतरकि देवघरिया अंगिकाओ में हुनको रचलो कुच्छू कविता मिलै छै; जेना ककि --

“काहाँ सेती आयले भौरा, काहाँ छलें रात रे ?

आरे भौरा, आबें निशि भेलो परभात रे।

भोरे झरलो मधु, रौदें जरै गात रे,

आरे भौरा, काहाँ छलें रात रे ?

एक तो फुटलों हमें, झड़ी के कुसात रे,

आरे भौरा, दोसरें निठुर तोर जात रे।

‘उमानन्द’ कहै भौरा, याही सें निपात रे,

आरे भौरा, के जोड़ें पिरीति तोर साथ रे।”

-- डॉ० मोहनानन्द मिश्र के सौजन्यों सें।

## मंच-युग

अंगिका भाषा-साहित्यों के मंच-युग १९५० ई. सें शुरू होय छै, जेकरों सीमा १९८५ ई. ताँय निश्चित करलें गेलें छै।

### अंगिका भाषा-आंदोलन

बीसमी शती (ई.) के चौथों दशकों में पं. बनारसी दास चतुर्वेदी द्वारा प्रवर्तित आरो पं. जगदीश प्रसाद चतुर्वेदी, महापंडित राहुल सांकृत्यायन, डॉ० वासुदेवशरण अग्रवाल, बाबू वृन्दावन दास आदि द्वारा उत्थित/उत्क्रमित जनपदीय आन्दोलनों के भूमिका के, अंगिका के अस्तित्वों आरो महत्वों के उजागर करै में, स्तुत्य मानलें जाय पारै छै। कलकत्ता सें ‘विशाल भारत’, टीकमगढ़ सें ‘मधुकर’ आरो चतुर्वेदी द्वारा स्थापित ब्रजमंडल सें ‘ब्रजभारती’ पत्रिका निकलै रहै। तीन्हू में जनपदीय आन्दोलन संबंधी निबंध छपै रहै जेसिनीं ये देशों के दोसरो-दोसरो भाषा-भाषी आरनी के जगैलकै। अवध, बुंदेलखंड, गढ़वाल, मिथिला, भोजपुर, मगध, अंग, बज्जि आदि सब्भे जागलै। वै स्थिति में डॉ० लक्ष्मीनारायण सुधांशु, श्री गदाधर प्रसाद अम्बष्ठ, डॉ० माहेश्वरी सिंह ‘महेश’ आरनी आपनों

मातृभाषा अंगिका के संरक्षण आरों संबर्द्धन लेली आगू बढ़लात । हुनकासिनी के पीछूँ डॉ० परमानन्द पाण्डेय, पं. जगदीश मिश्र, श्री नरेश पाण्डेय 'चकोर', श्री मेवालाल शास्त्री, पं. सुरेन्द्र प्रसाद मिश्र, डॉ० तेजनारायण कुशवाहा, डॉ० भुवनेश्वर सिंह 'भुवन', श्री शारदा प्रसाद सिंह 'सैदपुरी', पं. दामोदर शास्त्री, पं. बुद्धिनाथ झा 'कैरव', बाबू सत्येन्द्र नारायण अग्रवाल आरनी के शक्ति जुड़लै । हिनकासिनी में, अंगिका बोली-बोली के प्रचार-प्रसार करै में, डॉ० 'महेश' आरों 'भुवन' जी खास करी के आगू रहलात जबे कि संगठन में अम्बष्ठ जी के हाथ आगू रहलैन् । अम्बष्ठ जी बिहार राष्ट्रभाषा परिषद् (पटना) के एक पदाधिकारी छेलात । हुनका साथे डॉ० परमानन्द पाण्डेय वाँही कार्यरत छेलात । अम्बष्ठ जी के संयोजनों में पटना में १९५६ ई. में 'अंगभाषा-परिषद्' के स्थापना भेलै, जेकरों अध्यक्ष डॉ० सुधांशु, प्रधान मंत्री अम्बष्ठ जी, प्रकाशन-मंत्री डॉ० पाण्डेय आरों प्रचार-मंत्री 'चकोर' जी चुनलौं गेलात । हममें (डॉ० कुशवाहाँ) 'अंग प्रान्तीय साहित्य-सम्मेलन' के नामों से एक-टा दोसरों संस्था १९६४ ई. में स्थापित करलियै । ओकरों अध्यक्ष कविराज विद्यानारायण शास्त्री होलात । ई संस्था के तरफों से शिकारीपाड़ा, पथरगामा, पीरपैती, हवेली खड़गपुर, अमरपुर, ककवारा (बाँका), बनगाँव (सहरसा), मुजवरताल (मनिहारी) आरनी स्थानों में कयेक-टा अधिवेशन होलै, जेसिनी से अंगिका के प्रति लोगों में रुझान पैदा होलै । वही संस्था के एक प्रस्ताव (११ दिसंबर, १९७३ ई.) के अनुसार 'अखिल भारतीय अंगिका भाषा सम्मेलन' स्थापित करलौं गेलै जेकरों अध्यक्ष डॉ० माहेश्वरी सिंह 'महेश', उपाध्यक्ष कवितराज विद्यानारायण शास्त्री, डॉ० सत्येन्द्रनारायण अग्रवाल, डॉ० परमानन्द पाण्डेय, डॉ० नरेश पाण्डेय 'चकोर', डॉ० भुवनेश्वर सिंह 'भुवन' आरों महासचिव डॉ० कुशवाहा चुनलौं गेलात ।

वहें रड, १९७३ ई. में अखिल भारतीय अंगिका विकास सम्मेलन, सेमापुर (कटिहार/पूर्णिया), १९७८ ई. में अखिल भारतीय अंगिका साहित्य-कला-मंच, भागलपुर आरों अखिल भारतीय अंगिका विकास सम्मेलन नाथनगर (भागलपुर), १९८१-८२ ई. में अखिल भारतीय अंगिका विकास मंच, भागलपुर, जान्हवी अंगिका साहित्य-संस्कृति-संस्थान, सुल्तानगंज, १९८३ ई. में अंगिका सांस्कृतिक परिषद्, बोकारो (बिहार), १९८४ ई. में अंगिका साहित्य सम्मेलन, भागलपुर, समय साहित्य सम्मेलन, पुनसिया (बाँका), भाषा-संगम (दुमका), उदित अंगिका साहित्य परिषद्, देवघर आरनी संस्था आरों संगठनों के जन्म भेलै । हैसिनी सब्भे मंचों

के कार्यक्रम सराहनीय रहलै। यै-सब से मंच-युगों के नामकरणों के सार्थकता सिद्ध होय छै।

### मंच-युगों के अंगिका कविता :

मंच-युगों के काव्य-कृति-सब में 'खोंड़-पतार' (सदानन्द मिश्र 'साहित्यक साँढ'), 'पनसोखा' आरो 'सती-परीक्षा' (सुमन सूरु), 'माटी के चेत', 'पंचरड चोल', 'रौदा के दूब', 'कानै छै लोर' (उचितलाल सिंह), 'पछिया बयार' (परमानन्द पाण्डेय), 'अंग-दर्शन' आरो 'सवर्णा' (तेजनारायण कुशवाहा), 'भोरको लाली', 'किसान : देशों के शान', 'अंग-लता' आरो संपादित 'अंगश्री' (नरेश पाण्डेय 'चकोर'), 'कच' (अनिल चन्द्र ठाकुर), 'लोक-गीता' (लक्ष्मणसिंह चौहान), 'गीतांगिका' (कमला प्रसाद उपाध्याय 'विनोद') 'गीत-लहरी' (परमानन्द प्रेमी), 'करिया झूमर खेलै छी' (अमरेन्द्र), 'शिव जी हीरो बनों हे' (अच्युतानन्द चौधरी लाल'), 'ऐंगना उतरलै चाँद' (अनिल शंकर झा आरो खुशीलाल मंजर-संपादित), 'गुमसैलों धरती' (सुरेन्द्र मिश्र 'परिमल'), 'गीत-नाद' आरो 'गीत गामों के' (श्रीस्नेही सच्चिदानन्द), 'पछिया पुकारै छै' (खुशीलाल मंजर), 'गुमार' (गुरेश नोहन घोष 'सरल'), 'चिन्ता' (रघुनन्दन झा 'राही'), 'घैरकों' (भुवनेश्वर सिंह 'भुवन'), 'भोर भेले आबै छै' (सीताराम दास), 'प्रतिनिधि अंगिका कवि' (रघुनन्दन झा 'राही' / सुभाष चन्द्र 'भ्रमर'-संपादित), 'पुष्पहार' (नवीन चन्द्र शुक्ल) आदि प्रकाशित भेलै।

यै-सब में 'सती-परीक्षा', 'सवर्णा', 'कच' आरो 'चिन्ता' प्रबंध-काव्य छेकै। 'सवर्णा' मंच-युगों के श्रेष्ठ महाकाव्य मानलौ गेलौ छै। यै में सूर्य आरो सूर्य-गत्नी संज्ञा आरो हुनकासिनी के कथा रूपक के भाषा में कहलौ गेलौ छै। ई ग्रंथ बिहार सरकारों के राजभाषा विभागों से पुरस्कृत होय चुकलौ छै।

'सती-परीक्षा' में सीता जी के चरित्रों के उदात्तता, 'चिन्ता' में समकालीन विचार-धारा आरो 'कच' में कच आरो देवयानी के मनोदशा के अभिव्यक्ति भेलौ छै। बाद-बाकी काव्य-कृति विविध छंद, शिल्प आरो शैली के परिधानों में सामाजिक विसंगति, भ्रष्टाचार, 'सेक्स' (काम), भूख, जातिवाद, ढोंग, ढकोसला, आतंकवाद, धार्मिक उन्माद, नारी केरों व्यथा-कथा से भरलौ तें छेबे करै, राष्ट्रीय एकता आरो साम्प्रदायिक सद्भावों के संदेशो दै छै। ऐन्हों रचना से रचनाकारों के समसामयिक प्रवृत्तियो प्रकट होय छै। श्री प्रभातरंजन सरकार 'आनन्दमूर्ति',

महर्षि मेंही, संत शाही, स्वामी चरणदास आरनी संतों के अंगिका पद आरो बनन ये युगों के विशिष्ट उपलब्धि रहलै।

### मंचोत्तर-युग

अंगिका भाषा-साहित्यों के मंचोत्तर-युग १९८५ ई. के बाद शुरू होय छै। ये युगों में अंगिका के दुइ-तीन ठो नया राष्ट्रीय मंच मिललै, जेना कि अखिल भारतीय अंगिका भाषा एकता परिषद्, भागलपुर ; अंगिका शोध-संस्थान, बनमनखी/सेमापुर (कटिहार) ; अखिल भारतीय अंगिका साहित्य विकास परिषद्, जयमंगल टोला, साहु परबत्ता (नौगछिया) -आर। अंगिका के राष्ट्रीय पहिचान दे लेली सब्भे लब्बों-पुरानों संस्थाभिनी के एक-टा समेकित मंच अंगिका अभियान समितियो उभरी ऐलै, जेकरों राष्ट्रीय महाधिवेशन १० अप्रिल, १९९४ ई. के राजधानी दिल्ली के गान्धी शान्ति प्रतिष्ठानों में संपन्न भेलै। वै औसरो पर हौ अभियान-समिति के संयोजक डॉ० तेजनारायण कुशवाहा ने हौ महाधिवेशनों के उद्देश्य आरो कार्यक्रमों के राखते होलों कहलकै कि आंगी/मागधी प्राकृत/अपभ्रंश-जनित बंगला, असमिया, उड़िया के स्वतंत्र भारतों में स्थान मिली गेलों छै, भोजपुरी आरो मैथिली सरकारों के गृहमंत्रालयों से आश्वस्त होय चुकली छै आरो अंगिका आपनों अधिकार लै लेली खाली उत्सुके नै, प्रयत्नशीलो छै। वही लेली अंगिका केरों है अभियान दिल्ली ताँय आबी गेलों छै।

मंच-युगों में अंगिका में विविध विधाओं में साहित्य-सृजन करै के प्रवृत्ति तें लोगों में जागबे करलै, आकाशवाणी के प्रसारणों में अंगिका के शामिल करै के, विश्वविद्यालयों में आरोसिनी जनपदीय भाषा नाखी अंगिकाओ के स्थान दिलवावै के आरो अंगिका अकादमी के स्थापना सरकारी स्तरों पर करवावै के आन्दोलनों होते रहलै। यैसिनी में पहिलका याने आकाशवाणी के प्रसारणों में अंगिका के शामिल करवावै में कुच्छू दूर ताँय सफलता मिललै जबे कि आकाशवाणी के भागलपुर केन्द्रों से अंगिकाओ में थोड़ों-बहुत प्रसारण होवै लागलै। दोसरो तरफ अंगिका भाषा-साहित्यों के विश्वविद्यालयों में स्थान दिलवावै लें वै बीचों में विभिन्न संस्था/मंचों से प्रस्ताव पास करी-करी के आरो बिहार-विधान-मंडल आरो भारतीय संसदों में प्रश्न उठाय-उठाय के सरकारों के धेयान आकृष्ट करवैते गेलों रहलै। वही बीचों में एक विशेष बात ई भेलै कि डॉ० माहेश्वरी सिंह 'महेश', डॉ० डोमन साहु 'समीर', डॉ० तपेश्वर नाथ, डॉ० श्याम सुंदर घोष आरो डॉ० अमरेन्द्र के हस्ताक्षरों से

एक-टा ज्ञापन १२ जुलाई, १९८९ ई. के, एक 'डेपुटेशनो' के माध्यमों से, भागलपुर विश्वविद्यालयों के कुलपति महोदयों के देलों गेलै आरो ओकरा कार्यरूपों में अनवावै लेली भागलपुर विश्वविद्यालय आरो बिहार अन्तर विश्वविद्यालय बोर्ड, पटना से; खास करी के डॉ० समीर (उदित अंगिका साहित्य परिषद्, देवघर के अध्यक्ष) द्वारा, अपेक्षित संपर्क बरोबर राखलों गेलै। परिणामस्वरूप भागलपुर विश्वविद्यालयों के कुलाधिपति (राज्यपाल, बिहार) के विज्ञप्ति संख्या - बी एच यू-३/९०-१०८१/जी एस (१) ता० १९ जून, १९९५ द्वारा अंगिका भाषाओ के त्रिवर्षीय डिग्री कोर्स (स्नातक पास/आनर्स) में शामिल करै के मंजूरी मिली गेलै, मत्तुर अंगिका अकादमी के स्थापनावाला प्रयास अभी ताँय अमलों में नै ऐलौ छै जेकरों वास्तें अपेक्षित आन्दोलन अभियों चली रहलों छै। साथै-साथ, बिहार इण्टरमीडिएट एजुकेशन कौंसिलो में अंगिका के स्थान दिलवावै के आन्दोलनों चली रहलों छै।

### मंचोत्तर-युगों के अंगिका कविता

मंचोत्तर-युगों में मंच-युगों के सब-टा प्रवृत्ति बनलों रहलै। आय अंगिका के दोसरों-तेसरों विधाओं के संगें-संग काव्य-विधाओ में सृजन आरो प्रकाशनों में अपेक्षित गति ऐलों छै। यै युगों के कुछ उल्लेख्य काव्य-कृति में 'कागा की संदेश उचारै' (अनिरुद्ध प्रसाद विमल), 'गेना' (अमरेन्द्र), 'ययाति' (नरेश पाण्डेय चकोर), 'जैजात संस्कृति के' (अकेला अनिरुद्ध), 'ज्ञान-गंगा', 'गान्धी-चरित' आरो 'आनन्द-मंगल' (गोपाल कृष्ण 'प्रज्ञ'), 'चटनी' (जगदीश पाठक 'मधुकर'), 'रूप-रूप प्रतिरूप' (सुमन सूरु), 'अँचरा' (नेरेश जनप्रिय), 'चन्द्रहार' (नवीन चन्द्र शुक्ल 'पुष्प'), 'सूरजमुखी' (सूर्यनारायण), 'आपनों बोली आपनों भाव' (कृत्यानन्द), 'अंगिका के प्रतिनिधि कवि' (संपादक गंगा प्रसाद राव), 'फूलों के गुलदस्ता' ('चकोर'), 'अंग-तरंग' (परशुराम ठाकुर 'ब्रह्मवादी'), 'गुड़गुड़ी' (सुरेन्द्र दास), 'स्वाती के मेघ' (वैकुण्ठ बिहारी), 'उध्वरिता' (सुमन सूरु), 'गीत-गंगा', 'सात समन्दर साथ' आरो 'आठ समन्दर आँख' (संपादक अमरेन्द्र), 'जइबै अंग देश' (प्रीतम कुमार 'दीप'), 'कहभौ तें लागतहौ छक दें' (लक्ष्मण प्रसाद यादव बेलहरिया), 'मन्दार बोलै छै' (रामनन्दन विकल), 'ई जिनगी' (भूतनाथ तिवारी), 'चढ़ावा' (अंजनी कुमार शर्मा), 'कवि कालीदास पाण्डेय-कृत बारहमासा' (गोपाल कृष्ण 'प्रज्ञ'), 'पतझड़' (उमेश जी),



'अंगिका के प्रतिनिधि प्रकृति कविता' (संपादक गंगा प्रसाद राव), 'अंग-सँवरी' (संपादक 'अनल'/राज कुमार), 'पछिया पुकारै छै' (खुशीलाल संवर), 'अंग-सागर' (देवेन्द्र दिलवर), 'कृष्ण-लीला' (दर्शन दुबे) आदि विशेष करी के चर्चित छै।

मंचोत्तर-युगों के अभी ताँय प्रकाशित भेलों प्रबंध-काव्यों में 'कागा की संदेश उचारै !', 'ययाति', 'गेना' आरों 'उध्वरिता' खास करी के परिगणनीय छै। 'कागा की संदेश उचारै !' एक विरह-काव्य छेकै, जे प्रबंधों के रूप लेने होलें छै। यै में नायिका 'साँवरी' के विरह-दशा के विशद वर्णन होलें छै, जे कि वही हृदयस्पर्शी छै। 'ययाति', प्रबंध-काव्यों के अंतर्गत, एक-टा खंड-काव्य छेकै। यै में शुक्राचार्य के बेटी देवयानी आरों राजा नहुष के बेटा ययाति के पौराणिक कथा कहलें गेलें छै। 'गेना', कथा-वस्तु आरों शिल्प के आधारों पर, महाकाव्यों के कोटि में आवै छै। एकरों नायक 'गेना' के माध्यमों से एकरों रचयिता नें समाजों में दलितोत्थान के आह्वान करने छै। ई आधुनिक युग-बोधों के एक-टा श्रेष्ठ कृति छेकै। 'उध्वरिता' आधुनिक अंगिका काव्य-साहित्यों के नवीनतम महाकाव्य छेकै। एकरों प्रकाशन से अंगिका के बहुत बड़ों जीवन मिललें छै। तीन खंडों में विभक्त कुल अठारों सर्गों में रचलें यै महाकाव्यों के मुख्य उद्देश्य भीष्म पितामहों के चरित्र-प्रकाशन छेकै। 'उध्वरिता' आधुनिक अंगिका महाकाव्य केरों बृहत्त्रयी में से एक मानलें जाय छै।

## (४) आधुनिक युगों के कवि आरों कविता के संक्षिप्त परिचय

(क्रम यथासंभव जन्म-तिथि के अनुसार)

अंगिका केरों आधुनिक युगों के कविता के साजै-सँवारै में लागलें कवि आरों हुनकासिनी के काव्यगत उपलब्धि पर, संक्षेपों में, प्रकाश डाललें जाय रहलें छै। कोशिश करलें गेलें छै कि कोय कृति/कृतिकार छूटी नै जाय। तैयो वै में कोय व्यवधान होय जाय तें वै लेली विनम्र क्षमा-याचना। त्रुटि-विच्युतियों के परिमार्जन समय पर करलें जैतै।

## गदाधर प्रसाद अम्बष्ठ (स्व.)

श्री गदाधर प्रसाद अम्बष्ठ के जन्म खगड़िया जिला केरों गोगरी भिरी बिल्ली गामों में १९०३ ई. में भेलों रहै। हुनी बिहार राष्ट्रभाषा परिषद् (पटना) में १९५६ ई. ताय अनुसंधान-पदाधिकारी छेलात। आधुनिक अंगिका के उन्नायकों में हुनको नाम उल्लेखनीय छै। हुनके संयोजनों में १९५६ ई. में अंगभाषा-परिषदों के स्थापना पटना में भेलों रहै, जौनी में हुनी प्रधान मंत्री आरो सुधांशु जी अध्यक्ष छेलात। मूल रूपों से हुनी बिहार में अंगिका भाषा आन्दोलनों से जुड़लें एक ऐन्हों व्यक्ति छेलात जे सचमुचे 'नेता' संज्ञा के चरितार्थ करने छोंत।

अम्बष्ठ जी एक प्रतिभासंपन्न कवियो छेलात। हुनी महाकवि कालिदासों के सुप्रसिद्ध गीति-प्रबंध 'मेघदूत' के समश्लोकी अनुवाद अंगिका में कैने छोंत। हुनको हौ कृति अंगिका में अनुवाद-साहित्यों के खाता खोलै छै। उल्लेखनीय छै कि कोय भारतीय आर्य-भाषा हुँ या दक्खिनों के तमिल, तेलुगु, मलयाली या कन्नड़ भाषा, सब्भै के लिखित साहित्यों के आरंभ अनुवादे से होलें छै।

अनुवाद-कला के जौन गुण होना चाहियो ऊ-सब अम्बष्ठ जी के कृति में मिलै छै। 'मेघदूत' मंदाक्रान्ता छंदों में छै। अम्बष्ठ जी वही छंदों में मेघदूतों के अंगिका-अनुवाद करी के आपनों प्रतिभा के उजागर करने छोंत। एक उदाहरण लेलें जाय -

“ऊ सैलों पे विरह-दुःख से दुबरो देह होलों,  
(हौ) जक्ष केरों कनक-बलिया हाथों से खुलि गेलै।  
आषाढ़ों के प्रथम दिवसे देखलकै मेघ-माला,  
हाथी जेना पर्वत -सिखरें दाँत(ँ) से ढूस लेतें।।”

हुनको 'पतझड़' जीवनो के स्वरूप समझै के कविता छेकै। एको मुख्य रस शान्त (रस) कहलें जाय, मतुर आरोसनी रसो के सुआद मिलै छै।

## उमेश चन्द्र चौधरी (स्व.)

पं. उमेश चन्द्र चौधरी संस्कृत आरो हिंदी के अध्यापक छेलात। हुनी हिंदी, संस्कृत, बंगला आरो अंगिका में समान रूपों से रचना कैने छोंत। हुनको कृति 'कैकेयी' पर बिहार सरकारें 'बिहारी ग्रंथ लेखक पुरस्कार' देने रहै। 'कैकेयी' हिंदी में छै। पं. भुवनेश्वर चौधरी 'भुवनेश' उमेश जी के आपनों चाचा रहैन्। हुनको प्रतिभा के जगावै में हुनको पूरा हाथ रहै।

उमेश जी अंगिका में गद्य आरो पद्य दोन्हू लिखने छोट। 'चौबे जी के गप' स्तंभ-लेखक के रूपों में हुनी 'गुलाबी जी' कहलैलें छोट। अंगिका में लिखलें हुनको काव्य-कृति 'पतझड़' के नामों से १९९७ ई. में प्रकाशित होलें छै। ओकरों अलावे अंगिका में लिखलें हुनको ढेरसनी कविता 'अंग-माधुरी' में छपलें छै। फनू, 'चकोर' जी-संपादित 'एक साहित्यकार परिवार' में सुकवि उमेश जी के बारों-टा अंगिका-कविता प्रकाशित भेलें छै। वै में सुधांशु जी आरो दिनकर जी के प्रति श्रद्धांजलि स्वरूप कविता 'टुटलै टू वीणा के तार', 'भुरुकवा' आरो 'वसंत' के संगे 'पतझड़' -ओं के एक अंश छै।

'पतझड़' उमेश जी के प्रबंध-काव्य-कृति मानलें जाय पारै छै। एकरा एक बोध-गीति-काव्यों के कोटियो में राखलें जावें पारें। मानव-जीवनों में सुख-दुख ऐतें-जैतें रहै छै। दुखों में घबड़ाना नै चाहियो। कोय-ने-कोय समय सुखो ऐबे करतै। बहुत-कुछ येहें रडों के भाव लेने प्रतीक भाषा में 'पतझड़' केरों रचना भेलें छै।

"पतझड़ छै संकेत नया कोंपल गाछी में आवै के ;  
नया फूल-फल, नया रंग, आनन्द नया उमगावै के ।  
दुख के बाद सुखो आवै छै, होली - हुल्लड़ आवै छै ;  
पतझड़ छेकै शान्तिदूत सुख के सदेश सुनावै छै ।।"

भाषा आरो छंद पर उमेश जी के पूरा अधिकार छैन्। अलंकारों के प्रयोगों में बेसी सौंदर्य हुनको रचना में लौके छै ।।

रूपक - "कोयल करिया रंग छै, मोहै सगरो जहान,  
बिजली पीतांबर के भान दरसावै छै ;  
रस के समुद्र उमड़ै लें नभ-मंडल में,  
घन-घन के नादों में बाँसली बजावै छै ।  
बौगला के पाँती मोती-माला सोहै केसों पर,  
विविध विलास मुक्त रस बरसावै छै ;  
सावनों में बादलों के रूप धरी 'श्री उमेश',  
ब्रज के बिहारीलाल नन्दलाल आवै छै ।।"

-- 'एक साहित्यकार परिवार', पृ . २८.

## श्रीनन्दन शास्त्री

श्रीनन्दन शास्त्री के जन्म लखीसराय भिरी नन्दनगामा गामों में १९१४ ई. में भेलै। हुनी अंगिका के वयोवृद्ध कवि/गीतकार छोट। हुनको अंगिका कविता मगही के कर्ते नी संकलनों में छपलें छैन्। हुनी शुद्ध अंगिका बोलै छोट आरो अंगिकाये में कविता करै छोट। हुनको कविता लोक-छंदों में छै। हर कविता लय/तालों में बँधलें छै। सखी पत्र शैली में रचलें हुनको 'खेत के फूल' के महाकाल-गीत के रूपों में खूबे प्रशंसा मिललें छै। 'पतरी' के आखिर में हुनी कहलें छोट --

“केकरा देखैयो सखि ! आपन दुर्गतिया ई ?

सुनतौ के बिपतला केँ हाँक गे ?

दुनियाँ केँ आँख एखन पत्थल केँ आँख सखि !

कान दोनों भीत केँ सुराख गे।

ऐलों हे समैया ई विनास केँ, हे सखि !

जीयै केँ नै आस हौ सखि !

लिखियौ अब कोन बतिया ?”

येहें रड 'अरिया पर थिरकै किसनमा', 'नया जदना केँ जोड़ी', 'रोपा गीत', 'रोपा केँ दिन हौ दाय गे', 'मस्ती में झूमै हौ धान' ओगैरह गीतों केँ नामे सेँ लागै छै कि गीतकार शास्त्री जी की रड लोक-रंगों में रँगी गेलें छोट। हुनको ऐलों हे समैया', 'जीयै केँ नै आस हौ' आरनी में मगही केँ पुट छैन्।

श्रीनन्दन शास्त्री जी मूल रूपों में स्वतंत्रता-आन्दोलन, खेतिहर-किसान आरो मजूदर-आन्दोलन आरो लोग-वेदों केँ दुख-दरदों केँ कवि छेकात। साँय-बहू सेँ संबंधित एक-टा गीत देखियै --

“खोजै केँ नोकरिया छोड़ें फिकिरिया, बाँधों कमरिया ना ;

तोहर हरवा हमर कुदरिया सेँ बनतै कियरिया ना।

मिटतै बिपतिया, हटतै आफतिया देश-जहनमा सेँ ना ;

तोहर डिगरिया ओ हमर कुदरिया में चमकतै सोनमा ना।।”

## हलधर चौधरी 'दीन' (श्री)

मिश्रपुर, कुमैठा (भागलपुर) -निवासी पं. हलधर चौधरी 'दीन' केँ जन्म २ अप्रिल, १९१४ ई. केँ भेलै। हिनको अंगिका कविता पाण्डुलिपिये में छैन्। हिनी

'अंग-माधुरी' में पहिलों दाफी १९७० ई. में छपलें छौत । 'जानवर आर आदर्श-शीर्षक आपनों कविता में हिनकों कहनाम छैन् -

" उठाय के सिर, हिलाय के कान, सटाय के मुँह, ऊ बैलें सोचलकै कि -  
कहिनों छै ई मानव महान् ! आरो, हममें सब दिन से - लांछित उत्पीड़ित,  
ओकरहै शब्दों में, पशु - भरलें अज्ञान !"

- 'अंग-माधुरी', दिसंबर, १९७० ई.

## दामोदर चौधरी (शांस्त्री)

पं० दामोदर चौधरी के जन्म भागलपुर जिला के बभनगामा (नौगछिया) गामों में २७ फरवरी, १९१६ ई. में होलें छेलै । हुनी संस्कृत के विद्वान अध्यापक आरो कवि तें छेबे करलात, हिंदी आरो अंगिकाओ के सिद्धहस्त कवि छेलात ।

चौधरी (शांस्त्री) जी अंगिका के हिमायती छेलात । हुनका में प्रबंध-काव्य लिखै के क्षमता छेलै ; मतुर हुनी अंगिका में कुछए कविता आरो मुक्तक लिखी के स्वर्ग सिधारी गेलात ।

अलंकारों से सजलों-सँवरलों सुष्ठु भाषा में लिखलें हुनकों एक-टा मुक्तक यहाँ देलें जाय रहलें छै जे कि 'आँसू' के छंदों में छै --

"पीबी के घोर अँधेरा, ऊषाँ दै छै इँजोरा ;

सज्जन भी जहर पियै छै, बाँटै छै सुधा - कटोरा ।"

## हंस कुमार तिवारी (स्व.)

हिंदी के मँजलों होलें शिष्ट परंपरा के कवि हंस कुमार तिवारी केरों पहिचान अंगिकाओ में छै । हुनकों जन्म हुनकों नानाश्री के नगर नाथनगर (भागलपुर) में १९१८ ई. में होलें रहै । हुनी हिंदी आरो बँगला के चर्चित विद्वान् कवि-लेखक तें छेबे करलात, अंगिका लेली हुनकों हृदयों में अपार प्रेम रहै । हुनी अंगिका के एक पूर्णतः विकसित भाषा के रूपों में देखै के प्रबल इच्छा राखै छेलात ।

पं. हंस कुमार तिवारी बिहार राष्ट्रभाषा परिषद् (पटना) के निदेशक के पदों के सुशोभित कैने रहौत । हुनकों देहावसान २७ सितंबर, १९८० ई. के होय गेलै ।

तिवारी जी के अंगिका कविता पत्रिका आरनी में कभी-कभार छपलें मिलै छै । 'अंग-लता' कविता-संग्रहों में प्रकाशित हुनकों एक रचना 'गीत बरसात के'

अंगिका कविता-साहित्यों में मानक कविता के स्थान रखे है --

“गुइयाँ,

विष बोरी सुइयाँ ई सावन के कुहियाँ ।

रही-रही बदरा बैमान बड़ी गरजै ;

बरजे नै सुनै एक मानै नै अरजे ;

बरसै अकास आरो जे तरसै री भुइयाँ ।

मचै मेह - माँदर पर रिमझिम के कजरी,

अगिनबान मारै री नावनगर बिजरी ;

मन कलकै छलकैने लोचन-मटकुइयाँ ।” इत्यादि ।

### भिखारी ठाकुर ‘अधूरा’ (स्व.)

श्री भिखारी ठाकुर ‘अधूरा’ के जन्म गोड्डा जिला के रुंजी गामों में ५ अक्टूबर, १९१९ ई. में भेलों छेलै । हुनको मृत्यु १० सितंबर, १९७६ ई. के होय गेलै । हुनी हिंदी आरो अंगिका में कविता करै छेलात ।

‘अधूरा’ जी के साहित्य-साधना प्रशंसनीय छै । अंगिका के पत्र-पत्रिका में रूपलें हुनको कविताँ पाठक आरो श्रोतासिनी के विभोर करतें रहै छेलै । हुनको जीवता कयेक-टा काव्य-संकलनों में छपलें छै । काव्य-गुण आरो अलंकार-योजना हुनको कविता के सिंगार छेलै । हुनको ‘अगरबत्ती’ कविता में अगरबत्ती के मानवीकरण बड़ी बढ़िया भेलें छै --

“हम्में अगरबत्ती छेकाँ ;

भारत रों मुकुट - मलयागिरि पर - हमरों बास ।

मलयानिल छेकै हमरों स्वास ।

हमरा तोड़ी दें, मचोरी दें या कि आगिन लगाय के जारी दें,

हम्में सुगंध देतहैं रहभौँ ;

कैन्हें कि - हम्में छेकाँ भारतीय ल ल ना ।”

व्याजस्तुति के भाषा में हिनको भावों के अभिव्यक्ति देखलें जाय --

“हम्में बड़का वीर छी/सब कामों में मीर छी ;

छाँकलों पापड़ दाँतों से तोड़ी, पटकी के तोड़ाँड़ी सीसी ।

केक-बिस्कुटों के बात नै पूछें, चाकलेट खाय छी मीसी !

बोडगों नै, गंभीर छी !”

-- अंग-माधुरी, मई, १९७५ ई. ।

## लक्ष्मण सिंह चौहान (श्री)

श्री लक्ष्मण सिंह चौहान जी के जन्म प्रसन्नडों (हवेली खड़गपुरी, मुंगेर/जमुई) में १९२० ई. में होलें छैन्। हिनी अंगिका के एक सिद्धहस्त हस्ताक्षर छेकात। हिनको लिखलें 'लोकगीता' शीर्षक काव्य-कृति प्रकाशित छैन् जे कि ६७ पेजों में छै। वै में लोक-धुनों पर रचलें हिनको गीत संकलित छै। एनाके तें लागै छै कि श्रीमद्भागवतगीताये लोकगीतों के रूपों में रूपान्तरित छै, मतुर वोन्हों बात नै छेकै। हों, महाभारत आरो श्रीमद्भागवतगीता के आधार वै में जरूरे रहलें छै।

'लोकगीता' अंगिका गीति-परंपरा में महत्वपूर्ण स्थान राखै छै। माधुर्य आरो प्रसाद गुणों से युक्त 'लोकगीता' खाली सुकवि चौहानों के कठे के नै, जन-जन के कंठों के सिंगार छेकै। यहाँ कवित्त छंदों में रचलें रूपक आ उत्प्रेक्षा के एक-एक उदाहरण देलें जाय रहलें छै।

रूपक - "भारत के मूलधन गीता-गंगा-गैया-मैया ;  
आरो धन धूल केरों तूल हो साँवरिया ।"

वै में आनुप्रासिक छटा के सुंदर निर्वाहो भेलें छै।

उत्प्रेक्षा - "अधर पर टुहू-टुहू लालियो विराजै रामा,  
मनहु कमल-दल छोर हो साँवरिया ।"

## प्रभातरंजन सरकार 'आनन्दमूर्ति'

महासंभूति प्रभातरंजन सरकार के भौतिक देह वैशाखी पूर्णिमा १९२१ ई. के रेल-नगरी जमालपुर (मुंगेर) में मिललें रहै आरो अवसान २१ अक्टूबर १९९० ई. के भेलै। हुनको पिताश्री लक्ष्मीरंजन सरकार आरो माताश्री आभारानी सरकार अध्यात्म आरो दर्शन में खूबे रुचि राखै छेलात, जेकरों प्रभाव हुनकासिनी के दुलरुआ नुनू प्रभात पर पड़लै।

'आनन्द-मार्ग' जैन्हों अंतर्राष्ट्रीय संस्था के प्रवर्तक आरो संचालक श्री प्रभातरंजन सरकार के ख्याति 'आनन्दमूर्ति' के नाम से बेसी छै। हुनी एके संग सामाजिक, दार्शनिक, राजनीतिक, क्रान्तिकारी कवि आरो भाषाविद् छेलात। विविध विषयों पर हुनको २५० से बेसी ग्रंथ प्रकाशित छै। 'वर्ण विज्ञान', 'वर्णविचित्रा' आरो 'शब्दचयनिका' - ई तीन-टा ग्रंथ भाषाविज्ञानों पर छै।

'आनन्दमूर्ति' जी ने अंगिका के एक स्वतंत्र भाषा बतैने छै। 'प्रभात-संगीत' के नामों से प्रख्यापित हुनको ५०१८ गीत खाली बाँगला, हिंदी, संस्कृत, उर्दू,

अंग्रेजी, मैथिली आरु मगहीये में नै, बलुक अंगिकाओ में छै । वैसिनी अंगिका गीतों में अंगभूमि लेली हुनको अपार प्यार अभिव्यक्त होलों छै ; जेना --

‘हे माय अंगभूमि ! तोरे लेली जान कबूल करै छियै ।’ (पद-संख्या ४०८९),  
‘अंगभूमि सुंदरता-भूमि, एन्हों देश धरती में पैबों नाहि ; x x x तन-मन तोरा लेली सौंप देलियै, साँस अंगों-आकाश में जैतै बहि ।’ (पद-संख्या ४२०६) ।

महागीतकार आनन्दमूर्ति जी के अंगिका भाषा-प्रेम देखलों जाय --

“अंगभाषा मोर मधुर समान,  
माय सम मातृभाषा सुमहान ;  
आबों बंधु ! एय ठाय सुनौ मोर गान,  
अनूप अंगभाषा मानै छै महि ।”

अंगिका में रचलों ‘प्रभात-संगीत’ सरकार जी नै आपन्हें सुर-लय-बद्ध करने छोट, जे कि देश-विदेश में गैलों जाय छै । अंगिका ‘प्रभात-संगीत’ के वर्ण्य विषय छेकै - अंग भूमि-महिमा, अंगिका भाषा-महिमा, परम तत्त्व, गुरु, शिव, श्रीकृष्ण, राधा, वर्तमान परिवेशगत स्थिति आर ; मूल रूपों में भक्ति आरु प्रेम-तत्त्व कहलों जाय । हुनको भाव आरु शिल्प में नवीनता देखलों जाय छै । आधुनिक अंगिका काव्य-साहित्य लेली हुनको देन अत्यधिक मूल्यवान् मानलों जाय पारें । हुनी अंगिका के एक स्वतंत्र भाषा तै मानन्हें छै, देश-देशान्तरो ताँय एकरों व्याप्ति आरु विस्तारो करने छै ।

### परमानन्द पाण्डेय (डॉ०)

डॉ० परमानन्द पाण्डेय अंगिका के मूर्धन्य कवि आरनी में परिगणनीय छोट । हिनको जन्म भागलपुर जिला के रामपुर भगवान (भँड़ोखर) में श्रावण शुक्ला सप्तमी, सं. १९७९ वि. (१९२३ ई.) में होलों छै । हिनी बिहार राष्ट्रभाषा परिषद्, पटना में सेवारत छेलात । अखनी आपनों सेवा-निवृत्त जीवन पटना में बिताय रहलों छोट ।

पाण्डेय जी अंगिका के बहुमुखी रचनाकार छेकात । गद्य आरु पद्य दोन्हू में हिनको रचना भेलों छै । हिनको प्रकाशित कृतिसिनी में ‘सात फूल’, ‘दिश के बचावो हो’, ‘पछिया बयार’, ‘प्रथम अंगिका व्याकरण’ (हिंदी में) आरु ‘अंगिका के भाषिक अध्ययन’ मुख्य छैन् । अंगिका भाषाविज्ञानों पर शोध करी के हिनी भागलपुर विश्वविद्यालयों से डी. लिट्. के उपाधि हासिल करने छोट । ऊ एक स्पृहणीय शोध-ग्रंथ छेकै जेकरों प्रकाशनों के प्रतीक्षा छै ।



'पछिया बयार' में पाण्डेय जी द्वारा समय-समय पर लिखलें सैंतीस-टा अंगिका कविता संकलित छै। कुल ६४ पेजों कें है किताबों कें प्रकाशन १९७६ ई. में भेलों छै। 'पछिया बयार' कविता कें कुछेक अंश देखलें जाय --

“धमी-धमी बहै भैया पछिया बयार हो,  
पछिया बयार हो, पछिया बयार हो।  
तोहरोँ असराँ रही छै किसान हो ;  
पसरलों चास छै खेत - खरिहान हो ;  
बूँट गहुम जों केरों लागलों पथार हो,  
रौदी में घूमी-घूमी करै छियै दौनी,  
टप-टप घाम चुवै करतें ओसौनी ;  
ताक नैं मानै भैया रात-भिनसार हो।”

कहलें जाय पारै छै कि 'पछिया बयार' कें रचना आपनों भाषा कें नुँगा-पटोर में कोय ऊँचों भाव या कल्पना या सौंदर्य कें महीनी तें नैं लेने छै, तैयो इतिवृत्तकता में लोक-जीवन यै में जरूरे झलक मारै छै। येंहें कारण छै कि हिनकों गणना एक रससिद्ध कवि कें रूपों में होय छै।

### आनन्द शंकर माधवन (आचार्य)

अमरावती (मंदार विद्यापीठ) कें योगी आचार्य आनन्द शंकर माधवन दक्खिन-उत्तर भारतों कें मिलन-सेतु छेकात। हिनी १९४५ ई. में लोगों में जन-जागरणों कें सदेश प्रसारित करै लेली मंदार पर्वत भिरीं 'मंदार विद्यापीठ' ऐन्हों शिक्षण-संस्थान स्थापित करी कें जन-सेवा-रत छोंत।

माधवन जी कवि, लेखक, संपादक, चिंतक आरो विचारक छेकात। हिनी अंगिका बोलै आरो लिखै छोंत। हिनकों अंगिका कविता कयेक-टा संग्रहों में लागलों छै। भाषा आरो काव्य-सौंदर्य कें दृष्टि सें हिनकों एक-टा कविता कें कुछेक पाँती देखलें जाय --

“जे महँगों छै हो सस्तो भी ;  
जल कें देखों, हवा कें बात सोचों।  
प्रतिष्ठा नैं चाहों, अपमान नैं मिलथों।  
धौन जमा नैं करों, गरीबी नैं सतैथों।  
छिपावों नैं/पाप सें बचभें ;  
चाह तजों/शान्ति मिलथों।”

## अभयकान्त चौधरी (डॉ०)

डॉ० अभयकान्त चौधरी मूल रूपों से अंगिका के गद्य-लेखक छेकात। तैयो हिनी अंगिका में ढेरे कविता रचने छोंत जे सब 'अंग-माधुरी' में छपलौ छै।

डॉ० चौधरी के जन्म ३० अगस्त, १९२३ ई. के अखनीको बाँका जिला के डहुआ गामों में भेलौ छै। हिनी आपनों कविता में सामाजिक विसंगति आरो महँगी पर करारा चोट करने छोंत। एँगनों के छपरी पर बोलतें होलौ कौआ से कवि अनुरोध करै छै --

“कौआ, तोहें बहुत बोलै छें ; आबें एतें कैन्हें डोलै छें ?

पहुना केँ नै खाय लें मिलतौ ; तोहरो दाना कहाँ सेँ भेंटतौ ?

महँगी की मामूली भेलै ? सब केँ दुर्गत पूरी गेलै !

कैन्हों केँ दाना हमें खाय छी; पहुना ऐला पर भुखले रहै छी।”

चौधरी जी केँ भाषा बड़ी सरल आरो सुबोध होय छै। गद्य में हिनको जे अवदान छैन् वैसिनी केँ चर्चा यै इतिहासों केँ गद्य-भागों में करलौ गेलौ छै।

## भुवनेश्वर सिंह 'भुवन' (डॉ०)

डॉ० भुवनेश्वर सिंह 'भुवन' केँ जन्म उत्तर भागलपुरों केँ एक सुंदर गाँव 'तिलघी' में १९२४ ई. में तिला-संक्रान्ति केँ दिन भेलौ छै। हिनको रहन-सहन, खान-पान, बोल-चाल सब्भै में अंगिका शलक मारै छै। अंगिकाहै में आपनों भाव-विचार खोलैवाला हिनीयें, डॉ० माहेश्वरी सिंह 'महेश' केँ बाद, दोसरो व्यक्ति छोंत।

'भुवन' जी केँ उल्लेखनीय अंगिका काव्य-कृति छेकै १९८५ ई. में प्रकाशित 'घैरको' आरो १९९४ ई. में प्रकाशित 'खोरना'। 'घैरको' में हिनको २३ कविता कुल २५ पृष्ठों में आरो 'खोरना' में २८८ छंदों में समकालीन शासन पर लिखलौ ९६-ठो व्यंग्य-विंब छै।

विचारों सेँ 'भुवन' जी प्रगतिवादी छोंत। हिनको कविता में मुख्य रूपों सेँ जनवादी विचार-धारा उभरलौ छै। हिनको दोसरो कृति में समकालीन शासन-व्यवस्था पर कठोर व्यंग्य कसलौ गेलौ छै।

'भुवन' जी केँ कविता विंब-प्रधान होय छैन् -- चाहे ऊ कृषि-विंब रहें या व्यापार-विंब या कोनो आरो विंब। हुनको गीत-रचना बड़ा भावपूर्ण होय छैन् ; गीतों केँ भाव-सौंदर्य आयको गरीबी केँ भाषा में मनो केँ मुग्ध करी दै छै ; जेना. कि --

“कत्तें दिन तहतै निनान ?

युगों-युगों सें खटी-मरी कें सौसे दुनियाँ पालै ;

बुतरू भुखलों, घरनी नाँगटी देखी हियरा सालै ।

केहनों ई उलट विधान ?”

हिनी भाषा-शिल्पी छोंत । नर-प्रकृति आरो नरेतर-प्रकृति एक्के संग की रड हिनकों रचना में ससरलों चलै छै, हिनकों एक गीतों में देखै कें लायक छै --

“कोयल संगीत छै उदास ।

मन्है में राखै छी मनो कें बात ;

दिन कटै कानी, छगुनता में रात ;

चिचियावै चिड़ियाँ होथैं परभात,

मुरझैलों कली आ' मरुवैलों पात ।

मलय पवन हपसै हतास ।।”

### डोमन साहु 'समीर' (डॉ०)

संताली, हिंदी, अंगिका, भोजपुरी आदि भाषा कें विद्वान् साहित्यकार डॉ० डोमन साहु 'समीर' मूलतः गोड्डा जिला कें पन्दाहा गामों कें निवासी छेकात । हिनकों जन्म ३० जून, १९२४ ई. कें होलों छै ।

'समीर' जी कें लिखलों 'अंगिका-हिंदी-शब्दकोश', 'अंगिका-व्याकरण' आरो 'समीक्षात्मक निबंध (अंगिका)' स्वतंत्र पुस्तकों कें रूपों में प्रकाशित होय चुकलों छै । अंगिका कविता कें कोय संकलन आभी ताँय नैं प्रकाशित होलों छैन् ; मतुर हिनकों रचलों फुटकर अंगिका कविता हिंदी कें 'आज', 'हिन्दुस्तान', 'संकल्प', 'कंचन-लता', 'साहित्य-भारती' आरो अंगिका कें 'आंगी', 'अंगप्रिया', 'अंगिकाँचल' आदि पत्र-पत्रिका में छपतें रहै छै । सच पुछलों जाय तें हिनी आबें अंगिका कें पर्याय बनी गेलों छोंत, अंगिका कें प्रति समर्पित ।

'समीर' जी अंगिका कें मानक रूपों कें प्रयोग करै छोंत आरो, जे रहें से रहें, झूमर छंदों में खूब खिलै छोंत । प्रकृति कें विविध रूप हिनकों रचना में खूब उभरै छै । हिनकों एक अंगिका कविता (झूमटा) कें नमूना लेलों जाय --

“लहकै पुरवैया कि लरकै बदरिया (२),

रही-रही --

मारै कनखी बिजुरिया, कि रही-रही ।

बरसै जे पनिया कि चूवै अगरिया (२),  
 भरी आनौ --  
 केना खाली गगरिया, कि भरी आनौ ?  
 अमुआँ केँ ठारी पर भोरे भिनुसरिया (२),  
 कुहू - कुहू --  
 बोलै कारी कोइलिया, कि कुहू-कुहू।  
 जिया मोरा सालै कि पिया परदेशिया (२),  
 केकरा सेँ --  
 खोलौँ हिरदा केँ बतिया, कि केकरा सेँ ?”

— ‘अंग-प्रिया’ सेँ।

डॉ० समीर शृंगार आरो भक्ति रसहौ केँ सुकवि छोट। शृंगार रसों केँ कविता पढ़तेँ हुएँ जेना हिनकोँ शृंगारिक भावना मंचों पर उभरै छैन् तेना भक्ति-रसों में पगलों हिनकोँ भक्ति-भावो कविता में उजागर होय छैन्। ‘सिंहवाहिनी-स्तुति’ में कहलौं गेलों छै --

“दुःख-ताप रोग-शोक, तापित अनेक लोग,  
 गहत चरण तोरों, देवी सिंहवाहिनी।  
 कंद-मूल फल-फूल, धूप-दीप-दूध-हीन,  
 चढ़ौआ नयन-लोर, देवी सिंहवाहिनी।”

अध्यात्म-चिंतनों हिनकोँ कविता केँ विशेषता छेकै, जे कि प्रतीकात्मक शैली में मिलै छै --

“एक दीप तें हमरो बरतेँ रहलै घुप्प अन्हारों में ;  
 एक राग तें हमरों बजतेँ रहलै भाव-सितारों में।  
 दीप-शिखा में काँपी-काँपी उठलै परछाहीं केकरौ ;  
 ज्योति मचललै, तैयो तें पुरलै मनुहार जेकरों नै।”

-- ‘साहित्य-भारती’, जन.-मार्च, १९९७ सेँ।

### वचनदेव कुमार (डॉ०)

हिंदी, संस्कृत आरो अंगिका केँ विद्वान् डॉ० वचनदेव कुमार केँ नाम साहित्य-जगतों में आदरों सेँ लेलों जाय छै। अंगिका में हिनकोँ प्रवेश कविता आरो कहानी में संगे-संग भेलों रहै। हिनी अंगिका केँ कयेक-टा व्यंग्य-रचना देने छोट। हिनकोँ ‘नगर-पुराण’ केँ कुछेक पाँती देखलों जाय --

“रात/घरों से मूसा निरास लौटलै ;  
 भोर/घरों में बिलाय उदास बैठलै ;  
 साँझ/ड्रेनपाइप पेंट आरो मुँहों में सिगरेटी छल्ला,  
 कानों में पंपिया केश में कियोकारपिनी बिल्ला,  
 गोड़ों में छुछंदरी जूता आरो सर्ट हीरो-छाप उलल्ला,  
 सिनेमा में खिड़की पर मचावै छै हल्ला,  
 हरिओम् तत्सत् !”

-- 'अंगिका' से।

### कुमार विमल (डॉ०)

गाँव तेंगा, जिला मुगेर (आबें बेगूसराय) के निवासी राष्ट्रीय साहित्यकार डॉ० कुमार विमल छठमे क्लासों से रचना करै छैत। आपनों आत्मकथ्य में हिनी कहै छैत -- “आगू चली के डॉ० माहेश्वरी सिंह ‘महेश’, प्राचार्य कपिल, आचार्य नलिनविलोचन शर्मा, डॉ० लक्ष्मीनारायण सुधांशु आरनी के नगीची संपर्क हमरा साहित्य-सृजन दिसिं सदैव उन्मुख राखलकै।”

हिनी मनो से अंगिका के विकास चाहै छैत। हिनको अंगिका कहानी बेसी चर्चित छैन् ; मतरकि अंगिका में कवितो लिखने छैत। आपनी ‘अंगिका’ नामों के कविता में हिनी लोक-चेतना के माटी में जनमली अंगिका के प्रति शुभ कामना के संकेत देने छैत --

“लोक-चेतना के अधित्यका पर निरमित ई,  
 सरस्वती रों दिव्य सौध में पुष्पमालिका ;  
 लै के चललै कुशल-खेम रों सुभग कामना,  
 गीत-हंसिनी जन-मानस के मधुर अंगिका।”

-- 'अंगिका' से।

### अवध भूषण मिश्र (पं.)

आयुर्वेद, विज्ञान आरो साहित्यों के विद्वान् कवि पं. अवध भूषण मिश्र हिंदी में कयेक-टा प्रबंध-काव्यों के रचयिता आरो कवि-निर्माता छैत। हिनी अंगिका के कोय प्रबंध-रचना तें नै निकाललें छैत, लेकिन अंगिका के पत्र-पत्रिका आरनी में कयेक-टा स्फुट कविता छपवैने छैत।

मिश्र जी के अच्छा अधिकार भाषा आरो छंदों पर छैन् । हिनको कविता में काव्य-कला के दृष्टि से भाव-गांभीर्य आरो शिल्प-सौष्ठवों के अच्छा निदर्शन छै । ये विचारों से हिनको 'अंगिका अनुगीत' देखलें जाय --

“ वनफूल-गुणों के हमें गुणगान करै छी ;  
तोहें राजनीति के के नित नाम कमावों,  
हमें काव्य-देवता के सिंगार करै छी ।”

-- 'अंग-माधुरी' से ।

### मधुकर गंगाधर (डॉ०)

हिंदी कथा-साहित्यों में शीर्षस्थ स्थानों पर समासीन डॉ० मधुकर गंगाधर आपनों बोली के नै भुलैने छोट । हिनी अंगिकाओ में कविता-कहानी लिखी-लिखी के एकरा जिनगी दै रहलें छोट । अंगिका कविता में हिनको कहै के ढंग निराला छै । 'नेता महात्म' कविता में हिनी कहने छोट --

“ सतयुग में होलै एक परम धर्म-जेता, जनमे से नाम पड़लै बच्चूसिंह नेता ।  
त्रेता में बनलै वहें पहुँचलें संत, हुनको शासन में रहै छै वसंत ।  
दुआपर में कहलैलै देवता के देव, ई युग में पालै छै मनो में कुटेव ।  
कलियुग में भोर-साँझ करै छै कीरतन, पीटी-पीटी आपनों मानस के बरतन ।  
सतयुग में ई युग के महिमा छै भारी,साधने छै 'दल', सिद्धि 'बँगला' अरु 'गाड़ी' ।

-- 'अंगिका' से ।

### मनीर शबनम (जनाब)

जनाब मनीर शबनम हिंदी, उर्दू आरो भोजपुरी के संगे-संग अंगिकाओ के कवि छोट । हिनको जन्म साहेबगंज नगरों में १९२६ ई. में होलें छै । हिन्ने पिछलका तीन दशकों से हिनी बाराहाट-ईशीपुरों में रहै छोट ।

'शबनम' जी के अंगिका गजल या दोसरो रचना बड़ा गंभीर, निर्दोष, भावप्रवण आरो प्रभावकारी होय छै । संवेदनशील कवि 'शबनम' जी के एक शेर देखियै --

“दुनियाँ के हाल देखी 'शबनम' बहै छै लोर ;  
अमृत कही के विष पिलावै छै आदमी ।”

-- 'अंग-माधुरी' से ।

## सदानन्द मिश्र 'साहित्यिक साँढ़' (पं.)

अंगिका केँ हास्य-व्यंग्य कवि पं. सदानन्द मिश्र 'साहित्यिक साँढ़' केरों जन्म उत्तर भागलपुर जिला केँ बभनगामा में १९२६ ई. केँ नवंबर महीना में भेलों छै। हिनी एक सेवा-निवृत्त शिक्षक आरो मानव-मूल्यों केँ वितेरा छेकात।

हिनकोँ प्रकाशित अंगिका काव्य-कृति 'खोंड़-पताड़' केँ बहुते ख्याति मिललें छै। अभी ताँय यै किताबों केँ चार संस्करण होय चुकलें छै। यै किताबों केँ रचना-काल १९६५ या १९६६ ई. होतै ; पहिलका संस्करणों में प्रकाशन-तिथि नै देलें गेलें छै। चौथें संस्करणों केँ ६० पृष्ठों में कुल ५०-टा कविता लागलें छै।

'साहित्यिक साँढ़ों' केँ कविता केँ विषय यै जिनगी सेँ जुड़लें जिनिस आरो जीव-जन्तु छेकै। अंगिका काव्य-साहित्यों में हास्य-रसों केँ हिनी पहिलें कवि छेंत। हिनके सेँ अंगिका में हास्य-व्यंग्यों केँ परंपरा शुरू होलें छै।

'साहित्यिक साँढ़' कवि केँ कविता केरों शिल्प तें पुराने छै, मतरकि कथ्य छै नया, जै में हिनकोँ शिष्ट आरो संयमित हास्य केँ दर्शन होय छै ; जेना कि --

'हे रे उड़ीस ! हे रे उड़ीस ! सब दिन केँ आय झाड़बो रीस ।

टेंटी-भर केँ जन्तु छहत्तर आँख मुनतें-मुनतें भुक ;

बाँह पटकतें पीठ उचकइलें पीठ हटइतें जाँधी छुक !

अच्छा बात नै होयतौ आबें चढ़लें जाय छो हमरा खीस ।''

-- 'खोंड़-पतार' सेँ ।

## श्रीरंजन सूरिदेव (डॉ०)

अंगिका, हिंदी, संस्कृत, प्राकृत आरो नेपाली केँ विविध विधा में साहित्य-लेखन में प्रवीण डॉ० श्रीरंजन सूरिदेव केँ जन्म ३ फरवरी, १९२७ ई. केँ शुभेश्वरथान, धौनी (संताल परगना) में भेलों छै। हिनी अंगिका भाषा आरो अंग-महाक्षेत्रों केँ गौरव छेंत। हिनकोँ ढेरेसिनी अंगिका कविता 'अंग-माधुरी' -आर पत्र-पत्रिका में छपलें छै।

हिनकोँ भाषा, भाव आरो शिल्प केँ पहिचान अंगें करने छै। यहाँ हिनकोँ 'ओलहनों' कविता केँ कुछेक पाँती उदाहरणस्वरूप देलें जाय रहलें छै --

"रोहिनी हे !

तोहें तें बड़ी कुलवंती छें ;

मगर तोरा सेँ हमरों कुच्छू शिकायत छै,

तोरोँ चान बहकलें छैन,

झरोखा होय करी कें चुप्पे-चुप्पे चललों आवै छौन,  
 हमरा सूतैवाला कोठरी में ;  
 कुच्छू नैं सोचै छौन कुल आरो धरम,  
 सब केरों गरों रेती दै छौन  
 आपनों किरिन केरों ठंढा-ठंढा हाथों सें  
 हमरों गरम-गरम देहों कें नरम-नरम छूवै छौन !”

-- 'अंगिका' सें ।

### गोपाल मिश्र (पं.)

तारापुर कें धोबई-गामों कें पं. गोपाल मिश्र एक सुयोग्य शिक्षाविद्, कवि आरो लेखक छौत । हिंदी कें किताब 'नेफा के तांडव' सें हिनी अंगिका में ऐलात आरो सुंदर-सुंदर कविता सें अंगिका कें सिंगार कैलकात । हिनकों 'झुनझुन कटोरवा' कविता काफी लोकप्रिय छैन्, जेकरा में आयकों नेता पर करारा चोट करलों गेलों छै । एक कविता --

“हिंदी में बेसी ठेठ अँगरेजीए चलैने  
 दुआरी सें एँगने, नैं कुछु तें कोबी आरू बैंगने,  
 लेने घुरी कें घोर/घरहौं की तरान !  
 हिनी लघु प्राण नैं, महाप्राण ;  
 पटना में मड़वा, दिल्ली मटकोरवा,  
 जेकरे नाँव झुनझुन कटोरवा ।”

### शारदा प्रसाद 'सैदपुरी' (श्री)

श्री शारदा प्रसाद 'सैदपुरी' नौगछिया अनुमंडलों कें सैदपुर गामों कें निवासी छौत । अंगिका कें प्रचार-प्रसार में हिनकों बड़ा योगदान रहलों छै । हिनकों कविता जमीनों सें जुड़लों मिलै छै । भौलीदारों कें दरद देखैतें होलों हिनी भौलीदारों कें भाषा में कहियो दिन फिरै कें बात की रड कहने छौत, से देखलों जाय --

“हमरों समैया एक दिन जरूरे ऐतै, बाबू !  
 तोहरों समैया ऐसनों कबहूँ नैं रहतै, बाबू !  
 आबें नाँही रहतै ऐसनों तोहरों जमनमा हो,  
 छीनी लेल्लहौ कहिने बाबू ! जोतलों जमीनमा हो ?”



### अच्युतानन्द चौधरी 'लाल' (श्री)

पेशा से अधिवक्ता श्री अच्युतानन्द चौधरी 'लाल' अंगिका के कवि छोट। हुनको पहिलो अंगिका गीत 'शिवजी के बरात' मई, १९७७ ई. के 'अंग-माधुरी' में छपलौ छै। हुनको एक गीत-संकलन 'शिव जी हीरो बनो हो' के नामों से प्रकाशित भेलौ छै। वै में शिव जी पर लोक-धुनों पर रचलौ गीत, विद्यापति के नचारी नाखी, लोक-प्रचलित छै। हास्य रसों के अंतर्गत एक-टा गीतों के उदाहरण लेलौ जाय --

“भूत-परेत साथ लेलें, डिम-डिम डमरू बजैलें,  
शिव जी आबी गेलै मैना के दुअरिया में ;  
भाँग-धतूरा खैलें, बूढ़ों बैल सवारी करलें,  
शिव जी आबी गेलै मैना के दुअरिया पर।”

### गुरेश मोहन घोष 'सरल' (श्री)

श्री गुरेश मोहन घोष 'सरल' स्वभावे से कवि छोट। हिनको जन्म अंग-जनपदों के अमरपुर अंचलों के जानकीनगर ओड़ेय गामों में १९२७ ई. में भेलौ छै। हिनको फुटकर कविता पत्रिका-आर में निकलतें रहै छै। एक-टा कविता-संकलनों 'गुमार' नामों से प्रकाशित छैन्। ऊ हास्य-व्यंग्य कविता-संकलन छेकै। प्रकाशन दिसंबर, १९८४ ई. में भेलौ छै, जेकरा में तेरों-टा क्षणिका-सहित कुल २७-टा कविता संकलित छै।

'सरल' जी के कविता के एक-टा बड़ों गुण छेकै सहज संप्रेषणीयता। केकरहौ मनो में हिनको कथ्य सोझे घुसी जाय छै। हिनी काँहीं-काँहीं आपनों वैयक्तिक अनुभवों के बड़ी सरलता से खोललें छोट, जे कि समष्टि लेलियो सही उतरलौ छै। चिंतनशील रहस्यमय गुथी से हटलौ 'सरल' जी आपनों कृतित्वों में राष्ट्रीय चिंतन में लागलौ तें जरूरे आवै छोट। येहें कारण छै कि अनैतिक आरो भ्रष्ट आचरणों से व्यथित हिनको हृदयें समाजों के हेरी के आपनों गुमार निकाललें छै --

“भोटो देलियहौ, जितबो करलहें, मौर-मिनिस्टर बनबो करलहें ;  
धुरदा दै नै चलथौ गाड़ी, डाँड़ी-डाँड़ी जैभें किन्ने ?

की करै लें ऐभें हिन्ने ?  
जात-पाँत के बात भुलैलौ जात-पाँत के याद दिलाय छौ ;

गद्दी खातिर जात गमाय छों, फेंकी देभौं गिरभें हुन्ने !

की करै लें ऐभे हिन्ने ?

-- 'गुमार' सें ।

हिनकों व्यंग्यों कें भाषाँ कतें चोट करै छै, दू पाँती में आगूं देखियै--

“हम्मैं, भाय जी ! कुछ नैं करलाँ !

जेल नैं गेलाँ बूड़ी मरलाँ,

सन् बयालिस कें आन्ही में आँख मुनी कें कूदी पड़लाँ ;

चोर-डकैतो जे-जे गेलों ओकरे तें पौ-बारह भेलों ;

X X X X X X  
तगमा जेकरा जेलों कें छै पेन्शन पाबी गद्गद भेलों !”

-- 'जो रे तहिया' सें ।

‘जो रे तहिया !’ सुकवि ‘सरल’ जी कें एक-टा संस्मरणात्मक आलेख छेकै जेकरों प्रकाशन हालहै में भेलों छै आरो जेकरा में ‘गागर में सागर’ भरलें छै । निचलका कवितांशों में उभरलौ ‘सरल’ जी कें व्यंग्य खास करी कें समझै लायक छै --

“खाय छै सरकारों कें, लै छै सरकारों कें, तोरा दरकार की ?

नहरों कें पानी में पैसहै कें धार छै !

सड़कों कें माटी में एक्कों कें चार छै !

कुच्छू जों बोलों तें नन्हैं कें तार छै !

चुपचाप बैठी रहों, पैभैं तों पार की ? तोरा दरकार की ?”

### जगदीश पाठक ‘मधुकर’ (पं.)

श्रीमती धनेश्वरी देवी रमा आरो पं. अचम्भित पाठक जी कें पुत्ररत्न कें रूपों में अवतरित भेलों पं. जगदीश पाठक ‘मधुकर’ हास्य-व्यंग्यों कें बेजोड़ कवि छेकात । हिनकों जन्म बाँका जिला कें खैरा गामों में अचला सतमी सं. १९८९ वि. (१२ जनवरी, १९३२ ई.) कें दिन होलों छै । हिंदी कें ‘साहित्य-विशारद’ सुकवि ‘मधुकर’ जी हिंदी आरो अंगिका दोन्हू कें सशक्त हस्ताक्षर छोंत । हिनका विक्रमशिला हिंदी विद्यापीठें, हिनकों अंगिका-सेवा पर, ‘कविरत्न’ कें आलंकारिक उपाधि सें सम्मानित करने छै । एक दोसरों संस्था सें हिनका ‘कला-मनीषी’ कें उपाधियो मिललें छैन् ।

‘मधुकर’ जी कें एक-टा किताब ‘चटनी’ प्रकाशित भेलों छैन् १९९० ई.

में। ऊ छोटों-छोटों हास्य-व्यंग्य-प्रधान कविता के संकलन छेकै। हास्य-व्यंग्ये आय-काल सब्भे भारतीय भाषा में खास जोर पकड़लें छै। सुकवि 'मधुकर' जी आपनों हास्य-व्यंग्य-भरलों रचना से अंगिका साहित्यों के अच्छा सजैने छोट। हिनको 'चटनी' कविता-संकलने स्वस्थ मनोरंजन करै छै ; जेना --

“घरनी ऐलै, घोर स्वर्ग होय गेलै --

आरो हममें स्वर्गवासी होय गेलाँ !”

वाह, की रड कसलों व्यंग्य छै एतने-टा में ! समाजों के व्यथा-कथा हिनी 'चटनी' के माध्यमों से खूब कहने छोट। मानव-भूल्य सदाय बनलों रहें, ई 'मधुकर' जी के कविता के कीमती संदेश छैन्।

'चटनी' के अलावे 'मधुकर' जी के कर्ते नी फुटकर कविता पत्रिकासनी में प्रकाशित होते रहलें छैन्।

### महेन्द्र प्रसाद जायसवाल (डॉ०)

पुरानों विक्रमशिला महाविहारों के भिरी भवानीपुर गामों के डॉ० महेन्द्र प्रसाद जायसवाल- हेनों विभूति के जन्म दै के गौरव मिललों छै। माघ, सं. १९९० वि. के हिनको जन्म होलों छै। हिंदी आरो अंगिका के विद्वान् कवि-कथाकार जायसवाल जी अंगिका कविता बेसी नै लिखने छोट ; हिनी मूल रूपों में कहानीकार छेकात, तैयो हिनको कयेक-टा अंगिका कविता 'अंग-माधुरी' में छपलों आरो 'अंग-लता' संकलनों में लागलों छै।

जायसवाल जी के भाषा फरगुनी नाखी उड़ै छै। तद्गुण अलंकारों के भीतर रचलों हिनको 'बिहान' के वर्णन के रसास्वादन करियै --

“ललका अबीर लेपी भागलै भोरकवा, कि भेलै बिहान ।

तान छेड़ै कोइलिया बगाने - बगान ।

हियवा हिंगोर लाल भेलै सरंगवा रों,

जियवा फदाय लाल नदिया तरंगवा रों ;

हुलकै गोसैयाँ मकाने-मकान, कि भेलै बिहान ।

तान छेड़ै कोइलिया बगाने - बगान ।।” -- 'अंग-लता' से।

### सूर्यनारायण (श्री)

भारतीय संस्कृति के अनुगायक श्री सूर्यनारायण जी के जन्म १९३३ ई. में भागलपुर जिला के एकचारी रेलवे स्टेशनों से जरा हटी के साहुपाड़ा दिग्घी में

होलों है। हिनी अंगिका के एक समर्थ कवि छोट। हिनको एक कविता-संग्रह 'सूर्यमुखी' प्रकाशित भेलों है, जेकरों पहिलका संस्करा १९८८ ई. केरों छे कै। जे में 'मइया सरस्वती' आरो 'भारत मइया' सहित कुल ३९ कविता संकलित छैन्। आरंभ में डॉ० बेचन जी के लिखलें गंभीर भूमिका छै, जे में हुनी 'सूर्यमुखी' के विषय-वस्तु के उद्घाटित करने छोट।

'सूर्यमुखी' के कवितासिनी में रचनाकार सूर्यनारायण जी ने कविता के संबंध जीवनों से जोड़ने छै। काल्पनिक चित्रों के अपेक्षा वास्तविक जीवनों के चित्र यैसिनी रचना में बेसी छै। हिंदी के द्विवेदी-युगीन कविता नाखी इतिवृत्तात्मक कविता के माध्यमों से रचनाकारों के दृष्टि मर्मस्पर्शी बनलें छै। एक बनिहारों के आत्मकथा में जहाँ एक दिस ओकरों जीवनों के दुर्दिन दरसैलों गेलों छै वाँहीं दोसरो दिस आशा के किरिनों छिटकैलों गेलों छै ; जेना कि --

“बाघों रड माघों के जाड़ा, दलकै छै हड़ी-हड़ी ;  
केन्हों के झाँपै छै देहों के सीबी के बोरा-चट्टी।

x x x x x x  
समयँ पुकारै छै बान्हों के मिली-जुली के तोड़ें पड़तै ;  
पियासलों खेतों के सुराज के धारों के : " पड़तै।  
तब्बे धरती लोरी गैतै, थिरकी उठतै खेत-खालेहान ;  
स्वर्ग से बढलें होतै है प्राणों से प्यारों हिन्दुस्तान ।।”

देखलें जाय कि राष्ट्रीय भाव-धारा आरो समाजों के उत्थानों के कर्ते सुंदर भाव अभिव्यक्त भेलों छै यै में । रचना में मानक अंगिका भाषा के प्रयोग तें भेले छै, छंद-प्रवाहो बड़ी सुगम आरो सुबोध छै। येहें सुकवि सूर्यनारायण जी के विशेषता छेकैन्ह। देशभक्ति, वीर-रस आरो प्रकृति-चित्रणों हिनको कविता के दोसरो विशेषता छेकै ; जेना --

“भारत माता के लाज मेटें नै देबै। झंडा तिनरंगा के झुकें नै देबै ।।  
कोय रावण आबें, आबें नै पारें। सीता के दामन पाबें नै पारें ।।  
यै सीमा रेखा के काटें नै देबै। भारत माता के लाज मेटें नै देबै ।।

### कमला प्रसाद 'बेखबर' (प्र०)

प्र० कमला प्रसाद 'बेखबर' के जन्म पूर्णिया जिला के धनपुरा गामों में १९३३ ई. में भेलों छैन्। हिनी हिंदी आरो अंगिका में रचना करै छोट।

कवि 'बेखबर' जी जागरूक आरो संवेदनशील कवि छोंत । हिनकों अंगिका कविता भावों में सहज सघन होय छै । आभी ताँय हिनको कोय स्वतंत्र पुस्तक तें नै देखला में ऐलों छैन्, मतरकि पत्र-पत्रिका में हिनकों रचना बरोबरे छपतें रहलें छै । 'बेखबर' जी एक गतिशील रचनाकार छेकात । हिनकों कविता में युगीन विचारों केँ स्वर उभरलें छै । हिनकों व्यंग्य-प्रधान रचना मिट्टों चुटकी नाखी लागै छै --

'हे रे साँप !

तों बड़ा दकियानूस छें !

पुरानों परंपरा में बसै छें

आरो साँप केँ साँपें नै डँसै छें ;

अरे, आदमी केँ तें देख -- ऊ अपना केँ

कतना आगू बढ़ैने जाय छै,

आदमी केँ आदमी खैने जाय छै !

-- 'आंगी', जनवरी, १९९६ ई. ।

'बेखबर' जी केँ कविता में सधलों-सधलों रसों केँ नमूना मिलै छै । एक वीभत्स रसों केँ चित्र देखों --

"आरो, ई नीचाँ में ठढ़ा-ठढ़ा ताकै छै,

पपड़ीदार ठोर सुखलों जीह लै केँ चाटै छै ।

पत्थल केँ गोली रड आँख छै ;

हाथ जेना रोआँहीन गीघ केरों दू पाँख छै ;

देह जेना मसानों केँ लकड़ी

जरलों सुखलों, आरो ऊ अभाव केरों मकड़ी,

सुखलों रोटी प्रेम सेँ चिबावै छै ।"

-- 'अंग-माधुरी', जून, १९७३ ई. ।

## तेजनारायण कुशवाहा (डॉ०)

डॉ० तेजनारायण कुशवाहा केँ जन्म हिनकों नानाजी केँ गाँव सिंघाड़ी (जिला गोड्डा, थाना मेहरामा) में २४ अप्रिल, १९३३ ई. केँ भेलें छै । हिनी हिंदी-संस्कृत में एम.ए., पी-एच.डी, डिप-इन-एड आरो साहित्यालंकार, आयुर्वेदाचार्य आदि कर्ते नी डिग्रीधारी छोंत । मातृभाषा तें भोजपुरी छेकैन्ह, मजकि अंगिका, हिंदी, संस्कृत, अँग्रेजी, बँगला, गुजराती, मराठी, नेपाली, उड़िया, मलयालम-आर कर्ते नी भाषा केँ अच्छा या सामान्य जानकारी हिनका छैन् । हिनी हिंदी, अंगिका

आरो भोजपुरी के ख्यातिलब्ध रचनाकार छेकात । अंगिका में हिनको 'अंग-दर्शन' (१९७३ ई.) 'ओमा' आरो 'सवर्णा' (१९८४ ई.) नामों के काव्य-कृति आरो क्येक-टा गद्य-कृति प्रकाशित छैन् । फुटकर कविता तें कर्ते नी प्रकाशित छैन् तथा रेडियो आरो दूरदर्शनों से प्रसारितो होय चुकलौ छैन् । हाल्हे में हिनी हाई स्कूलों के प्रधान अध्यापकों के पदों से सेवा-निवृत्त होय के साहित्य-सेवा में लागी पडलौ छोट आरो विक्रमशिला हिंदी विद्यापीठ, गान्धीनगर (ईशीपुर, भागलपुर) के कुलसचिवों के आसन सुशोभित करै छोट । ऊ विद्यापीठ केरौ स्थापना हिनके प्रयासों से भेलौ छै । हिनको आपनों गाँव छेकैन्ह भंगाबान (कहलगाँव, भागलपुर), मतुर आबे ईशीपुरहै के निवासी बनी गेलौ छोट । हिनी कर्ते नी साहित्यिक संस्थासिनी से जुड़लौ छोट आरो कर्ते नी संस्थासिनी से सम्मानित/पुरस्कृतो होय चुकलौ छोट ।

कुशवाहा जी एक संवेदनशील आगे उदात्त विचारशील सुकवि तें छेबे करौत, अंग-देशों के ऐतिहासिक महत्ता के प्रामाणिक उद्घाटन आरो अंगिका भाषा-साहित्यों के समेकित उन्नयनों के प्रति एक समर्पित व्यक्तियो छोट । अंगिका भाषा-साहित्यों में हिनको मंचीय आरो लेखकीय अवदान विशेष रूपों से उल्लेखनीय छै । समग्र समरसता के प्रतिपादक डॉ० कुशवाहा के उपलब्धि के सम्यक् मूल्यांकन समय पर जरूरे होतै ।

'अंग-दर्शन' कुशवाहा जी के अंगिका के भौगोलिक काव्य-कृति छेकै, जेकरा में कहलौ गेलौ छै --

“युग-युग से ई अंग-देश के लोग अंगिका बोलै छै ;

ओही भाषा में हिनीसिनी रे भाव हृदय के खोलै छै ।”

'ओमा' एक वैदिक पुरा-कथा पर आधारित एक दूत-काव्य छेकै । एकरा में प्राकृत निश्चेतन पदार्थ (रात) से दूतत्वों के काम लेलौ गेलौ छै ।

'सवर्णा' महाकवि कुशवाहा जी के युग-जीवी अप्रतिम अंगिका महाकाव्य छेकै, जेकरा में सौर-परिवारों के पुराकथा आधुनिक अंगिका-भाषा में, विविध मनोहारी छंदों में रचलौ, बड़ी प्रभावकारी रूपों में उतरलौ छै । आरोसिनी के छोड़ियो देलौ जाय तें एक्के 'सवर्णा' महाकाव्य कुशवाहा जी के पक्षों में 'नास्ति येषां यशःकाये जरामरणजं भयम्' के चरितार्थ करै ले काफी छै । एकरा में त्वष्टा (विश्वकर्मा) -पुत्री सरण्यू (संज्ञा) आरो विवस्वत् (सूर्य) के दाम्पत्यों के पौराणिक कथा-सूत्रों के सहारा लेतें होलौ समर्थ रचनाकार कुशवाहा जी ने उदात्त चरित्र-

सौष्ठव, प्रांजल भाव-धारा, समृद्ध विचार-वैभव, सुष्ठु प्रकृति-सौंदर्य आदि के लौकिक धरातलों पर उतारै के जौन सफल काव्य-कौशलों के परिचय देने छै वैसिनी के प्रशंसा में डॉ० माहेश्वरी सिंह 'महेश', डॉ० अभयकान्त चौधरी, प्रो० ओमा प्रियंवदा, विद्यावाचस्पति कुलदीपनारायण 'झड़प', डॉ० छविनाथ मिश्र, डॉ० उदयनारायण तिवारी, डॉ० विष्णुकिशोर झा 'बेचन', डॉ० विनय मोहन शर्मा, प्रो० भानुदेव शुक्ल, डॉ० नारायण प्रसाद बाजपेयी, प्रो० रामसागर प्रसाद सिंह प्रभृति विद्वानों के अभ्युक्ति एका-पर-एक छै। कथा-वस्तु, भाव, भाषा, छंद, अलंकार आदि सब्भे दृष्टि से 'सवर्णा' एक उत्कृष्ट काव्य-कृति छेकै, जेकरा में 'गागर में सागर' के उक्ति चरितार्थ होय छै। ध्यातव्य छै कि यै महाकाव्यों पर कविवर कुशवाहा जी के बिहार-सरकारों के राजभाषा विभागों के अलावा तीन दर्जन से बेसी संस्थासिनी से पुरस्कृत करलें गेलें छै। एकरा में विभिन्न छंदों के प्रयोग नहला-पर-दहला बनलें छै। लोक-छंदों के बहार तें 'सवर्णा' के गीतसनी में चार चाँद लगाय देने छै -- 'गम-गम गमकै पिया, मंगिया के सिनुरा हो/झम-झम झमकै झुमका आय नु रे की। चम-चम चमकै बिंदिया चन्दन के लिलरा हो/ छम-छम छमकै तिरिया आय नु रे की।' (पृ. ३८)। सात 'किरणों' (खंडों) में रचलें यै काव्यों में स्थान-स्थान पर रूपक, प्रतीक, अलंकार आदि के छटाओ खूबे निखरलें छै। "मौज से रहलें तोरों तिया लहरों में"/"तबें रहतियै दोन्हू पानी के तरों में" (वक्रोक्ति), "तोरों रड तोहीं एक रूपसि, सुंदरि/ मौन गद्गद भेलै रूप पान करि" (अनन्वय), "कोय किरातनी गोड़ मेंहदी लगाय/सेहो मेंहदी हमरो अँखिया समाय" (असंगति), "यामिनी सरकलै/चाँदनी ढरकलै/जल हिलोरा उठै/चाँद छाया रुठै/गोद लेन्हें छहर/वै मनावै लहर" (प्रतीक) आदि उदाहरणस्वरूप लेलें जाय।

'सवर्णा' में कविवर कुशवाहा जी के उदात्त संदेश छैन् --

"मैया, पटैतें रों भारत के धरती,  
बन-बाग-जंगल-नगर - गाँव - परती ;  
हे सतपुरागिरि - विभा भगवती हे !  
रोजे उतारों हमें आरती हे ।।" (५४)

-- 'समीर' ।

### लखनलाल 'आरोही' (डॉ०)

भागलपुर नगर आरो गामों के सीमान्तों पर बसलें बहादुरपुर गामों में जन्म पाबी के वाँही आपनों बचपन बितैलकात आरो जवानी पैलकात डॉ०

लखनलाल 'आरोही' नें। हिनी हिंदी या अंगिका में बेसी कुछ नैं लिखलें छोट, तैयो हिनको जेसिनी कविता प्रकाश में ऐलों छै, हौ-सब अंगिका कें उपलब्धिये मानलों जैतै। हिनी आपनों एक-टा स्तरीय रचना 'नीन नैं आबै छै' में शीत-लहरो कें प्रभाव-क्षेत्रों में एक दिसिं अपना कें आरो दोसरो दिसिं दीन-दुःखिया कें राखी कें कहने छोट --

“मौसमे हवा में/ बरफ घोरी देने छै !  
ठंड केरो बाढ़/आबी गेलों छै/रात छै/  
चारी तरफ सन्नाटा छै।  
हम्मू गरम कपड़ा में दुबकी कें/बिछौना पर  
पड़लों छियै, लेकिन नीन नैं आबै छै ;  
गाँव-घरो कें/ गरीबों कें यादें, हमरा सतावै छै।”

### देवकीनन्दन 'बैरख' (श्री)

श्री देवकीनन्दन 'बैरख' एक शिक्षक-कवि छेकात। अंगिका-आन्दोलनों कें शुरुआती दिनों में हिनी श्री शारदा प्रसाद सैदपुरी कें साथें अंगिका कें प्रचार-प्रसार लेली अच्छा काम करने छोट।

सैदपुर (नौगछिया) कें रहैवाला 'बैरख' जी अंगिका-कविता करै में प्रवीण छोट। हिनको कविता में समकालीन परिदृश्य देखै में आवै छै --

“नीचें-ऊपर पानी जोर, रहौं हम्में सड़कों कें कोर ;  
नैं छै तनिको इँजोर, केकरो के पोंछतै लोर ?”

### उचितलाल सिंह (स्व०)

अंगिका-कविता-सौध कें भरैवाला कविसिनी में श्री उचितलाल सिंह कें अवदान बहुत अधिक मानलों जाय पारें। भागलपुर जिला कें घोघा रेलवे स्टेशनों से थोड़ो-टा हटी कें बसलों ताड़र गामों में ३० सितंबर, १९३६ ई. में पैदा होलों ई सुकुमार फूलों कें भगमानें कम्मे उमरी में १२ फरवरी, १९८५ ई. कें अपना कन बोलाय लेलकै।

श्री उचितलाल सिंह कें चार-टा कविता-पुस्तक निकललों छै -- 'पंचरंग चोल', 'माटी कें चेत', 'रौदा कें दूब' आरो 'कानै छै लोर'। 'पंचरंग चोल' केरो प्रकाशन बुद्ध-पूर्णिमा, २०२६ वि. (१९६९ ई.) कें होलों छै। ५१ पृष्ठों कें वै



किताबों में हुनकों २७-टा कविता छैन् । 'माटी कें चेत' केरों प्रकाशन १९७१ ई. में आरो 'रौदा कें दूब' केरों १९७५ ई. में भेलों छै । 'कानै छै लोर' हुनकों अंतिम कविता-पुस्तक छेकै, जेकरों प्रकाशन १९८४ ई. में भेलों छै आरो जेकरा में २४-टा कविता छै । वेहें रड, ६० पृष्ठों कें 'माटी कें चेत' में ५८-टा आरो ४२ पृष्ठों कें 'रौदा कें दूब' में ३०-टा कविता संकलित छैन् ।

स्व० उचितलाल सिंह लोक-संस्कृति आरो लोक-चेतना कें कवि छेलात । हुनकों गीत लोक-मानस कें सुंदर-से-सुंदर अभिव्यक्ति से भरलें छै । वैसिनी में स्वदेश-प्रेम कें अलावे अंग-क्षेत्रीय प्रकृति -- गाँव, नगर, जंगल, नदी, झरना, पहाड़, गाछ-बिरिछ, लता-गुल्म, धरती-सरंग, समुन्दर, पशु-पंक्षी, गरमी, बरसात, जाड़ा, साँझ-बिहान, फूल-फौर आरनी कें सौंदर्य, पूजा-अर्चा, व्रत-त्योहार, लोक-देवता, लब्बों-पुरानों परंपरा, तंतर-मंतर, जादू-टोना ओगैरह कें मुख्य विषय बनैलें गेलें छै । कुछेक कविता कें विषय यौवन आरो प्रेम-प्रसंगो छेकै, जै में नारी-मौन कें संयोग आरो वियोग शृंगार-भावों कें भाषा देलें गेलें छै ।

श्री सिंह सच पूछें तें रस, अलंकार, गुण, वृत्ति, विंब आरो छंद कें उजागर करैवाला कवि छेलात । रसों में शृंगार, शान्त, करुण, हास्य आरो वीभत्स रसों कें मुख्यता हुनकों कविता में मिलै छै । यहाँ शान्त रसों कें आस्वादन करलें जाय --

“सूना सपाटों में, दूर खपाटों में,  
युगों से खाड़ों छै, गुमसुम चुपचाप --

ठुडों निपत्तों एक गाछ बिकरार ।” -- ‘पंचरंग चोल’, पृ.१९ ।

यै में बिना ठार-पत्ता कें एक गाछों कें योगी कें रूपों में खाड़ों रहै में शान्त रसों कें सुंदर योजना होलें छै । येहें रड, शृंगार रसों में एक वासकसज्जा नायिका कें कौआ से मिललें शुभ संदेशों कें लेलें होलें अभिव्यक्तियो दर्शनीय छै --

‘हे रे कौआ, / तोरे समादों पर / पोछै छी पीढ़ा,  
खड़ाम / चपोतलों महकौआ मूँपोछ / राखै छी अछीनों  
जौल / सब सरजाम झारै-बुहारै छी / कोना-कातर मंदिर  
कें / अछैतें दिनें / सँजौतें छी मानिक-दियरा / चपोतै छी  
सुखलों बाती में / गैया कें घिउरा / कि जलतों निर्द्वन्द्व सगरे  
रात / ओछाय छी सेज / सहैजै छी नैहर कें पठैलों सोहाग  
सनेस / पसावै छी / बीहों फाड़ी तेल । फूलै सिनूर खेखरा कें  
बेल / डारै छी कजरा दुफक्को आँखी में ।” -- ‘कानै छै लोर’ ।

हमरों नजरी में, प्रकृति-चित्रणों में जे स्थान हिंदी में कविवर सुमित्रानन्दन पंत के छै वहेँ स्थान अंगिका में उचितलाल सिंहों के छैन्। सचमुच हुनी प्रकृति के चितेरा छेलात। हुनको हरेक कविता में घुरते-फिरते प्रकृति के कोय-ने-कोय चित्र आबिये गेलों छै।

स्व० सिंह जी के कविता में अनुप्रास, उपमा, रूपक, उत्प्रेक्षा, सदेह, लोकोक्ति, समासोक्ति, विभावना, मीलित आदि अलंकार अनायास भावों से आबी गेलों छै जे कि बड़ा स्वाभाविक लागै छै।

स्व० उचितलाल सिंह जी अंगिका के मर्मज्ञ कवि छेलात। हुनी अंगिका के मिठास पर मुग्ध छेलात। आपनों भाषा के साहित्यिक रूप दै में हुनी सफल होलें छें। हुनको भाषा में प्रसाद आरो माधुर्य दोन्हू गुण मिलै छै। प्रसाद गुण तें हरेक कविता में छै। विशेषणों के प्रयोगों में हुनका महारत हासिल छेलै -- सेहो बासी नै, बिल्कुल टटका, आपनों ढंगों के मौलिक। देखियै --

“अँखुवैलों गीत/मंजरैलों चित/लूवैलों तवा/निसुवैलों निसुवार ;  
गाभिन मौसम, ओसैलों रौद/अनसैलों मोद,  
कुहैलों रूप/लोरैलों धूप/ओझरैलों विचार ;  
मटमैलों गाम/अलसैलों बाँहीं/तोतरैलों गान,  
सुटियैलों, भुटकरलों, पोहैलों भान/बौकड़ों चान ;  
मरुवैलों खुट्टी/चिबैलों भुट्टी/निरौठों बोल,  
कोरयैलों सुधिया/सोन्हैलों एङना/भुटकुरलों कैतका चान,  
पियासलों धुरदा/गदरैलों जानवर/परबैती धूप/सोहागन बैहार ;  
निनैली, अलसैली, अनसैली हवा” आदि-आदि।

### द्विवेदी सच्चिदानन्द ‘श्रीस्नेही’ (श्री)

द्विवेदी सच्चिदानन्द ‘श्रीस्नेही’ जी के जन्म बाँका जिला के अमरपुर थाना के कौशलपुर (कोल बुजुर्ग) गामों में पहिली जनवरी, १९३६ ई. में होलों छै। हिनको पिताश्री छेलात श्री मनमोहन दुबे आरो माताश्री छेलीत श्रीमती कालिन्दी देवी। ‘श्री स्नेही’ अंगिका लेली एक समर्पित व्यक्ति छेका।

‘श्री स्नेही’ जी हिंदी आरो अंगिका दुहू में समान रूपों स रचना करे छें। ‘इमारत की सूरत’ (नाटक) आरो ‘गूँज हिमालय की’ (काव्य) हिनको हिंदी-पुस्तक तथा ‘गीत गामों के’ आरो ‘गीत-नाद’ अंगिका कविता-पुस्तक प्रकाशित छैन्।

‘गीत गामो के’ (१९७८ ई.) के कुल ४३ पृष्ठों में हिनकों ३७ गीत संकलित छै आरो आरंभ देवी के मनौन से भेलों छै। वेहें रड, १९८४ ई. में प्रकाशित आपनों ‘गीत-नाद’ में पारंपरिक अंगिका गीत संगृहीत छै। लोक-धुनों के लब्बों जिनगी दै लेली गीतकार श्री स्नेही जी है किताबों के प्रकाशन करने छौत जे कि स्वागत के योग्य छै।

‘गीत गामों के’ केरों विषय लोक-जीवनों के अंग-प्रत्यंग छेकै। अंग-क्षेत्रों के लोक-जीवनों के सही-सही प्रतिनिधित्व एकरा में संकलित गीतसर्नी करै छै, जे कि यहाँकेरों प्रकृति, समाज आरो संस्कृति से जुड़लें छै। यै में हास, परिहास आरो उल्लास स्वाभाविक रूपे अभिव्यक्त भेलों छै। एना तें कहलें जाय कि ‘गीत गामों के’ मूल रूपों में प्रकृति केरों कविता-संकलन छेकै, जेकरा में प्रकृति के यथातथ्य रूप, उद्दीपन-रूप, अलंकृत रूप आदि सहज भावों से उरेखलें छै। जग्घों-जग्घों पर उपमा, अनुप्रास, रूपक, पुनरुक्ति आदि अलंकारों के सुंदर उपयोग भेलों छै -

“झलमल झरोखा के झालर नाकी

अँचरा डोलै धानों के” (अनुप्रास) ;

“सीसी तुतरू, धम-धम ढोलक, झम-झम माँजर झाल,

नीलों अकासों के पीन्ही चुनरिया गोछी चललि ससुराल” ।

अनुकरणवाचिका पुनरुक्ति के कर्ते सुंदर उदाहरण उपस्थित भेलों छै, यै पदों में, देखलें जाय।

‘गीत-नाद’ किताबों में ‘मनौन’ के अलावे लोक-भजन, पराती, कजरी, बरखा, झूला, झूमर, रास, चैतावर, गोदना, बोलवै, जँतसार, सोहर, गोसाँय, मुड़नों, जनी-गीत, लगन, बेटा समदन, परछन, कन्या निरछन, अठोंगर, सिनुरदान, डकहनू, गारी, कोहबर, बेटा समदन, लोरी, छठ, होरी, रोपनी, कटनी, करमा, बारहमासा, उटका-पैची, निर्गुन, बिसहरी धुन ओगैरह से संबंधित नाना प्रकारों के गीत छै, जे कि सोझे लोक-जीवन आरो लोक-संस्कारों से संबंधित छै। यैसिनी में कर्ते नी गीत आकाशवाणी, भागलपुर से प्रसारित होय चुकलें छै। इहाँ एकटा ‘झूमर’ गीतों के रसास्वादन करलें जाय --

“नदिया के धार बीच गोरियाँ गगरिया पनिया भरै।

फुनगी पै सोभै लाल लाली रे किरनियाँ,

नदिया के माँग भरै मुसकै जवनियाँ ;

चुनरी रँगाय लाल, लौनियाँ उँगलिया मेंहदी रचै।

x x x x

तिरछी नजरिया सें बोरैलै मनमा,  
देखै जवनियाँ तें सुंदर सपनमा ;  
छम-छम नाचै सजनियाँ पैजनियाँ हौले बजै ।  
नदिया कें धार बीच गोरियाँ गगरिया पनिया भरै ।।”

येहें रड, आरो कत्तें नी लोक-जीवनों कें मुग्धकारी चित्र ‘गीत-नाद’ कें गीतसिनी में उभरलें छै । ‘श्रीस्नेही’ जी एक सधलें लोक-कलाकार छेकात, यै में कोय दू-मत नैं ।

### नरेश पाण्डेय ‘चकोर’ (डॉ०)

अंगिका भाषा-साहित्यों कें विकास आरो संवर्द्धन लेली समर्पित डॉ० नरेश पाण्डेय ‘चकोर’ कें जन्म ३ जनवरी, १९३८ ई. कें भागलपुर जिला कें एक गामों में होलें छै । सांख्यिकि-जेन्हों रूखों विषयों में स्नातकोत्तर उपाधिधारी होल्हों पर हिनका में एक संवेदनशील कवि हृदय आरो अंगिका कें प्रति अपूर्व समर्पण-भावना छैन् । पिछलका २७ सालों सें हिनी आपनों बलों पर ‘अंग-माधुरी’ मासिक पत्रिका कें संपादन आरो प्रकाशन करतें होलें अंगिका लेली ऐतिहासिक कीर्तिमान स्थापित कैने छोंत । विक्रमशिला हिंदी विद्यापीठ, ईशीपुर (भागलपुर) नें हिनका ‘विद्यावाचस्पति’ (पी-एच. डी.) कें मानद उपाधि सें सम्मानित करने छै ।

‘चकोर’ जी अंगिका में कविता, कहानी, नाटक, उपन्यास, निबंध, लोक-साहित्य आदि कत्तें नी विधा कें छूने छोंत । हिनकों लिखलें किताब दू दर्जनों सें बेसी प्रकाशित होय चुकलें छै; ‘भोरकों लाली’ (१९७२), ‘किसान : देशों कें शान’ (१९८३), ‘ययाति’ (१९८८) -आर वैसिनी में मुख्य-मुख्य किताब छेकै । हैसिनी हिनकों कविता-पुस्तक छेकैन्ह । ‘भक्ति-पुष्पांजलि’ में हिनकों हिंदी कें साथें कुच्छू अंगिकाओ कें गीत आरो भजन संकलित छै । हिनकों कुछेक भजन ‘राम-जन्मोत्सव’ किताबों में छपलें छै । लोक-साहित्य संबंधी कयेक-टा किताब हिनी डॉ० अभयकान्त चौधरी कें साथें मिली कें प्रकाशित करवलें छोंत । आपनों ‘शेखर प्रकाशन’ (बोरिंग रोड पच्छिम, पटना) आरो ‘अंग-माधुरी’ (मासिक पत्रिका) कें माध्यमों सें कत्तें नी अंगिका-साहित्यकारों कें प्रकाश में लानै कें श्रेय ‘चकोर’ जी कें प्राप्त छैन् । ई हिनकों जीवनों कें एक विशिष्ट उपलब्धि मानलें जाय पारै छै । हिनकों रचनाधर्मिता कें महत्व साहित्यिकता सें बेसी ऐतिहासिकता संबंधी छैन्ह ।

'भोरको लाली' प्रकृति केरों कविता छेकै। यै में भोरको लाली के ४८-टा विब छै। है किताबों के बारे में डॉ० श्रीरंजन चूरिदेव जी नें लिखने छै -- 'निस्संदेह प्रस्तुत मुक्तक-काव्य अंगिका भाषा की भाव-सुकुमारता, मनमोहक विब, मुक्त चितन तथा वैचारिक क्षमता को एक साथ ग्रहण करता है।' हुनको वै किताबे अंगिका के गद्य-गीतों के परंपरा के मार्ग खोलै छै।

किसान : देशों के शान 'चकोर' जी के समय-समय पर लिखलें कवितासनी के संग्रह छेकै। है किताबों के शीर्षके से एकरों वर्ण्य विषय स्पष्ट होय जाय छै। लागै छै कि ई कृषि-विज्ञान या कृषक-जीवनों के कोय पुस्तक छेकै, मत्तुर भीतरों के पन्ना खोलला पर एकरा में काव्य-रस मिलै छै। किसान, किसानों के माटी या किसान-जीवनों से जुड़लें कविता यै में बेसी करी के रहला के कारणे एकरों नाम किसान : देशों के शान' ठीक छै। एकरा में कुल २७-टा कविता छै। विषय-वस्तु, गायन, शैली आरो प्रभाव के दृष्टि से सब-टा कविता सराह लायक छै।

'ययाति' के रचना-प्रक्रिया में इतिवृत्तात्मकता छै। यै में नै तें नहुष के, नै तें देवयानी के आरो नै तें शर्मिष्ठा के चरित्र आपनों ढंगों पर उभरलें छै। वस्तु-संयोजन में लालित्य आरो माधुर्य के अभाव अखरै छै। एक बात येहों कि एकरा में जे कोनो छंदों के उपयोग भेलें छै, सब्भे में यति, गति आरो मात्रा के टूट छै। तैयो, 'ययाति' के रचना से, श्री अनिल चन्द्र ठाकुर के प्रबंध-कृति 'कच' नाखी, अंगिका के है विद्या कोय रड पूरै छै।

'चकोर' जी अंगिका के अप्रतिम आरो बहुमुखी रचनाकार छेंत। 'भोरको लाली' के रूपों में हिनको देन अंगिका कविता-साहित्यों के इतिहासों में सदाय बनलें रहतैन्ह।

'चकोर' जी के 'किसान' कविता के एक पद लेलें जाय --

"आभियों जों नै चेतभें, अन्न बिना भूखें मरभें।

'चकोर' के सहारा चान ; हममें ते छेकाँ किसान ।।"

### सुमन सूरु (महाकवि)

लोक-चेतना के उजागर करैवाला कविसिनी में अग्रगण्य श्री सुमन सूरु जी के जन्म ३१ दिसंबर, १९३८ ई. के बाँका जिला के बौसी थाना केरों गोलहट्टी गामों में होलें छै। हिनी अंगिका भाषा-साहित्य के क्षेत्रों में भारी ख्याति अर्जित

करने छोंत। विक्रमशिला हिंदी विद्यापीठ (ईशीपुर, भागलपुर) ने हिनका 'महाकवि' के विशिष्ट मानद उपाधि से सम्मानित कैंने छै।

कविवर सूरों जी के अगिका-कृति में 'पनसोखा', 'सती-परीक्षा', 'सुभद्रांगी', 'रूप-रूप प्रतिरूप' आरो 'उध्वरिता' उल्लेखनीय छैन्। यैसिनी में 'पनसोखा' आरो 'रूप-रूप प्रतिरूप' हिनको स्फुट कविता-संकलन, 'सती-परीक्षा' आरो 'उध्वरिता' प्रबंध-काव्य तथा 'सुभद्रांगी' उपन्यास विद्या के अंतर्गत आवै छैन्।

'पनसोखा' के पहिलों संस्करण हमरा देखै में नै ऐलों छै, मतुर ओकरो दोसरो संस्करण (१९७३ ई.) के अंतरंग चर्चा से पता चलै छै कि ओकरो पहिलों संस्करण १९७३ ई. से १०-१२ साल पहिने छपलों होतै। दोसरो संस्करणों में हुनी लिखलें छोंत - "नयी 'पनसोखा' में पुरानी 'पनसोखा' की बहुत-सी चीजें छोड दी गई हैं तथा कुछ नयी रचनाएँ शामिल की गई हैं।" यै किताबों में अंतिम कविता 'पनसोखा' लै के कुल ५१ कविता छै। आरंभ सरस्वती माय के मनौन-गीत से भेलों छै --

"मैया हे, तोरों हमें करै छी मनाओन,

ज्ञान-गृहवासिनी हे।"

यै किताबों में 'पनसोखा' के रंगे नाखी नाना भाव-विचारों आरो रूप-रंगों के कविता लागलों छै। हममें कहियो आपनों एक आलेखों में सूरों जी के एक भाव-गीति-लेखक कहने छेलियै। सच्चो, हिनको 'पनसोखा' आरो पिछलका 'रूप-रूप प्रतिरूप' के रचनासिनी भाव-गीतों के कोटि में आवै छै।

'सती-परीक्षा' हिनको खंड-काव्य छेकै। यै में सीता-वनवासों के कथा कहलों गेलों छै जे कि आठ सर्गों में समाप्त होलों छै। यैसिनी आठो सर्ग छेकै -- वाल्मीकि आश्रम में सीता, अशोक वनिका में सीता, बुतरू लव-कुश, भैयारी बातचीत, नैमिष वन में अश्वमेध जग्य, गाबों काव्य बजाबों बीन, लव-कुश के रामायण गान आरो सती-परीक्षा। यैसिनी सर्ग-नाम्है से है खंड-काव्यों के विषय-वस्तु स्पष्ट होय जाय छै, जे कि एक पौराणिक आख्यानों पर आधारित छै; मतुर राम के चरित्रों में एक नया सोचों के संचार भेलों छै, जे कि सूरों जी के मौलिक उद्भावना मानलों जाय पारें। पुष्ट भाव-पक्षों में आयकों सोचों के स्थान मिललों छै यै में। यै विचारों से हिंदी के महाकवि 'हरिऔध' जी के 'वैदेही-वनवास' के तुलना में जे छुटलों छै हौ 'सती-परीक्षा' में छै। यै में खंड-काव्यों के प्रायः सब्हे लक्षणों के निर्वाह होलों छै। 'कच' आरो 'ययाति' के अपेक्षा 'सती-परीक्षा' एक सफल खंड-काव्यों के कोटि में आवै छै।

'उध्वरिता' महाकाव्ये सूरु जी के नामों के साथे जुड़लें 'महाकवि' उपाधि के सार्थक करै छै । ई हुनको नवीनतम प्रबंध-काव्य छेकैन् । कुल १२५ पृष्ठों के अठारों सर्गों में समाप्त होलें है प्रबंध-काव्यों के प्रकाशन १९९६ ई. में भेलें छै ; पहिलें खंड 'पुरोवाक्' में एक से तीन, दोसरों खंड 'उध्वरिता' में चार से बारें आरो तेसरों खंड 'लोकान्तर' में तेरों से अठारों सर्ग छै ।

कविवर सूरुकृत 'उध्वरिता' अंगिका के बृहत्त्रयी महाकाव्य-- डॉ० कुशवाहाकृत 'सवर्णा', डॉ० अमरेन्द्रकृत 'गेना' आरो श्री सुमन सूरुकृत 'उध्वरिता' -- में परिगणनीय छै । एकरों कथावस्तु के उपजीव्य महाभारत छेकै । महाभारतों में पसरलें भीष्म पितामहों से समीकृत प्रसंगों के एक नियमित कथा के रूप देबें आरो ओकरा छंदबद्ध करबें एक असाधारण बात छेकै । यै में नै खाली वस्तु-संयोजनों में कवि के अपेक्षित सफलता मिललें छै, बलुक भीष्म पितामह आरो अवान्तर-कथा से संबंधित पात्रसिनी के चरित्रों के उजागर करै में हुनका सफलता मिललें छै । वस्तुतः, एकरा में एक युग-विशेष में मानव-चेतना के प्रसार-संकोचन आरो ओकरों द्वन्द्वों के अभिव्यक्ति दै के चेष्टा करलें गेलें छै । ई दृष्टि से 'उध्वरिता' चिंतन आरो दर्शन के महाकाव्य छेकै । यै में कुच्छू ऐनहों स्थल छै जहाँ कवि के लब्धों उद्भावना के दर्शन होय छै ; जेना कि -- अंग-देशस्थित मद्राचल जाय के अर्जुनों के माय दुर्गा के गुहार करबें, जबें कि महाभारत (भीष्म-पर्व २३/४-१९) में हौ पूजा-स्थल भिन्न छै । सर्ग आरो छंद के दृष्टि से 'उध्वरिता' में महाकाव्यों के पूरा निर्वाह होलें छै ।

महाकाव्यों के वर्ण्य विषयों में प्रकृति-चित्रण आवै छै । 'उध्वरिता' में प्रकृति के विभिन्न रूपों के चित्रण/वर्णन स्थान-स्थान पर अच्छा होलें छै । प्रकृति के मानवी आरो अलंकृत दोन्हू रूप है महाकाव्यों में निखरलें छै ; काँहीं-काँहीं प्रकृति के उग्र रूपो चित्रित भेलें छै । अलंकार के भाषा में जीवन के साथे प्रकृति के सटीक रूपांकन देखलें जाय --

“उतरी ऐलै दमचुरुवों अधबैसू पूस महीना ।

वन-वन के गाछी चढ़लै पितमरुवों जरठ बुढ़ारी ।

वै लोकों के चिन्ता जेना ताकै छै सरडों के ;

अरअराय गेलै जिनगी केरों हरियरका पत्ता ।”

‘अिहिर-अिहिर पसरै बतास में बेलस एक उदासी ;

सुसुवावै छै सिहिर-सिहिर सिहरी-सिहरी बसबिट्टी ।

जेना कट्टर दिल अन्यायी ने अन्याय करी के,  
लूटी सब सिंगार गाँव-के-गाँव उजाड़ करलके ।”

येहें रड, प्रकृति के व्याख्यायित रूप ढेरे मिलै छै यै प्रबंध-काव्यों में। यै से अर्थ-बोध सरल-सुगम होय गेलों छै। यै महाकाव्यों में प्रकृति के संश्लिष्ट रूपों के अलावे नाम-परिगणन-परंपराओ के जोगलों गेलों छै --

“भंजर - मकूल के गंध हवा के छाती पर,  
महुआ - कटहर - चम्पा वनबेला उफनैलों ।”

‘उध्वरिता’ त्रासदी-महाकाव्य छेकै। एकरों पहिनें अंगिका में एक-टा आरो त्रासदी-महाकाव्य ऐलों छै -- ‘गिना’। दुन्नो करुण रस-प्रधान छै। अंगी रसों में शान्त, वीर, वीभत्स आरो शृंगार ‘उध्वरिता’ में ऐलों छै। यै प्रबंध-काव्यों के सूझ-बूझ आरो प्रवाह स्तुत्य छै।

### चन्दरदास (श्री)

अंगिका काव्य-साहित्यों के विकास में संत-महात्मा आरनीयो के योगदान रहलों छै। हुनकासिनी में संत चन्दरदास एक ऐन्हों नाम छेकै जिनी अंगिका-भक्ति-काव्यों के भरै-पूरै में आपनों योगदान कैने छोंत। हुनका पर विशेष शोध होना चाहियों। यहाँ शान्त रसों से सिक्त हुनको एक कविता के एक अंश प्रस्तुत छै --

“नैहरा से हम जैबै ससुररिया जहाँ बसै कंत हमार हे।

नहिं पिन्हबै सिनुरा, नहिं पिन्हबै कजरा,

नहिं कुछू करबै सिंगार हे।

ई सब उनहू के मन नहिं भावै,

गुरु मोरा करला विचार हे।

जब हम चलि भेलाँ पिया के नगरिया,

बाटे भेंटल बटमार ने हे ।” इत्यादि।

-- चन्दरदासकृत ‘भजन-माला’ (भाग-१) से।

### प्रीतम कुमार ‘दीप’ (श्री)

श्री प्रीतम कुमार ‘दीप’ के जन्म कटिहार जिला के बरारी में १९३६ ई. के सितंबर महीना में भेलों छै। हिनी अंगिका आरो हिंदी में कविता आरो नाटक लिखै छोंत। हिनको प्रकाशित रचनासिनी में ‘अरमान’ (हिंदी कविता-संग्रह)



'एक लोटा पानी' (हिंदी नाटक), 'दर्द जिगर' (हिंदी शे'र आरो रुबाई) उल्लेखनीय छै। हिनको 'गीत-माधुरी' (भाग १ आरो २) छोटों-टा गीत-पुस्तिका छेकै। हिन्ने १९९७ ई. में हिनको कविता-संकलन 'जैबै अंग-देश' निकललौ छै।

'दीप' जी के कविता मानव-मूल्य आरो यथार्थ-बोध से जुडलौ मिलै छै। सब्भे कविता लोक-धुनों में रचलौ गेलौ छै। 'घरों के हाल' नामों के हिनको कविता के एक पद देखौ --

“आज-कालों के बेटी भेलै अभिशाप,  
दस-दस हजार माँगे बेटा के बाप !  
दू बेटी छौन, शादी के योग,  
उंगली देखाय छौन गामों के लोग !  
पेटों में अन्न नै, तन फटेहाल !  
की कहियौन समधी ! घरों के हाल !!!”

### मतिकान्त पाठक 'मधुव्रत' (डॉ०)

डॉ० मतिकान्त पाठक 'मधुव्रत' भावों के कवि छथिन। हिनको गाँव छेकै भदरिया, जहाँकरी सवासिन छलथिन बौद्धकालीन विशाखा आरो सामा। भदरिया वहे गाँव छेकै जे बुद्ध-युगों में 'भदिय' कहलावै रहै। हौ गौरवों के याद दिलावै छेलात 'मधुव्रत' जी, १ सितंबर, १९३८ ई. में अवतरित होय के ; किंतु, नियति के निठुरता ने पिछलका साल ऐन्हों प्रतिभाशाली कवि के उठाय लेलकै।

'मधुव्रत' जी संस्कृत, हिंदी आरो अंगिकाओ में कोमलकान्त पदावली रौ रचना कैने छौत। हुनको अंगिका रचना 'अंग-माधुरी' पत्रिका में छपलौ मिलै छै। एक-आध संग्रहो में हुनको रचना ऐलौ छै। हुनको कविता में खाली अंग-क्षेत्रे के नै, बलुक सौसे भारतीय संस्कृति के उजागर करैवाला विचार प्रगट होलौ छै ; भाषा रस आरो अंलकार-मडित छै।

'एकटा चिट्ठी शरणार्थी बंग-बंधु के नाम' कविता में संवेदनशील कवि-हृदय 'मधुव्रत' जी के उद्गार देखियै --

“की करलौ जाय, मीता !  
की ढोते रहभे/यादों रौ मलकाठ ?  
सहथे रहभे/यादों के सौपिन के उसान ?  
जे गेलौ/ओकरा साथे की ?

जीयो / ऊ ननबुटना बिरना के लेल  
 जे तोरे लहुओं-खाद पर/जनमलों छौं,  
 ऊ तोरा अबस्से दै देयीं/छाजा-बाजा-केस  
 आरो/सोना रौ बँगला देश !"

### विनय प्रसाद गुप्त (श्री)

श्री विनय प्रसाद गुप्त के जनमडीह कहलगाँव के गान्धीनगर महल्ला छेकै। वाँही ५ जनवरी, १९३९ ई. के दिन श्री सत्यनारायण साह आरो श्रीमती विमलाबाला साहा के सुपुत्रों के रूपों में हिनको जनम भेलों छै।

विनय जी 'अंग-माधुरी'; 'आंगी' आदि पत्रिका में छपतें रहै छौंत। 'आठ समन्दर आँख' अंगिका काव्य-संकलनों में हिनको कविता छपलौ छै। हिनी जीवनों के प्रकृति के साथे जोड़ी के चलै छौंत। 'सदेश', 'मुट्ठी भर जाडा', 'सावन', 'भरलों सावन' आदि कविता मै विनय जी के कविता के येहें रूप देखै में आवै छै।

"भैया, चलौ धूलों पर/डारी के शूलों पर ;  
 कैन्हें कि शूले छेकै/मूल ओकरो सार छेकै --  
 फूल एकरों फौर;/फूलों के बारे में सोचना की ?  
 ओकरा समझनी की ?/ जे गन्धे के साथे खतम होय जाय छै।"  
 -- 'आठ समन्दर आँख' से।

### परमानन्द लाल (श्री)

श्री परमानन्द लाल गाम सुँडनी (थाना मेहरामा, जिला गोड्डा) में १५ जनवरी, १९४० ई. के अवतरित होलौ छौंत। हिनका में कवि-भाव बचपन्हें से विद्यमान रहै, जे कि समय पर फुटलै। हिनको 'पुरुवा रौ संताप' शीर्षक अंगिका कविता देखी के महाकवि 'दिनकर' जी बड़ी मुग्ध होय गेलौ रहौथ आरो डॉ० माहेश्वरी सिंह 'महेश' के सामना में कवि, कविता आरो अंगिका के गौरवों के बखान कैने छेलात।

'पुरुवा रौ संताप' के प्रकाशन १९६९ ई. में उच्च विद्यालय, ईशीपुर के विद्यालय-पत्रिका 'बेला' में होलौ रहै। ओकरा में पुरुवा आरो उर्वशी के वैदिक कथा बड़ा सुंदर ढंगों से सोहर छंदों में कहलौ गेलौ छै। उर्वशी काव्य-परंपरा में वै कविता के महत्वपूर्ण स्थान छै। एकरों भाव आरो भाषा सोहर छंदों के अनुकूल छै।

“रूप-गुण आगरी समैया के विभावरी  
 देवपुरी अजूब लागै हे ।  
 ललना विधना रों अनुपम रचना  
 विरचना में रति भागै हे ।  
 छपाछप सुनी कें आ जियरा में गुनी कें  
 की सेहे छेकै उरबसी हे ?  
 ललना सेहो राजा उठलै पुकारी कें --  
 ‘उरवसी, उरवसी’ हे ।”

-- ‘करील कादम्बिनी’ सें ।

### गोपाल कृष्ण ‘प्रज्ञ’ (श्री)

श्री गोपाल कृष्ण ‘प्रज्ञ’ जी कें जन्म ओलपुरा गामों में होलों छै, मतुर हिनकों स्थायी निवास बाथ (थाना शाहकुण्ड) छेकैन्ह । हिनकों जुकाव बचपन्है सें साहित्य-रचना दिसिं रहलों छै, कैन्हें कि हिनकों पूरा परिवारे कवि, लेखकों सें भरलों रहलों छै । हिंदी, संस्कृत, अंगिका आरो बँगला कें ख्यातिलब्ध रचनाकार उमेश जी कें दोसरों पुत्ररत्न ‘प्रज्ञ’ जी बहुमुखी प्रतिभा कें धनी साहित्यकार छोंत ।

‘प्रज्ञ’ जी कें प्रकाशित अंगिका काव्य-पुस्तकसिनी में ‘ज्ञान-गंगा’, ‘गान्धी-चरित’ (१९९० ई.) आरो ‘आनन्द-मंगल’ (१९९२ ई.) उल्लेखनीय छै । ‘ज्ञान-गंगा’ कें विषय-वस्तु केरों परिचय एकरों शीर्षकहै सें मिली जाय छै । ‘गान्धी-चरित’ में विष्णु-स्तुति, कर्मचंद, पुत्तलिका, सुदामापुरी, पटेल, कस्तूरबा गान्धी, गोडसे, चतुष्टय, साबरमती, बनार, प्रयान आरो उपदेश शीर्षकों सें कविता लागलों छै । महात्मा गान्धी जी कें समझै-बूझै आरो हुनकों आदर्शों कें अपनावै खातिर है पुस्तक बड़ा उपयोगी छै । संगें-संगें आरोसिनी चरित-नायकों कें परिचयो है पुस्तकें दै छै ।

सुकवि ‘प्रज्ञ’ जी कें तेसरों काव्य-पुस्तक ‘आनन्द-मंगल’ (पृ. सं. ८४) में ‘दुर्गा प्राकट्य’ आरो ‘काली प्राकट्य’ लै कें अन्य तेरों कविता विवाह-कथा संबन्धी छेकै । विवाह-कथा कविते में कहलों गेलों छै । एकरा में शिव जी, श्रीराम, राधा, रुक्मिणी, यशोधरा, बिहुला, वासवदत्ता, उषा, तुलसी, द्रौपदी, संयोगिता आरो भानुमति कें विवाहों कें वर्णन छै ।

'आनन्द-मंगल' आनन्द आरो मंगल के काव्य छेकै। सुकवि 'प्रज्ञ' जी आयकों भाव-भूमि पर ई रचना कैने छोट। रचना पद-शैली में होली छै। भाषा में अंगिका के मानक रूप प्रयुक्त छै।

'प्रज्ञ' जी के काव्य-कृतिसनी से लागै छै कि हिनी एक अध्यात्मवादी कवि छेकात। हिनको काव्यों में अध्यात्म के संदेश निहित छै। सुनीति आरो शुद्धाचरण के पाठ पढ़ैबो हुनको रचना के मुख्य स्वर छै। हिनको 'देश पर अभिमान' कविता के एक अंश --

'हिंसा के ज्वाला से धधकै विश्व-वनी विकराल ;  
जखनी देखो तखनी मारै ठोकी-ठोकी ताल ।  
आडम्बर ऐलै धर्मो में, बुरा सभै के हाल ;  
वैभव छोड़ी घर से निकली बनलै ... ढाल ।'

सधलो छंदों में आपनों भावों के भाषा कते नीको देलो गेलो छै।

### गौरी शंकर तिवारी (श्री)

श्री गौरीशंकर तिवारी के जन्म सलेमपुर (भागलपुर) में १ जवरी, १९४१ ई. के होली छै। कविता करै में आरो ज्योतिषों के चर्चा करै में हिनको मॉन खूब लागै छैन्ह।

तिवारी जी के कविता 'अंग-माधुरी' आदि पत्रिका में छपते रहै छै। हिनको कविता में स्वानुभूति आरो प्रकृति के रंग-रंग के विब झलकै छै।

'सगरे शोभा, सगरे मस्ती, सबके मन में भरलो हुलास ;  
अनुराग मिलन के बेला में, वनवासी योगी छै पलास ।'

-- 'वनवासी' कविता से।

### मधुसूदन साहा (डॉ०)

१५ जुलाई, १९४० ई. के गोड्डा जिला के धमसाई गामों में जनमलो डॉ० मधुसूदन साहा जी अखनी राउरकेला इस्पात संयंत्रों में राजभाषा-अधिकारी के आसन सुशोभित करै छोट। हिनी हिंदी के एक ख्यातिलब्ध कवि आरो लेखक छेकात, मत्तुर आपनों मातृभाषा अंगिकाओ में कुछेक रचना कैने छोट आरो आय-काल उडिया-साहित्यों के खास-खास रचनासिनी के अनुवाद हिंदी मे करै मे आपनों प्रतिभा के उपयोग करी रहलो छोट। हिनको शिक्षा-दीक्षा अंगिका के

केन्द्रस्थल भागलपुर नगरों में भेलों छै। एक बेर गोड्डा में जनतंत्र-दिवस के अवसरों पर जबे कवि-सम्मेलन होलों रहै तबे हिनी १९५७ ई. के सुखाड़ संबंधी जौन अंगिका कविता पढ़लें रहोंत ओकरो तारीफ कविवर बुद्धिनाथ झा 'कैरव' में बड़ी खुश होय के केने रहै। 'आंगी' (भागलपुर) के पिछलका 'कविता-विशेषांक' में हिनको एक-टा अंगिका नवगीत छपलों छै -- 'अबकी बितलै फेरू रोहिनियाँ, कहिया पड़तै पानी ?'। 'आंगी' से जुड़ला के बाद साहा जी अंगिका में कुच्छू लिखै के मौन बनैलें छोंत -- पाँच-छों-टा नवगीत, दोहा आरो मुक्तक लिखबो करने छोंत। उपरलका कविता के आखरी पद छेकै --

“केकरो श्राप गाम पर पड़लै, मचलै घोर तबाही ?

मौसम हाथों में लै सूरज देलकै झूठ गवाही !

चारो तरफ मौत बौरैलै, चलै हवा तूफानी ;

अबकी बितलै फेरू रोहिनियाँ, कहिया पड़तै पानी ?”

-- 'आंगी' ५/९, जनवरी, १९९७ ई.

### सुरेश मंडल 'कुसुम' (स्व०)

श्री सुरेश मंडल 'कुसुम', विद्यावाचस्पति के जन्म गाम पबई (अंचल अमरपुर, जिला भागलपुर) में २ जनवरी, १९४१ ई. के होलों रहै, मतुर दुक्वों के बात कि हुनको निधन ११ जुलाई, १९८५ ई. के होय गेलै।

'कुसुम' जी हिंदी आरो अंगिका में रचना करै छेलात। हुनको साहित्यों के मुख्य विषय कहानी रहै, मतुर हुनको कुच्छू अंगिका कविता 'अंग-माधुरी' में छपलों मिलै छै। हुनको कविता में विचार-प्रमुखता देखलों जाय छै जबे कि कुछेक कविता शृंगार आरो शान्त रसों के छै। 'निहोरा' कविता में फागुन के संदर्भ में आपनों परदेशी पाहुन के घोर घुरी आवै लें नायिका से निहोरा करवैलों गेलों छै --

“सूनो छै घर-आँगन छप्पर-छाजन,

ऐलै फागुन घुरी आवों साजन !

ठठाय के हाँसै कोढ़ी-कुथरी,

मारै ताना बिहैली फुलवारी।

चम्पा चमेली लागै राजन,

ऐलै फागुन घुरी आवों साजन !”

## लक्ष्मण प्रसाद यादव 'बेलहरिया' (श्री)

श्री लक्ष्मण प्रसाद यादव 'बेलहरिया' के जन्म १० जनवरी, १९४१ ई. के बेलहर (बाँका जिला) में होलें छै। हिनी अंगिका आरो हिंदी में कविता करै छोट। 'कविश्री' के उपाधि से सम्मानित हिनको अंगिका कविता 'अंग-माधुरी', 'अंगप्रिया', 'प्रिय प्रभात' आदि में छपतें रहै छै।

'बेलहरिया' जी के एक-टा काव्य-कृति 'कहभौ सच तें लागतहौ भक' १९९४ ई. में छपलें छै। यै में कुल ७२ पृष्ठों में हिनको ४४-टा कविता छै। बैसिनी कविता में आयको सच आरो सोच के संदर्भों में सामाजिक विषमता, तिलक-दहेज, परिवार-कल्याण, अंधविश्वास, बेकारी, बेरोजगारी, महंगी, झगड़ा-झंझट, केशन, लोकतंत्रों के मखौल आदि के चर्चा आरो चित्रण छै। हिनको कविता नैतिक आचरण आरो राष्ट्रीय चेतना के संदेश दै छै।

भाषा में ठेठ अंगिका के प्रयोग भेलें छै। छंदों में विविधता छै, मत्तुर काँहीं-काँहीं मात्रा के कमी-बेसी खटकै छै।

'दिन-दहाड़े डकैतें लूटै, जानले छै सरदार ;  
बालू भीत बनाय के लूटै इंजीनियर-ठेकेदार ।  
नकली दवा से डाक्टर लूटै, झूठे-झूठे दलाल ;  
फाँकी दै मजदूरें लूटै, पानी फेंटी कलाल ।'

## बीजेन्द्र चौधरी 'बीज' (प्र०)

प्र० बीजेन्द्र चौधरी 'बीज' मुंगेर जिला के पढ़वारा (तारापुर) गामों में २२ अप्रिल, १९४१ ई. में जन्म लेने छोट। हिनको कनियैन 'चाँचो' (श्रीमती चंचला देवी) हिनको कवि-जीवनों के सहयोगिनी छथिन। 'बीज' जी कयेक भाषा में कविता करै छोट। हिनको अंगिका कविता 'अंग-माधुरी' में छपतें रहै छै। 'बीजोपहार' (१९८८ ई.) हिनको अंगिका काव्य-कृति प्रकाश में ऐलें छै, जेकरा में कुल ३१-टा कविता छै।

'बीज' जी मुख्य रूपें हास्य-व्यंग्य के कवि छेकात। 'बीजोपहार' में हास्य-व्यंग्य-प्रधान कविता के अलावे कुछेक दोसरो रसों के रचना छै, मत्तुर काव्य-कला के दृष्टि से सब-टा कविता निर्दोष नै कहलें जाय पारें।

## राम शर्मा 'अनल' (श्री)

९ अक्टूबर, १९४२ ई. के दिन कुल्हड़िया गाँव (अमरपुर सड़क मार्ग पर स्थित, जिला भागलपुर) में अवतरित श्री राम शर्मा 'अनल' अंगिका आरो हिंदी के कवि के रूपों में खूबे ख्याति पैलें छोट। हिनको अंगिका कविता पत्र-पत्रिकासिनी में छपते रहै छै। हिनको 'बामर' नामों के गीति-काव्य एक दशक पहिन्है छपबो शुरू भेतो रहै, मतुर अब ताँय प्रकाशित नै हुएँ पारलौ छै। तबे, 'गीत-गंगा' आदि अनेक कविता-संग्रहों में हिनको कयेक-टा रचना संगृहीत छै।

'अनल' जी गीत-रचना के संगीतों से जोड़ते होलें मौलिकता प्रदान करै में माहिर छोध। हिनको गीतों में चिंतनशीलता छै, मतुर काँहीं-काँहीं दुरूहताओ आबी गेलो छै। लागै छै, हिनको रचना-प्रक्रिया में बँगला के प्रभाव पड़लौ रहें। हिनी सोची-समझी के सुकुमार शब्दों के प्रयोग आपनों कविता में करै छोट, वे में स्वर भरै छोट। गीतसिनी में शृंगार, कर्ण आरो शान्त रसों के निर्वाह होलें मिलै छै। ऐन्द्रिक विबो के भीतर दृश्य, स्पर्श, घ्राण आदि के विब अपने-आप उतरलौ बुझाय पड़ै छै। एतने नै, कृषि, व्यापार आदि से संबंधित विबो के दर्शन हिनको कविता में होय छै। दू-एकटा उदाहरण लेलें जाय --

'तन-तरवर मँजरैलै रे दैबा, बोललै कोयलिया ;  
खुशबू से डूबी गेलै देहिया रे दैबा, गमकै डगरिया।  
नस-नस तड़कै, पोर-पोर फड़कै,  
हाथों के कंगन झन-झन झनकै,  
लटआबै खेलै लटझुमरी रे दैबा, पिन्हतहै टिकुलिया।'

-- 'गीत-गंगा' से।

लोक-धुन 'चैती' में है गीतों के सौंदर्य वर्णनातीत छै। येहें रड, एक दोसरो गीतों में सुकवि 'अनल' जी रातों के मानवीकरण के भाषा देतें हुएँ ओकरा भिन्न-भिन्न नायिका के रूपों में उपस्थित कैने छै। नमूना देखियै --

'एक पख रूप तोरों चकमक चनरिया गे,  
दोसरे पख रूप तोरों गुज-गुज अन्हरिया गे।  
रंग-रंग भेस घरी खेलै नया खेल गे रजनी !  
भूल-भुलैया में सब्भे समैलै गे रजनी ! आदि।

गीतकार 'अनल' जी के गीतों में युग-बोधो के रूप उठलौ छै। हिनी नवनिर्माणों के पक्षपाती छोध। देखों --

“दोन्हू मिली एक दुनियाँ बनैबै,  
दुनियाँ में लपका बस्ती बसैबै,  
बस्ती में एक्के रड आदमी बसैबै,  
धरती उतारबै आकाश, सजनमा के जाबे नै देबै।”

-- 'प्रतिनिधि अंगिका कवि', पृ. ७।

सुकवि 'अनल' जी आपनों गीतसिनी में गीतों के भिन्न-भिन्न शैली अपनैलें छौत ; जेना -- पत्र-गीत के शैली में --

“बड़ी छंगुनी-गुनी लिखलें छी पतिया रे, लेलें जैहौ हमरों नैहर पुरबैया !”

है गीत संबोधन-गीतों के कोटियो में आवै छै। येहें रड --

“बड़ी गुण आगरी, बड़ी चतुराइन गे रजनी,

मनों नै भावै आबे महल अटरिया हे।

मनहु नै भावै आबे जेवर-गहनमा,

हमरा माँटी राजस्थानी मंगाय दें सजना।”

अंगिका के सुकुमार गीतकार 'अनल' जी पर अंगिका के गर्व छै।

### मथुरानाथ सिंह 'रानीपुरी' (श्री)

अंगिका के व्यंग्यकारों के कतारों में लागलें श्री मथुरानाथ सिंह 'रानीपुरी' के आविर्भाव ग्राम रानीपुर (कहलगाँव) में ११ जनवरी, १९४३ ई. के होलें छै। रानीपुर अंग-क्षेत्रों के एक-टा ऐतिहासिक गाँव छेकै। हमरों अनुमानों से येहें रानीपुर पुरानों 'राज्ञी' (राज्ञी = रानी) छेकै जहाँ अंगिका के आदि-कवि सिद्ध सरहपा केरों जन्म १०.७.७३३ ई. के होलें रहै। लोक-प्रचलित गामों के नामों से जुड़लें 'राज्ञी' = 'रानी' (पुर) ; जेना -- दिधी सिमानपुर, लक्ष्मीपुर-बभनियाँ, खट्टी सिमानपुर आदि के क्रमों में रानीपुर गाँव रानीपुर-लघरिया के नामों से जानलें जाय छै।

कवि 'रानीपुरी' जी के पिताश्री राजेन्द्रनाथ सिंह आरो माताश्री हरिणी देवी धार्मिक प्रवृत्ति के लोग छेलात।

'रानीपुरी' जी बचपन्हें से रचना करै के दिसिं उन्मुख छेलात। धर्मपत्नी विमला आरो कनिष्ठ पुत्र अंजनी कुमार के असामयिक निधन से हिनको कवि-प्रतिभा गजूरी उठलै आरो छिटफुट रूपों में लिखतें/पत्र-पत्रिका में छपतें होलें 'धुँध फटतै' ई आशावादी काव्य-संग्रहों के प्रकाशन ताय पहुँचलात। 'धुँध फटतै' (१९९७ ई.) में कुल ३५-टा अंगिका-कविता छै।



हिनी मूलतः अंगिका के हास्य-व्यंग्यकार छथिन, मतुर दोसरो-तेसरो ढंगों के कविता लिखै छथिन। हिनकों कविता में शोषण आरो सामाजिक विसंगति के विरुद्ध आक्रोश के स्वर गूजै छै। हिनकों कविता में ऐलों तथ्य जीवनो से जुड़लौ छै।

'रानीपुरी' जी के भाषा फुरगुदी नाखी फुदकते चलै छै जै में खाली शब्दे नै, विचार आरो भावो फुदकै छै। हिनकों शैली में दोसरा आरनी के प्रभावित करै के शक्ति छै। हिनकों व्यंग्य-भाषा देखियै कि यै में कैन्हों नवनिर्माणों के सदेश छिपलौ छै --

'बढ़लौ ई चालो के/चाल बेढंगा,

करो सब्हे से प्रीत/नहाबों रोज गंगा ;

छोड़ौ दाव 'रानीपुरी' लगाबों नै लीस।' -- 'धुँध फटते' : गीत - ८.

'कहै छै 'रानीपुरी' मट्ट संभालो ;

टोकरी से सड़लौ आम निकालो ;

दागी आमों के फेंको किनार।' -- वहाँ : गीत - १६.

### रघुनन्दन झा 'राही' (पं.)

पं. रघुनन्दन झा 'राही' अंगिका के प्रबंध-काव्यों के रचनाकारों में आदर के दृष्टि से देखलौ जाय छौत। हुनकों जन्म १२ फरवरी, १९४३ ई. के भेलौ छै।

'राही' जी विचार-संवाहक कवि छेकात। हुनकों अंगिका प्रबंध-काव्य चिन्ता' एक विचार-प्रधान काव्य छेकै, जै में राम-कथा के भाव-भूमि पर ओकरो पात्र -- कैकेयी, दशरथ, राम, सीता, लक्ष्मण, उर्मिला, मंथरा, भरत आरनी के नया सोच/नया विचार 'राही' जी के भाषा में अभिव्यक्त होलौ छै।

'चिन्ता' काव्य हमरा १९८५ ई. के उत्तरार्ध में मिललै। एक दाफी ऊपर-ऊपर देखलां कि वै पर आपनों मन्तव्य दौ, मतुर मौका नै मिललौ। तबे, आय (३ दिसंबर, १९९७ ई. के) जबे है इतिहास लिखै के क्रम में हुनकों पारी ऐलै तबे 'चिन्ता' निकाललां। पढ़ते-पढ़ते हमे वोही में खोय गेलां। केकरहौ मनो में कोय कैसे पैसी जाय छै, खुदे कवि होते हुँ हमरा सोचै ले पड़लौ। कहलौ गेलौ छै, 'जहाँ नै जाय रवि, तहाँ जाय कवि।' सचवो, 'चिन्ता' काव्यों में देखै छी कि राम-कथा के वैसिनी पात्रों के मनो के बात/सोच ताँय 'राही' जी बाखूबी पहुँचलौ छौत।

'चिन्ता' केरों रचना सर्ग-पद्धति में होली छै। ये में कैकेयी आरो मंधरा के चरित्रों के प्रधानता छै जेना कि गुप्त जी के 'साकेत' (हिंदी) में उर्मिला आरो लक्ष्मण तथा श्री बलदेव प्रसाद मिश्र के 'साकेत-संत' (हिंदी) में भरत के चरित्रों के। कैकेयी के संबंध में भारतीय चिंतनों में प्रायः दूषित भावना देखली जाय छै, जेकरों परिष्कार हिंदी के महाकवि केदारनाथ सिंह 'प्रभात' में आपनों 'कैकेयी' महाकाव्यों में करने छै। वेहें रड, श्री उमेश जी आपनों हिंदी-प्रबंध-काव्य 'कैकेयी' में कुच्छू दूर ताँय कैकेयी के चरित्रों के परिष्कार कैने छै। सुकवि 'राही' जी के रचनाकारें कैकेयी के उदात्त चरित्रों के उजागर करै में कोय कोर-कसर नै राखनै छै। मंधरा के पश्चातापो 'चिन्ता' काव्यों के मौलिक उद्भावना छेकै। नया सोच/नया चिंतन के कविता के ढाँचा में ढालला के बादो 'राही' जी के भाषा सहज सप्रेषणीय, छंद प्रांजल आरो शैली गतिशील छैन्। वस्तुतः, 'चिन्ता' अंगिका-साहित्यों के गौरव-वृद्धि करैवाला काव्य-कृति छेकै।

'राही' जी के फुटकरों कविता कर्ते नी छपली छै। 'मेघ' शीर्षक हुनको एक कविता में प्रकृति के छटा देखली जाय --

"डल्लमडल मेघ छै ।

कबदै छै दुखिया के जान,

अत्त करै छों हो भगवान !

कखनी गिरतें गोर अधदिया,

दोसरों नै कोय थेग छै ! डल्लमडल० ।

-- 'प्रतिनिधि अंगिका कवि', पृ. १३२.

## उदयकान्त ठाकुर 'बिहारी' (श्री)

श्री उदयकान्त ठाकुर 'बिहारी' मिर्जाचौकी रेलवे स्टेशन भिरी उत्तरे गाँव शाहाबाद (जिला भागलपुर) के निवासी छेलात। हुनको जन्म १९४३ ई. में भेलो रहै, लेकिन हुनी ५ मई, १९८३ ई. के दिवंगत होय गेलात।

हुनी मानलें छोंथ कि कविता करै के प्रेरणा हुनका डॉ० कुशवाहा आरो आपनों अग्रज श्री राघवेन्द्र ठाकुर 'उन्मन' से मिलली रहै। कुशवाहा जी हुनको एक किताबों के 'भूमिका' में हुनका 'गीतों के राजकुमार' कहने छै।

सुकवि 'बिहारी' जी के दुइ-टा गीत-संकलन निकलली छै -- 'बिगुल फूंक दो' आरो 'विजय-अभियान'। दोन्हू में अंगिका, हिंदी आरो भोजपुरी कविता छै।

'बिगुल फूँक दो' के पहिलों संस्करण १९७० ई. में भेलों छेलै, अब ताँय आरो कते नी संस्करण होय चुकलों छै।

स्व० बिहारी' जी के गीत भाव-गीतों के कोटि में आवै छै। संक्षिप्तता, रागात्मकता आरो भावों के एकतानता हुनकों गीतों के विशेषता छेकै। हुनकों गीतें अनुभूति के तीव्र बनावै छै। कुछेक गीत उद्बोधन-गीतों के कोटि में आवै छै। लोक-मंगल के अभिलाषाओ हुनकों गीतों में छै तथा प्रेम-गीतसिनी में भौतिकता उभरलों छै। एक उदाहरण --

“पीपल के छैयाँ में/बैठी के देखै छी देश ;  
माय गे ! पाकी गेलों हमरों केश !  
निमिया के देखै छी बाँसों के बाड़ी में ;  
कलकी पुतलिया चिन्हवै नै साड़ी में,  
झपै छी देखी के वेष !”

### रामदेव भावुक (श्री)

बचपन्है सें अंगिका-रचना में लागलों श्री रामदेव भावुक के जन्म खगड़िया जिला के बसबिट्टी (माड़र) में जनवरी, १९४४ ई. में भेलों छै। हिनकों कर्म-क्षेत्र मुंगेर छेकैन्ह। 'हंस के जीभ तरासल छै' (१९९५ ई.) हिनकों उल्लेख्य अंगिका काव्य-कृति छेकैन्ह। एकरा में हिनकों २७-टा कविता कुल ५ पृष्ठों में संकलित छैन्ह।

देशों के एकता, अखंडता पर खतरा, भारतीय संस्कृति के गिरते हुए मूल्य, सामाजिक व्यवस्था आरो न्याय के अवमूल्यन पर 'भावुक' जी के संवेदनशील कवि खास करी के चिन्तित छै --

“पानी-दूध अलग करतौ के ?  
हंस के जीभ तरासल छै !”

है विषम समस्या के समाधान लेली, व्यवस्था-परिवर्तन आरो नवनिर्माण लेली कवि भावुक उत्सुक छै --

“बदलों नै, बदली दें दुनियाँ,  
हौ भैया ! भागों नै।”

'हंस के जीभ तरासल छै' केरों भाषा अंगिका के पच्छिमी अंगुतरायी रूप छेकै जे कि डॉ० वचनदेव कुमार आरो डॉ० कुमार विमल के अंगिका कविता आरो कहानी-सब में मिलै छै। जो विषयान्तर नै समझलों जाय तें कहलों जैतै कि है

किताबों के अंत में लागलों डॉ० विभूति आनन्द ने ये किताबों के भाषा के मैथिली कही देलें छोट जबें कि ऊ (भाषा) साँटी अंगिका छेकै (एकाध रचना के भाषा छोड़ी के)।

‘हंस के जीभ तरासल छै’ में जनवादी भावना खास करी के उभरलें छै।

### रवीन्द्रनाथ ‘रवि’ (डॉ०)

डॉ० रवीन्द्रनाथ ‘रवि’ के जन्म १ मार्च, १९४४ ई. के नवागढ़ी (जिला मुंगेर) में भेलें छै। हिनी एक कृषि-वैज्ञानिक छेकात, मतरकि हिंदी आरो अंगिका दोन्हू में कविता करै छोट। कहलें जाय कि हिनको चरित के सजैने/सँवारने छै श्रद्धा आरो इड़ा दोन्हू में। है सौभाग्य विरले लोगों के मिलै छै।

‘रवि’ जी के ‘मधुमालिनी’ आरो ‘अंशुमाली’ काव्य-संकलन जल्दीये आबी रहलें छै जेसिनी संकलनों के कुछेक कविता पत्र-पत्रिका आरनी में छपी चुकलें छै। हिनको गीत बड़ा मधुर आरो मनो के मोहैवाला होय छै। ‘वसंत’ शीर्षक गीतों के कुछेक पंक्ति देखलें जाय --

“वन-वन उदास छै/दहकल पलास छै,  
कचरल कचनार देखी/सेमर उदास छै ;  
महुआ तर चूवै फगुनियाँ मकरन्द,  
पहुना जे ऐलें छै/छोटकी बौरैलें छै,  
कैतकी गुलाब संग/गेना फुलैलें छै ;  
उगलें पनसोखा-सन चमकै दिगन्त छै,  
डाल-डाल पात-पात छलकै वसंत छै।”

### नरेश ठाकुर (श्री)

श्री नरेश ठाकुर के जन्म १६ जुलाई, १९४४ ई. के भागलपुर जिला के बैजनाथपुर गामों में भेलें छै। हिनको रचना ‘अंग-माधुरी’ में छपतें रहै छै।

नरेश ठाकुर जी के कविता सामयिक प्रभावों के संदर्भों के छूतें चलै छै, मतरकि मात्रिक छंदों के दृष्टि से हिनको कविता में संशोधनों के जरूरत बुझावै छै।

“मानव-महिमा के हमरा तप-बल से आय बढ़ाना छै ;  
आपनों चारित्रिक गरिमा से ऊपर आय उठाना छै।

पहुँचै नै देवत्व जहाँ वै शिखरों के करना छै पार ;  
लड़ना छै हमरा पशुता से मानवता के लै के कटार ।

### रामनन्दन विकल (श्री)

श्री देवनारायण प्रसाद जी के सुपुत्र श्री रामनन्दन विकल केरों जन्म कुडरो (बौसी) में २३ मार्च, १९४३ ई. के होलें छै। हिनको ढेरसिनी रचना पत्र-पत्रिका में छपतें रहै छै। कयक-टा काव्य-संकलनों में हिनको कविता शामिल भेलें छै। १९९६ ई. में प्रकाशित 'आठ समन्दर आँख' में हिनको छौ-टा कविता छपलें छै जेसिनी में समाज आरों प्रकृति के विविध चित्र अंकित होलें छै।

विकल जी के दुइ-टा किताब प्रकाशित छै। वै दुहू में एक-टा 'मंदार बोलै छै' (१९९३ ई.) काव्य-पुस्तक छेकै। कुल २४ पेजों के है किताबों में मंदार, बौसी, गुरुघाम आरनी के महिना के बखान करलें गेलें छै।

'मंदार बोलै छै' हमरों (डॉ० कुशवाहा के) 'अंग-दर्शन' नासी एक भौगोलिक-काव्य/यात्रा-काव्य छेकै। सुकवि 'विकल' जी कवित छद/विदेशिया रागों में प्राचीन अंग-देशों के कुछेक ऐतिहासिक, धार्मिक आरों सांस्कृतिक स्थानों के रस-सिक्त भाषा में दर्शन करैने छै वै किताबों में। हिनको काव्य-रचना के संभावना बरकरार छै। हिनको 'देवता' शीर्षक कविता के बानगी लेलें जाय —

'देवता, कहाँ छों ?/आबों नी./

हिरदा केरों दुआर/खुल्ला छौ,

दीया जराय लें/सब छौ --

सलाय, काठी/तेल, बाती/बारैबाला कोय नै !

आबों, सब के मिलाय दें, दीया जराय लें ।

-- 'अंग-माधुरी', जनवरी, ६१.

### सुरेन्द्र आ 'परिमल' (डॉ०)

डॉ० सुरेन्द्र आ 'परिमल' के आविर्भाव १५ जुलाई, १९४६ ई. के जमुई जिला के गोही (लक्ष्मीपुर) गामों में होलें छै। हिनी साहेबगंज कॉलेजों में हिंदी के अध्यापक छौत ।

अंगिका के कर्ते नी संस्था से संबद्ध 'परिमल' जी अनेक पत्र-पत्रिका लेली लिखते रहै छोट। हिनको अंगिका कविता 'अंगश्री', 'प्रतिनिधि अंगिका कवि' आदि संकलनों में ऐलौ छै। 'गुमसैलौ धरती' (१९८४ ई.) हिनको स्वतंत्र अंगिका काव्य-कृति छेकै। वै किताबों के कुल ४८ पेजों में हिनको ३०-टा कविता लागलौ छै। हममें वै किताबों के गीतसनी के 'भाव-गीत' के कोटि में राखै छियै, सब्भे गीत भावप्रद छै। लागै छै कि अंगिका के समीक्षकसिनी के सम्यक् ध्यान 'गुमसैलौ धरती' पर नै गेलौ छै। गहन अध्ययनों से हौ भाव-गीत-कृति के गहराई के महसूस करलौ जैतै। अंगिका-गीति-काव्य के परंपरा में 'गुमसैलौ धरती' एक अनुपम कृति छेकै। संसारों के जड-चेतन चीजों के हमरासिनी सब्भे देखै छियै, मतुर कवि के देखै के ढंग कुछू आरो होय छै। जबे हौसिनी वस्तु के प्रभाव कवि-हृदयों पर पड़ै छै तबे कवि ओकरा आपनों भाषा के रंग दै छै। कवि के आपनों अनुभूति आरो अभिव्यक्ति सामान्य श्रोता या पाठकों के अनुभूति आरो अभिव्यक्ति होय जाय छै। 'गुमसैलौ धरती' के कवि 'परिमल' जी के आत्माभिव्यक्ति खाली हिनखे बनी के नै रहलौ छै, हौ हमरा आरनीयो के आत्माभिव्यक्ति बनी गेलौ छै। वै संकलनों के गीतसनी के येहें सफलता छेकै ; कैन्हें कि आत्माभिव्यक्ति के काव्यों के मुख्य तत्व मानलौ गेलौ छै जे कि भाव-गीत अथवा गीति-काव्यों में खास करी के प्रगट होय छै।

'गुमसैलौ धरती' अनुभूतिपरक काव्य छेकै। हौसिनी भाव-गीतों में कवि रौ आत्मा के संगे भावना निललौ छै। एकरों एक विशेषता येहो मानलौ जाय कि कवि 'परिमल' जी सांस्कृतिक, सामाजिक या राष्ट्रीय स्थिति के भावों के रंगों में ऐन्हों रंगी देने छोट कि अंगिका गीति-काव्यों के आगू के परंपरा में हौ रंग जरूरे चढ़तै।

है संकलनों के कयेक-टा रचना अतुकान्त गद्य-शैली में लिखलौ गेलौ छै, मतुर वोहो-सब ऐन्हों प्रवाह में बही रहलौ छै कि हौ धारा से हौसिनी के भिन्न नै करलौ जाय पारें। है कृति के गीतों में भावों के सम्यक् विवृति होलौ छै। एकाद्य नमूना देखलौ जाय --

“प्रात पवन डोलै छै, कलिका पट खोलै छै ;  
सिंदूरी रंग आसमान, अलसैलौ उतरल बिहान ।  
चिडिया के पंख खुलल, भौरा के बोल जगल ;  
बैलों संग चललै किसान, फुसुर-फुसुर बोलै बिहान ।”

## बालकवि आर्य (स्व०)

सुदूर निर्जनो में ताड़ों के पत्ता पर काँटों से कविता लिखै में आनन्दमग्न रहैवाला भालेश्वर आनन्द 'अंगवासी' (पीछूँ 'बालकवि आर्य') के जन्म ३ जनवरी १९४६ ई. के गाँव कुशाहा (जिला भागलपुर) में भेलों रहै। हुनी समुद्र-संतरण के इच्छा राखै छेलात, किंतु हुनको निधन आय से तीन साल पहिने बोकारो (बिहार) में होय गेलै।

बालकवि आर्य जी हिंदी आरु अंगिका में कविता आरु लघु कथा लिखै छेलात आरु हिंदी पत्रिका 'अक्षत' के संपादनों करै छेलात। दक्खिन बिहार में अंगिका के प्रचार-प्रसार में हुनको बड़ा योगदान रहै। हुनको अंगिका कविता 'अंगवाणी' (ईशीपुर), 'अंग-माधुरी' (पटना) आदि में छपै रहै।

काव्य-कला के दृष्टि से जो बालकवि आर्य के मूल्यांकन करलें जाय तें एक सहृदय कवि के सहज अनुभूति के दर्शन होय छै। हुनको कविता में मात्रिक छंदों के प्रधानता छै। हुनको रचना में मजदूर-किसानों के प्रति सहानुभूति आरु पूंजीपति या शोषकवर्गों के प्रति आक्रोशो अभिव्यक्त होलें छै। साथे-साथ, हुनको बाल-कविता में बाल-सुलभ विषय आरु सरलता/कोमलता के संगे-संगे सहज गेयता के समावेश छै। एक बाल-कविता 'आमंत्रण' के उदाहरण लेलें जाय --

“घरों में नुनवा कानै छै, बात नहीं कुछ मानै छै ;  
बाबा-भैया कत्तो मनावै, नुनुवाँ भेल मुँह-फकरों।”  
“आबह गैया हियो-हियो, बाट'क पानी पियो-पियो ;  
घेरि-बेरि के आज पिलैबो, आप पियें तों सगरो।”

-- 'अंगवाणी' : १.७.१९६८ से।

## वैकुण्ठ बिहारी (श्री)

मेदनीपुर (प्रखंड फूलीडूमर, जिला बाँका) में श्री वैकुण्ठ बिहारी ने २६ दिसंबर, १९४६ ई. के संसारों के प्रथम दर्शन कैने छै। हिनी हिंदी में एम. ए. करी के शिक्षा-शास्त्र आरु संगीत में स्नातक उपाधि उपलब्ध करने छौथ।

वैकुण्ठ बिहारी जी हिंदी आरु अंगिका में रचना करै छौत। हिंदी में प्रकाशित हिनको नाटक 'चन्द्रशेखर आजाद', 'माँ का कलेजा' आरु 'इन्कलाब का सिंदूर' के अच्छा ख्याति मिललें छै। अंगिका में 'बिहारी' जी के एक-टा नाटक 'लहुवों

से महँगों सिनूर' आरो काव्य-संकलन 'स्वाति के मेघ' प्रकाशित छै। पहिलका के प्रकाशन १९८९ ई. में आरो दोसरका के १९९२ ई. में भेलों छै।

'बिहारी' जी में प्रबंध-काव्य लिखै के अपूर्व क्षमता छै ; 'अंग-सवासिन' आरो वत्स-नरेश उदयन के राजरानी 'सामा' पर लिखलें हिनको प्रबंध-काव्य प्रकाशन के बाट जोही रहलें छै। हिनको 'स्वाति के मेघ' अंगिका के गीति-काव्य-परंपरा से जुड़लें एक सुंदर पुष्प छेकै। एक स्वतंत्र संकलन के रूपों में है किताब हमरा कुछुवे दिन पहिने देखै में ऐलै। पहिने हिनको गीत पत्र-पत्रिकासनी में छपतें ऐलें छै। 'श्रीस्नेही' जी के 'गीत गाँवों के', 'गीत-गंगा', 'अंग-मंजरी', 'अंगप्रिया', 'अंग-माधुरी', 'अंग-क्षेत्र', 'अंगिकांचल' आरनीयो में हिनको अंगिका रचना छपतें रहलें छै।

'बिहारी' जी के गीतों में मुख्य रूपों से भक्ति-भावना, साम्प्रदायिक सद्भावना, देश-प्रेम आरो शृंगार-भाव मुखर छै। सब्भे गीत राग-रागिनी में बाँधलें छै। गीति-काव्यों के लक्षणों पर हिनको गीत खरो उतरै छै।

### शंकर प्रसाद 'श्रीनिकेत' (श्री)

उत्तरी अंग-क्षेत्रों के ख्यातिप्राप्त साहित्यकारों में शीर्षस्थ श्री शंकर प्रसाद 'श्रीनिकेत' अंगिका तेली एक समर्पित व्यक्ति छोट। अंगिका में विविध विद्या के रचना करै छोट। एक-टा छोटों-टा अंगिका व्याकरणों लिखी के प्रकाशित करवैने छोट। हिनको जन्म जेठ दशहरा १९४२ ई. के सेमापुर बाजार (जिला कटिहार) में भेलों छै। हिनी कटिहार, पूर्णिया, किशनगंज, अररिया, सुपौल, मधेपुरा आरो सहरसा क्षेत्रों में अंगिका के प्रचार-प्रसार में अच्छा काम करने छोट। हिनी अंग-शोध-संस्थान (सेमापुर) के संस्थापक निदेशक आरो ढेरसिनी संस्था से संबद्ध साहित्यकार छोट।

'श्रीनिकेत' जी के अंगिका प्रबंध-काव्य 'कर्ण' आरो कविता-संकलन 'गीतश्री' छपतें-छपतें रुकी गेलें होलें लागै छै, लेकिन हिनको अंगिका कविता प्रायः पत्रिकासिनी में छपतें रहलें छै।

हिनको कविता में गान्धीवादों के छाप झलकै छै। कवि जी के विश्वास छै कि समाजों में समता आरो समानता ऐल्है पर शान्ति स्थापित होतै। हिनको कृषि-गीत बड़ा लोकप्रिय होलें छै। कोशी के किनारा परको एक विब देखियै --



“कोशी के किनारों पर --

बगुला के पाँत छै, उजरो-उजरो पाँख छै ;

... दोहरे में सुल्लों दोनों आँख छै ।”

### अक्षयश्री

‘अक्षयश्री’ जी गुरु बाजार (कटिहार) के निवासी छौथ । पूरा नाम छेकैन्ह अक्षय कुमार साहा ‘अक्षयश्री’ । हिनी अंगिका में कविता, कहानी आरो निबंध लिखै छौथ । अंग-माधुरी’ -आर में हिनको रचना छपलों करै छै । हिनको विश्वास छैन् कि अन्हारों पर इँजोर होतहै छै, होबे करतै । हिनको एक कविता --

“चहकै छै चिड़िया, गूँजै छै शोर,

पखना फड़काय झाड़ै, भेँ गेलै भोर ।”

‘अक्षयश्री’ जी मूल रूपे गीतकार छेकात । हिनको गीत भाव आरो भाषा में मँजलों रहै छै ।

### सुभाष चन्द्र ‘भ्रमर’ (श्री)

लोक-जीवनों से जुड़लों पुरा-संस्कृति के अनुगायक श्री सुभाष चन्द्र ‘भ्रमर’ अंगिका के नामी-गिरामी कविवर्गों में परिगणनीय छौत । हिनको कार्य-क्षेत्र दुमका छेकै । यै लेली हिनको रचना में अरण्य जीवनों के झाँकी नजरो में आवै छै ।

‘भ्रमर’ जी के गीति-नाट्य ‘उषा’, जेकरों थोड़ों-टा अंश श्री ‘राही’ आरो श्री ‘भ्रमर’ - संपादित ‘प्रतिनिधि अंगिका कवि’ में छपलों छै, एक उत्कृष्ट रचना छेकै । वै में ‘उषा-अनिरुद्ध’ के कथा के नया भाव आरो भाषा मिललों छै । सधलों छंदों में रचलों वै गीति-नाट्यों के अंगिका-साहित्यों में विशिष्ट स्थान छै/होतै । हिनको एक कविता ऐन्हों छै जै में अंग-क्षेत्रों में प्रयुक्त ढेरसिनी गारी भरलों छै । ‘उषा’ (गीति-नाट्य) के पैहलों अंकों के शुरुआती अंश --

“जन्ने देखों रंग-बिरंगों फूल, हवा बौरैलों रड ;

यै फुलवारी में वसंत जिनगी-भर से ओझरैलों रड ।

हर मौसम के फूल, सभै के रूप-रंग छहकौआ रड ;

कोय-कोय गंध हेराय देने छै, कुछ विहँसै महकौआ रड ।” - पृ. २५.

ठेठ अंगिका आरो सधलों छंदों में रचलों गीति-नाट्य ‘उषा’ में भाव, शिल्प आरो शैली के मणि-कांचन योग निखरलों छै । दुःखों के बात येहें कि ऐन्हों उत्कृष्ट रचना अब ताँय पुस्तक के रूपों में नै ऐलों छै ।

## प्राणमोहन 'प्राण' (श्री)

प्रकृति के सामाजिक संदर्भों से जोड़वाला कवि श्री प्राणमोहन 'प्राण' के जन्म बीसी (जिला बाँका) में होलें छै। हुनी अंगिका आरौ हिंदी में समान रूपों से लिखै छौत। हिंदी में एक-टा पत्रक 'मनोज' के नामों से निकालै छौत तथा हिनको हिंदी काव्य-कृति 'भोर' के अच्छे ख्याति मिललें छै।

'प्राण' जी एक सफल गीतकार छेकात। हुनको रचना में समकालीन यथार्थ के चित्र मिलै छै। अंगिका में निखलें हुनको कविता 'अंग-माधुरी' 'कविताश्री' आदि पत्रिका में छपतें रहलें छै, मत्तुर अब तॉय कोय संकलन में छपलें छै। हुनको एक गीतों के थोड़ों-टा बानगी देखलें जाय --

“गरजै छै मेघ, पिया ! लागै छै डोर !  
चमकै छै बिजली तें घड़कै छै छाती ;  
चमकी-चमकी उठै छी आधे-आधे राती ;  
उपरें आसमान भेले, धरती भेले तौर ।”

-- 'प्रतिनिधि अंगिका कवि', पृ. ९७.

## सुरेन्द्र दास (श्री)

हमरासिनी के देशों के स्वतंत्रता आरौ श्री सुरेन्द्र दास एक्के दिन मिललें छै। जमुई जिला के केवाल फरियता (गिद्धौर) हिनको गाँव छेकैन्।

हिनी कवि, लेखक, पत्रकार आरौ नेताओ छेकात। हिनको 'तूफान' (हिंदी में) आरौ 'गुडगुडी' (अंगिका में) किताबों के रूपों में प्रकाशित होय चुकलें छै। हिनको कविता में देशों के महिमा आरौ आत्मविश्वासों के स्वर खास करी के उभरलें छै। देखलें जाय --

“धन्य यहाँ के भूमि कहाय, जहाँ विराजै गंगा माय ;  
जेकर पुत्र करै अनुराग, साधै कठिन योग-वैराग ।”

## नवीन चन्द्र शुक्ल 'पुष्प' (श्री)

श्री नवीन चन्द्र शुक्ल 'पुष्प' चाँदपुर (जगदीशपुर, भागलपुर) के निवासी छेकात, मत्तुर अबे भागलपुरों में रहै छौत। हिनी अंगिका के एक मधुर गीतकार के रूपों में जानलें-मानलें जाय छौत। अंगिका में हिनको दुइ-टा कविता-पुस्तक 'पुष्पहार' आरौ 'चन्द्रहार' (१९८५ आरौ १९८८ ई.) प्रकाशित

है। पहिलका में 'पुष्प' जी के रचलें ५१ आरो दोसरका में ७१-टा गीत संकलित है। 'चन्द्रहार' के शुरू में डॉ० अभयकान्त चौधरी के लिखलें 'चन्द्रहार' : एक झाँकी (समीक्षा) छपलें है।

'पुष्प' जी के कविता में भक्ति, शृंगार आरो राष्ट्र-प्रेमों के भाव है। कृषि, देहज आरो लोक-जीवनो के सांस्कृतिक मूल्यों के अनुरक्षा से संबंधित गेय पद (कविता) हिनी बेसी लिखलें छौत। वैसिनी में हिनको गीतकार-रूप निखरलें है। भक्ति-गीतों में आत्मसमर्पण के भाव देखलें जाय है। राष्ट्रीय गीतों में देशो के एकता, अखंडता, स्वतंत्रता के सुरक्षा आरो साम्प्रदायिक सद्भावों के भाषा देलें गेलें है। सब-टा गीत लोक-धुन, लोक-लय आरो लोक-तानों में रचलें बुझावै है।

"भारतों के पावन घरती सें स्वर्गो भी है कम ;  
जेकरो माटी में ई देहिया मिलै बनी भसम।  
देशो के खातिर ही निकलै जेकरो देहों सें दम ;  
मातृभूमि के ई माटी में जन्मौ जनम-जनम।।"

### बाँकेबिहारी झा 'करील' (स्व०)

जिला भागलपुर, अनुमंडल नौगछिया के भ्रमरपुर गामों में जनमलें श्री बाँकेबिहारी झा 'करील' के निघन अल्पायु में ही २५ दिसंबर, १९७६ ई. के होय गेलैन्ह। हुनी विश्वामित्र महाविद्यालयों में संस्कृत के व्याख्याता छेलात। हुनको कविता संस्कृत/हिंदी, मैथिली आरो अंगिका में मिलै है। 'अंग-माधुरी' में हुनको क्येक-टा कविता छपलें है।

स्व० 'करील' जी के एक-टा काव्य-कृति 'करील-कादम्बिनी' के नामों से प्रकाशित है। संगीत के शास्त्रीय मंचों पर अंगिका के लानै में हुनको महत्वपूर्ण भूमिका छेलैन्ह। हुनको गीतसनी शास्त्रीय राग-ताल में बाँधलें है। 'गुरु महिमा' (लोक-धुन, ताल दादरा) में हुनी कहने छौत --

"नाम के नदिया नहैबै, जनम-फल पैबै हो ;  
जनम-जनम के मल के ढेरी --  
सहज ही सकल बहैबै, जनम-फल पैबै हो।।"

### सीताराम दास (श्री)

उत्तरी अंग-जनपदों के प्रतिभासंपन्न कविरत्नों में अग्रण्य श्री सीताराम

दास के जन्म जियागाछी गाँव (पूर्णिमा/कटिहार जिला) में भेलों छै। 'भोर भेले आवै छै' (१९८३ ई.) हिनको एक प्रतिनिधि कविता-संग्रह छेकै।

सीताराम दास जी संगीत आरो कविता दोन्हू पर अधिकार राखै छोंथ। अंगिका लेली समर्पित कवि सीताराम दास जी के रचना लोक-जीवन आरो जन-चैतन्य से जुड़लें छै। 'भोर भेले आवै छै' में हिनको ७२-टा रचना लागलें छै जेसिनी के गद्य-गीत कहलें जाय पारै छै। वैसिनी रचना में कवि जी आपनो सोचो के दर्शन के स्तर पर ले गेलें छै। ई माने में 'भोर भेले आवै छै' के कते नी कविता रहस्य के कविता छेकै। सरहपा, कबीर आरनी के रचनासिनी के परिप्रेक्षो में बात करलें जाय तें 'भोर भेले आवै छै' आधुनिक अंगिका के पहिलो रहस्यवादी कृति ठहरै छै। कवि सीताराम जी के साधक आत्मा प्रकृति से परो के बात लेली जेना कि बेचैन होय उठलें रहें। भावनात्मक रहस्यवादी हिनको कविता के विशेष अध्ययन करै के जरूरत महसूस होय छै। एक उदाहरण लेलें जाय --

'सुनरी शृंगार करै छै ऐना लैके/ कंधी के लम्बा टान दैके  
बढियाँ एक-टा सीध बिथारलकै/ आँखी में काजरो के  
एक-टा पतली रेख टानी देलकै/ एक-टा टिकली  
कपारो पर दैके ताकै छै/ इन्ने-उन्ने,  
अरे, बाप रे !/ आपनो रूपो पर सुनरी  
मोहित भै गेलै/ मोहो के ई-टा भाव जे भाँसलै  
कोय देखी तें नै लेलकै/ सुनरी ताकै छै इन्ने-उन्ने  
आरो ओकरो रूप/ ताकै छै चारो ओर ! -- पद-४.

### आमोद कुमार मिश्र (कविरत्न)

कविरत्न आमोद कुमार मिश्र अंगिका के एक सुपरिचित हस्ताक्षर छेकात। गाँव छतहार (भागलपुर) -निवासी साहित्य-मनीषी पं० गिरिधर शास्त्री 'भ्रमर' के सुपुत्र आमोद जी के जन्म आपनो नाना जी कन जसीडीह (देवघर) में १७ दिसंबर, १९४७ ई. के होलें छै। हिंदी में एम. ए. हिनी अंगिका, भोजपुरी आदि पर अच्छा अधिकार राखै छोंत, हिंदी में तें निष्णात छेबे करोंथ।

अंगिका में हिनको रचना 'भोर ?' (कहानी-संग्रह) आरो 'मुठिया चाउर' (एकांकी-संग्रह) प्रकाशित होय चुकलें छै। पुस्तक के रूपो में हिनको कोय अंगिका काव्य-कृति अखनी ताँय हमरो नजरी में तें नै पडलें छै, किंतु हिनको

कविता कर्ते नी दोसरों-तेसरों काव्य-संकलनों में छपलों छै आरो मंचों पर ओज-भरलों कविता सुनै केँ मौका हमरा मिललों छै। हिन्ने 'अंगद' नामों सेँ हिनकोँ एक अंगिका प्रबंध-काव्य प्रकाशित होयवाला छै।

आमोद जी केँ कविता 'हम्ही गुलाब छी, काँटहौ में मुस्कावै छी', 'जब्बड़ भीत' आदि लोकप्रिय होलों छै। ओज गुणपूर्ण हिनकोँ रचना केँ रसास्वादन करै में मोन मुग्ध होय जाय छै, हिनकोँ 'आमोद' नामों केँ सार्थकता सिद्ध होय जाय छै। एक उदाहरण लेलों जाय --

“कैना काटैछी जाड़ा केँ बरफों रड कनकन्नों रात,  
आगिन रड लू बैसाखों केँ, सावन-भादों केँ बरसात,  
देहरी-घोर उदास, ओसरा-छपारी पर छै सड़लों खौर ;  
कानै छै हमरे सड हमरों माँटी केँ पुस्तैनी घोर।”

-- 'प्रतिनिधि अंगिका कवि', पृ. ६८-६९.

### परशुराम ठाकुर 'ब्रह्मवादी' (पं०)

गोनई (हवेली खड़गपुर, जमुई जिला) -निवासी पं० वासुदेव ठाकुर केँ सुपुत्र पं० परशुराम ठाकुर 'ब्रह्मवादी' जी खाली दर्शन आरो अध्यात्मे सेँ नै, अंगिका भाषा, साहित्य आरो संस्कृति सेँ घनिष्ठ रूपों सेँ जुड़लों व्यक्ति छेकाथ। हिनकोँ जन्म १५ अगस्त, १९४७ ई. केँ होलों छै।

'ब्रह्मवादी' जी हिंदी आरो अंगिका में विभिन्न विधा केँ रचना करै छोट आरो 'अंग-तरंगिनी' नामों केँ एक-टा पत्रिकाओ निकालै छोट। हिनकोँ रचना 'अंग-माधुरी', 'नई-बात', 'अंगिकाँचल' -आर पत्रिका में छपतें रहै छै।

अंगिका पर हिनकोँ 'अंगिका भाषा : उद्भव और विकास' आरो 'अंगिका भाषाविज्ञान' (प्रथम खंड) प्रकाशित (हिंदी में) छै। काव्य-कृति केँ अंतर्गत प्रकाशित 'अंग-तरंग' (१९९३ ई.) हिनकोँ उल्लेखनीय पुस्तक छेकै। कुल १०६ पेजों केँ वै पुस्तकों में हिनकोँ १०८-टा कविता छै।

'ब्रह्मवादी' जी केँ कविता में प्रासंगिक भारतीय परिवेशों में अध्यात्म आरो आचार संबंधी विचार विशेष रूपों सेँ मिलै छै। अंगिका लेली हिनकोँ उद्गार छै -

‘जे भाषा केँ बच्चा में माय केँ गोदी में सिखलियै,  
जे भाषा में बाबू सेँ अध्यात्म-ज्ञान हम्में पैलियै ;  
ऊ भाषा केँ रक्षा करबों हमरों धर्म कहै छै ;

आपने भाषा के बल पर लोगों आत्मज्ञान पावै छै।”

-- हे अंगवासी ! जागौं कविता से ।

### भूतनाथ तिवारी (डॉ०)

डॉ० भूतनाथ तिवारी जी ये धरती के प्रथम दर्शन ३ मार्च, १९४८ ई. के भागलपुर जिला के गोबराय गामों में करने छोट । हिनी अंग्रेजी चिकित्सा-पद्धति के एक सफल चिकित्सक रहते हुए अंगिका में कविता करै छोट ।

हिनको एक-टा कविता-संग्रह १९९४ ई. में 'ई जिनगी' के नामों से निकललौ छै, जेकरा में हिनी है जीवनों के व्याख्या बड़ा गहराय में जाय के करने छोट । ये में हिनको कुल ३८-टा कविता छै । 'अंग-माधुरी' में १९८६ से १९९४ ई. ताँय छपलौ पहिलको गारो-टा कविताओ एकरा में लागलौ छै ।

डॉ० तिवारी ने आपनों 'ई जिनगी' में मुक्त छंदों के प्रयोग करै में कोय अनर्गल बात नै करने छोट । तबे नी 'ई जिनगी' के कवितासिनी में वस्तु-जगत् आरो स्वानुभूति से जुड़लौ सुष्ठु काव्यात्मकता ऐलौ छै --

“सबै कहै छै/ हममें छी आगू/ तोहें छौ पीछू/  
देखाइयो पड़ै छै/ कोय आगू/ कोय पीछू/  
आगू-पीछू रौ चक्कर/ छै हैनों भैया/ किस्मत रौ/  
सब रौनक पर/ पड़ी गेलै खटैया/ होडें दौड़ें/  
धूम मचाय छै/ धुआँ करै छै/ मन रौ भीतर/ कुआँ,  
करै छै/ निस्तार एक्के छै समतल।”

### रामशंकर मिश्र 'पंकज' (श्री)

वैद्यनाथधाम-देवघर-निवासी श्री रामशंकर मिश्र 'पंकज' एनाके तें मूलतः हिंदी के कवि छेकात, मत्तुर अंगिकाओ में रचना करै छोट । हिनको अंगिका-कविता 'अंग-माधुरी' पत्रिका में छपलौ मिलै छै । हिनको कविता में भावों के गाम्भीर्य मिलै छै । हिनको एक-टा काव्य-संकलन (हिंदी में) प्रकाशित होलौ छैन् । मंचों पर हिनको कविता-पाठ अच्छा जमै छै ।

'पंकज' जी के कविता में अंगिका (देवघरिया) भाषा के पुट जेना कि भावों के साथे होड़ करते चलै छै --

“फुल्ला बुतरू सारी मॉन, रही-रही के फाटै छें ;  
चान छुवै लें चाहै छी, हाँथे नें हमरों आँटे छें !”

## अवधबिहारी आचार्य

श्री अवधबिहारी आचार्य के जन्म नौगछिया के पकरा गामों में भेलों छैन् । हिनी हिंदी में एम ए आरो शिक्षा-शास्त्रों में प्रशिक्षण प्राप्त कैने छैत ।

हिनको एक काव्य-संकलन १९७१ ई में प्रकाशित होलों मिलै छै । कवितासिनी में युग-स्वर मुखरित होलों छै । आपनों एक-टा संबोधन-गीतों में देलों हिनको संदेश छै --

‘युग-पूजित तोहें दीपित तोरा नैं शीश झुकाना छै ;

आपनों गौरव-गाथा के तोरा नैं कभी भुलाना छै ।

आर्य - कुलों के गौरव-भूषण ! जागें, भेल बिहान रे ।’

## कुमार भागलपुरी (श्री)

कुमार भागलपुरी जी के घोर रैपुर (भागलपुर) । हिनी भाषा-शिक्षक छैत । हिंदी में स्नातकोत्तर उपाधि लेला के बाद हिनी कुच्छू दिनों ताँय आकाशवाणी, भागलपुरों से जुड़लों रहलात ।

‘भागलपुरी’ जी के कविता ‘अंग-माधुरी’ आरो ‘पूर्वा’ -जेन्हों पत्रिका में छपतें रहै छै । हिनी आशु-कवि आरो कुशल वक्ता छैत आरो हास्य-व्यंग्य-प्रधान रचना करै छैत । हिनको कविता --

‘सबसे अच्छा छै ननिहार ; नाना-नानी के संसार !

नाती जीएँ लाख बरीस ; नाना-मुख बरसै आसीस ।

जे नाना-घर जाय मोटाय, वेहें नानी के सोहाय ।’

-- ‘ननिहारों के गीत’ ।

## शंकर मोहन झा (डॉ०)

डॉ० शंकर मोहन झा के जन्म १६ अगस्त, १९५४ ई. के बाबा वैद्यनाथ के नगरी देवघर में होलों छै । श्री शशांक मोहन झा आरो श्रीमती कुसुम देवी के सुपुत्र झा जी सुख्यात जन-कवि सदुपाध्याय भवप्रीतानन्द ओझा के काव्य-कृतित्वों पर गंभीर शोध करी के हालहै में भागलपुर विश्वविद्यालयों से पी-एच. डी डिग्री हासिल कैने छैत । हिनको शोध-कार्यों के एक विशेषता ई छेकै कि हिनी स्व० ओझा जी के पदावली के भाषा के अंगिका सिद्ध करै में अपेक्षित सफलता पने छैत ।

डॉ० शंकर मोहन झा के कोय स्वतंत्र पुस्तक तें अब ताँय नै प्रकाशित भेलो छै, मतुर हिनको पहिलो अंगिका-गीत 'अंग-माधुरी', १९७५ ई. में छपलौ रहै। हिनी एक गीतकार छेकात, मतुर छदमुक्त कविताओ करै में हिनका महारत हासिल छैन्। हिनको कविता में यथार्थवादिता के साथे-साथ सरसता आरो सहज बोधगम्यता रहै छै। डॉ० शंकर मोहन झा के एक-टा अंगिका (दिवचरिया) कविता के एक अंश --

'आरखंड नामो'क बौन तें आबें खाली भवप्रीता'क रचना'म रहले ;  
बुजुर्ग पीढ़ी'क माथा'म बिसरतें-भूलतें जरा-जुरी बचलौ होते ।''

### अंजनी कुमार शर्मा 'विशाल' (श्री)

श्री विशाल जी भागलपुरो के एक उभरलौ पत्रकार, कवि आरो लेखक छेकाथ। हिनको कविता 'अंग-माधुरी' पत्रिका आरो कयेक-टा संकलनो में ऐलौ छै।

कवि विशाल जी विशेष करी के मानव-मूल्य आरो समाजो में पनपतें हुऐ घरातलीय मोह या प्रवृत्ति संबंधी कविता करै छौत। हिनको 'वृक्षारोपण' कविता के एक बानगी देखलौ जाय --

'बिचारी माटी तें छै/ बाढ़ में तबाह !  
टूक-केँ-एक पत्थर गिरै छै,  
कमै छै नै तइधो कटाव।  
पानी केँ साथ पैसा बहै छै,  
खाली मिलै छै ऑफिसरो केँ दाव ।''

-- 'सात समन्दर साथ', पृ. ४१.

### वेद प्रकाश बाजपेयी (श्री)

श्री बाजपेयी जी वंदनवार (जिला गोड्डा) के निवासी छेकात। हिनको बेसी अभिरुचि यदियो पत्रकारिता दिस छैन् तैयो हिनको पहिलो अंगिका कविता 'आदमी' छेकै। हिनी एक-टा अंगिका काव्य-संकलनो में छपलो छौत। हिनको कविता --

'हम्मे/मशीन बनी केँ/गड़गड़ाय छियै !

की हो,/जीयै छियै की ?

कहाँ मालूम छै--/कहाँ/कैन्हे जाय छियै !

चक्का कि मोटर .... की छियै ?''

-- 'अंग-माधुरी' से।



## देवेन्द्र (प्रो०)

प्रो० देवेन्द्र अंगिका आरो हिंदी के सजग कथाकार, सक्षम समीक्षक आरो संवेदनशील कवि छेकात। हिनको रचना सरजमीनों के छूते चले छै। सर्वहारा वर्गों के जीवनो के घात-प्रतिघातो के पारखी जनवादी चेतना के कवि प्रो० देवेन्द्र जी के एक साहित्यकारों के रूपों में अच्छा प्रतिष्ठा छैन्। अंगिकाओ पर हिनको अच्छा अधिकार छै। 'अन्हार काँपै छै' हिनको कविता के एक अंश देखलौ जाय --

"कहीं से ढोलक-झालों के आवाज आबै छै ;  
एक ढोलक ढेरी झाल -- अन्हार काँपै छै !  
एखनिये ते/मुर्दघट्टी रड लागै रहै सौसे इलाका !  
जिनगी के कहीं कोय दरेस नै !  
नै धरती, नै आकाश ; कुछ नै सूझै रहै यहाँ से वहाँ तक।  
जनाँ एक्के गो करिया पहाड़ -- अन्हार !  
जनाँ जमी गेलों रहें करिया रात !"

-- 'प्रतिनिधि अंगिका कवि', पृ. ११८.

## रतनकिशोर (श्री)

श्री रतनकिशोर जी गुरुबाजार (कटिहार) के निवासी छथिन। साहित्यों दिस हिनको अभिरुचि हिंदी आरो अंगिका के प्रख्यात कथाकार श्री अनूपलाल मंडल (स्व०) के प्रेरणा से जागलों छै। हिनको कविता के आधार-फलक बहुत फैललों छै। रूपक के शैली में हिनको एक गीत --

" बेबसी गावै छै उलझन के राग, /जीवन के जंगल में लागलों आग।  
दुविधा के दलदल में अंतर के फूल, /चिता चढ़लों ढेरों से अनब्याही धूल।  
सांसों के उपवन में उड़लै काग !"

## विजय (डॉ०)

१ जनवरी, १९४९ ई. के जन्म लेलों डॉ० विजय के घोर गाँव सहसी (जिला खगड़िया) छेकैन्। हिनी आरक्षी-सेवा से संबद्ध छोट आरो 'तुलसी' नामों के एक पत्रिका के माध्यमों से अंगिका के सेवा करते आबी रहलों छोट। 'माटी' आरनी काव्य-संकलनों में हिनको रचना छपलों छै। कविता हिनी गद्य-शैली में

लिखै छौं। हिनको 'चाँद' कविता --

"चाँद, बच्चा लें/सफेद-सफेद गेंद ;  
चाँद, सुहागिन वास्ते/कारों कपार पर उजरो सुंदर बिदिया ;  
मतुर, चाँद,/हमरा लें/  
चूल्हा पर चढ़लौं अल्मूनियम के हंडी  
या ताबा पर सेकैतें कच्चा रोटी।"

-- 'अंगिका के प्रतिनिधि प्रकृति कविता', २७.

### अमरेन्द्र (डॉ०)

अंगिका साहित्यों के अन्यतम महारथी डॉ० अमरेन्द्र आपनों सर्वतोमुखी प्रतिभा से अंगिका-साहित्यों के अंग-प्रत्यंगों के अलंकृत करी रहलौं छौं। हिनको जन्म ५ जनवरी, १९४९ ई. के बाँका जिला, रजौन थाना के रूपसार गामों में भेलौं छै, मतुर भागलपुरों में रहै छौं। हिनी अंगिका के अलावे हिंदीयो के कवि, गीतकार, गजलकार, पत्रकार आरो समीक्षाकार के रूपों में ख्यातिलब्ध छौं। कविता के साथे-साथ नाटक, निबंध, कहानी, शोध, बाल-काव्य आदि दोसरो-दोसरो विधा में हिनी स्तरीय रचना करै छौं।

आभी ताँय अमरेन्द्र जी के 'सूरज के पार', 'जनतंत्र का विक्रमशिला' 'करिया झूमर खेलै छी', 'पीर का पर्व पुकारे', 'देहरी पर दीया', 'गेना', 'ढोल बजै छै ढम्मक-ढम', 'स्वातंत्र्योत्तर हिंदी कहानी' (संपादित) इत्यादि पुस्तक प्रकाशित होय चुकलौं छै जबे कि हिंदी आरो अंगिका के कर्ते नी संकलन आरो पत्रिका के संपादन हिनी करतें ऐलौं छौं। अखनी 'आंगी' पत्रिका के संपादन आरो प्रकाशनों हिंदी-अंगिका में करी रहलौं छौं, जे कि एक स्पृहणीय पत्रिका के रूपों में जानलौं-मानलौं जाय रहलौं छै। ये इतिहासों के गद्य-भागों के लेखन/संपादन हिनके द्वारा करलौं गेलौं छै। 'गीत-गंगा', 'सात समन्दर साथ' आरो 'आठ समन्दर आँख' हिनको अंगिका कविता के संपादित पुस्तक छेकै। 'गीत-गंगा' के अंत में हिनको एक गाथा-गीति-नाट्य 'अंगदेव' लागलौं छै, जेकरों एक विशिष्ट महत्व छै।

अंगिका के काव्य-कृति के रूपों में अमरेन्द्र जी के 'करिया झूमर खेलै छी', 'ढोल बजै छै ढम्मक-ढम' आरो 'गेना' विशेष रूपों से उल्लेखनीय छै। 'अंगदेव' १५ पृष्ठों में ४६२ पाँती के एक लंबा गीति-गाथा-प्रबंध छेकै।

लोक-गीति-गाथा शैली आरो लोक-लय-धुनों में लिखलें एक भौगोलिक कविता छेकै ऊ। गंगा, कोशी, चानन नदी आरो अंग-देशों के मानवी आरो देव-रूपों में उरेखलें इतिवृत्त -- अमरेन्द्र जी के त्रासदी काव्य छेकै। करुण रसों में एकरों अंत भेलों छै, मत्तुर आशा के किरिन लेलें --

-- 'होलें छै आकाश से भाषण पुरतै किंछा तीनों बहिन रों, हो राम ;  
राम, होतै अबकी तीन-तीन अंग-देश अबकी जनम में , हो राम ।  
ई वचनों के सुनी के गंगा कोशी चानन खलखल हाँसै छै, हो राम ;  
राम छम-छम नाचै छै आरो मास में खमखम भादों में, हो राम ।।'  
X X X X X X  
तखनी देव पितर आरो मानुख खाली अंगदेवे ध्यावै, हो राम ;  
राम, अरज करै सब कहिया लेबा तोंय अवतार, हो राम ।।''

१९८२ ई. में छपलें 'करिया झूमर खेलै छी' डॉ० अमरेन्द्र के पहिले काव्य-संकलन छेकै। कुल २८ पेजों के है संकलनों में हिनकों २३-टा कविता छै। ये किताबों के शीर्षक आरो हरेक कविता के पहिलों पाँती से लागै छै कि ई एक-टा बाल-काव्य छेकै, मजकि बच्चासिनी के फेंकड़ा, लोरी आरो सूक्ति के बहाना से कविवर अमरेन्द्र जी समाज आरो देशों के स्थिति अच्छा दरसैने छै एकरा में ; लोकमनों के भाव आरो भाषा देने छै, गाम-घरों के बात करने छै।

डॉ० अमरेन्द्र के प्रबंध-काव्य 'गेना' केरों प्रकाशन १९९० ई. में भेलें छै। नौ सर्गों में समाप्त है काव्यों में कुल ९५ पृष्ठ लागलें छै। 'गेना' नामों के एक झाड़ूदार (सफाई-मजदूर) के जीवनो पर केन्द्रित 'गेना' अंगिका के पहिलों दलित-काव्य छेकै ; एकरों प्रकाशनों से एकरों रचयिता अमरेन्द्र जी अंगिका में दलित-काव्यों के एक स्तरीय ऊँचाई देने छै।

पाश्चात्य समीक्षा-शास्त्रों के अनुसार काव्यों के दू भेद होय छै -- एक विषयी-प्रधान (सब्जेक्टिव) आरो दोसरो विषय-प्रधान (ऑब्जेक्टिव)। विषयी-प्रधान काव्यों के तादात्म्य 'प्रगीत' से आरो विषय-प्रधान काव्यों के 'प्रबंध' (एपिक) से स्थापित करलें गेलें छै। 'गेना' विषय-प्रधान काव्य छेकै। ई महाकाव्यों के कोटि में आवै छै, जेकरा में एकरों नायक गेना के सौसे जीवनवृत्त छंदबद्ध होलें छै। एनाके तें महाकाव्यों के नायकत्व कोनो पौराणिक अथवा ऐतिहासिक व्यक्तित्वों के प्राप्त होलें ऐलें छै, मतरकि 'गेना' दलित लोक-जीवनो पर केन्द्रित छै जे कि आधुनिकता के एक उत्कृष्ट दृष्टान्त छेकै।

'गेना' अंगिका महाकाव्यों के बृहत्त्रयी के अंतर्गत आवै छै -- 'सवर्णा'

(डॉ० कुशवाहा), 'उध्वरिता' (कविवर सुमन सूर) आरु 'गेना' (डॉ० अमरेन्द्र) ।

'गेना' के वर्ण्य विषय आयकों विशृंखल समाज/समाजों में व्याप्त विसंगति छेकै, एक दलित पात्र (गेना) के सामाजिक पीड़ा छेकै। वहे पीड़ा के बखानों में गेना के सौसे जिनगी -- "करका कच्चा माँटी रड बुतरु भेलै" (जन्म) से लैके 'अतना कही चुप भेलै गेना' (मृत्यु) ताँय -- के वर्णन छंदबद्ध भेलों छै यै किताबों में। प्रबंध-काव्य 'गेना' के नायक गेनाँ आयकों समूचे दलित वर्गों के प्रतिनिधित्व करै छै। आयकों समाजों में दुकलों जात-पाँत, ऊँच-नीच, धनी-गरीब, बड़ों-छोटों इत्यादि के करुणा-भरलों वर्णन यै में होलों छै। लोक-जीवनों के बहुज्ञ रचनाकार अमरेन्द्र जी ने जीवनों के कते नी प्रवृत्ति, निवृत्ति के आपनों अनुभूति के साथे गूथी राखनै छै। खाली बौसी (शहर) आरु आस-पासों के लोगे के नै, बौसी हेनों दोसरों-तेसरों शहरों-बाजारों के लोगों के मनोवृत्ति के संस्कारवान् आरु संयमशील बनावै के प्रयास करबों जेना कि 'गेना' के संवेदनशील रचयिता (अमरेन्द्र जी) के एक सदुद्देश्य रहलों रहें।

प्रबंध-रचना में प्रायः तीन अंग होय छै -- वस्तु-वर्णन, चरित्र-चित्रण आरु भाव-व्यंजना। 'गेना' में है तीन्हू के निर्वाह होलों छै।

'गेना' बारहमासा ते नै, मतुर दू-दू महीना के जे छों ऋतु होय छै होकरे काव्य छेकै। बारहमासा विरह-काव्य होय छै, जै में कोय विरहिणी (नायिका) आपनों परदेशी प्रीतमों के विरह में आपनों मनोदशा के बखान महीना, पौख आरु नक्षत्रों के गुण-दोषों पर करै छै। 'गेना' हौ वर्णन-परंपरा में नै आवै छै। साल भरी के छवो ऋतुवों के चालों पर नायक गेना के जीवनवृत्त एकरा में घुरै छै। यै में जगघों-जगघों पर प्रकृति-वर्णनों के मनोहरता ते छेबे करै छै, प्रकृति के संगे गेना के प्रवृत्ति आरु ओकरों प्रवृत्ति के संगे नैसर्गिक प्रकृति के सुंदर समन्वय भेलों छै।

'गेना' लोक-जीवनों के महाकाव्य छेकै, जेकरा में लोक-व्यवहारों के शिक्षाप्रद संदेश भरलों छै। एकरा एक समाजवादी महाकाव्य कहलों जाय ते कोय अत्युक्ति नै। ई एक त्रासदी काव्य छेकै। एकरों अंग-रस 'करुणा' छेकै, जबे कि शृंगार, शान्त, वीभत्स-आर अंगी-रसो के स्थान यै में मिललों छै। रसे गुणों के सहारा लै छै। यै दृष्टि से 'गेना' प्रसाद-गुण-पूरित सरस काव्य-कृति छेकै। भावों के खोलै में, अर्थ-बोध करावै में, कयक रकमों के अलकारों के समावेश एकरा में नीकों भेलों छै। उपमान स्थानीय प्रकृति से बेसी लेलों गेलों

छै ; रूपक आरो उत्प्रेक्षा के तें भरमारे छै । काँहीं-काँहीं लोकोक्ति-जेन्हों अलंकारो के प्रयोग भेलों छै यै में ।

डॉ० अमरेन्द्र ने 'गेना' में मुख्य रूपों से मात्रिक वृत्त (छंद) 'सार' आरो वर्ण-वृत्त 'कवित्त' के प्रयोग करने छै । वोहो शास्त्रीय वृत्त में गेय पदों पर सटीक उतरै छै । 'गेना' के भाषा ठेठ अंगिका के निखरलों रूप छेकै । काँहीं-काँहीं मिथकों के उपयोगों से यै में गाम्भीर्य आबी गेलों छै । कर्तव्यनिष्ठ, यथार्थपरक, उदात्त चरित्र-चित्रण 'गेना' के विशेषता छेकै । संक्षेपों में, 'गेना' अंगिका-साहित्यों के एक विशिष्ट उपलब्धि छेकै ।

'ढोल बजै छै ढम्मक-ढम' सुकवि अमरेन्द्र जी के बाल-कविता-संग्रह छेकै, जेकरा में बच्चासिनी के मनोभावों के अनुकूल भाषा आरो छंदों में हिनकों ३५-टा छोटों-छोटों अंगिका कविता संकलित छै । अंगिका बाल-कविता के क्षेत्रों में है सचित्र किताबों के विशिष्ट महत्व छै, जेकरा से अंगिका-साहित्यों के एक अभावों के पूर्ति होय छै । बच्चासिनी के मनोरंजनों में 'ढोल बजै छै ढम्मक-ढम' के स्पृहणीय स्थान है । 'मुर्गा', 'मछली', 'छाता', 'कौआ', 'जाड़', 'बकरी', 'दीवाली', 'भोर', 'चाँद', 'गान्धी बाबा', 'धुम्माँ', 'रेल', 'ढोल', 'भालू', 'हाथी', 'मामा', 'ऊँट' ओगैरह शीर्षकों के कविता है किताबों में लगलों छै । 'जाड़' कविता के एक अंश देखलों जाय --

"दलदल दलकै हमरों हाड़ ; सुइये रड चूभै छै जाड़ ।  
कँपकँप काँपै दोनों ठोर ; कस्सी बान्हलों गाँती जोर ।  
कनकन्नों राते रड भोर ; गुरुओ जी से जाड़ कठोर ।  
गललों जाय छै हमरों हाड़ ; कहिया जैभा तोहें जाड़ ।"

### रमेश आत्मविश्वास (डॉ०)

डॉ० रमेश आत्मविश्वास के पूरा नाम छेकैन्ह श्री रमेश मोहन शर्मा 'आत्मविश्वास' । हिनकों जन्म जयमंगल टोला, साहु परबत्ता (नौगछिया, भागलपुर) में १ फरवरी, १९४९ ई. के भेलों छै । हिनी हिंदी में स्नातकोत्तर, शिक्षा-शास्त्रों में स्नातक आरो 'अंगिका अंचल के लोक-साहित्य के अध्ययन' पर पी-एच. डी. डिग्रीधारी कवि, साहित्यकार, पत्रकार आदि छोंत । हिनकों संपादनों में एक अनियतकालीन अंगिका-पत्रिका 'अंगिकांचल' निकलै छै । 'ज्योति तपस्या' आरो 'बाबा बिसू राँथ' के लोक-गाथाओ हिनकों संकलन आरो संपादनों में निकललों छै ।

डॉ० आत्मविश्वासकृत कोय अंगिका काव्य-संकलन हमरा देखला में नै ऐलें छै, मतुर हिनी अंगिकाओ में नीकों कविता करै छौत। पत्रिकासिनी में हि.कों जौन अंगिका कविता छपलें छैन् वैसिनी में आयकों संदर्भों में व्यथा-कथा क. में मिलै छै। 'कुली' शीर्षक हिनकों कविता कें एक अंश देखलें जाय --

'पेटों कें खातिर कमाय लें लागै छै, हाकिम !

दिन-भरी दूर-दूर जाय लें लागै छै, हाकिम !

X X X X

कुली समझी कें 'रे-बे' करी दै छै, बाबू !

पैसा दै खिनी चौअन्नी दै छै कम्मे !

शरीफ केकरा कहय छै --

आबें नज जानै छियै, हाकिम ! पेटों कें खातिर ।।'

-- 'अंगिकांचल', दिसंबर, १९९६ ई.

## अनिरुद्ध प्रसाद विमल, 'विद्यावाचस्पति'

स्व० चक्रधर प्रसाद यादव आरो श्रीमती पार्वती देवी कें आत्मज श्री अनिरुद्ध प्रसाद विमल कें जन्म मिर्जापुर-चंगेरी (बाँका जिला) में १८ जून, १९५० ई. कें भेलों छै। हिंदी में एम. ए. आरो शिक्षा-शास्त्रों में स्नातक डिग्रीधारी विमल' जी कें साहित्य-सेवा पर 'कविरत्न', 'विद्यावाचस्पति', 'पत्रकारश्री', 'साहित्यशिरोमणि' आदि मानद उपाधि कयेक संस्था सें मिललें छैन्। हिनी हिंदी आरो अंगिका में कविता, कहानी, नाटक, लघु कथा आदि अनेक विधा कें रचना करने छौत आरो करी रहलें छौत। १९७८ ई. में संस्थापित 'समय साहित्य सम्मेलन, पुनसिया (बाँका)' कें संस्थापक-महामंत्री आरो हिंदी त्रैमासिक 'समय' कें संपादकों कें रूपों में हिनी एक जानलें-मानलें साहित्यकार छेकात। हिंदी आरो अंगिका में हिनकों कयेक-टा नी किताब प्रकाशित होय चुकलें छै। वैसिनी में 'कागा की संदेश उचारै !' (प्रगीत प्रबंध-काव्य) आरो 'साँप' (नाटक) अंगिका में लिखलें हिनकों विशिष्ट कृति छेकैन्ह। एकरों अलावे 'प्रतिनिधि अंगिका कवि', 'ऐंगना उतरलै चाँद' आरो 'गीत-गंगा' काव्य-संकलनों में हिनकों दू दर्जनों सें बेसी कविता लागलें छै। अंगिका भाषा-साहित्यों कें विकास-चिंतनों सें जुड़लें व्यक्तित्व श्री अनिरुद्ध प्रसाद विमल कें 'कागा की संदेश उचारै!' अंगिका-साहित्यों कें एक विशिष्ट उपलब्धि छेकै।

'कागा की संदेश उचारै !' के समीक्षात्मक मूल्यांकन डॉ० डोमन साहु 'समीर', डॉ० अमेरन्द्र, डॉ० श्रीरंजन सूरिदेव, डॉ० मुचकुन्द शर्मा, डॉ० कमलकिशोर गोयनका, डॉ० बालेन्दुशेखर तिवारी, डॉ० श्रवण कुमार गोस्वामी आरनी विद्वानें मुक्त कंठों से कैंने छै। संस्कृत, अपभ्रंश, अवधी, ब्रजभाषा आरो हिंदी के 'मेघदूत', 'संदेशरासक', 'पद्मावत', 'भ्रमर-गीत' आरो 'कनुप्रिया' के परंपरा में अंगिका के 'कागा की संदेश उचारै !' एक उत्कृष्ट विरह-काव्य के कोटि में आवै छै, जेकरा में अनूढा परकीया नायिका 'साँवरी' (छद्मनाम्नी) केरों विरह-विधा तलस्पर्शी रूपों में, भिनु-भिनु ऋतु-चक्रों के प्रसंगों में, उभरलौ छै। "कागा की संदेश उचारै !" अंगिका की उत्कृष्ट सृष्टि है। ...पंक्ति-पंक्ति में मार्मिकता है। ...भावों की बाढ़ उमड़ती-सी लगती है।" (डॉ० मुचकुन्द शर्मा); "महाकाव्यात्मक गरिमा से मंडित काव्य 'कागा की संदेश उचारै !' प्रिया की स्मृति पर लिखा गया अद्भुत सृष्टि है।" (डॉ० श्रीरंजन सूरिदेव); "कागा की संदेश उचारै !" डॉ० अमेरन्द्र के कथन -- 'विरह-काव्य-परंपरा का विराम-चिह्न' -- को सत्य सिद्ध करता है।" (डॉ० गोयनका) इत्यादि।

मुक्त छंदों में रचलौ 'कागा की संदेश उचारै !' में भाव, भाषा आरो लयात्मकता के मनोहर समन्वय छै। अंगिका के एक उत्कृष्ट आरो विशिष्ट कृति छेकै ई।

### अनिरुद्ध प्रभास (श्री)

गाँव बनियाडीह (थाना गंगटी, जिला गोड्डा) में ५ मई, १९४९ ई. के जन्म लेलौ श्री अनिरुद्ध प्रभास हिंदी में एम. ए. छौत। हिनी मुख्य रूपों से अंगिका के सिद्धहस्त कथाकार/उपन्यासकार छेकात। हिनको लिखलौ 'छाहुर' अंगिका के बहुचर्चित उपन्यास आरो 'चम्पा के राजकन्या' नाटक छेकै। हिनी अंगिका में कते नी कविताओ रचलें छौत, मतुर किताबों के रूपों में छपलौ हिनको कोय संकलन हमरो नजरी में नै पड़लौ छै। हिनको कविता में आधुनिकता के स्वर उभरलौ मिलै छै। 'चैतों के दुपहरिया धूप' कविता के एक अंश लेलौ जाय --

"दारू से मातलों सौतारों रड नाचै छै,  
कंठों में लसकलों मंतर पंडितों के,  
खकसी के फेरू गोस्साय के बाँचै छै ;  
तावों से तबलों कुम्हारों के आबा,  
मने नै मानै तें रही-रही आँचै छै,

--ऐसने छै सुरजों के रूप ।

चैतों के दुपहरिया धूप !''

-- 'प्रतिनिधि अंगिका कवि', पृ. ९९

### सुरेश प्रसाद सिंह (डॉ०)

खगडिया जिला के पसराहा गामों में डॉ० सुरेश प्रसाद सिंह के जन्म १० दिसंबर, १९५१ ई. के होलें छै। हिनी हिंदी/अंग्रेजी में एम. ए. आरो पी-एच. डी. उपाधि- प्राप्त छोट।

सुरेश जी के दुइ-टा नाटक, 'माँ की कसम' आरो 'धरती का स्वर्ग' हिंदी में छै। एक-टा पत्रिकाओ निकालै छेलात।

हिनको अंगिका कविता जीवनानुभव-युक्त होय छै। रहस्यवादिता के आवरणों में हिनको कविता में संगीत, चित्रात्मकता आरो प्रतीकात्मकता विशेष करी के मिलै छै। हिनको कविता के एक अंश --

“धर्मों के छोड़ी के/असभ्ये हमें रहबै ;  
धर्महीन दुनियाँ में/लोग आय कैद छै,  
मानवता कैद छै/आपनों ही घरों में।”

### नन्दनन्दन (श्री)

कमलपुर (पुनसिया, बाँका) -निवासी श्री नन्दनन्दन जी के जन्म करमा एकादशी, १९५२ ई. के भेलें छै। विज्ञान आरो कानून के स्नातक नन्दनन्दन जी के अंगिका कविता 'ऐंगना उतरलै चाँद' आरनी कविता-संकलनों में ऐलें छै। हिनी गद्य-शैलीयों में लिखै छोट। हिनको भावाभिव्यक्ति मार्मिक, जीवन-मूल्यों के निर्धारित करैवाला होय छै --

“हुनको/अलसइलों आँख,/जेना पियासली -- थकली  
हिरनी/चटपट जी/पछिया के मारलों ठोर/जेना चुसलों --  
अधसुखलों गुलाब/अँचरा के छोर ;/ढील-ढाल .../”

-- 'मुनियाँ के आँख' सें।

### विपिन परमार (श्री)

'कविरत्न' -आर के उपाधि सें सम्मानित श्री विपिन परमार (श्री विपिन कुमार मिश्र) के जन्म १२ जुलाई, १९५३ ई. के ग्राम तगेपुर (अंचल जगदीशपुर,



जिला भागलपुर) में होतों छै।

आयकों भारतीय साहित्यों में जेना लघु कथा कें एक नया विधा अस्तित्वों में ऐलों छै तेन्है अंगिका में परमार जी कें लिखलें छोटों-छोटों कविता (लघु कविता) आपनों अस्तित्व खोजी रहलें छै। निस्संदेह, वै तरहों कें कविताँ तुरन्त असर डालै छै। हिनकों कवितासिनी में आयकों समाजों कें स्वरूप आरो मनोवृत्तों भाषा पैने छै। एकाघ उदाहरण --

काटै छै/ "काटै तें सब्भै छै --

हम्में हुनकों खेत काटै छियै

आरो हुनी हमरों पेट काटै छै !"

गनै छै/ "हुनियों गनै छै !

आरों हम्मू गनै छियै --

हुनी नोट गनै छै

आरो हम्में तारा !"

-- 'प्रतिनिधि अंगिका कवि', पृ. १३७.

एन्हें, 'विचार', 'देवदूत', 'पंच', 'किरिया' आरनी पर हिनकों अनेक प्रतीकात्मक अणु-कविता बड़ी व्यंग्यपूर्ण छैन्।

### देशभक्त (डॉ०)

कतें नी मान-सम्मानों सें विभूषित डॉ० देशभक्त जी कें जन्म ३० जून, १९५३ ई. कें भेलों छै। हिनकों अंगिका कविता 'अंग-माधुरी', 'आंगी' आदि पत्रिका में छपतें रहै छै। हिंदी आरो अंगिका कें पत्रकार 'देशभक्त' जी उत्तरी अंगक्षेत्रों कें रचनाकारों में महत्वपूर्ण स्थान राखै छोट। हिनकों कविता में आयकों लोगों कें मनो कें तिकखों अभिव्यक्ति रहै छै। हिनकों 'पहिने छों भारतवासी' कविता कें एक अंश लेलों जाय --

"अंग-बासी छों, बंग-बासी छों

या छों कोनो प्रान्त, जिला, गाँव-वासी--

है-सब छों बादों में तों,

पहिने छों भारत-वासी।

एहनों काम नै करो, भैया !

जेकरा सें हुएँ देशों कें छती ;

एहनों काम केकरहौ नै करें दें

जेकरा सें हुएँ देशों कें अपमान ।”

-- 'प्रतिनिधि अंगिका कवि', पृ. १११-१३.

### तारकेश्वर ठाकुर 'सुमन' (श्री)

१६ जनवरी, १९५४ ई. कें गोड्डा जिला, गंगटी प्रखंड कें रुंजी गामों में उत्पन्न श्री तारकेश्वर ठाकुर 'सुमन' अंगिका कें स्वनामधन्य कवि श्री भिखारी ठाकुर 'अधूरा' कें सुपुत्र छेकाथ । हिनकों कविता में अंग-देशों कें माटी आरो कर्म केरों महिमा अभिव्यक्ति पाने छै । हिनकों एक कविता कें एक अंश --

“ई छेकै कर्मयुग/कुछु काम करों ;  
कैन्हें कि काम नें/नाम आरो निसानी छोड़ै छै ;  
जे-जे बड़ों छेलै/महान् छेलै, कुछु करी गेलै ;  
छोड़ी गेलै धरती रों गोदी में छाप ।” -- 'कर्मयुग' सें ।

### राजकुमार (श्री)

पटना जिला, बाढ़ अनुमंडल कें शहरी गामों में १९५४ ई. में अवतरित श्री राजकुमार जी कें कर्म-क्षेत्र भागलपुर छेकै । 'कविरत्न' कें उपाधि प्राप्त आरो राजभाषा विभाग, भागलपुर प्रमंडल सें सम्मानित राजकुमार जी सचमुच 'गीतों कें राजकुमार' छोंथ । अंगिका, मगही आरो हिंदी -- सब्भे में हिनकों गीत एक्के रड उभरै छै । हिनकों मगही किताब 'लपकी' मगही कें बढियाँ-बढियाँ किताबों में स्थान पावै छै । अंगिका में हिनी 'अनल' जी कें साथें संपादित 'अंग-मंजरी' काव्य-संकलन देने छोंत, जे कि काफी चर्चित होलों छै ।

राजकुमार जी कें कविता कें विषय देश आरो समाजों कें वर्तमान परिदृश्यों कें उजागर करैवाला होय छै । इहाँ हिनकों दखिनाहा बरखा कें एक-टा झाँकी देलों जाय छै, जेकरा में अनुप्रासों कें छटा अच्छा निखरलों छै--

“दखिनाहा झिहिर-झिहिर झूम-झूम झोरै छै ;  
चन्दन रों बगिया कें चाननी अगोरै छै ;  
खींचै छै उतरा लकीर ।”

### अचल भारती (डॉ०)

समकालीन कविता कें धरातल पर बहुचर्चित कवि डॉ० अचल भारती कें आविर्भाव बाँका जिला कें सोहानी गामों में २७ मार्च, १९५४ ई. कें होलों छै ।

हिनी हिंदी आरो अंगिका केँ चर्चित हस्ताक्षर छौथ । हिंदी पत्रिका 'आज की कविताएँ' (बाँका) केँ संपादक डॉ० गिरिजाशंकर मोदी केँ सहयोगी संपादक डॉ० अचल भारती केँ अंगिका कविता तुकान्त, अतुकान्त आरो मुक्तक होय छै । हिनका समाजों से बेसी लगाव छै । यै लेली हिनकोँ कविता में सामाजिक अंतर्ध्वनि केँ अभिव्यक्ति विशेष रूपों सेँ होलों मिलै छै । हिनकोँ कविता 'गाँवों केँ हवा' केँ एक अंश देखलों जाय --

'गाँवों केँ हवा बीमार छै,  
शहरों सेँ ऐलों सब-कुछ उधार छै !  
लोगों केँ आगूँ लाज बेकार छै ;  
आरो, कवि छै कि आरी पर बैठी केँ --  
गाय-गाय झुम्मर में खोजै संसार छै ।''

-- 'प्रतिनिधि अंगिका कवि', पृ. १३५.

### मीरा झा (श्रीमती)

श्रीमती मीरा झा, एम. ए. (हिंदी) अंगिका केँ कवयित्रीसिनी में अग्रगण्य छथिन । हिनकोँ जन्म तिथि छेकैन्ह १९ सितंबर, १९५४ ई. । हालहै में अंगिका लोक-साहित्यों पर हिनी शोध करी रहली छथिन ।

श्रीमती झाँ 'अंगप्रिया' पत्रिका केँ संपादन एकाध बेर कैने छथिन । विक्रमशिला हिंदी विद्यापीठ, ईशीपुर (भागलपुर) द्वारा हिनका 'विद्यावाचस्पति' केँ मानद उपाधि सेँ सम्मानित करलों गेलों छै ।

मीरा जी गामों सेँ जुड़ली कवयित्री छथिन । हिनकोँ कविता में लोक-मंगल केँ भाव अभिव्यक्त होलों छै । माधुर्य-गुण-प्रधान हिनकोँ एक कविता केँ अंश देखलों जाय कि की रड हिनकोँ मनोँ केँ ललक गामों दिस फिरलों छै --

"सपना सिंगार देखी फरू-फरूँ सिहरै ;  
चिहुँकी केँ नीन खुलै रही-रही हहरै ।  
धुरी-धुरी छछनै छै मोन करै रहताँ --  
परदेशी पियवा केँ बाँह में ।  
धुरी चलें मीत ! फरू गाँव में ।''

X X X X  
"बरसलों बदरी केँ सुबास लेने मह-मह,  
कातिक पुरनिमा केँ उजास लेने दह-दह

नगरों के चिकनों अकासों रड,  
साफ छौं आँख तोरों ।”

-- 'प्रतिनिधि अंगिका कवि', पृ. ८५

### अनिल चन्द्र ठाकुर (श्री)

हिंदी, मैथिली आरों अंगिका के सिद्धहस्त कवि श्री अनिल चन्द्र ठाकुर के जन्म कटिहार जिला के समेली गामों में, जहाँ हिंदी-अंगिका के स्वनामधन्य कथाकार अनूपलाल मंडल रहै छेलात, २५ नवंबर, १९५५ ई. के होलें छै ।

अंगिका के प्रबंध-रचना के क्षेत्रों में ठाकुर जी के अच्छा ख्याति मिललें छै । हिनको काव्य-कृति 'कच' के प्रकाशन १९७५ ई. में भेलें छै । ई एकार्य-काव्य छेकै । पै में कच आरों देवयानी के पौराणिक कथा के अंगिका भाव आरों भाषा के पहिरौन मिललें छै । 'ज्व' संयम के काव्य छेकै । है लघु प्रबंध-काव्यें अंगिका के आधुनिक प्रबंध-काव्य-रचना के दुआर खोललें छै । हिनको कविता 'हवा' करों एक अंश --

“हम्में मनमोहक हवा, मंद-मंद बही के --  
सबकेँ दिल बहलावै छी, सबकेँ सुख पहुँचावै छी ;  
थकलों राही केँ मिटाय छी थकान,  
मन केँ ताजा करै केँ/हम्में छेकाँ अचूक दवा ।”

### मीना तिवारी (श्रीमती)

ऐतिहासिक नगरी कहलगाँव (भागलपुर) केँ सवासिन श्रीमती मीना तिवारी, जिनको जन्म २५ दिसंबर, १९५५ ई. केँ भेलें छै, आपनों रचना आरों संगीतों केँ लहलहैलों बिरवा सेँ जगदीशपुरों केँ कनेरी चाँदपुरों केँ महिमा केँ खिलखिलाय रहली छौंत ।

मीना जी केँ कला आरों गला दोन्हू श्रोतासिनी केँ मनो केँ जीती लै छै । हिनको गीतें नव वसंतों केँ प्रभाव नाखी विस्तार पैंने छै । हिनको एक लोक-कथा-संग्रह 'चलों, खिस्सा केँ गाँव' हालहै में प्रकाशित होलें छैन्ह । हिनको कविता --

‘हे सखि ! ऐलै ऋतु वसंत ।  
अमुआँ मंजरी गेलै, खिली गेलै चितवन । हे सखि० ।  
मदमस्त पछिया/बूझै नै बतिया ;  
आग लगावै वसंती रतिया, चितवा हिलौरै अनन्त/हे सखि० ।”

## प्रकाशसेन 'प्रीतम' (श्री)

श्री रामचन्द्र प्रसाद (पिता) आरों श्रीमती शकुन्तला देवी (माता) के सुपुत्र श्री प्रकाशसेन 'प्रीतम' ने जिला बाँका, थाना रजौन के बरौनी गामों में ५ जनवरी १९५६ ई. के ये संसारों के पहिलों प्रकाश देखने छोट। हिनी अंगिका के बेजोड़ गीतकार छोट। हिनकों गीति-पुस्तक 'गुदगुदी' के प्रकाशन १९८७ ई. में होलें छै, जेकरा में हिनकों १४-टा गीत संकलित छैन्। नामों के अनुरूप 'गुदगुदी' अंगिका के कवि आरनी के गुदगुदैतें होलें उदात्त प्रेरणा दै छै। दुइये पाँती में 'प्रीतम' जी के व्यंग्य कर्तें बेधक बनलें छै, से देखलें जाय --

'विज्ञान के ये युगों में  
स्कूटर पर साँढ़ चलै छै !'

## नरेश जनप्रिय (श्री)

श्री राम प्रसाद पंजियारा आरों श्रीमती मिनती देवी के परिवारों में श्री नरेश जनप्रिय जी के जन्म १९ जुलाई, १९५६ ई. में भेलें छै। हिनी अंगिका आरों हिंदी में रचना करै छोट। 'कवितांजलि' हिनकों हिंदी काव्य-संकलन आरों 'अँचरा' (१९८९ ई.) अंगिका काव्य-संकलन छेकै। ये में हिनकों २७-टा कविता छै।

'अँचरा' कवि 'जनप्रिय' जी के प्रारंभिक कविता-संग्रह छेकै। गीत-शैली में रचलें ये किताबों के कवितासिनी में 'जनप्रिय' जी ने आपनों सुख-दुख आरों गाम-समाजों के कथा कहने छै। बच्चा-बुतरुओ लेली हिनी कुछेक गीतों के रचना, बाल-भावना के अनुकूल, करने छोट। अंगिकाँ हिनका पर बड़ी असर राखै छै हिनकों कविता --

"सुनें, सुनें रे सुगना ! नूनू के दै झुलना ;

चान मामा रोज उतरतै, झूमी-झूमी ऐंगना ।"

-- 'नूनू के गीत' ।

## अनिल शंकर झा (श्री)

श्री अनिल शंकर झा के गाँव छेकै भागलपुर जिला के वंशीपुर चटमा। वॉही झा जी के जन्म १५ जनवरी, १९५७ ई. के भेलें छै। कुछेक बरस ताँप हिनी 'बयान' पत्रिका के संपादन करने छोट।

श्री अनिल शंकर झा के अंगिका कवित्व-रचना पर सम्यक् अधिकार छैन् ।  
आपनों रचना पर हिनी आपनों साहित्यिक छाप अच्छा छोड़ने छोट । हिनको  
अंगिका कवित्तें हिंदी के रीतिकालीन कवि घनानन्द के याद दिलावै छै --

“हुनका नै जावें देबै, चूड़ी खनकाय देबै,  
नैन मुसकाय देबै, पलक झंपाय के ;  
रैन से रिझाय फेनु बैन से खिजाय देबै,  
नैन से गिराय देबै धनुख चलाय के ;  
सौ उलहनाय देबै, लोर ढरकाय देबै,  
हुनका डुबाय देबै कजरा बहाय के ;  
यहू पर जो जैता ते जी के समझाय लेबै,  
लागी पिया पाँव लेबै सिसकी दबाय के ।”

-- 'प्रतिनिधि अंगिका कवि' से ।

भाव, भाषा आरो सदुक्ति-समन्वित ई कवित्तों के चित्रात्मकता वस्तुतः  
देखै आरो समझै लायक छै ।

### विकास पाण्डेय (श्री)

“हमरा नै अन्धड़ों के डोर/नै बतासों के/हमरा  
नै जेठों के चिन्ता/नै पूसों के/ई सब्भे हमरों  
पचलों छै/हम्में झूमते रहै छी/जुड़ावै छी मौन/  
हम्में छेकाँ बाँस-बौन ।”

आत्मकथा के शैली में बाँस-बनों के भाव-वृत्ति के गायक सुकवि  
श्री विकास पाण्डेय के जन्म चम्पानगर (भागलपुर) में १० अगस्त, १९५८ ई. के  
भेलों छैन् । हिनको 'नदी कातों के माटी' (कविता-संग्रह) छपी रहलें छै । एक  
बानगी --

“ई देवी छिकै/कि जोगिन ?

कभी शान्त रहै छै/कभी उमताय जाय छै !

जबे उमताय जाय छै ते हमरा निगली जाय छे,

जबे शान्त होय छै ते उगली दै छे,

हमरों दम्मों पर बीतै छै ;

ओकरो खेल फुरैते नै छै !

-- 'अंगप्रिया', दिसंबर, १९९१.

प्रतीकात्मक शैली में, नदी के प्रति नदी कातों के माटी के है उलाहनों बड़ी ठीक उतरलो है।

### ब्रह्मदेव झा रतैठिया (स्व०)

ग्राम रतैठा (खडगपुर, जमुई/मुंगेर) के कवि ब्रह्मदेव झा 'रतैठिया' के भगवाने कम्मे उमरी में ३ अप्रिल, १९८२ ई. के अपना कन बोलाय लेलखिन। हिनको कवि बड़ा धारदार रहै। हिनको कविता में लोग-वेदों के झकझोरी दै के क्षमता रहै। जीवनों के कठोर सच के दर्शन रतैठिया जी के कविता के विशेषता रहै।

### प्रसून लतांत (श्री)

'जेतन्है सुंदर नाम ओतन्है सुंदर काम' -- संयोगे से ऐहिनों कोय मिलै है। अंगिका के वहे 'कोय' में एक छोट प्रसून लतांत जी। हिनको जन्म १९५८ ई. में हिंदी-दिवस के अवसरों पर भेलो है।

कवि आरो पत्रकार 'लतांत' जी के कविता में लोक-जीवनों के संवेदनशील झांकी मिलै है।

### इन्दुभूषण मिश्र 'देवेन्दु' (डॉ०)

डॉ० देवेन्दु (१९५९ ई.) केरों हिंदी में 'मुठ्ठी भर धूप' (काव्य) छपलौ है आरो अंगिका में 'आपनों भारत देस वही' (खंड-काव्य) छपी रहलौ है।

### पतझड़ खैरावादी (श्री)

कविरत्न पतझड़ खैरावादी के जन्म ८ सितंबर, १९६० ई. के खैरा (नाथनगर) में भेलो है। हिनी अंगिका आरो हिंदी में रचना करै छोट।

'खैरावादी' जी के कविता के मुख्य विषय छेकै सामाजिक पीड़ा। हौ पीड़ा जातिवादों के हुए, आतंकवादों के हुए या मानवीय अवमूल्यनों के हुए, सब्हे हिनको कविता में स्थान पने है।

"ठीक है ; ई प्रश्न अजीबो गरीब है ;

एकरों उत्तर सिर्फ यही है कि -- 'ठीक है'!

चाहे लाख दुख रहे/दिल दर्द से चूर-चूर रहे,

तैयो मुसकाय के कहै लें पड़ै है -- 'ठीक है'।"

### कुमार दीपंकर (श्री)

कुमार दीपंकर आपनों ननिहर नारायणपुर (पीरपैती) में नवंबर, १९६० ई. के धरती के दर्शन पहिलों दाफी कैने छोट। हिनी अंगिका, भोजपुरी आरो हिंदी में कविता करै छोट। हिनको रचना 'नालन्दा-दर्पण', 'वाणी-विकास', 'अंग-मंजरी' -आर पत्रिका में छपलौ मिलै छै।

हिनको 'तुलसीदास रौ महिमा' के एक अंश --

"समचरितमानस में तुलसी रामकथा दरसैने छै ;

राम लला सीता मैया के पुलकित प्रेम उगैने छै ।

'मानस' में कविने चौपाई दोहा छंद सजैने छै ;

महाकाव्य रची के महाकवि के सुंदर पदवी पैने छै ।"

-- 'अंग-मंजरी' से ।

### महेश बेजार (श्री)

स्व० दामोदर प्रसाद सिन्हा के सुपुत्र श्री महेश बेजार जी के जन्म १ फरवरी, १९६१ ई. के भेलौ छै। कला आरो कानून के स्नातक कवि बेजार' जी आपनों रचना के माध्यमों से निराश मनुष्यों में आशा के संचार करै के चेष्टा करै छोट। हिनको 'मानव रौ इतिहास' कविता के एक अंश --

'हे मानव ! उठौ ; हारी गेला कैन्हें ?

ई अनमोल जिनगी से/कोशिश करौ नी आगू जाय लें फिरू ;

लक्ष्य पावै लेली हर हालत में/बढना छौन्,

गमों के ठोकर खाय के भी/एकरा से लड़ाय करना छौन् ।"

### धीरेन्द्र छतहारवाला (श्री)

गाँव छतहार (थाना शंभुगंज, जिला बाँका) में ३० दिसंबर, १९६२ ई. के जन्मलौ श्री धीरेन्द्र छतहारवालौ हिंदी आरो अंगिका में कविता, निबंध, लघु कथा आदि लिखै छोट आरो 'लहर' (हिंदी पत्रिका) के संपादन करै छोट। हिनको रचना अंगिका के 'अंग-माधुरी', 'तुलसी', 'अंगप्रिया' -आर पत्रिकासिनी में छपतें रहै छै।

छतहारवाला जी अंगिका वास्तें एक समर्पित व्यक्ति छेकात। देवघर में उदित अंगिका साहित्य परिषदों के स्थापना, डॉ० डोमन साहु 'समीर' के अध्यक्षता में, करी के हिनी १९८९ आरो १९९० ई. में दू बेर ओकरौ सफल अधिवेशन



करवैने छोट, जेकरों अनुगूँज आभी ताँय बरकरार छै। 'छतहारवाला' जी केँ एक-टा अंगिका-कविता केँ नमूना देखलौं जाय --

"उठी जाय लहास हमरों प्यारा देश भाय-बहिन लेली ;  
बहिन! मिटै नै जब तक तम देशों केँ  
जलतें रहें हमरों सारा, होतें रहें देश प्रकाशित  
खुशी रहें बहिन-भाय प्यारा।"

हिनी जिला सांस्कृतिक परिषद्, देवघर ; समय साहित्य-सम्मेलन, पुनसिया (बाँका) आदि सेँ सम्मानित होय चुकलौं छोट।

### कुन्दन अमिताभ (श्री)

श्री कुन्दन अमिताभ जी केँ गाँव खानपुर माल (जिला भागलपुर) छेकै। है युवा अभियंता कवि केँ जन्म १ जनवरी, १९६८ ई. केँ होलौं छै। अमिताभ जी केँ कविता में भाव आरो भाषा केँ सुंदर मेल मिलै छै। नमूना --

"केकरा परवाह छै-- रहें 'आपनों भारत सुंदर' ?  
हम्मे कपसतें-कपसतें गरजलियै,  
हवा में धिरकन होलै, / दर्द-भरलौं ध्वनि बिखरी गेलै,  
हिन्ने-हुन्ने सन्नाटा में !  
केकरा परवाह छै -- रहें 'आपनों भारत सुंदर'?"

### राजमोहन शर्मा (श्री)

श्री शर्मा जी केँ आविर्भाव ग्राम महौता (अमरपुर) में ५ मई, १९६९ ई. केँ भेलौं छै। हिनी अमरपुर सेँ प्रकाशित 'संकल्प' पत्रिका केँ संपादक रहलौं छोट। हिनकोँ पहिलौं कविता 'अंग-माधुरी' (नवंबर, १९८२) में छपलौं रहै। 'प्रतिनिधि अंगिका कवि' काव्य -संकलनों में हिनी स्थान पैंने छोट। हिनकोँ कविता प्राकृतिक परिवेशों सेँ खास करी केँ जुडलौं रहै छै।

हिनकोँ 'भोरकोँ एकान्त छन' कविता केँ एक अंश --

"गेलै रात तें ऐलै भोर, धीरें-धीरें बहै बयार ;  
पोखरी आ नदी केँ पानी सिहरें लागलै बारम्बार ।  
कुछ छन में ऊषा केँ लाली दुलरैतै कमलौं केँ फूल ;  
यही छनेँ देतै कर्मों केँ गाड़ी केँ पहिया में तूल ।।" पृ. १४५

## दीपक ज्योति (श्री)

श्री दीपक ज्योति नौवाँ दशकों के एक उभरलें कवि आरों पत्रकार छेकात । हिनकों जन्म गादीराता खेशर (जिला बाँका) में २ दिसंबर, १९६९ ई. के भेलों छै । हिनी कुच्छू दिनों तक बाँका से प्रकाशित 'आफत' आरों 'अग-मेल' पत्रिका के संपादन करने छोंत । अंगिका में हिनकों एक-टा कविता-संग्रह 'कानों बोर' प्रकाशित भेलों छै जेकरा लोगें खूभे पसीन करने छै । वै संग्रहों के कयेक-टा गीत जन-कंठों में विराजै छै । एक नमूना --

“कानों बोर / पैसा ऊपर बेटी तौर,  
तइयो बिहैलों कानों बोर !  
तीन दाव गरजों तें सुनथौं उच्चों,  
लोल छै बौगला रड, कान छै बुच्चों !  
सोनों रड धीया के जिनगी बुड़ैलों,  
कानों जमाय देखीं जिया जुड़ैलों !”

## महेश्वर झा 'व्यथित' (श्री)

अंगिका के सधलें-मँजलों गीतकार श्री महेश्वर झा 'व्यथित' जी द्वारा तरह-तरह के लोक-धुनों पर रचलें अंगिका गीतसिनी नब्बों कविता सजैने-सँवारने छै । हिनकों कयेक-टा रचना अंगिका के कुछेक संकलनों में ऐलों छै । हिनकों 'चिता घघकै छै' कविता के एक अंश --

“सभें देखे छै मशान, चिता घघकै छै !  
एक दिन होय जैतै समान, सभें समझै छै !  
केश जरै छै घाँसों रड आरों देह लकड़ी ;  
बैठी के सभें सोचै छै आपनों माथों पकड़ी,  
हमरों छूटतै प्राण, चिता घघकै छै !  
एक दिन होय जैतै समान, सभें समझै छै !”

-- 'प्रतिनिधि अंगिका कवि', पृ. ५५

## शंभुनाथ मिस्त्री (श्री)

हिंदी के संगें-संगें अंगिका नवगीति-रचना में निखरलें दुमकावासी श्री शंभुनाथ मिस्त्री एक सफल शिक्षक आरों भावुक संवेदना के कवि छेकात । शिल्प आरों कथ्य दोन्हू में मिस्त्री जी के अच्छा सफलता मिललें नजर आवै ।

हिनकों 'ई पगडंडी' कविता के एक अंश देखलें जाय --

"कत्तें छाप उखड़लें छै नंगा पाँवों के !  
 यै पगडंडी कथा कहै छै गाँवों के ।  
 सुखलें कंठ यहाँ तरसै छै पानी लें ;  
 तबलें धरती से चिनगारी फूटै छै ।  
 यहाँ अन्हरिया रात पसरलें आठो याम ;  
 बिलखी-बिलखी सभै करम के कूटै छै ।"

### भगवान प्रलय (श्री)

महेशपुर (कुरसेला, कटिहार) निवासी श्री भगवान प्रलय अंगिका के एक रससिद्ध गीतकार कवि छेकात । हिनकों कविता-पाठों से श्रोतावर्ग विमुग्ध होय जाय छै । एक गीतों के एक अंश --

"केकरा कहबै, के पतियैतै, अंडिया भेलै गुदरी ;  
 है तिनरडिया रंग में कहिया रँगैबै चुनरी !  
 टुटली टाटी छेदों से लिहारै छियै ऐडना ;  
 कानी-कानी नून-रोटी माँगै भोरे चेडना !"

-- 'अंगिकांचल', मार्च, १९९४ से ।

### गिरिजा शंकर मोदी (डॉ०)

हिंदी के कविता-पत्रिका 'आज की कविताएँ' के संपादक डॉ० गिरिजा शंकर मोदी के चिंतनशीलता समकालीनता से संबद्ध छैन् । हिंदी में तें हिनकों कयेक-टा काव्य-संकलन निकली चुकलें छै, मतुर अंगिकाँ आभी ताँय बाटे जोही रहलें छै । हिनी यै पीढ़ी के दरद, धरमों के साजिश आरो संस्कृति के झूठों के बेटी जानै आरो मानै छोट । वै मान्यता के दरसावैवाला नमूना देखलें जाय --

"दहेजों के बात, महाजनों के हिसाब ;  
 सिलिण्डरों के गैस, मिट्टी के तेल, सलायों के काठी !"

### विजेता मुद्गलपुरी (श्री)

हास्य-व्यांग्यों के चर्चित हस्ताक्षर श्री विजेता मुद्गलपुरी के जन्म १ मई, १९६३ ई. के मुंगेर में भेलें छैन् ।

विजेता जी के पहिलों कविता-संग्रह 'नीक बात नै ठीक लगै छै' जनवरी,

१९९५ ई. में प्रकाशित भेलों छै, जेकरा में दुइ-टा गजल आरो छों-टा बड़ों-बड़ों कविता छै। हो किताबों के आरो बेसी संस्कृत रूप देखै के इच्छा कतेक लोगों के छै। हिन्ने हुनी एक दोसरो संकलन 'कटरंगनी के फूल' छपवैने छोट, जेकरा में गीत, गजल, मुकरी आरो विविध छंदों में रचलें कविता छै। वैसिनी में हुनी लोक-जीवनों के यथार्थ आरो आयकों सामाजिक विसंगति-आर के दर्शन करैने छोट। ऊ खाली हास्य-व्यंग्यों के पुटे से नै, बलुक प्रकृति-चित्रण, मिथक-प्रयोग, विंब, प्रतीक, रस, गुण, रीति, छंद-रूप आदि से भारी-भरकम लागै छै।

सुकवि विजेता जी ने कटरंगनी के फूलों के महत्वाकांक्षा आरो ओकरो बहाना/व्यंजना से समाजों में पसरलें नाना प्रकारों के रोगों/विसंगतियों के अभिशमन लेली है किताबों के माध्यम बनैलें छै, जे कि स्वागत के योग्य छै। हुनको हास्य-व्यंग्यों के नमूना लेलें जाय।

“मारों ओकरा जों कोनो तोहर करें खिलाफ,  
तोहर बड़को दोष पर उंगली रखना (छै) पाप !  
दण्ड के ऊ अधिकारी,  
तोहरे बलें फूलें-फलें सगरो रंगदारी !  
बोलें तारकनाथों से कि तों हमरो तारों,  
जों नै तारें पारों तें पटक के उनको मारों !”

### खुशीलाल मंजर (श्री)

बाँका जिला के मिर्जापुर-चंगेरी गामों के निवासी श्री खुशीलाल मंजर हिंदी आरो अंगिका के एक संग्रहों-मंजलों कवि-साहित्यकार छेकात। हिनको जन्म तिथि छेकै दीवाली, १९४५ ई.। श्री अनिलशंकर झा के साथे 'ऐगना उतरलै चाँद' संकलनों के संपादन 'मंजर' जी ने तें करन्हें छोट, 'पछिया पुकारै छै' (१९८४) के नामों से हिनको आपनों कविता-संग्रहो प्रकाशित छै। आपनों आस-पास पसरलें परिवेश आरो सामाजिक विषमता के सहज सुगम भाषा-शैली में उतारैवाला संवेदनशील कवि 'मंजर' जी के 'छिरियैलों कहानी' कविता के एक बानगी देखलें जाय--

“गाछी के टुटलें पत्ता रड उदास,

ओकरो जिनगी रों छिरियैलों कहानी !

जबे-जबे हमरा आँखी के सामना में आबै छै,

लागै छै, हमरो करेजों फाटी जैतों !”

'वहे रड भरी-भरी आँखी में लोर,  
आरो संपकटुवों रड पीरों चेहरा ;  
लागै जेना कि है दीया --  
कखनी भभकी के बुताय जैतै !!!'

### रामावतार 'राही' (श्री)

लोकप्रिय हास्य-व्यंग्यकार श्री रामावतार 'राही' अंगिका के एक भावुक कवि छोट। हिनको कविता-पाठों से मंचों पर ठहाका फूटें लागै छै। सवा टका मे किनलो सूप 'हेराय' गेला पर एक घरनी के उद्गार हिनको 'किरिया पडतै' कविता मे केना उभरलौ छै, से देखलौ जाय --

'एतै जबे समसुनरा के बाप,  
देतै हमरा दू-चार थाप,  
झोटों खीचतै, कान मोचारतै,  
लाठी बजाडतै, चुट्टा से दागतै,  
तखनी हमरा के-के बचैतै ?  
हक्को नी हक्को के किरिया पडतै !!!'

-- 'प्रतिनिधि अंगिका कवि', पृ. ११६-१७।

### गंगा प्रसाद राव (श्री)

समय-साहित्य-सम्मेलन, पुनसिया (बाँका) से सक्रिय रूपों से जुडलौ प्रगतिशील कवि-लेखक श्री गंगा प्रसाद रावने 'अंगिका के प्रकृति-कविता' संकलनों के संपादन आरौ 'रस-मीमासा' -जन्हों समालोचनात्मक ग्रंथों के प्रणयन करी के अंगिका भाषा-साहित्यों के श्रीवृद्धि करै मे महत्वपूर्ण योगदान करने छै। हिनी एक संवेदनशील कविता छेकात। हिनको कविता में सामाजिक विसंगति के निराकरण के स्वर खाम करी के उभरै छै जेना कि --

जात-पात के भद्र मिटावौ, एक नया समाज बनावौ।  
दशों के कल्याण यही मे छै ; मानवता के मान यही मे छै।  
जन-जन के सम्मान यही मे ; जाति-विहीन समाज रचावौ।

-- 'अंग-माधुरी', अक्टूबर, १९८६

### सियाराम प्रहरी (श्री)

हिंदी के सुपरिचित हस्ताक्षर श्री सियाराम प्रहरी (जमालपुर/मुंगेर) के खंड-काव्य 'महासती शैव्या' (हिंदी) के प्रकाशन हालहै में भेलों छै। हिनी अंगिकाओ के एक भाव-प्रवण सुकवि छोंत। हिनकों एक गीतों के बानगी --

“ई ओझरैलों जिनगी हमरों कतें नाच नचैलें छै !  
 फूल सभैं तें चुनीयें लेलकै, कांटों-सभ बिखरैलों छै !  
 बुतरू रोटी लें कानै छै, घरनी लाज बचावै लें ;  
 कतें आस लगैलियै आय तक सब सपना मुरझैलों छै ।”

-- 'अंगप्रिया', दिसम्बर, १९९१ ई ।

### अश्विनी (श्री)

पुनसिया मिर्जापुर-चंगेरी (जिला बाँका) में, लागै छै, साहित्यिक उर्वरता कम नै छै। 'समय-साहित्य-सम्मेलन, पुनसिया' के सक्रियता के फलस्वरूप वै क्षेत्रों में 'विमल' जी, अश्विनी जी, मंजर जी, जयप्रकाश जी, प्रभात जी, गंगाराव जी आरनी साहित्यकारों के रचनाधर्मिता केकरहौ सें छिपलों नै छै। अंगिका बास्ते ई एक शुभ लक्षण छेकै कि ग्रामीण वातावरणों साहित्यिकता सें मुखरित-मुरभित छै।

हिंदी आरो अँग्रेजी में एम. ए. श्री अश्विनी जी (मिर्जापुर-चंगेरी) एक सफल शिक्षक तें छेबे करोंत, एक संवेदनशील कवियो छोंत। हिंदी त्रैमासिक 'उद्घोष' के संपादक अश्विनी जी अंगिका के एक गीतकार कवियो छेकात, जिनकों एक गीतों के एक अंश देखलों जाय --

“तोरा बिनु सूनो लागै हमरों नगरिया !  
 फाटी गेलै धरती, सुखलों आकाश छै ;  
 सूखी गेलै पनघट, सुखलों परास छै ;  
 चूवी-चूवी सूखी गेलै भरलों गगरिया !”

### मधुसूदन 'मधु' (श्री)

'दुमका-दर्पण' (हिंदी पाक्षिक) के संपादक श्री मधुसूदन 'मधु' (दुमका) हिंदी, भोजपुरी आरो अंगिका के एक सुमधुर गीतकार छेकात। हिनकों एक अंगिका कविता के रसास्वादन करलों जाय --

“आपनों सुख-दुख के बात कहें खुद अपना से ;  
केकरा एते फुरसत है कि तोरों मोंन देखे ?  
सबै तें गुलाब-कमलों के फूल निहारै है ;  
केकरा की पड़लों है कि ओसों के कण देखें ?”

### योगेश कौशल (श्री)

ईशीपुर (भागलपुर) निवासी श्री योगेश कौशल अंगिका आरो हिंदी के एक सशक्त हस्ताक्षर के रूपों में उभरलों छेंत। हिनकों कविता में ग्रामीण जीवनो के चित्र कते बढियाँ उरेखलों है, देखलों जाय --

“छम-छम छमकै गाँवों के गोरिया,

चम-चम चमकै हरवा-कोदरिया ;

माथा पर कलौवों झुमलों बहुरिया,

हुलसी के चललै खेतों के ओरिया,

रोपै लें खेतवा में घानरे ।

बदरा ने फूँकलकै जान रे ।” -- प्रतिनिधि अंगिका कवि, पृ. १८१

### बलभद्र नारायण सिंह 'बालेन्दु' (श्री)

“प्रतीक कथा के माध्यम से आयकों पीढ़ी के झकझौरेवाला आरो नवचेतना के आगिन सुलगावैवाला कवि’ (संपादक, प्रतिनिधि अंगिका कवि, १९८६) श्री 'बालेन्दु' जी (दुमका) के राष्ट्रीय सद्भावों में भरलों एक कविता के एक अंश यहाँ देखलों जाय --

“एक गीत, एक गंध, एक रूप, एक रंग,

एक जात, एक पाँत, एक साँझ, एक प्रात,

एक भाव के तरंगारंग (गीत) गाबै छी ;

-- प्रतिनिधि अंगिका कवि, पृ. ४३.

### देवेन्द्रनाथ दिलवर (श्री)

अंगिका के हास्य-व्यापकार कविसिनी में एक आरो नया हस्ताक्षर जुड़लों छेंत -- श्री देवेन्द्रनाथ दिलवर। हिनकों जन्म १९६४ ई. में रामनौमी के दिन मुनियारचक/नौवागढ़ी (मुंगेर) में भेलों है - श्री भोला मंडल के सुपुत्रों के रूपों में।

कवि दिलवर जी के दुइ-टा अंगिका कविता-संकलन प्रकाशित होय चुकलें छै -- 'अंग-सागरी' (१९९६ ई. में) आरों 'अंग-लहरी' (विमोचनों के प्रतीक्षा में)। एक सौ एगारों छंदों के हिनको 'अंग-सागरी' कविता में परंपरा से थोड़ो हटी के कवि, लेखक, महाकवि, माय-बाप आदि के नया परिभाषा, व्यंग्य के भाषा में, देलें गेलें छै। एक नमूना लेलें जाय --

"चाहे कत्तो आबों घुसुर-घुसुर, समझें नै पारधौं फुसुर-फुसुर।

सोचै छौ अपना के बड़का कवि, छौ कहाँ मालूम कवि के छवि।

गाछ वहे झुके छै जेकरा में रहें फौल, संस्था चलै छै एकता के हुवे बोल ;

विद्वानों के सामने नै करों हुचुर-हुचुर।"

### माँडवी (श्रीमती)

श्रीमती माँडवी जी के जन्म १५ मार्च, १९६९ ई. के एकचारी (भागलपुर) में श्री दुर्गा प्रसाद सिंह के परिवारों में भेलें छै। श्रीमती माँडवी के मोंन हिंदी आरों अंगिका में गीत आरों दोहा लिखै में बेसी लागै छै। हिंदी के 'शंखनाद', 'सावन-भादो', 'सावन', 'कल्पना' आरों 'उमाश्री' -जेन्हों राष्ट्रीय काव्य-संकलनों में आरों 'अपूर्व्या' पत्रिका में हिनको गीत ऐलें छै।

अंगिका के 'अंग-मंजरी' काव्य-संकलनों में हिनको कविता 'जौने कौवा', श्रीमती मीरा झा, मीना तिवारी, मीना सिन्हा, सान्त्वना साह आरों अंशुमाला झा के कविता के संगे छपलें छै, जेकरों अभिस्तुति सब्भे दिसिं भेलें छै।

"भोरे-भोरे जौने कौवा !

सुतली छेलाँ मधुर नीन में पी के पास भोरौवा।

से दिन जबे जौने छेलै, /फनू कैन्हें तरसैने गेलै ?

चुनचुन करते, खजुवैतै देही के पीर मेटीवा।

सभे बात के आगम तोरा, /हमरों मानें एक निहोरा,

दे मिलाय, हुनका बोलाय, ले पायस पेट भरौवा।"

-- 'अंग-मंजरी' से।

### ५. अंगिका काव्य-संसार

संक्षेपों में कहलें जाय पारें कि अंगिका के काव्य-संसार पिछलका कुछुवे बरसों में विभिन्न विषय, भाव, छंद, लय, धुन आदि के क्षेत्रों में ऐहिनों फैललें



ऐलों छै कि देखी के अंगिका के उज्जवल भविष्य सुनिश्चित बुझावै छै । जिनको-जिनको जीवनवृत्त आरो काव्य-कृति के जानकारी उपलब्ध भेलै हुनकासिनी के संक्षिप्त विवेचन, जन्म तिथि के क्रम से, दै के प्रयास ऊपरो के लिखलका में करलौ गेलौ छै । हुनकासिनी के अलावे सर्वश्री सच्चिदानन्द पाठक, जोगेश्वर जख्मी (डॉ०), देवेन्द्रनाथ साह (डॉ०), देवनारायण 'चौच', श्याम सुंदर घोष (डॉ०), वारिद जी, राजेन्द्र पंजियार (डॉ०), मृदुला शुक्ल (डॉ०), हरिहर चौधरी 'विकल', रविकान्त नीरज, अनिरुद्ध अकेला, माधुरी जायसवाल (डॉ०), प्रदीप प्रभात, कमलकिशोर 'एकलव्य', सान्त्वना साह (डॉ०), प्रभात सरसिज, सामवे (डॉ०), मुहम्मद मुस्तार आलम (प्रो०), विक्रमादित्य विहंगम, त्रिलोकीनाथ 'दिवाकर', राघवेन्द्र नारायण आर्य (डॉ०), नलिनीकान्त (डॉ०), मनाजिर आसिक हरगानवी (प्रो०), भगवान प्रलय, ओम् प्रकाश मिश्र, कमला प्रसाद उपाध्याय, श्यामलाल आनन्द (डॉ०), अंजनी प्रसाद शर्मा (डॉ०), भुवनेश्वर भारती, अमर कुमार सिंह, कमलेश्वरी तिवारी, सुरेन्द्र प्रसाद यादव, योगेन्द्र चौधरी, शिवनन्दन प्रसाद हर्षवर्द्धन, भूदेव शर्मा, राजेन्द्र सिंह 'अमन', श्रीकृष्णा सिंह (डॉ०), राकेश रवि, शंभुनाथ जायसवाल, धर्मेन्द्र कुसुम, राघवेन्द्र उन्मन, रामवरण चौधरी (डॉ०), विनय प्रसाद गुप्त (प्रो०), देवेन्द्र (डॉ०), सोहन प्रसाद चौबे, महेश प्रसाद सिंह 'आनन्द', निर्मल सिंह लाल, नविता, जयप्रकाश गुप्त (डॉ०), देवेन्द्र जयपुरी, भुजंगी यादव 'मधुर', अभय कुमार भारती, सुरेन्द्र कान्त 'हंस', ब्रह्मदेव 'ब्रह्म', मोहनदास 'राही', सुरेन्द्र 'शोषण' (प्रो०), कामदेव मिश्र (प्रो०), अरविन्द कुमार 'भारती', डॉ० इन्दुभूषण मिश्र 'देवेन्दु' आरनी कवि-कवयित्रीसिनी के अंगिका रचना जबे-तबे पत्र-पत्रिका आरो संपादित संग्रहों में छपलौ मिलै छैन् । हिनकासिनी में अनेक विद्वान् हिंदी के ख्यातिलब्ध साहित्यकार/रचनाकार छेकात, मतरकि अंगिका-काव्यों में हिनकासिनी के अवदानों के उल्लेख्य अब ताँय प्रायः कम्मे छैन् जदियो अंगिका-भाषी रहला के नाताँ अंगिका के बड़ी असरा सब्भै सेँ छै । जिनकासिनी के अंगिका कविता देखै मे ऐलों छै वैसिनी में लौकिक प्रेम, गान्धीवादी विचार-धारा, देश-भक्ति, प्रकृति-चित्रण, किसान-मजदूरों के प्रति संवेदनशीलता, दलितोत्थान, प्रदूषण-निवारण, मानवीय मूल्यों के अवमूल्यन आदि सेँ संबंधित भाव-विचारों के नीकों अभिव्यक्ति होलौ मिलै छै । अनेकों केँ दू-एक्के अंगिका रचना सही, स्वागत के लायक छैन् ।

सर्वश्री फाल्गुनी मरीक कुशवाहा, विनोदबाला सिंह (डॉ०), छेदी साह

(डॉ०), राकेश रंजन, कामदेव मिश्र, लक्ष्मीकान्त मंदबुद्धि, बैरिस्टर प्रसाद सिंह, मणिलाल मंडल, देवेन्द्रनाथ साह (डॉ०), महेन्द्र नारायण मिश्र, त्रिवेणी पाठक, मु० जाहिद, रत्नेश शर्मा 'पंकज', गणेश कुसुम, शुकदेव प्रसाद मंडल, मंतलाल शर्मा, मनोज कुमार पंकज, चन्द्र प्रकाश 'जगप्रिय', त्रिवेणीनाथ दिवाकर, उमेश भारती, विजयेन्द्र, अशोक कुमार अकेला, छोटेलाल, निशाकर, विजय कुमार, संजय कुमार, शीलरक्षित, गौरांग प्रसाद 'सेवक', राजेन्द्र राज (प्र०), सुरेन्द्र सलिल, अरुणेन्द्र भारती, वाल्मीकि (डॉ०), पवन कुमार पंजियारा आरनी अंगिका में कविता करबों शुरू करने छोट। हिनकासिनी में कोय बेसी उमरी के छोट, कोय कम उमरी के, मतुर कविता करी रहलें छोट आरो 'अंगिकांचल', 'आंगी', 'अंग-माधुरी', 'अंगप्रिया', 'अंग-तरंगिनी' -आर पत्रिका में छपी रहलें छोट। हिनकासिनी के कविता सामाजिक उत्तरदायित्वों के समस्या आरो ओकरो समाधानों के भाव-धारा से जुड़लें लागै छै। हिनीसिनी समकालीन विचार-धारा आरो प्रवृत्ति-प्रवाहों के बेसी करी के कविता के विषय बनैने छोट। हिनकासिनी के रचना में नवीनता लेली ललक झलकै छै। आगू चली के हिनकासिनी में किनको प्रतिभा कौनी रूपों में विकसित-प्रस्फुटित होतै, से कहबों अखनी संभव नै बुझावै छै, मतुर अंगिका के प्रति उत्साह तें प्रायः सबै के रचना में देखावै छै।

## ६. निष्कर्ष

आखिर में, सार-संक्षेपों के रूपों में, आधुनिक युगों में अंगिका कविता लेखन के प्रवृत्ति आरो उपलब्धि नीचे प्रस्तुत करलें जाय रहलें छै।

(१) अंगिका में महर्षि मेंही, प्रभातरंजन सरकार 'आनन्दमूर्ति', संत-सेवी बाबा, संत शाही स्वामी, चरणदास, बाँकेबिहारी झा 'करील' आदि संत-महात्मा के भक्ति-भाव-भरलें कविता थोड़ों-बहुत सृजित होलै। हिनकासिनी के रचना में आत्मा, परमात्मा, बंधन, मुक्ति, संसार के असारता आदि के वर्णन होलें छै। हिनीसिनी मिथ्याचार आरो वाह्याचार के धिक्कारने छै।

(२) आधुनिक युगों में लोक-साहित्यों के अनुसंधान, अनुशीलन, संपादन आरो प्रकाशन शुरू भेलै। 'अंगिका संस्कार गीत' (पं वैद्यनाथ पाण्डेय), 'सलेस भगत' (डॉ० अभयकान्त चौधरी/डॉ० नरेश पाण्डेय 'चकोर'), 'लोरिकैन' (डॉ० चकोर), 'ज्योति तपस्या' आरो 'बाबा बिसू रॉथ' (डॉ० रमेश आत्मविश्वास), 'ज्योति तपस्या' (श्री प्रदीप प्रभात) आदि गीति-गाथा-प्रबंध आरो 'अंगिका जंतसार'

(डॉ० चकोर) के संकलन आरों प्रकाशन येहें युगों में भेलै ।

(३) भागलपुर, मगध आरों बिहार विश्वविद्यालयों के तत्वावधानों में अंगिका लोक-गीत, लोक-गाथा आदि पर डॉ० गायत्री देवी, डॉ० मनोहर सिंह, डॉ० निर्मल कुमार सिंह, डॉ० रमेश मोहन शर्मा 'आत्मविश्वास', डॉ० पुष्पा कुमारी, डॉ० शंकर मोहन झा आरनी के उल्लेखनीय शोध-कार्य भेलै ।

(४) प्रबंध-काव्य-रचना के दिसि कविसिनी के धेयान गेलै आरों एक-से-एक बढ़ियाँ प्रबंध-काव्य लिखलें गेलै -- 'कच' (अनिलचन्द्र ठाकुर), 'सवर्णा' (डॉ० कुशवाहा), 'ययाति' (डॉ० चकोर), 'कागा की संदेश उचारै !' (श्री अनिरुद्ध प्रसाद विमल), 'गिना' (डॉ० अमरेन्द्र) आरों 'उध्वरिता' (श्री सुमन सूरों) इत्यादि ।

(५) गीति-रचना के क्षेत्रों में विकास होलै आरों भजन, उद्बोधन-गीत, अभियान-गीत, पत्र-गीत, शोक-गीत, पथ-गीत ओगैरह गीति-काव्यों के विभिन्न अंगों पर कतें नी अच्छा-अच्छा रचना भेलै । ऐहिनों गीतिकारों में सर्वश्री राजकुमार, वैकुण्ठ बिहारी, राम शर्मा 'अनल', श्रीस्नेही, परमानन्द प्रेमी, राजेन्द्र पंजियार (डॉ०), भगवान प्रलय, उदयकान्त ठाकुर बिहारी, अश्विनी, अनिरुद्ध प्रसाद विमल, माँडवी, अमरेन्द्र (डॉ०), परमानन्द पाण्डेय (डॉ०), कुशवाहा (डॉ०) खास करी के उल्लेख्य छेंत ।

(६) आधुनिक युगों में बहुतेसिनी व्यंग्यकार अंगिका में उभरी के ऐलै । सर्वश्री सदानन्द मिश्र 'साहित्यिक साँढ', जगदीश पाठक 'मधुकर', भुवनेश्वर सिंह 'भुवन' (डॉ०), गुरेश मोहन घोष 'सरल', रामावतार 'राही', प्रकाशसेन 'प्रीतम', बलभद्रनारायण सिंह 'बालेन्दु', विजेता मुद्गलपुरी, सुरेन्द्रदास, मथुरा प्रसाद सिंह 'रानीपुरी' आरनी के नाम मुख्य रूपे आवै छै । हास्य रसों के बेजोड़ कविसिनी में रामावतार 'राही', प्रकाशसेन 'प्रीतम', विजेता मुद्गलपुरी, जगदीश पाठक 'मधुकर' आरों 'साहित्यिक साँढ' के नाम आवै छै ।

(७) ई युगों में भाव-गीत-लेखन के परंपरा चललै । वै परंपरा में सर्वश्री सुमन सूरों, उचितलाल सिंह, सीतारामदास, मतिकान्त पाठक (डॉ०), अचल भारती (डॉ०), गंगा प्रसाद राव, खुशीलाल मंजर, 'समीर' (डॉ०), आरनी उल्लेख्य छेंत ।

(८) अंगिका भाषा संबंधी अध्ययन, व्याकरण, शब्दकोश, काव्य-शास्त्र, इतिहास-लेखन आदि पर कयेक-टा ग्रंथ लिखलें गेलै आरों छपलै । वै प्रसंगों में सर्वश्री परमानन्द पाण्डेय (डॉ०), डोमन साहु 'समीर' (डॉ०), अभयकान्त चौधरी

(डॉ०), तेजनारायण कुशवाहा (डॉ०), नरेश पाण्डेय 'चकोर' (डॉ०), ओमा प्रियंवदा (डॉ०), गंगा प्रसाद राव, नवीन निकुंज, शंकर प्रसाद 'श्रीनिकेत' (डॉ०) आरनी के नाम खास करी के याद आवै छै। ऐन्होंसिनी ग्रंथों या आलेखों के प्रकाशन से कवि-लेखक आरनी के शब्द (पद)- विन्यास, वाक्य-विन्यास, छंद-विधान आदि के संबंध में नया दिशा मिललै।

(९) आधुनिक युगों के अंगिका कविता के इतिहासों से लागै छै कि करीब-करीब सब्भे अंगिका कवि के प्रारंभिक रचना मुक्तके से शुरू होलें छै आरौ मुक्तक काव्यों के अच्छा विस्तार भेलें छै। मुक्तक काव्यों के कयेक-टा बढ़ियाँ-बढ़ियाँ संकलन निकललें छै आरौ निकली रहलें छै। लागै छै कि ढेरसिनी कवि मुक्तक-संकलनहै में जीवित रहतै। एन्हों कवियों में कुछेक हिंदी के कवियो आवै छै। कुछेक कवि आर्थिक क्रमजोरी से आपनों स्वतंत्र संकलन निकालै में असमर्थ रहलें छै। सर्वश्री गदाधर प्रसाद अम्बष्ठ, बाँकेबिहारी झा 'करील', भिखारी ठाकुर 'अधूरा', राजमोहन शर्मा, मतिकान्त पाठक आरनी कर्ते नी रचनाकारों के कविता अर्थाभाव के कारणे पुस्तकों के रूपों में अब ताँय प्रकाशित होलें छै। जिनकासिनी के अंगिका कविता पत्र-पत्रिकासिनी में छपलें रही गलें छै हुनकासिनी में डॉ० कुमार विमल, डॉ० वचनदेव कुमार, डॉ० मधुकर गंगाधर, डॉ० श्रीरंजन सूरिदेव, आचार्य आनन्द शंकर माधवन, पं. ब्रह्मदेव झा रतैठिया, श्री राजेन्द्र सिंह 'नमन', कुसुमाकर दुबे, अशोक अरुण, कामदेव झा, विक्रम कुमार राणा, कृतिनारायण प्यारा, अंशुमाला झा, हंसकुमार तिवारी, दामोदर शास्त्री, प्रभात सरसिज आरनी के रचना-संपदा से हमरासिनी बहुते लोग वंचित रही गेलें छियै।

(१०) शास्त्रीय छंदों के अलावे लोक-धुनों पर कविता करै के प्रवृत्ति केरों विकास ये युगों में बेसी भेलै आरौ कर्ते नी लोक-छंदों के साहित्यों में प्रतिष्ठा मिललै। साथे-साथ हिंदी में प्रचलित काव्य-रूपों आरौ छंदों में अंगिका में कविता रचना करै के प्रवृत्तियो विकसित भेलै, जे कि अंगिका काव्य-साहित्यों के वृद्धिकारक भेलें छै।

(११) अंगिका कविता करै में कविसिनी के संगे-संग अनेक कवयित्रियो आगू बढ़लें छथिन। सर्वश्रीमती मीरा झा, मीना तिवारी, आभा पूर्वे (डॉ०), सान्त्वना साह (डॉ०), अंशुमाला झा, मृदुला शुक्ला (डॉ०), माधुरी जायसवाल (डॉ०), कृष्णा सिंह (डॉ०), विनोदबाला सिंह (डॉ०),

मॉडवी, प्रतिमा वर्मा, नीलम महतो (डॉ०), रूपम पाण्डेय, राधा कुमारी, नविता आरनी के नाम पै क्रमों में याद आवै छै।

(१२) अतीत के गौरव-गायन, देश-भक्ति, सांस्कृतिक चेतना, साम्प्रदायिक सद्भाव, प्रदूषण-निवारण, शोषण-उत्पीड़न-निराकरण, आर्थिक वैषम्य-दूरीकरण, राजनीतिक अपराध-विमुक्ति, देशों के वर्तमान दशा आरो दिशा-बोध, अमानुषिक अत्याचार-विरोध, भ्रष्टाचार-उन्मूलन, आतंकवाद-निर्मूलन ओगैरह आधुनिक अंगिका कविता के प्रमुख स्वर पै युगों में बनलें छै जे-सब कि देश-राष्ट्रों के मौजूदा अवस्था में अपेक्षित छै।

(१३) कविसिनी के आकर्षण आन्तरिक सौंदर्य के अपेक्षा वाह्य सौंदर्य दिसि बेसी देखलें जाय छै ; मत्तुर भौतिकता के बाहुल्यो में आध्यात्मिकता के स्वर अवक्रमित नै देखावै छै।

(१४) अंगिका के प्रारंभिक रचनासिनी बेसी करी के इतिवृत्तात्मक मिलै छै, जेकरों मूल कारण आपनों मातृभाषा-प्रेमों में बहबों बुझावै छै, जे कि बहुत अंशों में स्वाभाविक छै।

(१५) पै युगों के एक महत्त्वपूर्ण बात ई भेलै कि हिंदी अकादमी हैदराबाद (आ. प्र.) के पूर्व-महामंत्री आरो हिंदी त्रैमासिक 'संकल्प' के प्रबंध-संपादक अंग-सवासिन चतुर्वेदी प्रतिभा मिश्र-जेन्हों विदुषी के विशेष अभिरुचि आरो हुनकों श्रद्धास्पद पतिदेव प्रो० डॉ० बैजनाथ चतुर्वेदी के सत्प्रेरणा के फलस्वरूप अंगिका भाषा-साहित्यों के विकास में नया गति ऐलै। दोन्हू के सत्प्रयासों से 'अंगिका-हिंदी-शब्दकोश' (१९९७) के प्रकाशन तें होले छै, पद्मश्री डॉ० बी० वी० राजू -जेन्हों प्रख्यात उद्योगपति के दानशीलता के फलस्वरूप 'अंगिका-व्याकरण' (१९९८) प्रकाशित भेलै आरो ई 'इतिहास' प्रकाशित होय रहलें छै। भगमानें ऊ अंग-सवासिनों के असमये में अपना कन बोलाय नै लेतियै तें अंगिका भाषा-साहित्यों के विकास में चार चाँद लागी जैतियै। अंगिका-संसार हुनकासिनी के प्रति सदाय आभारी रहतै।

सारांशतः, अंगिका काव्य दोसरों-तेसरों जनपदीय भाषा-काव्यों से कोनो रूपे निम्नतर नै छै। अंगिका के रचनाकार आपनों उत्तरदायित्वों आरो कर्तव्यों के प्रति पूर्णतः जागरूक छेंत आरो आपनों रचना से अंगिका भाषा-साहित्यों के समृद्ध करै में दत्तचित्त छेंत, जे कि एक शुभ लक्षण छेकै। इति शुभम्।

# अंगिका साहित्य केरों इतिहास

(खंड - २ : गद्य)

डॉ० अमरेन्द्र, पी-एच० डी०

(संपादक, "आंगी")

(ज्ञानेन्द्रनाथ मुखर्जी पथ, भीखनपुर, भागलपुर, बिहार - ८१२००१)

# जीवनवृत्त



१. नाम - अमरेन्द्र कुमार सिन्हा ।
२. माता - स्व० पंचारानी देवी ।  
पिता - स्व० नरसिंह प्रसाद सिन्हा ।
३. जन्म - ५ जनवरी १९४९; ग्राम - रूपसार (रजौन), भागलपुर, बिहार ।
४. शिक्षा - बी० ए० (ऑनर्स), एम० ए० (हिंदी), पी-एच० डी० (भागलपुर विश्वविद्यालय, भागलपुर, बिहार) ।
५. मानद उपाधि - 'विद्यावाचस्पति', 'संपादकरत्न' ।
६. पुरस्कार - भवप्रीतानन्द-पुरस्कार, राष्ट्रभाषा-पुरस्कार, नन्द-पुरस्कार, कर्ण-पुरस्कार, बुद्धिनाथ झा 'कैरव'-पुरस्कार, धूमकेतु-पुरस्कार ।
७. प्रकाशित ग्रंथ/पुस्तक - अंगिका में - करिया झूमर खेलै छी ; गेना (महाकाव्य) ; ढोल बजै छै ढम्मकढम (बच्चासिनी के लायक) ; पंचगव्य ; छंद-छौनी ; अंगिका छंद-मौनी ; गजल रौं पिंगल ; हिंदी में - सूरज के पार ; जनतंत्र का 'विक्रमशिला' ; पीर का पर्वत पुकारे ; देहरी पर दीया ।
८. संपादन - सत्यावर्त ; शिरीष-कथा ; अणुकथा ; हाँक ; आंगी ; हिंदी-अंगिका के कयेकटा किताब ।
९. प्रसारण - एक दर्जन से बेसी रेडियो रूपक ।
१०. आलेख, कविता-आर (प्रकाशित) - कत्तें नी पत्र-पत्रिका आरो पुस्तकों में समीक्षात्मक आलेख, कविता, कहानी, फीचर लेख ओगैरह ।
११. संपर्क - संपादक, "आगी", ज्ञानेन्द्रनाथ मुखर्जी पथ, भीखनपुर, भागलपुर (बिहार) - ८१२००१ (फोन - ०६४१/४२८०६७) ।

# अंग जनपदों के पिछलका स्थिति-परिस्थिति

## राजनीतिक स्थिति

पूर्वी भारत के मुगल बादशाहसिनी पर अंग्रेजी ईस्ट इंडिया कंपनी के आधिपत्य होतहैं अंग-जनपद अंग्रेजी-शासनों के प्रभाव-क्षेत्रों में आबी गेलै। मुगल-आक्रमण के समयों में जेना अंग-जनपद तुलनात्मक दृष्टि से कत्ले-आम के अत्याचारों से प्रभावित होलें छेलै होन्हें शुरुआती दौर में अंग्रेजी अत्याचारों के विरुद्ध होलें कोनो ऐतिहासिक क्रान्ति आकि विद्रोहों के उल्लेख नै मिलै छै ; मतरकि १८३८ ई० के बाद स्थिति एकदम बदली गेलै। धीरें-धीरें अंग्रेजी शासनों के विरुद्ध जनाक्रोश भड़की रहलें छेलै आरो वही गति से अंग्रेजी शासनों के अत्याचारो जोर पकड़ते जाय रहलें छेलै। अंग-जनपदों में १९४२ ई. के जॉन भयंकर जनक्रान्ति फुटलें रहै, ओकरा से पहिले १८५५ ई. में संताल-विद्रोह आरो भागलपुरों में अंग्रेजी शासन आरो अंग्रेजभक्त सामन्तसिनी के विरुद्ध लोगों के भयंकर विद्रोहों के ऐतिहासिक उल्लेख प्राप्त होय छै ; मतरकि सामन्त-जमींदारों के संरक्षण हासिल होला के कारणे अंग्रेजी शासन संताल-विद्रोहों के आसानी से दबावै में सफल होय गेलै। तैय्यो हौ संताल-विद्रोह नें है जनपदों में अंग्रेज आरो अंग्रेजी शासन-पोषित सामन्त-जमींदारों के खिलाफ एक नया चेतना के नीव अवश्य डाली देने रहै।

अंग्रेजी शासनों के दौरान १७९३ ई. में बंगाल, बिहार आरो उड़ीसा में जबे जमींदारी प्रथा के नीव डाललें गेलै, तबे अंग-जनपदों के, जे कि ग्रामीण व्यवस्था के जनपद छेलै, वास्तविक शासक सामन्त-जमींदारसिनी बनी गेलै। बड़ों-बड़ों जमींदारी कायम होय गेलै आरो जमींदारसिनी के आतंक आम लोगों के जीवनो पर बढ़े लागलें छेलै। गामों-जबारों के मौर-मोकदमा के सुनवाय आबे परंपरागत पंचायत आरनी में नै होय के कचहरीसनी में होबो शुरु होय गेलें छेलै, जे कि अंग-जनपदों के महत्वपूर्ण स्थानों में स्थापित करलें गेलें छेलै। वैसिनी कचहरी के कानून-कायदा से अनभिज्ञ आम लोगों के परेशानी बढ़े लागलें छेलै, जेकरों परिणाम छेलै ऊ संताल-विद्रोह आरो जेकरों दुष्परिणाम भागलपुरों के राजनीतिक भूगोलों के भोगै लें पड़लै। भागलपुरों के एक अंग काटी के संताल परगना जिला बनाय देलें गेलै। क्रान्ति के दबावै लेली राजमहल से मुंगेर तक के एक भागलपुरों के तोड़ी-ताड़ी के तीन जिला में बाँटी देलें गेलै, ताकि अंग्रेजी अन्यायों के विरुद्ध आम लोगों में मजबूत संगठनों के अभाव बनलें रहें। येहें



कारण छेकै कि १८५७ ई के सिपाही-विद्रोह के वक्तीयो भारत के राजनीतिक इतिहासों में कोय उल्लेखनीय घटना के जिक्र नै मिलै छै।

मतरकि १९-मी शती के अंत होतें-होतें अंग-जनपदों में अँग्रेजी शासनो के विरुद्ध अभूतपूर्व क्रान्ति शुरू होय गेलै, जेकरों नेतृत्व सशस्त्र परशुरामी दलों के महान् क्रान्तिकारी शहीद महेन्द्र गोपनें करने छेलै। हुनको साथे परशुराम सिंह, श्री गोप, जागोशाही पागोशाही, सियाराम सिंह आरनीं अँग्रेजी कचहरीसनी के जरावै से लै के अँग्रेज-समर्थकसिनी के बलि चढ़ैने जाय रहलौ छेलै। पूरा-के-पूरा बाँका तोप आरो टॉमीसिनी से भरी देलौ गेलौ छेलै आरो हेलीकॉप्टरों से अँग्रेजी सैनिकों द्वारा अंग-जनपदों के लोगों पर गोली दागलौ गेलौ छेलै। अँग्रेजी सत्ता के विरुद्ध एक विशाल क्रान्ति के शुरुआत होय चुकलौ छेलै।

अंग-जनपदों में ऊ समय कते नी हेनौ अंगिका के गीत लिखलौ गेलौ छेलै जेसिनी में अँग्रेजी शासनो के विरुद्ध क्रोध के भाव अभिव्यक्त भेलौ छै। देशों के आजादी मिलला के बादें अंग-जनपदों के साथे जे राजनीतिक दुर्व्यवहार होलै ओकरा से ई युगों के साहित्य सर्वाधिक प्रभावित देखलौ जाबे सकै छै। राज्य-सरकार द्वारा नै तें यहाँ कोय सामाजिक आकि आर्थिक उद्धार करै के कोशिश भेलै आरो नै तें यहाँकरों लोक-भाषा के माध्यमों से यहाँकरों लोगों के शिक्षित करै के प्रयास। हेकरों विपरीत, सब सरकारों के प्रयास दोसरों-तेसरों जनपदों के भाषा के ई जनपदों पर थोपै के रहलै। आर्थिक जीवनो में समृद्धि लानै के बजाय बिहार के राजनीतिज्ञ यहाँकरों सामाजिक जीवनो में असंतुलन आरो धार्मिक फूट लानीके आपनों गोटी सेकै ले ज्यादा लागलौ रहलै, जेकरों सबसें विस्फोटक रूप भारत-विभाजन के समय तारापुर के बाद भागलपुरों के देखैले पड़लै।

साम्प्रदायिक नीति के कारणें अंग-जनपदों के यातायातों के सुविधा से वंचित राखबों, राजनीतिज्ञों के वादा-खिलाफी, जातीय विद्वेष-प्रचार आरनी से आपनों हित-साधन आरो आपनें हित लेली राजनेतासिनी के आपसी फूट-आर के चलते अंगिका भाषा के आधुनिक साहित्यों के वैचारिक संसारों पर भारी प्रभाव पड़लौ देखलौ जावे सकै छै। जो ई कहलौ जाय कि अंगिका के आधुनिक साहित्य आजाद भारतों के केन्द्रीय आरो प्रान्तीय सरकारों के अमानवीय क्रूर राजनीति से सामना होवै के साहित्य छेकै तें कोय अत्युक्ति नै।

आजादी के पहिले आरो ओकरों बाद दक्षिणी अंग-क्षेत्रों में जौन शोषण जारी रहलै ओकरों दुष्परिणाम सौसे अंग-जनपदों के झेलैले पड़लै। आरो, आजादी के बाद, अबे अलग झारखंड राज्यों के माँग ! वै नामों पर राजनीतिज्ञसिनी के

आत्म-लाभ ! अंग-जनपदों के दक्षिण में ई राजनीतिक समस्या के ले के विपुल अंगिका काव्य-साहित्यों के सृजन ई बातों के द्योतक छेकै कि आजादी के पूर्व-आरो परवर्ती राजनीतिक परिस्थिति की रड आरो कते अंगिका साहित्यों के प्रभावित करने छै ।

## सामाजिक परिस्थिति

अंग-जनपदों में जे जातीय सौहार्द के भावना प्राचीन समयों में बहुत हद तक कायम छेलै ऊ आधुनिक अंग में आबी के सुरक्षित नै रहें पारलै । हेकरो एक प्रमुख कारण होलै ई प्रान्तों के बड़ों-बड़ों राजा-रजबाड़ा के समृद्धि के पतन आरो ओकरो साथे सामाजिक प्रतिष्ठा केरो धीरे-धीरे हास ।

चंदेल, गन्धवरिया, किनवार, सुरखी, सखरवार आरनी क्षेत्रीय परिवारों के नै हौ समृद्धि रहें पारलों छै आरो नै तें हौ प्रभुत्व । कुछेक परिवारों के छोड़ी के अधिकांश राजपूत घराना के आर्थिक स्थिति संतुलित नै रहें पारलों छै ; आर्थिक फिसलन के बावजूद समाजों में उच्च दिखैके फिजूलखर्ची आरनी की रड ई जाति में प्रवेश करी गेलों छै, ई सब स्थिति के चित्रण अंगिका के आधुनिक साहित्यों में मिलै छै । दक्षिण अंग में बसैलों घटवाल जातियों के आर्थिक कमजोरी के कारणे सामाजिक प्रतिष्ठा सुरक्षित नै रहें पारलों छै । बुदेल क्षत्रिय से आपनों संबंध जोड़ैवाला बनौत जाति के भी आर्थिक स्थिति कमजोर पड़ी गेला के कारणे सामाजिक प्रतिष्ठा में कमी आबी गेलों छै ।

खेतौरी राजवंशों से पहिले जे नट आरो दुसाध जाति के राजवंश दक्षिण अंग में मिलै छै वहु घराना के सामाजिक प्रतिष्ठा आबे शेष होय चुकलों छै । जमींदारी के छाया में पलला के कारण विद्याभ्यासी कायस्थ लोगों के सामाजिक स्थिति काँहीं-काँहीं आपनों आर्थिक मजबूती के कारण तें सुरक्षित छै, मतरकि बाकी जगों में आपनों फिजूलखर्ची के प्रवृत्ति, दहेज-प्रथा, मादक द्रव्य-सेवन आरो विलासी प्रवृत्ति के कारणे विचित्र उपहासात्मक स्थिति में आबी गेलों छै ।

समाजों में औरतोसिनी के स्थिति भारत में मध्यकालों के स्थिति से ज्यादा भिन्न नै छेलै । ई बात नै छेलै कि ई जनपदों में स्त्री जाति के स्थिति सदाय हेन्हें छेलै । तत्कालीन उत्तरी भागलपुरों में मंडन मिश्र हेनों प्रकाण्ड विद्वानों के धर्म-पत्नी ने कभी शंकराचार्य के तर्क में परास्त करने छेलै आरो मुगलकालीन समयों में सुल्तानगंज उधाडीह गाँव (जमालपुर) के एक सामान्य परिवारों में जनमली रानी चन्द्रजीत ने कभियो जहाँगीर के सरदार बाज बहादुर

के परास्त करने छेलै। मतरकि, आम स्त्री के स्थिति हाल तक बहुत कारुणिके मानलो जैतै रहलै। विशेष करी के उत्तर अंग में बसलों दरभंगा-मधुबनी के ब्राह्मण समाजो में बिकौआ पद्धति के कारणे स्त्रियों के आभियों अत्यधिक कारुणिक छै। एक-एक बिक्रैआ के पास दस-पन्द्रह स्त्री के होबो कुछ साल पहिले तक आम बात छेलै। हौ बहुविवाह के कारणे एक बिकौआ के मरतहै एक साथ पन्द्रह-बीसो के विधवा होय जैबो आरो हौसिनी (विधवा) के साथ अमानवीय व्यवहार होबो हृदयो के हिलावैवाला कथा छेकै। इतिहासो में यहाँ तक उल्लेख मिलै छै कि एक-एक बिकौआ तीस-चालीस बीहा यै लेली करै छेलै कि हुनका कोय काम नै करै पड़े, ससुराल जाय-जाय के उदर पालतै रहै। ससुरालो के स्मरण लेली हुनी एक कॉपी रखै छेलै। मधेपुरा, सुपौल में आभियों हेनो बिकौआ के समृद्ध समाज छै। येहो प्रचारित करलो गेलो छै कि जे आपनी कन्या बिकौआ के देतै ऊ पुण्य के भागी होतै। उत्तरी अंग के ब्राह्मण समाजो में ई सामाजिक-धार्मिक विश्वास से स्त्री-समाजो के स्थिति अत्यधिक दयनीय रहलो छै। समाजो में विधवा-विवाह पर तै निषेध छेबे करलै, दहेजो के परेशानी से बचलै समाजो में अघवयसू के साथे कन्या के विवाह करै के प्रथाओ प्रचलित छेलै।

पुरानो सनृद्धि आरो सम्पत्ति के क्षय होय के क्रम में समाजो के बीच कुलाभिमान के संस्कारो जागृत हुवे लागलो छेलै। ई बात खाली उत्तरी अंग-जनपदे के ब्राह्मण समाज के बीच पराकाष्ठा पर नै छेलै, वरन् धीरे धीरे ई भाव एक साथ क्षत्रिय, कायस्थ, यादव, भूमिहार, वैश्य, कोयरी, कुरमी आरनीयो में जागृत होतै गेलै। १९३१ ई. आरो १९३४ ई. में क्रमशः सुपौल, बाँसी आरो मधेपुरा में मैथिल ब्राह्मण महासभा के आयोजनो से प्रभावित होय के १९३७ ई. में भागलपुर के गोशाला में भूमिहार ब्राह्मण महासभा के आयोजन, आरो फेनू कायस्थ महासभा, क्षत्रिय महासभा, यदुवंशी महासभा, कुम्हार महासभा, गोप महासभा, गंगोत्री महासभा, मुसहर महासभा, वैश्य महासभा के बात आवै छै। आरम्भ में ई सब महासभा के उद्देश्य जातीय कमजोरी के दूर करबो आरो जातीय उत्थान पर केन्द्रित छेलै, मतरकि बाद में वैसिनी महासभा के उपयोग राजनीतिक लाभ लेली हुवे लागलै, जेकरो विकास जातीय विद्वेषिता में होय चुकलो छै। पीछूँ हैसिनी महासभा के तैयारी समाज-द्वारा नै, राजनीति-द्वारा आयोजित करवलै गेलै, राजनीतिक स्वार्थ-सिद्धि लेली। जातीय महासभा के राजनीतिक उपयोग के कारणे आय अंग-जनपदो के जे सामाजिक स्थिति होय गेलो छै, ओकरो साफ-साफ चित्र अंगिका के आधुनिक साहित्यो में देखलो जावे सकै छै। साहित्यकार आपनो समयो

में सबसे ज्यादा प्रभावित होय है। यही में ओकरो साहित्य-कलाओ संबद्ध साहित्यकारों के समाज आरो समयों के आईना बनी जाय है।

अंगिका के आधुनिक अद्वैत कालों के साहित्यों में आधुनिक समाजों के तस्वीर उपस्थित है, वै में निजात पावे लेली सुधार के भावों है। समाजों में होय रहलें सामाजिक सुधार के काम्हे से साहित्यों में बहुत-कुछ ऐलों मानलों जैतै, जै में जातीय महासभा द्वारा चलैलों जाय रहलें सुधार-कार्यो गिनैलों जाबे सकै है। जातीय महासभा के ओरी से नै खाली आपनों जात के शिक्षित करै के प्रयास चली रहलें छेलै, बलुक समाजों के कुरीति -- दहेज, मद्यपान आरनी के दूर करै वास्ते शिक्षाओ प्रचारित करलें जाय रहलें छेलै।

अनाथ बच्चासिनी वास्ते समाजों में चिन्ता उत्पन्न होय चललें छेलै, जेकरे कारणे मुंगेर आरो भागलपुर में अनाथालयों के स्थापना करलें गेलें छेलै।

आधुनिक समयों में स्त्री-उत्थान अनेक स्वयंसेवी संस्थानों के सराहनीय कार्यो से अलग सरकार के ओर से भी अनेक बालिका-विद्यालयों के स्थापना जारी है आरो स्त्री समाजों के सामाजिक-आर्थिक दशा में सुधार लेली अनेक कानून बनैलों आरो योजनाओ चलैलों जाय रहलें छै। नौकरीयो में विशेष सुविधा देलें गेलें छै।

सामाजिक व्यवस्था के सुदृढ़ करै के उद्येष्ट्यों से बंधुआ मजदूरी-व्यवस्था खत्म करलें गेलें छै। अंग-जनपदों में प्रचलित गुलामी-प्रथाओ शेष होय पर आबी गेलें छै। ई जनपदों में गुलामी-प्रथा 'नफर' के नामों से प्रसिद्ध छेलै। ई नफरें (गुलामें) जो कोय स्वतंत्र लड़की से बिहाय करै छेलै तें ही लड़की पर मालिकों के अधिकार नै होय छेलै, मतरकि जो कोय नफर लड़की कोनो नफर लड़का से बियाह करै छेलै तें ओकरो (लड़की के) मफादात पर मालिकों के अधिकार मानलों जाय छेलै। स्वामी के इच्छा पर ऊ नफरों के बिक्री के परम्पराओ यहाँ मिलै छेलै। भागलपुर आरो मुंगेर में चुटिया-गुलाम होबै के उल्लेखो मिलै छै, जे कि नफर लड़की से बियाह आरो अपनी के बदला में साधारण मजूरी पर गुलामी करला के कारण कहलाय छेलै। अंग्रेजी शासन के समय अंग जनपदों के वै गुलामी-प्रथाओ पर रोक लगाय देलें गेलै।

ऐन्हो समयों में जातीय दुरवस्था के निवारण वास्ते कुछेक धार्मिक संस्था सक्रिय होलै। वैसिनी में आनन्दमार्ग प्रमुख है, जेकरो अनुसार आदमी या तें अच्छा होय है या बुरा। ओकरो कोय जात नै होय है। आनन्दमार्ग में ई व्यवस्था बनैलों गेलै कि कोय आपनों सन्तानों के बियाह आपनों जात मे नै करतै। शहर-शहर में अनेक उत्साही युवक नै अन्तरजातीय विवाह के अनेक उदाहरण राखलकै।

समाजों में आइयो हेनों एक वर्ग है, जेकरा ऊ सामाजिक प्रतिष्ठा प्राप्त नै है। मतरकि यै वर्गों में एक नया आत्मबल आरो आत्मसम्मान लानै लें कयैक संत-मार्गों यहाँ सक्रिय है। यै से सामाजिक दूरी आरो जातीय तनाव कम होलें है। आधुनिक वैज्ञानिक प्रचारों में यै दिशा में मदद पहुँचैलें है।

ई-सब सामाजिक बदलाव में आधुनिक अंगिका साहित्यों के दिशाओं के आपनों अनुसार चलैलकै।

आय समाजों में तरह-तरह के प्रदूषण है। आदमी के भौतिकता-प्रेम के कारणे सौसे समाज सड़ांध के बीच आबी गेलों है। पर्यावरण के सुधार के वास्ते ई जनपदों में अनेक स्वयंसेवी संस्था सक्रिय है। गंगा-मुक्ति-आन्दोलनों के उद्देश्य पर्यावरणों में सुधार छेकै।

ई-सब सुधार लेली अंग-जनपदों के आधुनिक समयों में ढेरे साहित्यों के निर्माण होलें आरो होय रहलें है। मद्य-निषेध, स्त्री-शिक्षा, बंधुआ-मजदूरी-उन्मूलन, सामंती-रुग्णता, पर्यावरण-संरक्षण आरनी के लैके गद्य आरो पद्य दोनों विधा में समृद्ध साहित्यों के सृजन भेलों है। यहाँ यहू संकेत करी देबों आवश्यक है कि देश-विभाजन के बाद (नौआखाली के बाद) अंग-जनपदों के मुगेर में आरो स्वतंत्र भारत में भागलपुर के सबसे बड़ों अमानवीय दुःख झेलैलें पड़लें छेलै। राजनीतिक कारणों से अंग-जनपदों के सामाजिक जीवन में जे विभाजन के दरार आबी गेलें छेलै ओकरा दूर करै के ई जनपदों के प्रमुख साहित्यिक संस्था आरो नया साहित्यकारसिनी ने साम्प्रदायिक सद्भाव के साहित्य-सृजन में आपनों जे रुचि प्रदर्शित करने है ऊ आधुनिक अंगिका-साहित्यों के एक प्रमुख पक्ष नाखी छेकै।

समाजों में नया वैज्ञानिक शिक्षा से विकसित एक नया वर्ग के कारणे आय एक वर्ग हेनों है जे भीतर से जातीय व्यवस्था आरो सम्प्रदायवाद हेनों सामाजिक अव्यवस्था के विरोध करी रहलें है आरो सभा-संगठनों के माध्यमों से ई व्यवस्था के तोड़ै में डॉ० योगेन्द्र, प्रभाकर आरनी नया पीढ़ी के लोग अत्यधिक सक्रिय है।

## धार्मिक परिस्थिति

अंगिका के आदि अद्वैतकाल में १९वीं शती के १८८२ ई. से लैके बीसवीं शती के १९२५ ई. तक के धार्मिक स्थिति के साहित्यों के इतिहास-निर्माण में भारी भूमिका रहलें है। एक तरह तें इस्लाम धर्म में हिन्दूसिनी के परिवर्तन आरो दोसरों

तरफ ईसाई पादरीसिनी द्वारा ईसाई धर्म के प्रचार होलै। भागलपुर के उत्तर-दक्षिण क्षेत्रों में दू हिन्दू राजघराना के मुसलमान धर्म के स्वीकार करी लेबों इतिहास-प्रसिद्ध छै। मुंगेर आरो संताल परगना में ईसाई पादरी के प्रभुत्व बढ़े लागलें छेलै।

ब्रह्म-समाज के संस्थापक राजा राममोहन राय के कार्य-क्षेत्र तें भागलपुरों में रहलै, जहाँ ब्रह्म-समाज-मंदिर के स्थापना से राजा राममोहन राय के सिद्धान्त कि ईश्वर एक्के छै, जातिवाद देशों के राष्ट्रीयता में बाधक छै, के प्रचार अंग-जनपदों के बुद्धिजीवी के आपनों दिस आकर्षित करलकै। राजा राममोहन राय, विधवा-विवाह आरो स्त्री-पुत्र के बराबरी के विचार चलाय रहलें छेलै।

फेनू, स्वामी विवेकानन्द के १९९० ई. में मुंगेर-भागलपुर में प्रवास के क्रम में होलें प्रवचनों से अंग-जनपदों के सामाजिक-धार्मिक परिस्थिति प्रभावित हुवें बिना नै रहें पारलें छेलै। विवेकानन्द जे कि परमहंस अरविंद के विचारों के प्रचारक छेलै, हिनको जाति-छुआछूत-उन्मूलन के साथ सम्प्रदायवाद-उन्मूलनों के विचारों से अंग-समाज काफी प्रभावित होय रहलें छेलै। समाजों के सामान्य लोगों के प्रति सहानुभूति-प्रदर्शन आरो हिन्दू-धर्मों के अपराजेय शक्ति के स्थापना विवेकानन्द जी के जीवन-लक्ष्य छेलै, जे अंग जनपदों के सामाजिक-धार्मिक जीवनो पर प्रभाव छोड़ी रहलें छेलै।

हिन्दू जाति सदाय जाति-प्रथा पर आधारित रहलें छै, जेकरा में ऊँच-नीच के भेद कम नै रहलें छै। ई अलग बात छेकै कि जातीय उन्माद एक उन्माद कभियो नै रहलै। तैयो कुलाभिमान आरो कुलापमान के भाव गहरा रहलें छै, जेकरों प्रतिगामी विकास धर्म-परिवर्तनों में होतें रहलें रहै। ई धर्म-परिवर्तन आरो हिन्दू-धर्मों के महत्व-स्थापना लेली अंग-जनपदों में कैएक धार्मिक संस्था सक्रिय छेलै, जेकरा में आर्य-समाज प्रमुख छै। मुंगेर आरो भागलपुर में आर्य-समाज के स्थापना से अंग-जनपदों में नया धार्मिक परिस्थिति के जन्म होय रहलें छेलै। आर्य-समाज के कार्यक्रमों से जाति-भेद आरो स्त्री-पुरुष-भेद के स्थिति चरमरावें लागलें छेलै। आर्य-समाज जहाँ वेदों के सार्वभौमिकता के प्रचार करी रहलें छेलै वहाँ समाजों के भौतिक उन्नति लेली विज्ञान आरो पाश्चात्य अध्ययनों पर बल दै रहलें छेलै। यै से अंग-जनपदों के जातीय आरो अन्धविश्वासों के जड़ता के जड़ीभूत रहै में मुश्किल होय चललें छेलै।

धर्म-परिवर्तनों के ई स्थिति में अंग-जनपदों के चिंतक-बुद्धिजीवी के चिंतित होबों स्वाभाविक छेलै। यहे समय में १८८२ ई. में थियोसॉफिकल सोसाइटी के मद्रास में स्थापना आरो १८९३ ई. में इंगलैंड से ऐली श्रीमती एनी

बेसेंट के भारत-भर में घूमी-घूमी के हिन्दू-धर्मों के महत्व पर व्याख्यान देला से हिन्दू धर्मों के पुनरुत्थान लेली एक नया परिवेश कायम हुवे लागलै। अंग-जनपदों के भागलपुर (भीखनपुर) में थियोजॉफिकल सोसाइटी के स्थापना करलौ गेलै।

अंग-जनपद तें शुरूवे से धर्म के द्वीप रहलौ छै। नाना रडों के धार्मिक आन्दोलन के, धर्म के उत्स-केन्द्र रहलौ छै। यै लेली एनी बेसेंट द्वारा हिन्दू धर्म के आध्यात्मिकता पर जबर्दस्त भाषण के दौर शुरू होलै तें एकरा से पूर्वी भारत काफी आन्दोलित होलै। अंग से लैके बंग तक धार्मिक पुनर्जागरण के वलय से बंधी गेलै। धर्म-पंथ, धार्मिक मान्यता, धर्म-पुरुष के संबंध में साहित्यों के सृजन के परम्परा काफी उत्कर्ष पर पहुँची गेलै। आदि अद्वैत काल के समाप्ति के दौर पर स्थित कवि दर्शन दुबे, भवप्रीतानन्द ओझा, चामू कमार, गैबीदास आरनी के धार्मिक साहित्यों के पीछे धार्मिक परिस्थिति के प्रभावों के इन्कार नै करलौ जावें सकै छै।

## शैक्षिक स्थिति

अंग-जनपदों में कहियो विक्रमशिला विश्वविद्यालय हेनो विश्वविख्यात विद्यापीठ आरो यहे विश्वविद्यालयों में दीपंकर श्रीज्ञान अतिश हेनो अद्वितीय विद्वानों छेलै; मतरकि यहाँ जोन महायानी, तंत्रयानी आरो वज्रयानी सिद्धसिनी के बोलवाला छेलै ओकरा से यहू पर प्रकाश पड़ै छै कि वहु समयों में शिक्षा आरो शिक्षार्थी के की स्थिति होतै।

ई कहलौ जैतै कि जो दर्शन, ज्ञान-विज्ञान आपनों ऊँचाई पर होबो करलै तें कुछेक विद्वानों के बीच केन्द्रित रहै। तखनी आम लोगों के बीच उन्नत शिक्षा के प्रचार होलौ रहें, एकरों इतिहास नै मिलै छै। १८३८ ई. में बड़ी जाँच के बाद ब्रिटिश कम्पनी के आदेश पर रॉबर्ट मौंटगोमरी ने जे 'ईस्टर्न इंडिया' ग्रंथों के रचना करने छै, ओकरों अनुसार भागलपुर नगर के सोलह पढ़लों-लिखलों आदमीसिनी में खाली दू व्यक्ति रामायणों के भली-भाँति समझे पारै छेलै, चार आदमी एकरों कुछ वाक्यों के आरो बाकी दस आदमी रामायणों के कुछेक शब्दे-भर समझे सकै छेलै। हुवे पारै कि वै वर्णनों में अशिक्षा के कुछ अत्युक्ति में कहलौ गेलौ रहें, मतरकि वै वर्णने शिक्षा के स्थिति के स्पष्ट अवश्य करै छै।

ई जनपदों के अधिकांश आदमी खड़ी बोली आकि रामायणों के पाठ्य-ज्ञान से अनभिज्ञ होला के कारण आपनों मातृभाषा के साथे जुड़लौ रहलै। अंग्रेजी

शासन के समय शिक्षा प्रचार लेली अनेक शिक्षण-संस्थानों के स्थापना भेलै ; मतरकि यहाँ अंग्रेजी पठन-पाठने के बोलवाला रहला के कारणे यहाँकरों निवासी के एक बहुत बड़ो अंश अप्रभाविते रहलै । ई स्थिति कमोवेश आजो छै । अधिकांश शिक्षण-संस्थान के संचालन अंग्रेजी-शासन के केन्द्र कलकत्तै से होय छेलै । १९१७ ई. ताँय भागलपुरों के शिक्षण-संस्थान कलकत्ते विश्वविद्यालयों से संचालित होतें रहै के उल्लेख मिलै छै । जहाँ रामायण भली-भाँति समझैवाला सोलह पढ़लों-लिखलों व्यक्ति में दुइये व्यक्ति रहै वहाँ कलकत्ता से संचालित इस्कूलों के प्रति यहाँकरों लोगों के कत्ते खींचे पारलें होतै, ई विचारै के बात छै । जेहनों रामायण भली-भाँति समझैवाला दुइये व्यक्ति छेलै होन्है अंग्रेजी शिक्षाओ पावैवाला सोलह में एकाधे व्यक्ति होतै ।

सरकारी स्तरों से अलग शिक्षा-प्रचार लेली स्थानीय शिक्षा-प्रेमी द्वारा जौन कार्यक्रम चलैलों जाय रहलों छेलै वहु लोकोन्मुखी नै छेलै । संस्कृत, फारसी-अरबी आरो हिन्दी के विकास लेली नामी-नामी मदरसा आरो स्कूलों के स्थापना होलै, मतरकि है जनपदों के स्थानीय (प्राकृत) भाषा के उपेक्षा होतें रहलै जबे कि भोजपुरी के विद्वान रघुवीर चरण आपनों भागलपुर-प्रवास के दौरान अंगिका में 'बटोहिया' हेनों लोकप्रिय गीतों के रचना करै में रुकलों नै छेलै ।

यहें बीच अंग्रेजी शिक्षा प्राप्त विद्वानसिनी में अंग्रेजी नीति के अनुसार आपनों क्षेत्रीय बोली के राजनीतिक पहचान दै के ललक जागृत भेलै । ई ललक बंगाल से शुरू भेलों छेलै आरो वाँहीं से राष्ट्रीय स्तरों पर उभरी रहलों ई प्रवृत्ति के पोषण होय रहलों छेलै । यै लेली जबे भागलपुरों में १९०९ ई. में बंग-साहित्य-सभा के अस्तित्व प्रमुखता से उभरलै तबे अंग-जनपदों में बसलों मधुबनी-बोली के समर्थक पंडित, जिनकों प्रभुत्व बनैली स्टेट पर छेलै, के ध्यान मधुबनी के बोली पर गेलै, आरो होकरों वास्ते विद्वान् पंडित-सब ने एक दोसरो रास्ता अख्तियार करलकै कि अंग-जनपदों के मूल (प्राकृत) स्थानीय भाषा अंगिका के मधुबनी-बोली के एक रूप कहना शुरू करी देलकै, ताकि मधुबनी-बोली के विस्तार के देखैलों जावें सकें । हुनकासिनी भागलपुर के बनैली स्टेटों के आपनों गिरफ्त में लैके मधुबनी-बोली के उत्कर्ष लेली स्टेटों के प्रोपराइटरसिनी से कलकत्ता-विश्वविद्यालयों में आर्थिक अनुदानों दिलवैलकै । एक तरफ मधुबनी के पंडितसिनी के यशोगान आरो दोसरो तरफ अंग के स्टेट मालिकों के उदारता । दोनों के असाधारण लाभ उठैतें मधुबनी-बोली के समर्थक पंडित महाराजा कामेश्वर सिंह बहादुरों से, आपनों पिता के स्मारक के नामों पर, प्रान्तीय विश्वविद्यालयों में मधुबनी-भाषा



लेली भारी आर्थिक अनुदान दिलवावै में सफल रहलै आरो सब्भे राजकीय संरक्षणों के लाभ उठैतें हुवें मधुबनी-बोली के समर्थन के समय में मधुपुरा के वनगाँव नामक बस्तीयो में 'साहित्य-सभा' के माध्यम से हौ बोली के प्रचार दै के कार्यक्रम प्रारम्भ होलै ।

१८५३ ई. में ब्रिटिश कम्पनी के ओरी से शिक्षा के सर्वसुलभ बनावै वास्ते जौन संसदीय समिति के निर्माण होलै ओकरों सर्वाधिक लाभ बंगालीसिनी के होलै । अंग्रेजी शासन के मुख्य केन्द्र होला के कारणे आरो बंगाल के सम्पर्क में रही के दोसरो लाभ केकरहौ ज्यादा मिललै तें मधुबनीवासी के, जेकरों एक दुष्परिणाम यहू भेलै कि अंग्रेजी पदाधिकारी से मूल प्राकृत अंगिका के साथ बौद्धकालीन महाजनपद बज्जि के लोक-भाषा के भी मधुबनी-बोली के उपभाषा बतावै में सफल भै गेलै ।

अंग-जनपदों में जे अंग्रेजी शिक्षा ग्रहण करी रहलें छेलै आकि करी चुकलें छेलै ओकरा आपनों मातृभाषा लेली कुछ बोलबो अंग्रेजी मतों के विरुद्ध लागी रहलें छेलै, जेकरा हुनकासिनीं ग्रहण करने छेलै । आइयो कमोवेश वहे स्थिति छै, जेकरों दुष्परिणाम ई होलै कि अंगिका भाषा के नै खाली अस्तित्वे घूमिल पड़ै लागलै, बलुक हेकरों भौगोलिक सीमा आरो साहित्यों के हड़पै के हड़प्पू-संस्कृति बिहार में शुरू भेलै । यहाँकरों आम आदमी निरक्षर छेलै, यै लेली ई हड़प्पू-संस्कृति के लाभ-हानि से आम आदमी उदासीने बनलें रहलै । अंग्रेजी तालिम पैलों अंगवासी के उदासीनता आरो निरक्षर लोगों के चुप्पी के कारणे बिहार के अन्य बोली-भाषा के अकादमी बनलै, स्कूल-कॉलेजों में ओकरों पढाय के व्यवस्था होलै ; मजकि अंगिका लेली सरकार के ओरी से कुछ नै करलें गेलै । डेढ जिला के बोली के साहित्य पुरस्कृत होलें शुरू भेलै, मतरकि पाँच प्रमंडलों के भाषा अंगिका शिक्षा में पिछड़ला के कारण पिछड़ले रहलै ।

ऐन्हों स्थिति में आजादी पैला के बाद अंग्रेजी तालिम पैलों अंग-विद्वानों के एक हेनों वर्ग तैयार भेलै जे कि अंगिका के अस्तित्वों के सुरक्षा लेली कटिबद्ध होलै । ये में श्री गदाधर प्रसाद अम्बष्ठ अग्रगण्य छेलै । अन्य विद्वानों में डॉ० लक्ष्मी नारायण सुधांशु, डॉ० परमानन्द पाण्डेय, डॉ० तेजनारायण कुशवाहा, श्री नरेश पाण्डेय 'चकोर', श्री सुमन सूरु, श्री मधुकर गंगाधर, प्रो० कमला प्रसाद बिखबर' आरनी प्रमुख छेलात । अंगिका आन्दोलनों के जेसिनी प्रमुख साहित्यकारों के पूर्ण समर्थन मिली रहलें छेलै वैसिनी में डॉ० रामधारी सिंह 'दिनकर', श्री अनूपलाल मंडल, डॉ० वचनदेव कुमार, डॉ० कामेश्वर शर्मा अग्रगण्य छेलात ।

बिहार में बिहारी लोक-भाषासिनी के केन्द्रीय आरो विशेष सुविधा प्रदान करते रहला के घोषणा से अंग-जनपदों के बुद्धिजीवीसिनीयों में एक नया किसिम के मातृ-भाषा-प्रेम के चेतना के विकास होलै, जे कि देखतहै-देखतहै अंग के दक्षिण से लैके हिमालय के सीमा के छूते उत्तर ताँय फैली गेलै। डॉ० लक्ष्मीनारायण सुधांशु, श्री अनूप लाल मंडल, श्री मधुकर गंगाधर, प्रो० कमला प्रसाद 'बेखबर', श्री शंकर प्रसाद 'श्रीनिकेत' आरनी अंगिका के प्रगति-पथ पर अग्रसर रहलें ऐलात आरो टटका समयों में श्री प्रद्युम्न सिंह, श्री केशव, डॉ० देशभक्त, डॉ० रमेश आत्मविश्वास, श्री चन्द्रप्रकाश जगप्रिय, श्री दीपनारायण 'दीप', डॉ० विजय, डॉ० सकलदेव शर्मा, श्री अनिल ठाकुर आरनी जहाँ अंगिका के लोकप्रिय बनावै आरो साहित्य से भरै में जुडलें छोट, बाँहीं दक्षिण में पं० भवप्रीतानन्द ओझा, पं० शुद्धदेव झा 'उत्पल', महाकवि सुमन सूरु, श्री सुभाषचन्द्र 'भ्रमर', डॉ० डोमन साहु 'समीर', डॉ० श्यामसुन्दर घोष, श्री अनिरुद्ध प्रभास, प्रो० सुरेन्द्र झा 'परिमल', श्री वेद प्रकाश बाजपेयी, श्री पंकज मिश्र आरनी के अंगिका-सेवा से अंगिका भाषा आरो साहित्यों के समृद्धि काफी ऊँचाई पर चढ़ी गेलें छै।

पश्चिमों में जे अंगिका के लोकप्रिय करै में श्री गदाधर प्रसाद अम्बष्ठ, डॉ० माहेश्वरी सिंह 'महेश', प्रो० नीलमोहन सिंह, डॉ० रामधारी सिंह दिनकर, श्री विजेता मुद्गलपुरी, श्री सियाराम सिंह 'प्रहरी', श्री रामदेव भावुक, श्री छन्दराज, श्री प्रभात सरसिज, श्री निर्मल सिंह 'लाल' आरनी के भूमिका ऐतिहासिक रहलें छै तें पूरब में डॉ० तेजनारायण कुशवाहा, श्री महेन्द्र प्रसाद जायसवाल, श्री अनिरुद्ध प्रभास, श्री पंकज साहा आरनी ने अनेक अंगिका सम्मेलन, अधिवेशन आरो कार्यशाला के माध्यमों से अंगिका भाषा के पूर्वी अंग के कोना-कोना तक खाली मोहे नै पैदा करलकै, बलुक समारोह आरो अधिवेशनों के माध्यमों से सौसे राष्ट्रों के विद्वानों के सम्मुख अंगिका के समृद्धि आरो प्राचीनता के राखै में अद्वितीय कार्य करलकै। यहें कार्य मध्य जनपदों में डॉ० परमानन्द पाण्डेय, श्री 'चकोर', श्री भुवनेश्वर सिंह 'भुवन', श्री सदानन्द मिश्र, श्री गुरेश मोहन घोष 'सरल', श्री सच्चिदानन्द 'श्रीस्नेही', श्री सुरेश मंडल 'कुसुम' आरनी साहित्यकारों द्वारा होलै। ई काम अंगिका भाषा के नया पीढ़ी के साहित्यकारों में अभूतपूर्व उत्साह आरो संकल्पबद्ध ढंगों से करी रहलें छै। कोशी अचलों में डॉ० आत्मविश्वास, मध्य अंग में श्री परशुराम ठाकुर ब्रह्मवादी, दक्षिण में श्री धीरेन्द्र छतहारवाला आरो पश्चिम में श्री विजेता मुद्गलपुरी तें पूरब में श्री अनिरुद्ध

प्रभास अंगिका भाषा के प्रति आम जन-जीवनों में गहरा रुचि के स्थापना लेली प्रयत्नशील छेत। अखिल भारतीय अंगिका साहित्य-कला-मंच द्वारा 'अंगवाणी' के चलन्त गोष्ठी ने ई क्षेत्रों में क्रान्तिकारी बदलाव आरो विकास लानी देने छै।

हेना के अंगिका भाषा आरो साहित्यों के शिक्षा-संस्थानों में स्थान दिलावै के माँग ते बहुत पैहिनै से होते रहलै, मतरकि १९९४ ई में. ई माँग के राष्ट्रीय रूप देलौ गेलै, जेकरों नीव समय-साहित्य-सम्मेलन, पुनसिया (बाँका) के राष्ट्रीय महाधिवेशन १९९३ ई में देलौ गेलौ छेलै जबे कि राष्ट्रीय आचार्य पद्मश्री डॉ० लक्ष्मीनारायण दुबे के अध्यक्षता में ई निर्णय लेलौ गेलै कि अंगिका भाषा आरो साहित्यों के प्रचार लेली दिल्ली में अधिवेशन करलौ जाय। ऊ निर्णयो के तहत अंगिका अभियान-साहित्य के निर्माण करलौ गेलौ छेलै, जेकरों अध्यक्ष श्री सतीशचन्द्र सिंह, महामंत्री डॉ० अमरेन्द्र आरो संयोजक छेलै डॉ० तेजनारायण कुशवाहा। ई समिति के पहलौ राष्ट्रीय अधिवेशन दिल्ली में होलै, जेकरा में प्रसिद्ध साहित्यकार आरो राजनीतिज्ञ डॉ० शंकर दयाल सिंह (स्व०), डॉ० दिवाकर प्रसाद सिंह, पूर्व-शिक्षा मंत्री, श्री गुणेश्वर प्रसाद सिंह आरनी ने भी भाग लेने छेलै। वै अधिवेशनों से अंगिका के राष्ट्रीय स्तरों पर नया पहचान देलौ गेलौ छेलै आरो वाँहीं से अंगिका के विश्वविद्यालयों में लानै वास्ते फेनू से एक नया ताकत ऐलै। ई ताकत दै में अंगिका भाषा-एकता-परिषद, भागलपुर आरो उदित अंगिका साहित्य परिषद्, देवघर के योगदान बड़ी ऐतिहासिक रहलै। डॉ० डोमन साहु 'समीर' आरो श्री सतीश चन्द्र सिंह के अविराम सक्रियता से आखिरकार १९९५ ई. में भागलपुर विश्वविद्यालय के कुलाधिपति (राज्यपाल, बिहार) के आदेश भेलै कि अंगिका भाषा-साहित्यों के विश्वविद्यालयों के स्नातक स्तर के सब्भे पाठ्यक्रमों में शामिल करलौ जाय। राज्यपाल महोदय के वै आदेशे अंगिका लेखक, साहित्यकार आरो विद्वानों के बीच पसरलौ उदासी के धूल के झाडी-पोछी देलकै, जेकरों अन्दाजा १९९५ के 'हिन्दुस्तान' (पटना) में प्रकाशित अर्पणा सिंह के एक लेखों से लगैलौ जावै सकै छै। वै तरहों से अंगिका भाषा के आधुनिक साहित्यों के प्रकाशन में सर्वथा नया किसिमों के उत्साह के दिशा खुललै।

अंग-जनपदों में शिक्षा के नवीन प्रचार से ई जनपदों में एक नया किसिम के सांस्कृतिक परिवेश बने पारलै। बुद्धिजीवी-साहित्यकार के संबंध विश्व के विभिन्न दार्शनिक विचार-धारा से होलै। मार्क्स, लेनिन, नीत्शे आरो सात्र के दार्शनिक विचार-धारा से भी यहाँकरों समाज में एक नया चिंतन (सोच) लेली

मानसिक स्थिति पैदा भेलै। विश्वविद्यालय स्तर पर ई-सब दर्शन के अध्ययन-अध्यापन नें नया शिक्षित समाजों के अन्तर्राष्ट्रीय बनै में काफी मदद पहुँचैलकै। आधुनिक अंगिका-साहित्यों में भौतिकतावादी, प्रकृतिवादी, अस्तित्ववादी चिंतन यहें नवीन शिक्षा के परिणाम छेकै।

## आर्थिक परिस्थिति

अंग-जनपद, जे आपनों आरम्भ-काल्है से सम्पत्ति आरो समृद्धि वास्ते विश्वभरी में नामी छेलै, जौन जनपदों के व्यापारी समुद्र के पार करी-करी विश्वभरी से आपनों व्यापारिक संबंध कायम करने छेलै आरो जे समृद्धि-सम्पत्ति के कारणे आपना पर बार-बार मगध के आक्रमणों के कारण बनलौ छेलै, अंग्रेजी शासन के प्रसार-प्रचार के कारणे यहाँकरों बचलों-खुचलों नामी उद्योगो घूमिल पड़ै लागलै।

रेशम-उद्योग के लैके जे गालपुर विश्वभरी में विख्यात रहै, ओकरो अंग्रेजी कम्पनी नें बचाय के कोशिश नै करलकै। आजादी के बादो रेशम-उद्योग में कोय बुनियादी सुधार के कोशिश नै करलौ गेलै। बड़ों-बड़ों के नीचे कुछ-कुछ काम करलौ गेलै। स्वातंत्र्योत्तर भारत में ई रेशम-उद्योग केन्हीं के आपनों अस्तित्वे-भर बचावें पारी रहलौ छै। बुनकरा के अर्थिक दयनीयता पिछलका कुछ दशकों से आपनों चरम पर आबी के रुकी गेलौ छै।

सरकारी सहयोग आरो संरक्षण के अभाव के कारणे कयेक महत्वपूर्ण गृह-उद्योग अस्तित्वविहीन होय गेलै, जे में एक लाह-उद्योगो छेलै। लाह के चूड़ी-उद्योग के समाप्ति के साथे-साथ अनेक परिवारों के समक्ष भुखमरी के भयंकर संकट आबी गेलौ छै, एक महत्वपूर्ण आर्थिक स्रोत छेलै लाह-उद्योग।

आजादी के बादो ई जनपदों में सरकार द्वारा कोय महत्वपूर्ण उद्योगों के स्थापना नै करलौ गेला के कारणे ई जनपदों के अधिकांश लोगों के आर्थिक स्थिति के मजबूती देबों संभव नै छेलै। ई जनपदों के आर्थिक सुदृढता के एक आधार जे जंगल छेलै ओकरो विनाश ई क्षेत्रों के दरिद्रता के आरो भयंकर बनैतें गेलै। आय ई जनपदों के दक्षिणी हिस्सा संताल परगना के अधिकांश जंगल वृक्षविहीन होय गेलौ छै आरो उत्तरी अंग कटिहार-पूर्णिआ, जे कि कभी पूरा अरण्य छेलै, अबें मैदान होय के रही गेलौ छै। जंगल ई जनपदों के आर्थिक जीवनों के सुदृढता में हमेशा से भारी सहयोगी रहलौ छै। ओकरो विनाश से ई जनपद जो आय कंगाली के कगार पर आबी गेलै तें आचरज नै।

अंग-जनपदों के आर्थिक दुरवस्था के सबसे बड़ों कारण रहलै - जमींदारी व्यवस्था पर कृषि के कार्य। एक समय छेलै जबे कृषि-भूमि पर केकरो आधिपत्य नै होय छेलै; मतरकि जमींदारी-प्रथा के लागू होतहैं जमीन पर जमींदारों के अधिकार होय गेलै। जमीन के खरीद-बिक्री शुरू होय गेलै। फसलों पर जमींदारों के अधिकार होय गेलै आरो ओकरो कृषि-भूमि पर काम करैवाला किसानों के जीवनें कारुणिक दृश्य उपस्थित करे लागलै। धीरे-धीरे खेतिहर-मजदूरों पर जमींदारों के अत्याचारो बढ़लें गेलै, जेकरो कयेक बुरा परिणाम निकललै। गाँवों से लोगों के पलायन शुरू भेलै; वैसिनी देशों के नगर-महानगरों में मजूरी करै लें निकली गेलै।

उत्तरी अंग-जनपदों में तें गंगा आरो कोशी के उपद्रवों से आर्थिक उपद्रव आरो चरम पर देखलें गेलै। प्रतिवर्ष लाखो परिवारों के बाढ़ के कारणे अन्न आरो घोर वास्ते बिलबिलावे पड़े छै। हर वर्ष सरकारों के आश्वासन चलतें रहै छै। फरक्का बराज के कारणे तें कोशी अंचल के आर्थिक परेशानी दिनोंदिन बढ़लें चललें जाय रहलें छै। फरक्का बराज के कारणे गंगा के नै खाली गहराई घटलें जाय रहलें छै, बलुक बालू के लगातार जमाव होतें जाय के कारणे नदी के पाटो चौड़ा होय रहलें छै। दियारा के कृषि गंगा के चौड़ा होतें पाट से लगातार समाप्त होय रहलें छै। जमीन एक बेर गंगा-कोशी के पेटों में समैलों तें तीस-पैंतीस सालों के बाद उबरै के बात रहै छै। खेतिहर-मजदूरों के समक्ष लगातार भुखमरी के सुरसा मुँह फैलैले जाय रहलें छै। वै पर कोशी अंचल के जमींदारी निर्दयता अलग। फरक्का बराज के कारणे समुद्र से मछली के एबों बंद होलें जैबो उत्तरी अंग-जनपदों के मछुवारासिनी के जीवन-सुरक्षा पर भारी प्रश्न-चिन्ह खाड़ों करी देले छै।

अंगिका के आधुनिक गद्य-साहित्य, खास करी के उपन्यास आरो कहानी साहित्य, में अंग-जनपदों के नया किसिमों के अमानवीय आर्थिक शोषण आरो पूंजीवादी अत्याचारों के बड़ी भयावह अभिव्यक्ति भेलें छै। कथा-साहित्य नाखी नया समय के अधिकांश अंगिका कवियोसिनी ने है आर्थिक विपन्नता आरो आर्थिक अपराधों के खुली के उजागर करने छै। गंगा-मुक्ति के लैके सैकड़ों अंगिका-गीतों के रचना ई बातों के सबूत छेकै कि अंग-जनपदों के बेढंगा आर्थिक व्यवस्था ने कोन तरह से अंगिका-साहित्यों के प्रभावित करने छै।

## काल-विभाजन आरो नामकरण

कोय भाषा के लिखित साहित्य जबे से मिले लागै छै तभिये से ओकरो इतिहासो शुरू होय जाय छै। 'आंगी' के साहित्य हेना के ते सातमी-आठमी शती ईस्वीये से सिद्ध-कविसिनी के चर्यापदों में मिले लागलें छै जेकरो जिक्र यै इतिहासों के पद्य-खंडों में करलें गेलें छै। वै हिसाबों से अंगिका-साहित्यों के पुनरुत्थान आकि पुनर्जागरण-युग बीसमी शती के लगभग मध्य भागों से शुरू होय छै। पुनर्जागरण-युग यै लेली कि येहें समयों में अंगिका भाषा आरो साहित्यों के संरक्षण आरो विकास लेली अनेक ख्यातिप्राप्त साहित्यकारों के अंगिका-आन्दोलन शुरू होलै।

साहित्य के इतिहासों के काल-विभाजन आरो नामकरण प्रायः उपलब्ध साहित्यों के मुख्य प्रवृत्ति के अनुसार होय छै। अंगिका साहित्यों के काल-विभाजन डॉ० तेजनारायण कुशवाहा ने, खासकरी के, अंगिका-आन्दोलनों के ध्यान में राखतें होलें, मंच-युग (१९५०-१९८५ ई.) आरो मंचोत्तर-युग (१९८५ ई. से अब तक) के नामों से करने छै। हिनी मंच-युगों के अनेक वरिष्ठ साहित्यकारों के मंचोत्तर-युगों में देखैने छै आरो कहलें छै कि मंचोत्तर-युगों में मंच-युगों के सब्भ प्रवृत्ति मिलै छै। यै संबंधों में कुछू मतान्तर होवै के गुजाइश छै, मतरकि यहाँ वै संबंधों में कुछ कहै के अवकाश नै छै। ई बात नै छै कि १९५० ई. से १९८५ ई. के बीच खाली मंच आकि संस्थाये के जन्म होलै, साहित्यों के सृजन नै ; बल्कि देखलें जाय तें येहें काल-खंडों में मंच आकि संस्था बनै से काँहीं बेसी श्रेष्ठ अंगिका साहित्यों के सृजनों भेलें छै।

श्री सच्चिदानन्द श्रीस्नेही ने अंगिका के आधुनिक अद्वैत कालों के चार भागों में बाँटी के देखने छै -- १. उत्थान-काल (१९३५-१९५५ ई.), २. रजत-काल (१९५६-१९६९ ई.), ३. स्वर्ण-काल (१९७०-१९७७ ई.) आरो ४. हीरक-काल (१९७८ ई. से आय तक)। श्रीस्नेही जी के ई काल-विभाजनों के आधार साहित्य के विशेषता के कारण नै, बल्कि साहित्य के प्रकाशन-संख्या आरो साहित्यिक चहल-पहल छेकै। जो साहित्य के श्रेष्ठता के बात लेलें जाय तें जे कालों के श्रीस्नेही जी ने उत्थान-काल कहलें छै वही कालों में सर्वश्री भुवनेश्वर सिंह 'भुवन', सदानन्द मिश्र, सुमन सूरु आरनी हेनो श्रेष्ठ रचनाकारों के साहित्य पर्याप्त मात्रा में आबी चुकलें छेलै। सचतें ई छेकै कि काल-विभाजनों के समय श्रीस्नेही जी के सामने रचना-विशेष के मूल्यांकन मुख्य नै रहलें छेलै।

रचनासिनी के प्रकाशन-संख्या के आधारों पर काल-विभाजन वैज्ञानिक मानतो जावे सकै है। तथाकथित स्वर्ण-युग आरो हीरक-युगों के अनेक रचना कोनो मूल्यों के नै है।

डॉ० माहेश्वरी सिंह 'महेश' के 'अंगिका भाषा और साहित्य' हिंदी-निबन्धों में अंगिका-साहित्यों के पुनरुत्थान आकि पुनर्जागरण-युग वास्तें कोय स्पष्ट नामकरण तें नै मिलै है, मत्तुर आधुनिक अंगिका गद्य-साहित्यों के उल्लेख के क्रम में हुनी 'नवयुग' शब्द के प्रयोग करने है। यै सें यही कहलौ जावे सकै है कि हुनको मतानुसार ई कालों के नाम 'नवयुग-काल' उपयुक्त है।

जें गंभीरता सें विचार करलौ जाय तें ऊपरों के सब नामकरण या तें समयों के बोध करावै है या साहित्यों सें अलग कोय दोसरो बातों के। हमरो विचारों सें अंगिका-साहित्यों के ई पुनरुत्थान-कालों के आधुनिक अंगिका-साहित्यों के अद्वैत काल कहबौ बेसी उपयुक्त होतै। आधुनिक अंगिका-साहित्यों सें जहाँ समय-विशेष पर प्रकाश पड़ै है वहाँ रचनासिनी में अभिव्यक्त आधुनिक भावों के बोध होय जाय है। फनू, 'अद्वैत' शब्द सें ई कालों के दू विभेदों के बीच भावों के समानता के साथे-साथ ई साहित्यों में आधुनिक भावों के प्रमुखता-व्यापकता के भी बोध होय जाय है। यही सें 'अंगिका साहित्यों के नवयुग' आकि आधुनिक कालों के 'आधुनिक अद्वैत काल' कहबौ बेसी वैज्ञानिक होतै।

श्री सुमन सूरों ने अंगिका-साहित्यों के पुनरुत्थान-युग के 'आधुनिक काल' कहने है जे कि आगू चली के डॉ० कुशवाहा आरो श्रीस्नेही जी द्वारा है काल वास्तें निर्धारित नामों सें जरूर अधिक वैज्ञानिक है।

आधुनिक अंगिका अद्वैत काल के साहित्य, जेकरों शुरुआत १९४० ई० के आस-पास सें होय है, आपनो भाव-धारा आरो शिल्प-विधानों में बहुत अधिक बदलावों के संकेत दिये लागै है। वहे बदलावों के कारण अंगिका-साहित्यों के आधुनिक अद्वैत कालों के दू स्पष्ट उपभेद आरो बने पारै है -- १. पूर्व-आधुनिक अद्वैत काल आरो २. उत्तर आधुनिक अद्वैत काल।

पूर्व-आधुनिक अद्वैत कालों के तात्पर्य वैसिनी साहित्यकारों सें है जिनको संबंध खास करी के अंगिका भाषा आरो साहित्यों के नवोत्थानों सें भी होतै। सर्वश्री गदाधर प्रसाद अम्बष्ठ, भुवनेश्वर चौधरी 'भुवनेश', उपाध्याय जी, लक्ष्मण सिंह चौहान, परमानन्द पाण्डेय, भुवनेश्वर सिंह 'भुवन', सदानन्द मिश्र, नरेश पाण्डेय 'चकोर', तेजनारायण कुशवाहा, सुमन सूरों आरनी कवि पूर्व-आधुनिक अद्वैत काल के साहित्यकार छेकै जिनको काव्य-साहित्यों में नया सामाजिक-

राजनीतिक चेतना मिलबो शुरू होय जाय छै, मतरकि शिल्प आरो शैली कें दृष्टि सें निस्सदेह पहिलें प्राचीनता कें ही बोध कराय छै। लोक-छंदों कें उपयोग प्रमुखता सें होला कें साथें आधुनिकता-बोध कें ऊ आँस आकि कड़वाहट नै छै जे कि उत्तर-आधुनिक अद्वैत काल कें कविसिनी कें रचना में मिलै छै। यहू में कोय शक नै कि श्री सदानन्द मिश्र आरो श्री भुवनेश्वर सिंह 'भुवन' -हेनों कवि होनों विभाजन सें मुक्त छै, मतरकि अधिकांश कवि पर ई विभाजन लागू होय छै।

पूर्व-आधुनिक अद्वैत काल कें कविसिनी में आधुनिकता कें आँस, काँहीं-काँहीं तें एकरों गंध-भर छै। तबें, आधुनिक यै लेली छै कि हिनकासिनी कें काव्य में भक्ति कें ऊ प्रबल धार पर रोक अवश्य देखाय छै जे वै धारा कें अबाध गति आधुनिक काल सें पहिलें सर्वश्री दर्शन दुबे, भवप्रीतानन्द ओझा, महर्षि मेंहीं, चन्दरदास, गैबीदास आरनी तक अबाध गति सें बीसमी शती कें पूर्वाद्ध तक चललें आबै छै। भक्ति कें जग्घा पर पूर्व आधुनिक अद्वैत काल कें कविसिनी नें प्रकृति आरो लोक-रीति-रिवाजों कें प्रमुखता सें आपनों कविता में उठैबों शुरू करलकै।

उत्तर-आधुनिक अद्वैत काल कें छोर १९७५-७६ ई. कें आस-पास काँहीं सें मानलें जैतै। ई दृष्टि सें पबई (अमरपुर) में जुलाई १९७८ ई. में होलों अखिल भारतीय अंगिका साहित्य-मंच कें प्रथम अधिवेशन कें ऐतिहासिक महत्व छै। ऊ साहित्य-कला-मंचों कें स्थापना आरो ओकरों प्रथम अधिवेशन नें नया अंगिका लेखकों कें एक बहुत बड़ों सूची सामने में राखलकै। वै सूची कें साहित्यकारों कें प्रवेश, एकाध कें छोड़ी कें, अंगिका साहित्यों में नये छेलै, मतरकि हेनों बात नै छेलै कि हुनकासिनी साहित्य कें दुनियाँ लेली नये छेलै। वै मंचों कें अधिवेशन में उपस्थित नया पीढ़ी कें रचनाकार मुख्य रूपों सें खड़ी बोली (हिंदी) कें साहित्य सें जुड़लें साहित्यकार रहै जिनकों पहचान आबें अंगिका-साहित्यकारों कें रूपों में पहिलें छै। सर्वश्री ज्योतिष मंडल, सच्चिदानन्द श्रीस्नेही, सुरेश मंडल 'कुसुम', गुरेश मोहन घोष 'सरल', निर्मल कुमार चौधरी, मुर्शीद अली, शिवेन्दु आरनी कें प्रयास सें वै मंचों कें स्थापना आरो ओकरों ऊ ऐतिहासिक अधिवेशन संभव हुवें पारलें छेलै।

वै अधिवेशनों में डॉ० रामजी सिंह, डॉ० विष्णुकिशोर झा 'बेचन', डॉ० अभयकान्त चौधरी, डॉ० तेजनारायण कुशवाहा, श्री नरेश पाण्डेय 'चकोर' आरनी पूर्व-आधुनिक अद्वैत काल कें साहित्यकार तें छेबे करलै, नया साहित्यकारों में सर्वश्री सुरेश मंडल 'कुसुम', जगदीश पाठक 'मधुकर', श्रीस्नेही, गुरेश मोहन घोष 'सरल', प्रियतम कापरी, मीरा झा (श्रीमती), अंजनी कुमार विशाल, शिवेन्दु



विद्रोही, अमरेन्द्र, कुमार भागलपुरी, ओम् प्रकाश मिश्र, श्रीराम शर्मा 'अनल', श्रीनिकेत, राकेश रवि, श्रीचन्द, रामावतार राही, कैलाश कुमार, परमानन्द प्रेमी आरनीयो छलै। उत्तर-आधुनिक अद्वैत काल के प्रारम्भ येहेसिनी कवि-साहित्यकारों से मानना चाहियो। फरू, अक्टूबर १९७८ ई. में अखिल भारतीय अंगिका-विकास-सम्मेलन के जे पहिलो अधिवेशन चम्पानगर (भागलपुर) में भेलै ओकरों संपूर्ण संचालन में अंगिका के बिल्कुल नया लेखक-साहित्यकार सर्वश्री भोलानाथ दत्त 'लतांत', विकास पाण्डेय, सुलेमान चम्पापुरी, संजय यादव, रविकान्त नीरज, अभय आनन्द, रंजीत दत्त आरनी छेलै। वहु सम्मेलनों में जे नया पीढी के साहित्यकार आपनों-आपनों कविता लै के मंच पर ऐलों छेलै हुनकासिनी के नाम वहे छेकै जे जुलाई १९७८ ई. के पबई के अधिवेशनों में उपस्थित छेलै। यही से उत्तर-आधुनिक अद्वैत काल के एक सौ से बेसी साहित्यकारों के सूची आबे मिलै छै जे कि आपनों साहित्यों के प्रवृत्ति लै के उत्तर-आधुनिक अद्वैत कालों के साहित्यिक प्रवृत्ति से अलग-थलग नै छै। यही ले १९७८ ई. से लै के आय तक के अंगिका साहित्यकार उत्तर-आधुनिक अद्वैत काल के ही साहित्यकार ठहरतै।

१९७८ ई. के बाद अंगिका साहित्य में राजनीतिक, आर्थिक, सामाजिक आरो धार्मिक विसंगति के भयावह आरो हास्यास्पद स्वरूपों के जे रड पारदर्शी रूपों में उतारलें गेलें छै, ऊ बेशक आपनों स्वरूप पूर्व-आधुनिक अद्वैत काल से आपनों अभिव्यक्ति के साहसिकता आरो स्पष्टता में बिल्कुल भिन्न छै।

## कथा-साहित्य

### कहानी (सामान्य)

खड़ी बोली हिंदी के आलोचक भलें ई मानतें रहें कि हिंदी में आधुनिक कहानी के प्रचलन अँग्रेजी साहित्य से भेलै, मतरकि अंगिका के आधुनिक कहानी ई भाषा में प्रचलित लोककथा के विकास छेकै, जेकरों जन्म बातचीतों के एक नया रूप ग्रहण करी लेला के कारणे होलें होतै। यही कारण छै कि अंग-जनपदों में कहानी में ऐन्हों गपों के प्रयोग होय छै, जे कि गपों के गढ़लों साहित्यिक रूप छेकै। अंगवासी लोगें खिस्सा के साथें 'गप' (खिस्सा-गप) लगाये के अकसरों बोलै छै।

खिस्सा-गपों के सही परिभाषा की हुवें पारें आरो ई कोन गद्य-विद्या से अलग पहचान राखै छै, निर्णायक रूपों में ई कहबों कठिन छै; कैन्हें कि यहें कहानी जबें ज्ञान-शैली पर लिखलें जाय छै, तबें ई संस्मरण बनी जाय छै आरो

जबें यै में चरित्र पर जोर देलें जाय छै तबें यहें शब्दचित्रों के नगीच पहुँची जाय छै। फनू, भावों के प्रधानता से ई निबंधों के नगीच पहुँची जाय छै तें संवादों के प्रमुखता से नाटकों के करीब चली जाय छै।

यै से स्पष्ट छै कि कहानी के कोनो खास तत्वों पर ज्यादा जोर देला से ऊ आपनों कहानी-रूप छोड़ी के आरो कोय साहित्य-रूप ग्रहण करें लागै छै। यही से ई कहलें जाबें सकै छै कि कहानी ऊ साहित्यिक रूप छेकै जेकरा में चरित्र-चित्रण, संवाद, देश-काल के साथें कोय एक घटना के होबो जरूरी छै आरो जेकरों संतुलित, उद्देश्यपूर्ण समन्वय कहानी छेकै।

आधुनिक अंगिका कथा-साहित्य केरों विधिवत् लेखन आरो प्रकाशन, हिंदी कहानिये नाखी, अनुवादित कहानी-साहित्ये से होलें छै। हेकरा से ई नै समझना चाहियें कि जखनी ई भाषा में रूपान्तरित कहानी के प्रकाशन शुरू भेलै, तखनी मौलिक कहानी के लेखन नै होय रहलें होतै। तखनी मौलिक रूपों से लिखलें कहानी के प्रकाशनों के कोय व्यवस्था नै छेलै आरो नै तें ओकरों ले कोय सरकारी आकि लेखकीय उत्साहे छेलै। यै लेली हस्तलिखित रूपों में रखलें ऊ-सब कहानी दीमक आरो समय के प्रभावों से आपना के सुरक्षित नै राखें पारलें होतै। हेना के तें एकरों प्रमाण मिलै छै कि मुद्रण सर्वसुलभ होला के पहिलें तक अंगिका साहित्यकारों में हस्तलिखित पत्रिकाओ के संपादन के उत्साह कम नै रहलै आरो हेनों पत्रिका में कहानियों के स्थान मिलतें रहलें छेलै। १९५४ ई. के आस-पास भागलपुरों के एक गाँव 'बाथ' से संपादित 'भारती' एक हेने पत्रिका छेलै।

अंगिका भाषा में रूपान्तरित कहानी के प्रकाशन अठारवीं शती ईस्वी के आखिरी चरणों में श्री फादर अंटोनियोकर द्वारा 'नामी गोस्पेल' के अंगिका-अनुवादों से डॉ० माहेश्वरी सिंह 'महेश' ने मानलें छै, जेकरों उल्लेख 'महेश' जी के 'अंगिका भाषा आरो साहित्य' (पृ० २४) में छै। यहें किताबों से पता चलै छै कि जॉन क्रिश्चियन ने भी 'बाइबिल' के एक अंशों के अंगिका-अनुवाद तैयार करवैने छेलै, जेकरों लीथों-प्रतिसिनी जन-समुदाय के बीच बँटवैलें रहै। डॉ० ग्रियर्सन ने आपनों प्रसिद्ध पुस्तक 'लिंग्विस्टिक सर्वे ऑफ इंडिया' में रूपान्तरित कहानी साहित्यों के कुछ उदाहरणों राखलें छै, जेकरों एक अंश नीचे छै।

"कोय आदमी के दू बेटा छेलै। ओकरा में से छोटका बाप से कहलकै कि हो बाप! जे कुछ धन-सम्पत छै, ओय में जे हमरों हिस्सा होय छै से हमरा दै दें। तबें ऊँ धन-सम्पत के बाँटी देलकै। बहुत दिन भी नै भेलै कि ओकरों

छोटका बेटा सब चीज के इकट्ठा करी-धरी के बहुत दूर मुलुक चललौं गेलै आरो वहाँ लुच्चापनी मे दिन-रात रही के सब धन के ऐश-जैश में खरच करी देलकै। जबकि सब धन-सम्पत्त चललौं गेलै तबे ऊ गाँव में अकाल भेलै आरो ऊ बिल्लला होय गेलै। तबे ऊ एक वडै गाँव के रहवैया कन रहै जे ओकरा सूगर चरावै लेल आपनो खेत मे भेजलकै।' (अंगिका भाषा आरो साहित्य)।

अंगिका में मौलिक कहानी लिखै के जे प्रयास चललै, ऊ संभवतः हास्य-व्यंग्य के कहानी रहै। पंडित बुद्धिनाथ झा 'कैरव' नै, जे कि अंगिका भाषा-साहित्य के आबोलनों के कट्टर समर्थक रहै आरो जिन्ही पटना में १९५६ में 'अंग-भाषा-परिषद्' के स्थापना में आपनों भारी सहयोग देलें छेलै, परिषद्-स्थापना से बहुत पहिले अंगिका में गद्य-साहित्य-सृजन शुरू करी देने छेलै। 'अंगिका संपूर्ण पंडित बुद्धिनाथ झा 'कैरव' शीर्षक से डॉ० डोमन साहु 'समीर' के लेखों में एक उल्लेख छै कि 'कैरव' जी ने 'मोतिया विनोद' के नामों से अंगिका में एक किताब लिखने छेलै, जे कि हस्तलिखित होला के कारणे आबे अप्राप्य छै।

'कैरव' जी के ई अंगिका गद्य-कृति आपनों लोकप्रियता के सीमा पार करी गेलौ छेलै। आचरज नै कि 'कैरव' जी के हास्य-व्यंग्यवाला अंगिका कहानी ने बाद में कहानी लिखै के मार्ग प्रदर्शित करलकै; कन्हें कि हेनों कहानी के सृजन में लोगों में अंगिका भाषा आरो साहित्यों के प्रति एक आकर्षण पैदा करलौं जावै सकै छेलै। १९५४ ई० के आस-पास जे हस्तलिखित 'भारती' अंगिका पत्रिका के संपादन शुरू भेलै आरो वै में श्री उमेश के 'चौबेजी के गप' के नामों से जे कथा ऐलै (जेकरों नियमित प्रकाशन, 'अंग-माधुरी' के प्रकाशन के बाद करलौं गेलौ छेलै) वोहो हास्य-व्यंग्य के कहानी छेकै।

मतरकि निश्चित रूपों से यहू नै कहलौं जावै सकै छै कि ओरलका दिनों मे ५० 'कैरव' आकि श्री उमेश ने जौन हास्य-व्यंग्यवाला कहानी के नीव राखलकै, ऊ आधुनिक अंगिका कहानी के प्रस्थान-बिन्दु छेलै।

श्री निर्मल लाल ने 'गोविन्द दीक्षित' नामों के एक हेनों साहित्यकारों के नाम लिखी के भेजने छै जिनकों निघन १९९२ ई० में या १९९६ ई० में नब्बे साल के उमरी मे भेलै आरो जे अंगिका कहानी कहै में अद्भुत प्रतिभा के छेलै। गाँव-टोला के कोय घटना के लैके वै पर कहानी गठी देबों आरो दोस्त-मोहिन के सुनाय देबों हुनका ले आम बात छेलै। आखिर खिस्सा सच के अर्थों तें यहू छेकै, सच में खिस्सा दीक्षित जी तारापुर-निवासी छेलै। तखनी मुद्रण के असुविधा से पाण्डुलिपि के रूपों में गाँव-घरों में राखलौं अंगिका कथा-साहित्यों के खोज

तेली कोय प्रयास नै होलें छै ।

साहित्यों के इतिहास लेखक-द्वारा अभियों तौय कोय सराहनीय ईमानदार कोशिश नै भेलें छै । आपनों रचना के प्रकाशित करी के आरो वही से अंगिका-साहित्यों के संबद्ध विधा के आरम्भ मानी लै के कुछ अंगिका साहित्यकारें अंगिका भाषा आरो साहित्यों के स्वरूपों के एतें अंधकारमय करते ऐलें छै कि रौशनी के अन्वेषी दिग्भ्रमित होय उठै । साहित्यिक दबाव, सरलता आकि प्रोत्साहनों के ख्याल से कोय नामी साहित्यकार द्वारा खास-खास कृति पर अंगिका गद्य के, अंगिका कविता के आदि रूप लिखी-देला से अंगिका के स्थिति बड़ी उलझी गेलें छै । हालाँकि सिद्ध-साहित्यों में नया सिरा से डॉ० समीर द्वारा अंगिका भाषा के स्वरूप-निर्धारण से उलझलें स्थिति हटी चुकलें छै ।

जहाँ तक मुद्रित रूपों में प्रकाशित मौलिक आधुनिक अंगिका कहानी के प्रश्न छै, डॉ० परमानन्द पाण्डेय के 'सात फूल' से पहिलकों कोय मुद्रित कहानी नै प्राप्त होलें छै । 'सात फूल' के प्रकाशन १९६२ ई० में समाज-शिक्षा-पर्यद्, पटना (बिहार) से होलें छै, जै में डॉ० पाण्डेय के सात-टा कहानी -- नामसमझी के फौल, तरु-मंगल, किरपिनी रौ धौन खोंटों खाय, आब अछैतें बाब नै लागें, पाप लिखतौ, जेन्हें करनी तेन्हें भरनी आरो राँगाधारी बाबा, संकलित छै ।

प्रो० दुर्गा प्रसाद उपाध्याय रौ एक लेखों के मोताबिक देश के बढावों हो' (१९६३) डॉ० पाण्डेय के 'कहानी-प्रधान कृति' छेकै । हुनकों मोताबिक ई संग्रहों के पहिलों कहानी 'सुगीरानी' कथोपकथन के लिहाज से एक अच्छा कहानी छेकै । ई संग्रहों के प्रकाशको समाज-शिक्षा-पर्यद्, पटना छेकै । एक आरो उल्लेख के मोताबिक 'सपना' हिनकों कहानीसिनी के एक आरो संग्रह छेकै जे पांडुलिपिये अवस्था में रखलें होलें छै ।

तबे से लैके आय तक अंगिका में कयेक-टा कथा-संग्रह होय चुकलें छै, जै में कुछ तें स्वतंत्र कहानी-संग्रह छेकै आरो कुछ संपादित । संपादित कहानी-संग्रहों में 'अंगिकाजलि' (१९६९ ई०) बहुत ऐतिहासिक महत्व के छेकै, जे कि डॉ० पाण्डेय आरो श्री नरेश पाण्डेय 'चकोर' के संयुक्त प्रयासों के उपलब्धि छेकै । चौसठ पृष्ठों के ई कहानी-संग्रहों में सतरों-टा कहानी राखलें गेलें छै । अंगिका कहानी के विषय आरो शिल्पगत आधुनिकता के समझ के ख्यालों से है संग्रहों के कहानी 'बरद-बिद्रोह' (मधुकर गंगाधर), 'कांक्षा' (डॉ० कुमार विमल), 'भुललें याद' (प० अयोध्या प्रसाद झा), 'भिरखो सराध' (डॉ० वचनदेव कुमार) के ऐतिहासिक महत्व निर्विवाद रूपों से असदिग्ध छै ।

संपादित कहानी-संग्रहों के दृष्टि से दोसरो महत्वपूर्ण कथा-संग्रह 'फूल फूलै' (१९७१ ई०) छेकै, जेकरों सम्पादन श्री नरेश पाण्डेय 'चकोर' द्वारा होलें छै। वै संग्रहों में कयेक-टा कहानी हेनों छै जेकरों प्रकाशन 'अंग-माधुरी' पत्रिका में होय चुकलें छेलै। वै संग्रहों के कहानी में 'गूज' (मधुकर गंगाधर), 'खटुआ भाय' (सुमन सूरु), 'नरकौ में ठेला-ठेली' (नरेश पाण्डेय 'चकोर'), 'फुटरा' (राधाकृष्ण चौधरी) आरो महेन्द्र जायसवाल के कहानी असंदिग्ध रूपों में श्रेष्ठ कहानी के प्रतिमान प्रस्तुत करै छै। हेकरों अतिरिक्त 'गुलाबी जी' आरो प्रकाशवती नारायण के कहानियों के आपनों-आपनों महत्व छै।

आय तें अंगिका कथाकार के एक लम्बा सूची मिलै छै, मजकि वै से पहिले हेनों कथाकार ऐलें छै जौने आपनों कहानी-संग्रहों से अंगिका कथा-साहित्यों के भरै-पूरै के प्रयास करलकै। हालाँकि हेनों संग्रहों के महत्व यही लें रहें पारें कि ऊ-सब संग्रह मुद्रित कहानी के अभाव-काल में ऐलै। शेखर प्रकाशन, पटना से प्रकाशित सुरेश मंडल 'कुसुम' के कहानी-संग्रह - 'लपकी' (१९७६ ई०) आरो 'कथा-कुसुम' (१९७७ ई०) कहानी-संग्रहों के गिनती में जहाँ वृद्धि लानै छै वहाँ हौ काहनीसिनी में कथाकार 'कुसुम' के भावी लेखन के दिशा आरो प्रौढ़ता के बीजबिंदु अवश्य मिली जाय छै।

१९८६ ई० में अंगिका कहानी लैके विशिष्ट पहचान के कथाकार श्री महेन्द्र जायसवाल के कहानी-संग्रह 'शनिचरा' के प्रकाशन चम्पा प्रकाशन, दुमका से होलै, जै में 'ज्वाला भाय', 'चितकबरी', 'मसूदन', 'खेसरा', 'शनिचरा', 'लबकी' आरो 'बटेसरा' कहानी के संग्रह छै। 'शनिचरा' के कहानीसिनी पढ़ला के बाद यहें कहलें जैतै कि 'कथा-कुसुम' के बाद अंगिका में 'शनिचरा' के प्रकाशन जेना कोय समतल जमीन पर पर्वत खाड़ें होय गेलें रहें। आपनों गहराई आरो फैलाव में अद्भुत जायसवाल जी के ई-सब कहानी अंगिका साहित्यों में कभियो नै भुलैलें जावें पारें।

'शनिचरा' कहानी के बाद १९८७ ई० में श्री आमोद कुमार मिश्र के तीन-टा कहानी के संग्रह 'भोर ?' के प्रकाशन भेलै। आर्थिक विसंगति, साम्प्रदायिक सद्भाव आरो सांस्कृतिक अवमूल्यन के लैके लिखलें गेलें - 'कहिया होतै भोर?', 'मटरू' आरो 'भरगांग' ई तीनों कहानी विषय-वस्तु के साथे शिल्पो के स्तरों पर मनो के बाँधैवाला छेकै। डॉ० 'समीर' के शब्दों में, -- " भोर ?" (कहानी-संग्रह) पढ़ी के आह्लादित होय गेलें। अंगिका साहित्य केरों बाल्य-काल्है में ऐहिनों

प्रौढ़ रचना प्रस्तुत करी के हुनी (मिश्र जी) सिद्ध करी देलें छै कि अंगिका भाषा रों अभिव्यंजना-शक्ति केकरहौ सें लिच्छड़ नै छै। ..... आमोद जी के कहानीसिनी अंगिका रों प्रतिनिधि-कहानी गिनलों जैतै।" - 'अंगप्रिया', जन०-मार्च, १९९७ ई०। फिरू १९८८ ई० में डॉ० रामनन्दन विकल के कथा-संग्रह 'माँटी केरों गंध' प्रकाशित होलों छै, जेकरा में 'विकल' जी के चौदह-टा कहानी संकलित छै। ऊ-सब कहानी के शर्त के केन्हों के पूरा करैवाला कहानी छेकै, सस्ता मनोरंजन आरु अविश्वसनीय संवाद।

नया समयों के अंगिका कहानीकार आरु अंगिका कहानी के आधुनिक मिजाज के समझ में तीनों संपादित कथा-संग्रहों के प्रकाशन के बाद कहानीकार नरेश पाण्डेय 'चकोर' के कहानी-संग्रह 'तिलका सुन्दरी डार-डार' के प्रकाशन १९९१ ई० में शेखर प्रकाशन, पटना ने करलै छै, जेकरा में 'सतुआ' कहानी छोड़ी के मई, ९० सें अक्टूबर, ९० आरु मार्च, ९१ सें सितम्बर, ९१ के 'अंग माधुरी' पत्रिका में प्रकाशित 'चकोर' जी के पन्द्रह कहानी संग्रहित छै, जै में कहानी के क्रम छै -- कचहरिया बाबा, घल्लर, मेहनत के फूल मिट्टों, लाचारी, श्रवण कुमार, मीता, परिवर्तन, तिलका सुन्दरी डार-डार, बुढ़ारी में गंजन, प्रीत के रीत, नरकों में ठेला-ठेली, बाबाजी, समाज के बन्धन, बिन्दु आरु भतुआ। संग्रह के सबटा कहानी कथाकारों के वैष्णवी व्यक्तित्व आरु हुनकों सामाजिक सोच के व्यक्त करैवाला छेकै। कहानीसिनी में 'चकोर' जी ने सामाजिक बदलाव के यथार्थ चित्रण के साथे साहित्यों के उद्देश्यों के सामना में राखलों होलों छै।

सामाजिक बदलाव के विभिन्न यथार्थ आरु नया अंगिका कहानी के आधुनिक शिल्प के जेसिनी कथा-संग्रहें मजबूती के साथ प्रस्तुत करै छै वै में सुधाकर जी द्वारा संपादित - 'अंगिका कथा' (१९९२), देवेन्द्र जी द्वारा संपादित 'अंगप्रिया' के कथा-विशेषांक (मार्च १९९४) आरु डॉ० अमरेन्द्र के सम्पादन में प्रकाशित 'अंगिका कहानी' (१९९७) प्रमुख छै।

'अंगिका कथा' में निम्नांकित कहानी प्रकाशित होलों छै -- बहर पूजा, भोथरी'का के पहलवानी (जगदीश पाठक 'मधुकर'), तिनडरिया (सुरेश मंडल 'कुसुम'), दू पाटों के बीच (रवीन्द्र कुमार मिश्र), झोपड़ी में उगलों अमरलता, बँटवारा (प्रकाश सूर्यवंशी), अपराधी (सुरेश मोहन मिश्र), समझ, गिरगिट (विपिन परमार), सरकार (वेदप्रकाश बाजपेयी), सातो नदिया उमड़ली जाय, नालिश (सुधाकर) आरु केकरों के ? (दिनेश बाबा)। संग्रहों में दुइ-टा लोक-कथाओ छै।

हेना के तें प्रकाश सूर्यवंशी, सुरेश मोहन मिश्र, विपिन परमार आरो वेद प्रकाश बाजपेयी के कहानीयों वै संग्रहों में धेयान खींचै छै, मतरकि कथा-शिल्प के दृष्टि से जे सच्चे में आपनों उदात्त रूप खाड़ों करै छै वै में 'सातो नदिया उमड़ली जाय', 'नालिश', 'दू पाटों के बीच', 'तिनडरिया', 'बहर पूजा' आरो 'भोथरी'का के पहलवानी' कहानी के ही राखलौ जैतै। जों बाजपेयी जी आरो सुरेश मिश्र जी के कहानी के हटाय देलें जाय तें बाकी कहानीकारों के कहानी में स्वाभाविकता आरो संतुलन के अभाव कहानी के कमजोर करै छै।

'अंगप्रिया' के कथा विशेषांक (१९९४) में जे कथाकार के कहानी प्रकाशित होलें छै, ऊ निस्संदेह सबटा उत्कृष्ट कोटि के कहानी छेकै, जेसिनी कि कथाकारों के साथें संपादकों के सजग विश्व-दृष्टि के पारदर्शी परिचय दै छै। विशेषांकों में प्रकाशित अणु-कथा (पारस जी के अणुकथा 'डेड लिस्ट' छोड़ी के) समीक्षा के विषय नै बनैलें जाय तें वै अंको के सबटा कहानी -- 'राजभोग' (महेन्द्र जायसवाल), 'विपत्ति' (सुमन सूरु), 'आसरा' (अनिरुद्ध प्रभास), 'गोला बरद' (श्रीकेशव), 'बानर' (भुवनेश्वर सिंह 'भुवन'), 'के नै जानै छै?' (पी० एन० जायसवाल), आरों 'पनरों अगस्त' (सुधाकर) कथातत्व के विशिष्ट गुणों से कसलों-गुंथलों छै। हेकरो एक प्रमुख कारण ई छेकै कि ई विशेषांक के सब कथाकार के दशकों से कथा विधा से जुड़लें रचनाकार छेकै।

१९९७ ई० में डॉ० अमरेन्द्र के सम्पादन में 'अंगिका कहानी' के प्रकाशन वै दृष्टि से एक विशेषतः उल्लेखनीय कृति छै कि वै संग्रहों में अंगिका के चर्चित कथाकारों के साथें हेनों रचनाकारों के कहानी छपलें छै जे कि कथा-लेखक के रूपों में अज्ञेय छेलै। साथें-साथ कयेक लेखक पहिलें बार लेखक के रूपों में आपनों पहचान यहीं से शुरू करे सकलें छै। वै संग्रहों में निम्नांकित कथाकार आरो कहानी छै -- श्री केशव के 'काकी', डॉ० महेन्द्र प्रसाद जायसवाल के 'जिनगी रों सत्त', श्रीमती आभा पूर्वे के 'टुकड़ा-टुकड़ा सुरुज', श्री अनिरुद्ध प्रसाद विमल के 'तपेसर', श्रीराम शर्मा 'अनल के 'दशरथ कबीर पंथी', श्री गंगा प्रसाद राव के 'स्वर्ग रों खंडहर', श्री नागेश्वर प्रसाद राम के 'धरती रों स्वर्ग', श्री सुरेन्द्र प्रसाद यादव के 'समय-चक्र', श्री सोहन प्रसाद चौबे के 'चाँदनी रात रों अन्हार', श्री नवीन निकुंज के 'संस्कार', डॉ० विजय कुमार के 'परलोक-यात्रा', प्रो० कमला प्रसाद बिखबर के 'मानस-पुत्र', डॉ० श्यामसुन्दर घोष के 'भूत', डॉ० देशभक्त के 'सम्मान', प्रो० विनय प्रसाद गुप्त के 'टीस', 'जागृति' के 'नानी

माय', 'अग्यानी' के 'सबसे बड़ों झूठ', डॉ० आशुतोष प्रसाद के 'मनों के बोझ', श्रीमती आशापूर्णा के 'नहिरा के आश' आरो अशोक ठाकुर जी के 'दुःख'।

ई संग्रहों के सबटा कहानी पारिवारिक, सामाजिक, राजनीतिक यथार्थ के बहुत संतुलन में उतारते कहानी छेकै। सब रचना में रचनाकारों के विश्व-दृष्टि यै संग्रह के ऐतिहासिक बनैलें होलें छै।

मतरकि हैसिनी काहनी-संग्रहों से अलग अंगिका कहानी के ऊ वृहत साहित्यों के उल्लेख करबों शेषे रही जाय छै जेकरा पर बिना विचारलें अंगिका कहानी के सम्पूर्ण संस्कार के समझबों मुश्किलें बनलें रहतै। अंगिका कहानी साहित्यों के कोष के विस्तृत करै में लागलें ईसिनी कथाकार छेकै सर्वश्री राजीव परिमलेन्दु, जनार्दन राय, देवेन्द्र, भिखारी ठाकुर 'अधूरा', अक्षय कुमार साहा, दीपंकर कुमार घोष, मुस्तार आलम 'दीपक', गोपाल कृष्ण 'प्रज्ञ', मीरा झा, मीना तिवारी, रीता सिन्हा, विजेता मुद्गलपुरी, आर० के० नीरद, विमल वर्मा, डॉ० श्यामलाल आनन्द, राम किशोर, महेश सिंह 'आनन्द', अरुन्धती पाण्डेय, डॉ० नीलम महतो, अनिल चन्द्र ठाकुर, राधाकृष्ण चौधरी, प्रदीप प्रभात, डॉ० मनाजिर आशिक हरगानवी, विकास पाण्डेय, डॉ० देशभक्त, रतन प्रकाश आरनी।

ई-सब कहानीकारों के अधिकांश कहानी 'अंग-माधुरी' (पटना), 'अंगप्रिया' (भागलपुर), 'चम्पा' (दुमका), 'अंगिकाँचल' (नौगछिया), 'आंगी' (भागलपुर), 'शिरीष कथा' (भागलपुर), 'नई बात' (भागलपुर), 'प्रिय प्रभात' (भागलपुर) आदि में प्रकाशित होलें छै आरो दुर्भाग्य से हैसिनी पत्रिका के सब्भे अंक अलभ्य होला के कारणे कर्ते नी महत्वपूर्ण कहानी-लेखकों के संबंध में नामोल्लेखो करबों मुश्किल छै।

आधुनिक समय में जे अंगिका कहानी लिखलें गेलें छै वैसिनी के विषय आरो उद्देश्य के दृष्टि से, वातावरण-प्रधान, चरित्र-प्रधान, मनोविश्लेषक, सामाजिक, ऐतिहासिक आरो घटना-प्रधान काहनी में कथानक-प्रधान कहानी के कोटि में राखलें जैते। कुछेक के मिजाज रोमांस के कहानी के रूपो में छै। मतुर, निश्चित रूपों से, सामाजिक वातावरण, चरित्र-चित्रण या मनोविश्लेषण के कहानी के तुलना में अंगिका में घटना-प्रधान कहानी के अभाव छै। घटना-प्रधान कहानी के संबंध मुख्यतः ऐतिहासिक कहानी के साथे होय छै। कल्पना के आधारों पर जबे लेखक आपनों कहानी के कथानक-प्रधान बनाय छै तबे ओकरों कोशिश कथा में औत्सुक्य के भंडार पैदा करबों होय छै। अंगिका के लोक-कहानी में यहें



घटना-तत्व के प्रधानता है ; मतरकि आबे हेनों कहानी के मूल्य चुकी चुकली है आरो हेनों कहानी साहित्य में आबे प्रतिष्ठा नै पाबै है । आधुनिक अंगिका-लेखक ने कहानी में ई प्रवृत्ति के प्रायः छोड़ी देलै है । आधुनिक समय में धर्म आकि लोककथा के आधार बनाय के अंगिका के लिखलें गेलें कहानी घटना-प्रधान कहानी के अन्तर्गत ही राखलें जैतै, जेकरों अच्छा उदाहरण श्री गोपालकृष्ण 'प्रज्ञ' के 'सती बिहुला', डॉ० श्यामलाल 'आनन्द' के 'वकील बाबू' आरो श्री राधाकृष्ण चौधरी के 'जरलें नसीब' कहानी छेकै ।

वातावरण-प्रधान आरो चरित्र-प्रधान कहानी आधुनिक अंगिका कथा-साहित्यों के मुख्य भेद छेकै । हालाँकि यहाँ एक बात कही देबों आवश्यक होतै कि अंगिका कहानीकारों में कहानी के कोय तत्व-विशेष के विशिष्ट रूपों से पकड़ी के कहानी लिखै के प्रवृत्ति नै मिलै है । ये लेली यहाँ कहानी में एक संतुलन मिलै है जे कि श्रेष्ठ कहानी के कसौटी भी मानलें गेलें है । ई अलग बात छेकै कि अंगिका में कोय कहानीकारों के विशिष्ट कथा-शैली के आकि कथा-भेद के कहानीकार रूपों में नै देखलें जाबें सकै है, तैयो कै-एक कथाकार हेनों है जिनको कहानी में कहानी के कोनो तत्व के प्रति विशिष्ट झुकाव आसानी से देखलें जाबें सकै है ।

वातावरणों के दृष्टि से अंगिका कहानी पर विचारलें जाय तें सर्वश्री महेन्द्र प्रसाद जायसवाल, श्रीकेशव, अनिरुद्ध प्रसाद विमल, आभा पूर्वे (श्रीमती), अनिरुद्ध प्रभास आरनी के कहानी मुख्यतः वातावरण के प्रधानता लेलें कहानी छेकै । दरअसल, श्रेष्ठ कहानी के निर्माण में वातावरण के भूमिका बड़ी प्रमुख होय है । प्रकृति आरो रूप-चित्रण से ही जहाँ कहानीकारें आपनों कथ्य के प्रभावी बनावै के कोशिश करै है, ऊ वातावरण-प्रधान कहानी होय है । यै दृष्टि से 'राजभोग' (महेन्द्र प्रसाद जायसवाल), 'सातो नदिया उमड़ली जाय' (सुधाकर), 'टुकड़ा-टुकड़ा सुरुज' (आभा पूर्वे), 'काकी' (श्री केशव), 'तिनडरिया' (सुरेश मंडल 'कुसुम'), 'तपेसर' (अनिरुद्ध प्रसाद विमल), 'गणतंत्र दिवस' (नीलम महतो), 'जिनगी रों सत्त' (महेन्द्र प्रसाद जायसवाल), 'गोला बरद' (श्रीकेशव), 'देवदूत' (अक्षयश्री), 'आसरा' (अनिरुद्ध प्रभास) आरनी कहानी श्रेष्ठ उदाहरण छेकै ।

जेहनों कि पहिले कहलें गेलें है, अंगिका कहानीकारों में कोय विशिष्ट शैली के पकड़ी के आपनों कोय अलग पहचान बनावै के परिश्रमपूर्ण कोशिश नै भेलें है ; मतरकि यहू बात से इनकार नै है कि महेन्द्र प्रसाद जायसवाल जी के कहानी में चरित्र-तत्व के ही प्रधानता है । हिनको

‘ज्वाला भाय’, ‘चितकबरी’, ‘लबकी’ आरनी चरित्र-प्रधान कहानी छेकै। डॉ० नीलम महतो के कहानी ‘आयको बाल्मीकि’, ‘तैहिया’, ‘गणतंत्र-दिवस’ आरो ‘हार रों जीत’ अंगिका में चरित्र-प्रधान कहानी के अच्छा उदाहरण राखै छै। श्री नरेश पाण्डेय ‘चकोर’ के ‘मीता’, प्रो० कमला प्रसाद बेखबर के ‘मानसपुत्र’, श्रीराम शर्मा ‘अनल’ के ‘दशरथ कबीर पंथी’, श्री जयप्रकाश ठाकुर ‘तृषित’ के ‘चान बाबा’, ‘जागृति’ जी के ‘नानी माय’, श्रीमती आभा पूर्वे के ‘नत्थूराम’ आदि चरित्र-प्रधान कहानी छेकै।

अंगिका में आय-काल ऐतिहासिक कहानियों लिखै के प्रचलन दिखै छै। हालाँकि हेनो कहानी के घटना-प्रधान कहानी से अलग नै राखलें जावें सकें छै, मतरकि उद्देश्य के भिन्नता से दोनों में जरूरे अन्तर देखलें जाबें सकै छै। खाली घटना-प्रधान कहानी में औत्सुक्य पर लेखकों के ध्यान ज्यादा केन्द्रित होय छै, जबे कि ऐतिहासिक कहानी में कहानीकार इतिहासों के कोय घटना आकि वीर-चरित्रों के लैके समाजों के सम्मुख कोय आदर्श राखै के कोशिश करै छै। येहें फरक दोनों तरहों के कहानी के भेदक तत्व हुवें पारें। ‘कोखी के लाल’ (जगदीश पाठक ‘मधुकर’), ‘प्रायश्चित पूरा नै होतै’ (राजीव परिमलेन्दु), ‘पन्ना के उदारता’ (धीरेन्द्र छतहारवाला) आरनी कहानी अंगिका में ऐतिहासिक कहानी-लेखन-प्रवृत्ति दिस इशारा करै छै।

हेना के तें, चरित्र-चित्रण के ख्यालों से अंगिका साहित्य ने मनोवैज्ञानिक आरो मनोविश्लेषण-प्रधान कहानियों लिखै दिस कहानीकारों के सम्मान दिलैलें छै। ‘गूज’ (मधुकर गंगाधर) कहानी में जो मनोविज्ञान के सहारा लेलें गेलें छै तें ‘आधों रात के सुबह’ (अमरेन्द्र) में मनोविश्लेषण के आधार बनैलें गेलें छै, मतरकि ये ढंगों के कहानी के संख्या अधिक नै छै। हेकरो एक बड़ों कारण येहें हुवें सकै छै - नया अंगिका लेखकों के सामाजिक चेतना के प्रति प्रतिबद्धता। येहें सामाजिक प्रतिबद्धता के कारण अंगिका में सामाजिक कहानी के सर्वश्रेष्ठ उदाहरण गिनैलें जावें सकै छै। सामाजिक कहानी के क्षेत्र बहुत विस्तृत छै ; केन्है कि ‘समाज’ शब्दे आपना-आप में काफी विस्तृत होय छै।

अंगिका के सामाजिक कहानी के भीतर आर्थिक, राजनीतिक, पारिवारिक यथार्थ के कहानी प्रमुख छै। राजनीतिक चेतना के कहानी में मुख्य रूपें वर्ग-चेतना आरो वर्ग-संघर्ष के आधार बनैलें गेलें छै। सुधाकर जी के कहानी ‘नालिश’ आरो श्रीकेशव के कहानी ‘गोला बरद’, देवेन्द्र जी के ‘प्रतिकार’, श्री प्रकाश सूर्यवंशी के ‘ओपडी में उगलें अमरलता’, पवन कुमार जी के ‘हाय,

लोगों की कहतै।' आदि हेकरों श्रेष्ठ उदाहरण छेकै। यै दृष्टि से सर्वश्री अनिरुद्ध प्रसाद विमल, अनिरुद्ध प्रभास, रामकिशोर, सुरेन्द्र प्रसाद यादव आरनी के कहानियों विवेचनीय छै; मतरकि हेनों कहानी कम नै छै जे कि राजनेता के चरित्रों के उजागर करते कहानी छेकै। मधुकर गंगाधर जी के कहानी 'बरद-विद्रोह', वेद प्रकाश वाजपेयी जी के 'सरकार' आरो 'अग्यानी' जी के 'सबसे बड़ों झूठ' हेने कहानी छेकै। विगत कुछ वर्षों में अखिल भारतीय अंगिका साहित्य-कला-मंच के साहित्य-शाखा 'अंगवाणी' के कै-एक कथा-गोष्ठी में पढ़लें गेलें कै-एक राजनीतिक कहानी बड़ी सशक्त आरो ऐतिहासिक महत्वों के छेकै।

सामाजिक कहानी में आर्थिक दबाव से लिखलें गेलें कहानी के संख्या ई भाषा-साहित्यों में सर्वाधिक छै, जेसिनी में पारिवारिक आर्थिक बोझ से लै के ऑफिसर, जमीन्दार, महाजनों के आर्थिक लूट-खसोट, षड्यंत्र, सब-कुछ शामिल छै। हेनों कहानी में 'राजभोग' (महेन्द्र प्रसाद जायसवाल), 'पनरों अगस्त' (सुधाकर), 'टुकड़ा-टुकड़ा सुरुज' (आभा पूर्वे), 'आस्था' (डॉ० नीलम महतो), 'तिनडरिया' (सुरेश मंडल 'कुसुम'), 'दू पाटों के बीच' (रवीन्द्र कुमार मिश्र), 'कहिया होतै भोर?' (आमोद कुमार मिश्र), 'दमयन्ती' (अनिरुद्ध प्रसाद विमल), 'भाय' (अश्विनी कुमार), 'दुखनी काकी' (गंगा प्रसाद राव), 'अधकपाड़ी' (धीरेन्द्र छतहारवाला) आरनी निस्सदेह महत्वपूर्ण कहानी छेकै। आर्थिक पहलू के लैके अंगिका कथाकारसिनी नें आर्थिक शोषण में लागलें जमींदार, पटवारी, सेठ, साहूकार, ऑफिसर, राजनेता के चरित्र के लैके बढ़ियाँ-बढ़ियाँ कहानी के निर्माण करने छै। 'बानर' (भुवनेश्वर सिंह 'भुवन'), 'खटुआ भाय' (सुमन सूरु), 'समाज के बंधन' (नरेश पाण्डेय 'चकोर'), 'नापी' (राम किशोर), 'तिनडरिया' ('कुसुम'), 'सोरजबा' (विमल वर्मा), 'बड़ों आदमी' (राधाकृष्ण चौधरी) आरो रामकिशोर के कहानी 'बिटखौका' हेने कहानी छेकै।

पारिवारिक-आर्थिक कलह-संघर्ष के लैके श्री सोहन प्रसाद चौबे, श्रीमती आशापूर्णा, श्री सुरेन्द्र प्रसाद यादव आरनी के लिखलें कहानी प्रभाव छोड़ैवाला छेकै। राधाकृष्ण चौधरी के 'एक हीरा, दू अंडा-गंडा', पवन कुमार के 'हाय, लोगों की कहतै!', नरेश पाण्डेय 'चकोर' के कहानीसिनी पारिवारिक जीवन के विविध यथार्थ, खासकरी के आर्थिक दबाव बढ़ी गेला के कारण तनाव-संघर्ष के कहानी ऐतिहासिक शैली में लिखलें प्रभाव राखैवाला कहानी छेकै।

सामाजिक कहानी में अन्धविश्वास के लै के 'भूत' (डॉ० श्याम सुन्दर घोष), अन्धप्रथा के लै के 'समाज के बंधन' (नरेश पाण्डेय 'चकोर'), सामाजिक

साम्प्रदायिक सद्भाव के लै के 'प्रीत के रीत' ('चकोर'), 'राखी रों मान' (डॉ० निर्मल कुमार सिंह), 'मटरू' (आमोद कुमार मिश्र) तथा नारी-सम्मान आरो जागृति के लैके 'धरती रों स्वर्ग' (नागेश्वर प्रसाद राम), 'बेटी' (रतन प्रकाश) -हेनों कहानी कम नै लिखलें गेलें छै। जों सोहन प्रसाद चौबे के कहानी 'चाँदनी रात रों अन्हार' आरो श्रीमती आशापूर्णा के कहानी 'नहिरा के आस' में नारी-उत्पीड़न के देखैलें गेलें छै तें सुमन सूरु के 'खटुआ भाय', रतन प्रकाश के 'बेटी', डॉ० मनाजिर के 'दर्द रों काँटा', डॉ० नीलम महतो के 'बतैहिया', अक्षयश्री के 'कीमत', आरो जागृति के लेलें सामाजिक छेकै। अनिरुद्ध प्रसाद विमल, आभा पूर्वे, सुरेन्द्र प्रसाद यादव, नवीन निकुंज आरनी कथाकार नारी-जागृति के लैके श्रेष्ठ कहानी के सृजन दिस सक्रिय छै। नारी-संवेदना लैके कहानी लिखै दिस श्रीमती रीता सिन्हा के कथा-लेखन बहुत लोकप्रिय छै। 'करिया मेघ' हिनको नारी-अन्तर्मन के उल्लास आरो अन्तर्संघर्ष के खोलैवाला एक बहुचर्चित कहानी रहलें छै।

आय-काल वातावरण-प्रधान कहानी के एक अंग के रूपों में पर्यावरण के लैके अंगिका में कहानी-लेखन के प्रवृत्ति देखलें जाय रहलें छै। 'परिवर्तन' (नरेश पाण्डेय 'चकोर'), 'जहर' (राम किशोर) - आरनी हेने कहानी छेकै। पै सिनी से पता लागै छै कि अंगिका कहानीकार आपनों समय आरो वातावरण के प्रति सजग आरो विश्व-दृष्टि राखैवाला रचनाकारों के रूपों में उपस्थित छै।

प्रेम-कहानी के सृजन अंगिका कहानी के मुख्य धारा नाखी नै दिखै छै, मजकि आभा पूर्वे के 'ऋणी' (१९९७) आरो जय प्रकाश गुप्त के 'लाज रही गेलै गुलमोहर के' (१९९७) आरनी हेनों प्रभावी प्रेम-कहानियों लिखलें गेलें छै।

जहाँ तक आधुनिक अंगिका कहानी के शिल्प-शैली के सवाल छै, ई भाषा के कहानीकारसिनी ने आधुनिकतम प्रचलित शैली के प्रति आपनों रुचि आरो ओकरो प्रयोग में आपनों दक्षता के अद्भुत प्रतिमान प्रस्तुत करने छै।

शैली के दोनों पक्ष, ढाँचा आरो भाषा के क्षेत्रों में अंगिका कहानीकार ने आपनों अद्भुत सामर्थ्य के पता देने छै। रूपगत शैली के लैके जहाँ ऐतिहासिक यानी वर्णनात्मक शैली श्री प्रकाश कुशिक (भला के गुजर नै), मु० मुख्तार आलम 'दीपक' (हंसा जाई अकेला), ठाकुर जयप्रकाश तृषित (सर्वनाशों के कारण), धीरेन्द्र छतहारवाला (पन्ना के उदारता) आरनी कथाकार ने आपनों-आपनों कहानी लिखने छै वहाँ संस्मरण-शैली के ढेर कहानी अंगिका में सृजित होलें छै। 'काकी' (श्रीकेशव), 'तपेसर' (अनिरुद्ध प्रसाद विमल), 'टुकड़ा-टुकड़ा सुरुज'

(आभा पूर्वे). 'दू पाटों के बीच' (रवीन्द्र कुमार मिश्र), 'नानी माय' (जागृति), 'मनों के बोझ' (डॉ० आशुतोष प्रसाद), 'दुःख' (अशोक ठाकुर) आरनी संस्मरण-शैली के श्रेष्ठ कहानी छेकै। अक्षयश्री के कहानी 'देवदूत' (१९८१) मिश्रित शैली के एक उल्लेखनीय कहानी छेकै।

संस्मरण-शैली के एक भेद आत्मकथा शैलीयो में श्रीमती मीरा झा, श्रीमती जीवनलता साह, डॉ० नीलम महतो, श्री गंगा प्रसाद राव, श्री सोहन प्रसाद चौबे आरनी के कलात्मक कहानी मिलै छै। श्री मधुकर गंगाधर के 'बरद-विद्रोह' जो प्रतीक-शैली के एक श्रेष्ठ कहानी छेकै तें श्रीमती आभा पूर्वे के कहानी 'ऋणी' (१९९७) अंगिका में लिखलें पत्र-शैली के कहानी के सुन्दर उदाहरण छेकै। वहीं आभा पूर्वे के 'केन्हों द्रौपदी : केन्हों महाभारत' कहानी (१९९७) में डायरी शैली के सुन्दर निर्वाह होलें छै।

भाषा-शैली के लैके अंगिका कहानीकार ने आपनों विराट् प्रतिभा के प्रदर्शन करलें छै। जहाँ एक ओर भाषा के ध्वन्यात्मकता -- 'दिन्नर टिकचर ... दिन्नर टिकचर ... दिन्नर टिकचर। xxx कड़ - मकड़ ... कड़ - मकड़ ... पी - पी पँच बजना। कड़ - मकड़ ... कड़ मकड़ ... पी - पी ... टन - टन।' (जिनगी रों सत : महेन्द्र प्रसाद जायसवाल) आरो चित्रात्मकता -- 'काकी नै ज्यादा लंबी रहै, नै नाँटी। xx एकदम गोल-मटोल। कोमल कमल रड काया। चिक्कन-चाक्कन। गुलगुल-थुलथुल। मांसों से भरलें। लड्डू मोतीचूर सन। तिकखों नाक-नक्श। सुगढ़। हँसमुख। xx आपन्है कामों में व्यस्त। लद्धर-पद्धर। इन्ने-उन्ने। आपनों बित्ता-भर के माँगों में गद्दी-भर सिनूर ... (काकी' : श्रीकेशव) से आपनों कथा-भाषा के वयस्क बनैलें छै। काँही व्यंजकता, काव्य ममता -- 'बैशाखों के टपटपिया रौदा xxx चान बाबू चौकी के गरदा गमछा से झाड़ी के बोलै छै -- याय ऐतना गरमी छौं, भुजंगी बाबू, कि गाछियो-बिरिछियो से घाम चुवै छै -- (बिटी' : रतन प्रकाश) आरनी गुणों से भाषा के उदात्त रूप प्राप्त होलें छै।

कथा-भाषा गढ़ के साथे-साथ कहानीकारसिनी ने अंग-जनपदों के जौन सामाजिक भाषा के मुहावरा -आर के नया अर्थ आरो परिष्कृत रूपों में प्रस्तुत करने छै, वहू अंगिका कहानी के एक बड़ो उपलब्धि छेकै।

## व्यंग्य-कथा

आधुनिक अंगिका कहानी-साहित्यों में व्यंग्य-कथा एक स्वतंत्र विधा के रूपों में विकास पाबी गेलों छै। अंगिका लें ई रंगों के कथा-साहित्य कोय नया चीज नै छेकै, बल्कि अंगिका के लोककथा-साहित्यों के आधों से अधिक हिस्सा हास्य-व्यंग्य के कथा-साहित्य छेकै। यै से है जनपदों के विनोदी स्वभाव हेकरो जड़है में मिलै छै, जेकरे विकास आयको अंगिका व्यंग्य-कथा-साहित्य छेकै।

ई मात्र संयोग नै हुएे मारे कि पं० बुद्धिनाथ आ 'कैरव' के कहानी-संग्रह 'मोतिया विनोद' भी हास्य-व्यंग्य में पहिलों दाफी ऐलै। आय तें व्यंग्य-कथा-लेखकों के एक मजबूत कड़ी यहाँ छै। पं० बुद्धिनाथ आ 'कैरव' के बाद हस्तलिखित पत्रिका 'भारती' से श्री उमेश जी के जे 'चौबेजी के गप' प्रकाशित भेलै ओकरो धारावाहिक प्रकाशन 'अंग-माधुरी' के प्रकाशन के साथ फेनू करलौ गेलै। व्यंग्य-कहानी में श्री उमेश जी के नाम 'गुलाबी जी' ऐलौ छै। 'अंग-माधुरी' में प्रकाशित हिनको व्यंग्य-कथा काहीं तें तिरिग-चलितर, माखी-मखर, चीलर-उडीस, सन् '७४ के गणतंत्र-दिवस, बेरादरों के पगड़ी, पोता के ललक, झुनकू भाय, सिक्की साव, बड़की-छोटकी आरनी शीर्षकों से छपलौ छै आरो काहीं शीर्षक नै होय के खाली स्तम्भ-शीर्षकों के साथे कथा शुरू करलौ गेलौ छै।

यै में कोय शके नै कि श्री उमेश जी (गुलाबी जी) के व्यंग्य-कथा व्यंग्य के सब दृष्टि से उच्च कोटि के ठहरै छै। यै में जतें हास्य के तत्व छै ओते सामाजिक कुरीति पर प्रहार करै के परिहासपूर्ण क्षमताओ छै। हिनको हास्य-व्यंग्य के एक अंश उद्धृत छै,-- "राती लागै छेलै कि मखरें उडाय के भागी जैतौ। कथी लें एक्को घंटा सुतबौ। खटिया में खजबज उडीस आरो उपरों से भन-भन खच्च ! की करतियाँ ? हेठे में गमछी बिछाय के धोती के नाय ओढी के सुतै के कोशिश करलाँ। भोरों पहराँ तनिटा आँख लागलौ तें बसंती पाँडे के प्रातकाली शुरू भै गेलै। भेंड़बाजा ठोंठों रड लै के आलाप दिये लागलै -- 'जागौ हो, मुरलीधर माधो ! जागौ हो, तमाकुल !'"

हास्य-व्यंग्य-कथा-लेखक के रूपों में श्री जगदीश पाठक 'मधुकर', श्री उमेश जी के दोसरो हेनौ हस्ताक्षर छै जिनको पहचाने व्यंग्य-लेखक के रूपों में छै। १९७८ ई० के 'अंग-माधुरी' (नवम्बर) में प्रकाशित 'जेहनो करनी, वैन्हो फल' संभवतः हिनको पहिलो प्रकाशित मौलिक रचना छेकै। १९८७ ई० में हिनको व्यंग्य-कथा लैके 'पंचफोरन' कथा-संग्रह के प्रकाशन होलै जेकरा में

हिनको -- 'बहरपूजा', 'भोधरी 'का के पहलवानी', भोधरी 'का के इन्साफ', 'सौन्धी' आरो 'बैदे' व्यंग्य-कथा संग्रहित है। ये में से 'बैदे' के छोड़ी के बांकी के प्रकाशन पैहले होय चुकलें है। हेकरो बादो 'मधुकर' जी के कै-एक व्यंग्य-कहानी प्रकाशित होलें है, जे में -- 'नदी आरो नद', 'सतफोट-सहस्राफोट के दंगल' बहुत लोकप्रिय होलें है।

जगदीश पाठक 'मधुकर' जी के व्यंग्य-कथा के ई निजी पहचान छेकै कि हिनको कथा-पात्र आपनों व्यक्तित्व चरित्रों में एतें जीवन्तता लेलें होलें है कि शब्दचित्रो के यही सुख प्राप्त होय जाय है। पात्र आपनों कार्य आरो रूप-गठन से कथा में बड़ी सहजता से हास्य-व्यंग्य के सृजन करै में समर्थ दिखै है। 'मधुकर' जी के व्यंग्य-कथा में लोककथा के छौंको है, व्यंग्य के आँस कम। हिनको व्यंग्य-कथा के एक अंश नीचे देलें जाय है, --

'सुनयै भोधरी 'का के पारा गरम। हुनी मुड़ी घुमाय के जबाब दै छथिन -- जे से मानों कि तोरा कौवाँ नोचौं -- आरो पोटरी बान्ही के सत्तू, चूड़ा, भात आरो रोटी दहू छुतहरी के। अँह ! गरीब है ! लगुवा छेकै। बेसहारा है। हाय रे, दया के देवी ! जराबों भी आबें की जराय छें ! सब यै दुनियाँ में दगाबाज, नमकहराम है। बच्चा में दादी हमरा ठिक्के कहै छेलै -- जे से मानों कि तोरा कौवाँ नोचौं -- कि

बहू-बहू मत कर, बहू होतौ बकरी।

माँगतौ नोन तेल, माँगतौ लकड़ी।'

ओह, कचारों से तें तंग आबी गेलाँ।'

धारावाहिक रूपों में 'करुआ माय'- शीर्षक से रामावतार 'राही' के तेरों-टा व्यंग्य-कथा भागलपुरों के 'प्रिय-प्रभात' (साप्ताहिक) में प्रकाशित होलें है -- १९८३ ई०, १९८९ ई० के २८ मई, ११ जून, २५ जून, २ जुलाई, ९ जुलाई, ३० जुलाई, २० अगस्त, १० सितम्बर, १७ सितम्बर, २४ सितम्बर, १ नवम्बर के अंकों में।

रामावतार 'राही' के व्यंग्य-कथा में मध्यवर्गीय आरो निम्नवर्गीय परिवारों के आशा, उल्लास, घुटन, संघर्ष आरनी के बड़ी परिहास के साथें राखलें गेलें है, जे सहृदयों के रिझैला के साथें-साथें रुलाबै है। करुआ माय के एक अंश नीचे है, --

'हाथ चमकाय के करुआ माँय कहें तें लागलै सौंसे रामायण - 'हाय रे,

मरद ! बड़का मरद बनै के गुमान करै छौं । जबे से बीहा करी के हमरा लानलें छौं, तबे से हमरा कौन सुख देलें छौं, सिवाय बच्चा-बुतरू के ? हेकरो अलावा कोय सौखो - अरमान हमरो पूरा करलें छौं ? सौखों से एक्को पता टिकलियो लानलें छौं ? देखों तें ठामें मटरा माय की सुन्नर-सुन्नर साड़ी-कुरता, रोल्ड-गोल्ड के झूमका, नथिया आरो सिलवरो के पायल पिन्ही के सौसे गाँव झमाझम करै छै ! आरो, हममें तोरो एक पीतरों रो औंगठियो तक नै जानै छियौ ।'

है ओलहना सुनी के करुआ बाप के दिमागों के फ्यूज उडिये तें गेलै ।'

'अंग-माधुरी' पत्रिका में दीनदीप उर्फ गुरुजी के व्यंग्य-कथामाला के प्रकाशन होलें छै । ई व्यंग्य-माला के मुख्य शीर्षक छेकै -- 'गुरुजी के गुटरूगू' । मुख्य शीर्षकों के नीचहौ उपशीर्षक मिलै छै ; जेना -- 'भीमों के पार्ट', 'हाथी के सवारी' (अ: सि: ८५), 'इन्द्र के पार्ट', 'कलकत्ता के चक्कर', 'नागा के टक्कर', 'अस्ससानी काली', 'गुरुजी के भूत' ; मतरकि अधिकाश, जेनाकि जनवरी से अगस्त-सितम्बर '८५ के पूर्व प्रकाशित व्यंग्य-माला, के कोय उपशीर्षक नै देलें गेलें छै ।

प्राप्त सामग्री के आधारों पर ई ज्ञात होय छै कि हिनको व्यंग्य-कथा के प्रकाशन ८४ ई० के अन्तिम चरणों से होलै । दिसम्बर, १९८४ ई० में प्रकाशित 'भीमों के पार्ट' से पैहलको हिनको कोय कथा हमरा देखैलें नै मिललें छै । आश्चर्य तें ई छै कि हास्य-व्यंग्य के ई कथा-लेखक के संबंधों में कोय कुछ संकेत करै के कोशिशो अंगिका-साहित्य के विद्वान्द्वय इतिहासकारें आपनों साहित्येतिहासों में नै करने छै ।

'दीनदीप' उर्फ 'गुरुजी' के व्यंग्य-कथा के प्रकाशन 'अंग-माधुरी' में रुकी-रुकी के होलें छै । हर कथा एक-दोसरा से स्वतंत्र छै, यै से एकरों अंत के घोषणा नै मानलें जाबे सकै छै । सब कथा अगर जुड़लें छै तें शुरू के दू पात्र से, जे आपस में मिलै छै आरो कथा शुरू होय छै । कथा के ई शैली श्री उमेश जी के 'चौबेजी के गप' में भी मिलै छै ।

गुरुजी के हास्य-व्यंग्यों में व्यंग्य के फुहारा तें छै के, परिहासों के कभियो-कभियो अन्धड़-बतासो बहतें मिलै छै । हिनको व्यंग्यों के एक अश द्रष्टव्य छै, --

"दू ठो बोटल भरी देलकी x x x                      x x x                      x x x

'हममें कहलियै कि एकटा लोटा लै लौ, दिशा-मैदान करै ले    लेकिन



ऊ बोलली कि तोहें भलों कतें छे । लोटा-तोटा हेराय देभें । केन्हों के काम चलाय लिहो । खैर, हम्में बोलबम करी देलाँ । x x x हम्में तीन दिनों पर देवघर प्रातः दस बजे पहुँचलाँ । x x x शिवगंगा में नहैलाँ । दुन्नो बोटलों में गंगाजल छेलो । x x x हम्में कहुना भीड़ चीरी के बाबा के पास गेलाँ । x x x मार खैलाँ, पर हमरा दिशा-मैदान के हरकत होलाँ । x x x शिवगंगा गेलाँ । हम्में खाली दुन्नो बोटलों में जल भरलाँ आरू दौड़लों-दौड़लों थोड़ों दूर पर जाय के बैठी गेलाँ । दुन्नो बोटल आगू में दायाँ-बायाँ राखी के बैठी गेलाँ ।

‘चौबेजी ठठाय के हँसलात । हुनी बोललात -- तबें तें सभा में दू गुलदस्ता बीच जेहिनों सम्पत्ति सोहै छै, वहें रड शोभतें होबें ? गुरुजी दाँत निकोसी के बोललात -- ‘ओकरो से ज्यादा सुन्दर ।’

आय अंगिका में व्यंग्य-कथा कहैवाला लेखकों के संख्या के कमी नै छै । सदानन्द मिश्र, महेन्द्र जायसवाल, राधाकृष्ण चौधरी, डॉ० विजय कुमार आरनी व्यंग्य-कथा-लेखकों में प्रमुख स्थान राखैवाला गद्यकार छेकै । ई दोसरो बात छेकै कि अंगिका व्यंग्य-कथा के चतुर्भुज रूपों में श्री उमेश, जगदीश पाठक ‘मधुकर’, दीनदीप उर्फ गुरुजी आरो रामावतार ‘राही’ दिखै छै ।

मतरकि एक बात जे अंगिका के सब्भे व्यंग्य-लेखकों वास्तें कहलें जावें सकै छै ऊ ई कि हिनकों व्यंग्यों में सामाजिक कुरीति, विसंगति भीड़ में प्रदर्शित छै आरो ओकरा पर प्रहार आकि आलोचना लेली व्यंग्यकार ने आपनों बुद्धिवाला कल्पना के सहयोगों से व्यंग्य रचना के विभिन्न उपादानों के बड़ी कुशलता से उपभोग करने छै, जेकरे कारणे यहाँ प्रहार के साथ परिहासों के भरपूर ठिकाना छै । महेन्द्र जायसवाल के ‘चितकबरी’, डॉ० विजय कुमार के ‘परलोक-यात्रा’, ठाकुर जयप्रकाश ‘तृपित’ के ‘केतारी के खेती’ अंगिका में व्यंग्य-कथा के मजबूत जमीनों के सिद्ध करैवाला कहानी छेकै ।

## अणु-कथा

मुक्तक कविता में जे स्थान दोहा के छै, कहानी के क्षेत्रों में, आपनी शैली आरो शिल्प लै के, अणु-कथा ठीक वहे स्थान राखै छै । अणु-कथा लघु कथाये (सॉर्ट स्टोरी) के सरलतम, संक्षिप्त, लेकिन व्यंग्य-प्रधान रूप राखैवाला कथा-शैली छेकै, जेकरा कुछ कथाकारें/आलोचकें, गलती से, ‘लघु-कथा’ के कोटि में राखै छै । असल में, लघु-कथा ‘सॉर्ट स्टोरी’ -ये के हिंदी-अनुवाद

छेकै आरो वही से कहानी विद्या के स्वरूपों के समकक्ष है। लघु-कथा आरो अणु-कथा में एक विशिष्ट अन्तर ई छेकै कि श्रेष्ठ कहानी में जहाँ करुणा आपनों पराकाष्ठा पर अभिव्यक्त होय लें चाहै छै वहाँ अणु-कथा के अंत व्यंग्यों के पराकाष्ठा पर होय छै।

कुछ लोगें समझै छै कि अणु-कथा के मतलब दू-चार संवादात्मक पंक्ति में आपनों बात कही देबों होय छै, जे कि एकदम गलत समझ छेकै। अणु-कथा, असल में, लघु-कथा के ऊ रूप छेकै जेकरा कोनो विशिष्ट बाहरी दृश्य के केमरा के लेन्सों पर अंकित दृश्याकार कहबों ज्यादा मुनासिब होतै, जहाँ सब कथा-तत्व आपनों हिसाबों से लघु रूपों में उपस्थित रहै छै।

अणु-कथा के लोकप्रियता के पीछें आयकों भागम-भाग जिनगी के उपज कहलें जावें सकै छै। होना के हेकरो जौड़ आरो फॉर लोक-कथाये में सुरक्षित छै। आय अणु-कथा के एक समृद्ध परंपरा नै खाली हिंदीये में, बलुक हिंदुस्तानों के सब्भे लोक-भाषा में हासिल छै। अंगिकाओ में अणु-कथा-लेखन दिस है भाषा के कथाकारसिनी काफी विलक्षण प्रतिभा के सबूत दै रहलें छै। सर्वश्री सुमन सूरु, डॉ० मनाजिर आसिक हरगानवी, अनिरुद्ध प्रसाद विमल, आभा पूर्वे (श्रीमती), आर० के० नीरद, राजकुमार, पारस कुंज, 'अज्ञानी', अनिरुद्ध प्रभास, विजेता मुद्गलपुरी, योगेश कौशल आरनी कयेक कथाकार अणु-कथा-साहित्यों के विशिष्ट पहचान दै में बहुत सक्रिय छै। हेना के तें नरेश पाण्डेय 'चकोर', मीरा झा, प्रदीप प्रभात -हेनों कुछेक कथाकारहौ के अणु-कथा प्रकाशित होवै के अलावा गोष्ठी-आर में पढलें-सुनलें जैतें रहलें छै।

१९९० ई० से १९९७ ई० के बीच ढेर अणु-कथा अंगिका में प्रकाशित होलें छै; मतरकि दू बात सही छै कि शिल्प-शैली के दृष्टि से सब्भे के अणु-कथा साहित्यों के भीतर राखलें नै जावें सकै छै। हेनों कहानी के संख्या बहुते रहलै जे कि आर० के० नीरद के 'समझ' (१९९३), पारस कुंज के 'डेड लिस्ट' (१९९४), 'चकोर' जी के 'मजाक' (१९९४), डॉ० देशभक्त के 'सम्मान' (१९९७), 'अज्ञानी' जी के 'सबसे बड़ो झूठ' (१९९७), डॉ० हरगानवी के 'हारलो दाव' (१९९७) के बरोबरी के रहै।

१९९७ ई० में श्री विजेता मुद्गलपुरी के कोय दर्जन-भर अणु-कथा के प्रकाशन भेलें मिलै छै, जेसिनी में 'मौन के ऐंगना', 'लोगें की कहतै', 'जिम्मेवारी', 'देहेज बियाह', 'एगो आरो घोटाला' काफी चर्चा में रहलें छै। मुद्गलपुरी जी के अणु-कथा 'अग्रसर' (मुगेर), 'आंगी' (भागलपुर) -आर पत्र-पत्रिका में प्रकाशित

होते रहलौ है। १९९७ ईस्वीये में डॉ० अभयकान्त चौधरी के कुछेक अणु-कथा 'लघु कथा' के नामो से, प्रकाशित होलो है, जे कि अणु-कथा-संग्रह 'लघु कथा' आरो ललित निबंध में संकलित है ; मतरकि 'भिखारी', 'दुमड़ी', 'चमरू', 'अकाल', 'मोटर साइकिल', 'एगारों अगस्त', 'पंखा पूलर', 'मुहरी', 'बग्घी' हेनौ 'लघु कथा' असल में 'अणु-कथा' छेकै, 'सॉर्ट स्टोरी' (लघु कथा) तें नही कहलौ जाय पारै हैसिनी के।

अणु-कथा के लोकप्रियता के देखते हुए पिछलका कयेक सालों में आरो-आरो भाषाओ के कयेक-टा अणु-कथा के अनुवादों के प्रचलन अंगिका में बढी रहलौ है। १९९० ई० के 'अंगप्रिया' (मार्च) में श्री सआदत हसन मंटो के 'सफाई-पसंद' आरो श्री कम्बर अली के 'मरुस्थल की पुकार' अणु-कथा के अंगिका-अनुवाद 'अंगप्रिया' के संपादक डॉ० देवेन्द्र ने प्रस्तुत करने है। हालांकि बहुत कम हेनौ लेखक है जिनकासिनी के ध्यान अनुवाद दिस देखावै है जे के हेकरो बहुत ज्यादा आवश्यकता है। खाली उर्दू आकि अंग्रेजीये के अणु-कथा के अंगिका-अनुवाद प्रस्तुत करलौ जाय तें एक उपलब्धि होवें। भारतीय भाषासिनी में ई शैली के जे श्रेष्ठ रचना आबी रहलौ है वैसिनी के अनुवादो अंगिका में हुए तें अंगिका-साहित्यों के पाठकों के भारतीय कथा-साहित्यों के समृद्धि के साथे अंगिका-लेखकों के अपना के थाह में मदद मिलें। तैयो पूरा विश्वासों से कहलौ जाय पारै कि सर्वश्री अनिरुद्ध प्रसाद विमल, आभा पूर्वे (श्रीमती), राजेश कुमार झा आरनी जे तरहों से अंगिका अणु-कथा के नया शिल्प आरो शैली दै रहलौ है वैसिनी से ई कथा-शैली आपनों साहित्यों के समृद्ध करे पारतै।

## उपन्यास

आय-काल जे उपन्यास लिखलौ जाय रहलौ है आकि ई साहित्य विधा के जे अर्थ समझलौ जाय है, ऊ बेशक आपनों स्वरूप आरो माने में एकदम आधुनिक छेकै। आय उपन्यासों के अर्थ ऊ बृहद् आकारों के गद्य-कथा से होय है जे कि वास्तविक जीवनो के सुख-दुखों से संबद्ध होय है, जेकरों कथानक में ठोस जगत् आरो एकरों पात्रसिनी के प्रतिनिधित्व होय है। उपन्यासों के कोय निश्चित परिभाषा तें नै हुवे पारै है, मतरकि सब ने है स्वीकारै है कि उपन्यास आपनों युगों के वास्तविक चित्र देवाला बृहद् आकारवाला कथा-साहित्य छेकै।

ई गद्य-कथा के तत्वो वही छेकै जे कि कहानी के होय है

जेना -- कथावस्तु, पात्र, संवाद, देश-काल, शिल्प आरो उद्देश्य ; मतरकि है बात स्मरण रहना चाहियो कि कहानी में जहाँ हैसिनी तत्वों में एक से अधिक के अवहेलनों हुवे पारें छै वहाँ उपन्यास ई सब में से केकरौ इनकार करी के नै चलें पारें। जो हेनो होय छै तें वहाँ उपन्यासों के वयस्क रूपो नै उभरै पारै छै।

उपन्यासों के है तत्वों के आधारे पर उपन्यास के कै गो भेद करलौ जावें सकें छै ; जेना -- घटना-प्रधान, चरित्र-प्रधान, वातावरण-प्रधान आरनी। हेना के तें कथा-स्रोतो के आधारों पर उपन्यासों के विभाजन साहित्य में बहुप्रचलित छै ; जेना -- ऐतिहासिक, धार्मिक, राजनीतिक, आर्थिक, मनोवैज्ञानिक, वैज्ञानिक आरनी।

होना के सब तरहों के उपन्यास या तें पात्र के अन्तर्जीवन के कथा होय छै या फेनू पात्रों से बाहर के दुनिया के संघर्ष-कथा। यहीं से सब तरहों के उपन्यास के मोटा-मोटी दू जातों में रखलौ जावें सकै छै, ऊ जात छेकै -- वैयक्तिक उपन्यास आरो सामाजिक उपन्यास। मनोवैज्ञानिक, मनोविश्लेषणात्मक, राजनीतिक, आर्थिक आरो वैज्ञानिक उपन्यासों के सब वर्ग उपरे के दू वर्गों में अँटी जाय छै।

अंगिका भाषा में उपन्यास-साहित्य एकदम से नया लेखकों के निधि छेकै, हेकरा में कोय विवाद नै हुवे पारें। ई भाषा में उपन्यास-लेखन के प्रारम्भ दीप नारायण सिंह 'दीप' से होय छै, ई बात तब ताँय कहलौ जैते जब ताँय कि हेकरा से पूर्वो के कोय औपन्यासिक कृति के उल्लेख आकि जानकारी नै प्राप्त होय छै। साहित्यकार निर्मल प्रसाद सिंह 'लाल' से प्राप्त एक लिखित जानकारी के मोताबिक दीप नारायण सिंह 'दीप' शंभुगंज-तारापुर के निवासी छेलात, जिनको मृत्यु १९८० ई० के आस-पास करीब एक सौ पाँच बरसों के उमिर में होलौ छेलै। हिनी आपनो पूर्वजों के जीवन-घटना के लैके लगभग पाँच सौ से ऊपर पृष्ठों के एक उपन्यास लिखने छेलै। आत्म-कथा शैली में लिखलौ हौ उपन्यासों के नाम निर्मल सिंह लाल ने 'जरलौ दीया' लिखने छै।

'लाल' के ही मोताबिक 'जरलौ दीया' में कै-एक पुस्तों के जीवनो के उतार-चढ़ावों के बड़ी रोचक ढंगों से उपन्यास बनाय के लिखलौ गेलौ छै। जब ताँय ई औपन्यासिक कृति के सर्वसुलभ रूप साहित्यों के बीच नै आबी जाय छै, एकरो कथावस्तु आरो शिल्पो के संबंध में निर्णयात्मक रूपों में कुछवो कहना मुश्किल छै ; मतरकि है बात सही छेकै कि अब ताँय 'जरलौ दीया' से पूर्वो के कोय औपन्यासिक कृति के सूचना नै होला के कारणे 'जरलौ दीया' से ही अंगिका

भाषा में उपन्यास-लेखनों के आरम्भ मानबों असंगत नैं होतै।

हेना के तें १९७१ ई० में नरेश पाण्डेय 'चकोर' के एक प्रकाशित कृति मिलै छै जेकरा पर 'अंगभाषा' के सर्वप्रथम लघु-उपन्यास के विज्ञापनों छपलें होलें छै। शीर्षक के नीचे एक पंक्ति आरो प्रकाशित छै - बौद्ध कालीन आदर्श चरित्र - नारी विशाखा के जीवन-वृत्त पर आधारित।

उपन्यासकार नैं केना एकरा उपन्यास कहने छै, नै मालूम। जहाँ तक लघु उपन्यास के प्रश्न छेकै ऊ वृहत् उपन्यास के सम्पूर्ण तत्व के संक्षिप्तता में ग्रहण करते आपनों औपन्यासिक स्वरूप के प्रकट करै छै। विशाखा कथावचन शैली में लिखलें मात्र बीस पृष्ठ के एक पहेली-कथा (कहानी) छेकै जेकरा में नै कोय संघर्षतत्व के प्रधानता छै, नै वातावरण के आरो नैं तें विशाखा के कोय बहुत उल्लेखनीय उदात्त रूप ही समक्ष आवै छै, बल्कि नारी में आभूषण के प्रति आकर्षण के कमजोरी के कुछ ज्यादा स्वर मिललें छै। ज्यादा से ज्यादा विशाखा के एक बड़ो कहानी कहलें जावें सकै छै।

अंगिका में उपन्यास के वास्तविक लेखन आरो प्रकाशन प्रख्यात कथाकार अनूप लाल मंडल के उपन्यास 'नया सूरज, नया चान' से ही होय छै।

### ‘नया सूरज : नया चान’

‘नया सूरज : नया चान’ १९७९ ई० में शेखर प्रकाशन, पटना से स्व० अनूप लाल मंडल के प्रकाशित पहिलें उपन्यास छेकै। ई उपन्यासों के विषय जातीय व्यवस्था के विरोधों में अन्तर्जातीय शादी के प्रोत्साहन देबों छेकै, जेकरों तें उपन्यासकारें उत्तर अंग-जनपदों के ग्रामीण, सामाजिक-आर्थिक अवस्था आरो भूगोल के आपनों ई कृति के विषय-वस्तु के रूपों में स्वीकार करने छै।

रमानाथ, जे कि मोटो खाय-पीयैवाला, मतरकि ईमानदारी से जीयैवाला किशुनदास के पुत्र छेकै, जेबें एम० ए० प्रथम श्रेणी में पास करी के आपनों गाँव हरिहरपुर लौटै छै तें किशुनदास के खुशी के ठिकानों नैं रही जाय छै। पुरानों सोच-समझ के मोताबिके पिता नैं आपनों पुत्र के सामना में बीहा करी लैके प्रस्ताव राखै छै, मजकि रमानाथ मुकरी जाय छै। बीहा के लैके रमानाथ के सोच असामान्य छै कि ऊ अन्तर्जातीय बीहा छोड़ी के आरो कुछ नैं करे पारें। यै में रमानाथ के दोस्त बिष्णुकान्तो मदद करै छै। खाली बीहे के मामला में नैं, रमानाथ, जे कि गाँवों के आर्थिक-सामाजिक भेदों के लैके दू फाँकों में बँटलें देखने छै, ओकरा नया जीवनों दै लें बेचैन छै।

एक बेर निमंत्रण पाबी के रमानाथ उच्च विद्यालय, रहीमगंज के स्वर्ण-जयंती में भाग लै लें जाय छै जहाँ ओकरो मुलाकात शील-गुण से सम्पन्न विदुषी शिक्षिका सुश्री प्रभावती गुप्ता से होय छै, जे कि खुदे ऊ स्वर्ण-जयंती में भागीदारी लै लें ऐली छेलै। बाते-बात में ई-सब बातों के पता चलै छै कि दोनों वही स्कूलों के छात्र रही चुकलें छेलै आरो सुश्री प्रभावती के धर्मपिता चौधरीये जी अबे एकमात्र ओकरो अभिभावक छेकात। यहू मालूम भेलै कि प्रभावती के माय खाली अन्तर्जातीय नै बिहैली गेली छेलै, बलुक हुनी अन्तर्प्रान्तियो छेली। सबकुछ जानी-सुनी के प्रभावती के ओकरो इस्कूल ताँय छोड़ै के बीचों में रमानाथ ओकरा से बीहा करै के इच्छा राखै छै, जेकरा प्रभावती स्वीकारी लै छै।

रमानाथ के लागै छै कि ओकरो आर्थिक-सामाजिक विचार पारम्परिक नै होला के कारणे गाँवों के समृद्ध लोगो लें ऊ उपेक्षित रड बनी गेलें छै। शायद यहें कारणे जबे प्रोफेसर अग्रवाल के चिट्ठी मिलै छै, तबे ऊ बनारस जाय के हिन्दू विश्वविद्यालयों में इतिहास के प्रोफेसर बनी जाय छै ; मतरकि जल्दीये प्रभावती के धर्मपिता चौधरी जी के चिट्ठी मिलै छै, शादी-बीहा लैके। वै कारणे ऊ छुट्टी लै के बनारस से आपनों गाँव लौटी जाय छै।

रमानाथ आरो प्रभावती के शादी होय जाय छै आरो रमानाथ के कहला पर प्रभावती अपनों नौकरी छोड़ी के घर-गृहस्थी सुव्यवस्थित करै में लागी जाय छै ; मजकि ई अन्तर्जातीय विवाह से गाँव खुश नै छेलै। किशुनदास ई बातों के लैके कम परेशान नै छेलै, परंतु हुनी यहें बातों से खुश छेलै कि पुतोहू बड़ी सुघड़ मिलली रहै, जेकरा से किशुनदास के बड़ी आत्मिक खुशी मिलै रहै। वें आपनी पत्नी के साथे तीर्थयात्रा पर निकलै के बात सोची लै छै, परंतु विधि के विधानों कुछ अलगे होय छै। जखनी किशुनदास गौरी साहु के मुकदमा के पैरवी करी के शहर से गाँव आबी रहलें छेलै तखनीये हुनका कोय दुश्मने छूरा से घायल करी दै छै। रमानाथ के अनुपस्थितिये में प्रभावती नै खाली धैर्य आरो विवेक के साथे घायल ससुरों के शहर के अस्पताल पहुँचाय छै, बलुक हुनको सेवा में दिनरात एक करी दै छै। रमानाथ के जल्दी लौटै के तार करै छै, मतरकि सब-कुछ होल्है के बाद किशुनदास नै बचै छै।

ई घटना से रमानाथ एते दुखित होय छै कि गाँव ऐला पर फेनू घुमी के शहर नै जाय छै आरो गाँव के सड़ाँध मिटावै के संकल्प करी के प्रभावती के साथे वही में लागी जाय छै। हौ कामों में एक ग्रामीण मित्र हीरानंदों के ओकरा खूब मदद मिलै छै, जेकरो ई परिणाम होय छै कि गाँवों में श्रीकृष्ण उच्च विद्यालय

के साथे-साथ कृष्ण-पुस्तकालयो खुलै छै । ग्रामीणों सब देखै छै कि रमानाथ आरो प्रभावती ऊ गाँव वास्तें नया सूरज, नया चान बनी गेलों छै ।

सतरह परिच्छेदों में लिखलें गेलों एक सौ नौ पृष्ठों के ई उपन्यास एक महान् सामाजिक आदर्श खाड़ों करै वाला छेकै, जेकरों पीछें उत्तरी अंग-जनपदों के सांस्कृतिक परिवेशों के बल छै । उपन्यासकारों के समक्ष एक निश्चित सामाजिक आदर्श प्रमुख रहलौ छै, यै लेली है उपन्यासों के भाषा-शैलियो घुमावदार नै होय के सीधा-सपटा छै । गाँव के लोगों के आरो खुद उपन्यासकारों के व्यक्तित्वे नाखी भाषा रूपों के एक उदाहरण नीचें छै,--

“घाटों पर एक जगह चौरस करी के मोटों-मोटों लकड़ी रखलें गेलै ; फिरू सरबों-सरबों लकड़ी ; ओकरों ऊपर कुच्छू संठी बिछैलें गेलै । हिन्ने दू आदमी मिली के दासजी के गंगाधारों में लहवाय के फिरू अँगोछा से पोछी के लकड़ी केरों सारा पर राखी देलें गेलै ।

### छाहुर

१९८२ ई० में लोकप्रिय कहानीकार अनिरुद्ध प्रभास के उपन्यास ‘छाहुर’ के प्रकाशन होलै । बौसठ पृष्ठों में समैलों अंगिका के ई उपन्यास आपनों प्रकाशन के साथें चर्चा में रहलें छै ।

ई उपन्यास पैरू आरो ओकरों मुँहबोली भौजाय के बीच के संबंधों पर आधारित छै ।

पैरू के दोस्त किसन अपनी पत्नी के गोदी में एक छोटों बच्चा (जोगिया) के छोड़ी के दुनियाँ से चली बसै छै । फेरू तें जोगिया के भार पैरू आपनों ऊपर लै छै । जोगिया माय (भौजी) के प्रति लगाव देखी के पैरू के पत्नी पैरू से लड़ै छै । एक दिन आपनों पति से मार खाय के पैरू के पत्नी घोर छोड़ी के चली दै छै ।

आबें पैरू विधवा भौजी आरो जोगिया लेली सोचतें रहै छै । होली के समय पैरू के ऊपर रंग-अबीर डालतें भौजी के देह-हाथ शिथिल पड़ें लागै छै । यहेँ-सब वातावरण के बीच जोगिया बड़ों होय जाय छै । पैरू जोगिया के बीहा करवाय दै छै, मतरकि जोगिया बहू पैरू आरो आपनी सास के संबंधों से कुपित होय उठै छै । आखिर में दुखित पैरू घर-द्वार छोड़ी के साधुगिरी पर उतरी आबै छै । आश्रम बनाय के अलग होय जाय छै ।

दुखित जोगिया मायो एक दिन घर-द्वार छोड़ी के आश्रम पहुँची जाय छै -- पैरू के सेवा में । फेरू एक दिन पैरू के जीवनो के आखरी समयो आबी

जाय है। पैरू इच्छा व्यक्त करै है - जोगिया आरो जोगिया बहू के देखै के। जोगिया अपनी कनियैनी के साथे आवै है। एक दिन पैरू के प्राण उड़ी जाय है। विवाद उठी खाड़ों होय है कि पैरू के मुँहों में आग के देतै, मतरकि भौजी आपनों निर्णय सुनाय दै है, पैरू के मुँहों में आग देतै तें जोगियाँ।

'छाहुर' अंगिका पाठकों के बीच काफी लोकप्रिय उपन्यास सिद्ध होलें है। ये में उपन्यासकारे पैरू आरो भौजी के सहज स्वाभाविक आकर्षण के लैके जे कथावस्तु गढ़लें है। ओकरा में पाठकीय रोचकता के कारण कथावस्तु के साथे-साथे भाषा-शिल्प के आकर्षण के महत्वपूर्ण योग है। लोकतत्व के प्रधानता से 'छाहुर' में औत्सुक्य-आकर्षण-तत्व के काफी समावेश होय गेलें है। 'छाहुर' उपन्यासों के भाषा-शिल्पों के एक बानगी देखलें जाय --

"राम-राम ! ऐन्हों बात नै कहों। वैसे केकरो मुँह पकड़लें जाय ; लेकिन पैरूआ-किसन के दोस्ती कृष्ण आरो सुदामा से कम नै रहै। सब दिन पैरू किसन के भैया नाकी आदर देतें रहलै आरो जोगिया माय के भौजाय के आदर। किसन नें भी मरै दम तक पैरू के दोस्त आरो छोटों भाइये समझलकै, दुश्मन नै।"

(पृ.६)।

## शुभद्रांगी

१९८८ ई० में अंगिका विकास समिति, दुमका से प्रकाशित 'सुभद्रांगी' श्री सुमन सूरु-रचित एक ऐतिहासिक उपन्यास छेकै। प्रियदर्शी अशोक के माय सुभद्रांगी, जे कि चम्पा (अंग) के रहै, ओकरहै केन्द्र में राखी के ई उपन्यास के सृजन करलें गेलें है।

सुभद्रांगी के संबंध में कोय विशेष ऐतिहासिक जानकारी प्राप्त नै होय है (कम-से-कम ई उपन्यासों से तें यही मालूम होय है), मतरकि उपन्यासकार नें ई ऐतिहासिक उपन्यासों के आपनों कल्पना से भरै-पूरै के प्रयास करने है ; जेकरो परिणाम छेकै कि ई उपन्यासों में गुलेठी ज्ञा, अनंगसेना, सखेती हेनों कै-एक पात्र उपन्यासकारों के मानस-पात्र के रूपों में आबी के ये उपन्यासों के भरै-पूरै में मदद करै है। मदद की करै है, एक तरह से ई-सब मानस-पात्र इकट्ठा होय के सुभो (सुभद्रांगी) के पीछें छोड़ी के आपनों कथा बनैतें चलै है। चम्पा से लैके मंदार पर्वतों के यात्रा में, जे कि उपन्यासों के पहिलों खंडो छेकै, अनंगसेना सुभद्रांगी के सखी आरो सखेती सुभो के भाये आपनों प्रेम-प्रसंगों से ई खंडों के घेरने राखै है, सुभौ ये में एक मददगारे के रूपे-भर में आबै है।

कथा में मंदार पर्वतों के कथा आरो परिवेशों के प्रसंग द्वारा ज्यादा जगघो



छेकबों मूल उपन्यास-कथा के गौण करी दे छै। दरअसल, सुभो के कथा ते ई उपन्यासों के दोसरो खण्डों से प्रारम्भ होय छै, जेबे गुलेठी झा आपनो मित्र बिष्णुगुप्त (चाणक्य) से मिलै ले सुभद्रांगी के लेके पाटलिपुत्र पहुँचै छै। अनंगसेन भी साथ जाय छै।

बिष्णुगुप्त सुभद्रांगी के शील-गुण-प्रतिभा से प्रभावित होय छै। पाटलिपुत्र के युवराजो ओकरो रूप-राशि से अवाक् रही जाय छै। प्रणय-व्यापार माधवी-कुंज में पुष्प-प्रदान से पल्लवित होय के आखिर में चन्द्रगुप्त के गुरु बिष्णुगुप्त के सलाह पर विवाह-बंधन में बदली जाय छै। युवराज विन्दुसार से सुभद्रांगी के विवाह होतै चम्पा छोड़ै से पहिने आचार्ये गुलेठी से कहै छै कि वे अनंगसेना के भौजी कहने छै, एकरों खेयाल राखियहों। चम्पा के बेटी सुभद्रांगी के मगध में ऐतै समुच्चा मगध खुशी के सागर में डुबी जाय छै।

एक महाकवि के उपन्यास होला के कारणे ई उपन्यासों के महत्वो पै में कवित्वपूर्ण प्रसंग आरो भाषा-शैली के कारणे विशेष छै, ई निर्विवाद रूपे कहलौ जैतै। तेहत्तर पृष्ठों के ई उपन्यासों में प्रकृति आरो प्रेम के जतना-टा स्थान मिले पारलौ छै, ऊ प्रभाव छोड़ै वाला छै। पाटलिपुत्र में सुभो आरो युवराज के मालती-कुंज में पुष्पे के माध्यम बनाय के प्रेम-निवेदन करवैबों सूरु जी के कवि आरो शीलपूर्ण लेखन के उजागर करै छै। उपन्यासकार के हेनो पात्र आपनो देश-काल के मोताबिके चलै छै, ई उपन्यासकारों के सजग व्यक्तित्वे मानलौ जैतै। यही सजग व्यक्तित्वों के कारणे उपन्यासकारे पै उपन्यासों में घुरलौ अनंग सेना के प्रेम-कथाओ के विदा होती सुभो के एक वाक्यों से कि वे ओकरा भौजी कहने छै, खेयाल राखियहौ, जोड़ी दे छै। तैयो ई कहलौ जैतै कि है उपन्यासों में शुरूवे के चौथो पृष्ठ पर मंदार पर्वत ले तुरत्ते 'ई' आरो तुरत्ते 'ऊ' के प्रयोगों के असावधानी पाठकीय भ्रम के पैदा करै छै।

यै उपन्यासों के भाषा-शैली के एक उदाहरण नीचे द्रष्टव्य छै, "कटेली चम्पा के सुगन्ध से समुच्चा वातावरण सराबोर छै, कहीं कोय तरह के आवाज नै, जेना आकास के सौन्दर्य के धरती आ धरती के सुगन्ध के आकासे पीते रहे।" (पृष्ठ १२)।

### परबतिया

'परबतिया' श्रीमती आभा पूर्वे के पहिलों उपन्यास छेकै, जनवरी १९९१ ई० में प्रकाशित। ई लघु उपन्यास मात्र ४४ पृष्ठों में समाप्त होलौ छै,

जेकरों कथावस्तु तत्कालीन समयों के राजनीतिक दाँव-पेंच आरो वै से उत्पन्न सामाजिक स्थिति छेकै ।

'परबतिया' (पार्वती) ई उपन्यासों के प्रमुख पात्र आरो कोशी-अंचलों के एक गाँवों के समृद्ध आरो प्रतिष्ठित व्यक्ति बिसुनदेव बाबू (वंशी बाबू) के बेटी छेकै । है उपन्यासों के उद्देश्य जातीय विरोध के अभिशापों के देखाना छेकै, पै लेली एकरों नायक सूरज मंडल के पुत्र कार्तिक चन्द के बेटा परमेश्वर के बनैलें गेलों छै । कायस्थ परिवारों के 'परबतिया' परमेसर के प्यार में आकंठ दुबली छै, जेकरों खुलासा उपन्यास के पहिलों, दोसरों आरो तेसरों अध्यायों से होय छै ।

ई उपन्यासों के तेसरों अध्याय में परमेसर के नौकरी पर जैतहैं ओकरा से परबतिया के मुलाकात आरो एक-दोसरा लें दोनों के खिंचाव के वर्णन छै । परमेसर ई कही के बिदा लै छै कि अबकी गाँव लौटी के ऊ शहर नै जैतै, बलुक गामें में एकटा स्कूल खोली के गामों में शिक्षा फैलैतै, ताकि ओकरों पारबती से अलग रहै के कष्टमय जीवनो नै जीयै लें लागै ।

अध्याय पाँच में जाति के आधार पर नौकरी में सुविधा के घोषणा से सामाजिक स्थिति के चित्रण छै । जेकरों झलक उपन्यास-लेखिका ने पत्र के माध्यमों से उजागर करने छै, पत्र जे कि पारबती के नाम परमेसरें लिखै छै । अध्याय छवो यही समस्या से जुड़लें होलें छै, जे कि चिट्ठी के रूप में राखलें गेलों छै । ई चिट्ठी परमेसर के लिखलें गेलों पारबती के छेकै । दोनों मुख्य पात्रों के दू चिट्ठी से दोनों के सामाजिक सोच साफ होय छै, जे है मानै छै कि गरीबी-निर्धारण के आधार जाति नै हुवें पारें । पारबती वैज्ञानिक विश्व-दृष्टि के प्रचार लेली गाँवों के हरिजन-बस्ती में एक स्कूल स्थापना आरो वही माध्यमों से अशिक्षित पीड़ित वर्ग में वैज्ञानिक कल्याणकारी सोच करै के बात परमेसर के लिखै छै ।

है उपन्यासों के अध्याय छें में हरिजन-बस्ती में पारबती के पढ़ैबों आरो वै से बदनामी होय के चिंता से ग्रसित पारबती माय के ओकरों शादी लें चिंतित देखैलें गेलों छै, जेकरों परिणाम होय छै कि वंशी बाबू कापरी के कहलें पर ओकरों बीहा कार्तिकचन्द के बेटा परमेश्वर से करै लें तैयार होय जाय छै । पै लेली सूरज मंडल के छोटे भतीजा बेरासी के सम्मुख गीत गावै के बहाना से पारबती के लानै छै, ताकि देखा-सुनी होय जाय ।

मतरकि ई शादी के विरोध में पारबती माय खाड़ी होय जाय छै । माँय चाहै छै कि पारबती के बीहा आपनों जाते में हुवें -- दिवाकर बाबू के

बेटा से। आखिर में, अपनी कनियाँ के जिद के सम्मुख वंशी बाबू के नमै ले पड़ै है आरो पारबती के बीहा दिवाकर बाबू के लड़का शशांक से होवै के तैयारी शुरू होय जाय है।

अध्याय आठ में पारबती आपनों मनो के विरुद्ध बीहा होते देखी के परमेसर के नाम एक चिट्ठी लिखै है, जेकरा में पारबती के जीवन-लीला कुडुवे देरी बादें समाप्त करी लैके सूचना दै है। साथे-साथ हेकरो लें दुख व्यक्त करै है कि अशिक्षित समाज में शिक्षा से जे रोशनी लानै लें चाहै छेलै, आबे ऊ अधूरे रहतै। पारबती बेरासी के बोलवाबै है आरो ऊ चिट्ठी परमेसर के दै आबै के बात कही के विदा करै है। बेरासी के जैतें पारबती भी भोर हुवै से पहिले घरों से चुपचाप निकली जाय है। ऐंगना के केबाड़ी खोली के चोरकी पाँवों से गंगा किनारी पहुँची जाय है। गणेशी के नाव खोले है। गणेशी अभियो कछारिये नगीच बनलें अपनों मड़ैया में बेखबर सूती रहलें है। बीच नदी में पहुँची के पारबती एक दाफी गणेशी काका के तीन दाफी हाँक लगाय है आरो उत्तर में गणेशी का के हाँक सुनतहै ऊ गंगा में धौंस लगाय दै है। गणेशी का परबतिया के निर्जीव शरीर पानी में गोता लगाय के निकालै है।

है कृति के आखरी (दशमों) अध्यायों में शोक-संतप्त परिवार के साथे-साथ गणेशी का के विह्वलता प्रदर्शित है। पारबती के चिताग्नि में करैके पहिले परमेसरो आबी जाय है। जखनी निर्जीव पारबती के चिता जलै है तखनी सब लोगे परमेसर के बदहवास बनलें एक दिस चलले-चललें जैतें देखै है।

'परबतिया', आभा पूर्व जी के संभवतः पहिलों उपन्यास होला के कारण, एकरा में औपन्यासिक शिल्प पूर्णता के मजबूती से रिक्त रही गेलें है, जेकरों एक उदाहरण कथा में पारबती आरो बेरासी के सम्मिलित लम्बा गायन छेकै। उपन्यास में ई विस्तार के कोय औचित्य नै बुझावै है। हेकरो बादो उपन्यास-लेखिका नें वर्तमान सामाजिक सद्भावों के छिन्न-भिन्न करै के राजनीतिक चाल के उजागर करै के साथे समाज में जातीय सद्भावों के स्थापना लेली जे विषय-वस्तु उठैने है ऊ आपनों प्रभाव में अचूक है। है उपन्यास के भाषा पर लेखिका रों कवि व्यक्तित्व के भी पूरा प्रभाव है; उदाहरणस्वरूप एकरा में लागलें लोक-धुनों पर रचलें गीत --

“आ      SS      SS      SS

जाहि बने सीकियो नै डोलै, हे जोगिया !

ताहि बन तों नहीं जा।

ओहि बनें जोगिन बहुत छै, हे जोगिया !  
 रखतौं नैना लोभाय ।  
 आँगन मोरा लेखै बीजूबन, हे जोगिया !  
 घर लागै दिवस अन्हार ।  
 तोरों बिना सून सेज भेलै, हे जोगिया !  
 गेरुआ मोहि नै सोहाय ।  
 बाटें-घाटें सुमिरन करबौ, हे जोगिया !  
 मोती जकाँ झहरत नीर ।'' इत्यादि ।

### अन्तहीन वैतरणी

'अन्तहीन वैतरणी' श्रीमती आभा पूर्वे रों दोसरो उपन्यास छेकै, जेकरों प्रकाशन-वर्ष १९९३ ई० छेकै । ऐकरो पहिलें ई उपन्यास 'आंगी', जुलाई-अक्टूबर १९९३ में सम्पूर्ण रूपों में प्रकाशित होय चुकलौ छेलै । ई उपन्यास 'कचनार जबै कल्पतरु भेलै' - शीर्षकों से धारावाहिक रूपों में 'नई बात' (हिन्दी दैनिक, भागलपुर) से प्रारम्भ होय केँ कै-एक अंकों में समाप्त होलौ छेलै । चौसठ पृष्ठों केँ ई उपन्यास एक नारी केँ व्यथा-कथा केँ घेरतें उपन्यास छेकै ।

बच्ची, काफी सम्पतवाला जानकी बाबू केँ बेटी छेकै जे कि आपनों बाबुओ केँ काफी दुलारी छै । सम्पत बाबू, आपनों नाम केँ विरुद्ध अर्थहीन स्थिति केँ कारणें, चाहै छै कि केन्हों केँ हुनकों बेटा सेमल केँ शादी बच्ची केँ साथें होय जाय । यद्यपि बच्ची केँ माय होनों परिवारों में बेटी दै लें तैयार नै छै, मतरकि जानकी बाबू केँ ई आश्वासन पर कि हुनी लड़का केँ अर्थवान् बनाय दैतै, बच्ची माय ऊ घरों में बेटी दै लें तैयार होय जाय छै ।

जानकी बाबू देशभक्त आदमी छेकै । हुनी देश-सेवा में ही आपनों अपार जमीन-जायदाद केँ बहुत बड़ों हिस्सा खोय चुकलौ छै । बच्ची केँ शादी वक्ती हुनी खर्च करै में कोय कोर-कसर नै राखै छै, खान-पान सेँ लैकेँ सौर-सजावट ताँय ; मतरकि कुछू जौर-जेवरात बादे में दै केँ बात रही जाय छै ।

जखनी बच्ची पहिलों दाफी डोली सेँ उतरी केँ ससुराली केँ दुआरी पर गोड़ राखनें छेलै, आरो पति साथें-साथें सासों केँ जे घोर अपमान ओकरा मिललौ छेलै, ऊ खत्म होय केँ जग्घा में एक सिलसिला बनी जाय छै । सम्पत बाबू आपनों बेटा सेमल केँ बहू केँ साथें लेन्हे समधियारों पहुँचै छै, जहाँ बाकी जेवर-जेबरात

वास्ते जानकी बाबू पर दबाब डालै छै। आपनों विपरीत हालतों के बादो जानकी बाबू गहना-जेबर के व्यवस्था करै छै, आरो सेमल ऊ गछलों-सब लैके एक दिन लौटी जाय छै ; यहाँ तक कि बच्ची के गला रों हारो ओकरो सुतला में खोली लै छै। सब-कुछ समझी के जानकी बाबू सेमल के नौकरी के जोगाड़ लगाय छै, स्वास्थ्य-विभागों में ; मजकि सेमल इण्टरव्यू में भाग लेला के जग्घा चुपचाप घोर चली दै छै।

बच्ची के भविष्य लेली चिंतित जानकी बाबू बच्ची के पढ़ाना शुरू करै छै ; मतरकि सेमल के अनैतिक व्यवहारों के बात आपनों एक दोस्त से सुनी के सम्पत बाबू पतोहू के फेनू से मँगाय लै छै। बच्ची के दुख कम नै होय छै, यहाँ तक कि घोर उपेक्षा आरो आर्थिक अभाव के कारणे बच्ची वाँहीं जनमली आपनों फूल हेनो बेटी रजनीगंधा से भी सदाय वास्ते बिछुड़ी जाय छै। ससुराल में एक दियोर कमल छै, जेकरहै से कभी कुंडली मिलला के कारणे शादी लगै छेलै आरो जेकरो सीना में अभियों भाभी बच्ची वास्ते श्रद्धा छै।

जबे बच्ची दोबारा दूजीवियो होय छै तबे जानकी बाबू बच्ची के ओकरो ससुराल से लै आनै छै। नैहरे में बच्ची के बेटी बिजली होय छै। हुन्ने, समय बीतला के साथे, देह आरो अर्थ से जर्जर सम्पत बाबू, बच्ची ले करलों गेलों दुर्व्यवहार से, दुखित सेमल के ससुरों से कुछ लै-दैके ससुराले में बसे के सलाह दै छै। सेमले आपनों बाबू के बात मानी लै छै।

सौभाग्य के एक अध्याय खुलै छै। सेमल के साथे-साथे बच्चियो के नौकरी के खबर छै। फेनू बच्ची माय के कहला पर जानकी बाबू खाली दसबिधिया जमीने नै करी दै छै, बलुक एक मकानों खरीदै छै। सेमल बच्ची के ओकरो नौकरी के जग्घा धनबाद पहुँचाय के घुरी आवै छै, नवजात बेटी लेले कपसती बच्ची के छोड़ी। बच्ची ऊ सुनसान जग्घों में अपना के काफी भयभीत महसूस करै छै, कि एक दिन पियक्कड़ पड़ोसी मिसिरजी ओकरो डेरा घुसी आवै छै। बच्ची सुरक्षा लेली चीखै छै। बी० डी० ओ० श्रीवास्तव आपनों बँगलावाला क्वार्टर से निकली के वहाँ पहुँचै छै आरो मिसिर के वहाँ देखी के ओकरा नौकरी से हमेशे वास्ते निकाली दै के बात कहै छै। बी० डी० ओ० श्रीवास्तव बच्ची के आपनों ब्रहिन से जरियोटा कम नै मानै छै।

ई घटना के कछुवे दिन बाद बच्ची के आपनों बाबू के खबर मिलै छै आरो ऊ आपनों घोर भागलपुर लौटे ले तैयार होय जाय छै। बी० डी० ओ०

श्रीवास्तवो ओकरा आश्वासन दै छै कि ओकरो बदली वें मुगेर कराय देतै ।

भागलपुर ऐतहैं सेमल आरो सेमल कें भाय, जे कि बच्ची कें नामें लिखलें मकाने में आबी कें रहें लागलें छेलै, भयभीत होय जाय छै । अबतक जानकी बाबू कें राजनीतिक प्रतिष्ठा कें लाभ उठाय कें सेमल आपनों बदली भागलपुर कराय लेने छेलै । बच्ची कें देखी कें सेमल ओकरा प्रति आपनों व्याकुलता देखाय छै । फेनू, ओकरो मनो में प्राप्त धोन कें भोग-भाग लेली एक बेटा पावै कें भी किंछा जागी गेलों छै । तीने रोज कें बाद बच्ची कें नौकरी लें मुगेर जाय लें पड़ै छै । सेमलो साथ जाय छै, मतरकि ट्रेनिंग वास्तें जल्दीये बच्ची कें पटना जाय लें लागै छै । बच्ची कें पति वेतन पावें सकें, एकरों ऑथोरिटी-स्लिप लिखी के ट्रेनिंग लें चली दै छै । हिन्नें सेमलें बच्ची कें वेतन तें उठाय लै छै, मजकि ओकरा भेजै नैं छै ।

पति के व्यवहारों सें काफी दुखित होय आपनों नौकरी श्रीवास्तव सें पैरवी करवाय कें पटनाहे करवाय लै छै । अब ताँय बच्ची अश्वघोष नाम कें एक बेटा कें मायो बनी चुकली छेलै । बिजली बीहा योग्य होय चुकली छै । बच्ची एक बेर फेनू श्रीवास्तव जी कें सहयोग सें ओकरो शादी पूर्णियावासी रामसेवक बाबू कें बेटा सहजानंद सें ठीक करै छै ; मतरकि पहिलों सन्तानों क बीहा लेकै, हेकरो बाबू कें उपस्थित रहना एकदम जरूरी छै, यही सोची कें बच्ची आपनों पति लुग पहुँचै छै पुत्र अश्वघोष कें साथें ; मजकि सेमल नैं खाली श्रीवास्तव बाबू साथें ओकरो अनैतिक संबंध होय कें लाँछन दै पर लगाय छै, बलुक जीवनो कें भय दिखाय कें ओकरा सें कागज पर दस्तखतो कराय लै छै, ताकि ऊ अश्वघोष कें नैं लै जावें पारें ।

जिनगी सें एकदम थकली बच्ची ऊ घोर हमेशे वास्तें छोड़ी दै छै । बिजली कें शादी होय जाय छै । ओकरा अश्वघोष कें शादी कें खबर मिलै छै । बच्ची ठीक सें खुशो नैं हुवें पारै छै कि श्रीवास्तव बाबू कें मिरतू सें ऊ फेनू टूटी जाय छै आरो थकली-हारली बिजली कें बीहा कें बीस बरसों कें बाद नौकरी छोड़ी-छाड़ी कें जिनगी कें शेष समय काशी कें विश्वनाथ मंदिर कें नगीच एक टुटलों-टाटलों मकानों कें सीलन-भरलों कोठरी में रहें लागै छै - आपनों अतीत आरो वर्तमानों कें बीच झुलतें होलों ।

'अन्तहीन वैतरिणी' कें कथा-वस्तु येहे छै, पर यै उपन्यासों में वर्णन कें जे विस्तार होय छै ओकरा समेटियें कें कहला कें कारणें एकरा में संकोचन आबी

गेलों छै। काँही-काँही तें अपेक्षित वर्णन मिलबो करै छै, मजकि कै-एक बेर तें जेना लेखिका प्रसंग दिस संकेत-भर करी देने छै। यै लेली यै उपन्यासों के परिच्छेदो बड़ी छोटों-छोटों बनी गेलों छै। है उपन्यासों में ओरी सें लैकें आखरी ताय कथा के मुख्य पात्र बच्ची के मनोविज्ञान उभारै के कोशिश एक हद ताय सफल कहलें जैतै। निस्सदेह आखरी में मुख्य पात्रों के मनःस्थिति आरो कथाशिल्प उदात्त बने पारलें छै। यै उपन्यासों में भाषा-प्रयोग के एक रूप नीचें छै, --

‘दिन आबी के रोशनी अगजग में उलझी जाय छै आरो रात आबी के गुजगुज अन्हार ; मतरकि आँख खुललें रहला पर बच्ची के नैं तें रोशनीयें बुझावै छै आरो नैं तें अन्हारे। बस, धरती आरो आकासों के स्मृति-आशा रेगिस्तान में बिण्डोबों नाखी ओकरो मनो में दौड़ते-हाँफते रहै छै।’

## भाग्य रेखा

‘भाग्यरेखा’ परशुराम ठाकुर ‘ब्रह्मवादी’ -लिखित उपन्यास छेकै। वर्ष १९९४ के ‘अंग-तरंगिनी (प्रवेशांक) में ई उपन्यासों के एक अंश प्रकाशित छै, जेकरों ऊपर धारावाहिक लिखला सें ज्ञात होय छै कि ई कृति के लगातार निकालै के योजना छेलै जे कोय कारणें रुकी गेलै। प्रकाशित अंशों के एक अंश प्रस्तुत छै,--

‘हो पाण्डेजी ! जे परेशानी सें अपने गुजरी रहलें छियै, ओकरा सें जादे परेशानी सें हमरा गुजरें लें पड़ी रहलें छै। ई तें जानबे करै छियै “हानि-लाभ, जीवन-मरण, यश-अपयश विधि हाथ”। तैहियो लोगों के अपनों कर्म नञ् छोड़ना चाहियों। हिम्मत नञ् हारना चाहियों। सफलता-असफलता तें लोगों के अपनों हाथों में रहै छै।’

## तुलसी मंजरी

‘तुलसी-मंजरी’ श्रीकेशव के पहिलों प्रकाशित उपन्यास छेकै, हालाँकि रचना के दृष्टि सें ‘मरगांग’ हिनको पहिलों अंगिका-उपन्यास ठहरै छै, जेकरों प्रकाशन नैं होलें छै।

‘तुलसी मंजरी’ पहिलों दाफी ‘आंगी’ (जनवरी, १९९५) में सौसे प्रकाशित होलें छेलै ; बादों में ई स्वतंत्र रूपों में अंगिका-संसद, भागलपुर में १९९५ में प्रकाशित भेलै। डिमाई आकार के उनहत्तर पृष्ठों में समैलें ई सही

मायने में अंगिका के पहिलों उपन्यास छेकै, जेकरा पूर्ण रूपों से आधुनिक कहलौ जैतै। एकटा छोटों उपन्यास होला के बादो यै में तीन-तीन पीढ़ी के सामाजिक, आर्थिक कथा के साथे-साथ ओकरो मनोविज्ञान के बड़ी कुशलता के साथ प्रकट करलौ गेलौ छै।

सौसे उपन्यास पूंजी के अत्याचार, अनैतिकता आरो दरिद्रता के परेशानी, आक्रोश तथा परिवर्तित नया चेतना से गुंथलौ-गाँथलौ गेलौ छै।

दुखना, ई उपन्यासों के मुख्य कथा-पात्र, गाँव के महतो बड़का बाबू के इयोढ़ी के एक हेनौ मजूर छेकै जे परबों-त्योहारों में दोसरै कन से गोबर लानी के आपनों ऐंगनों लीपै छै। दुखना के जनमला पर दुखना बाबू ओकरा इयोढ़ी पर मजूर बनाय के ई कहतें वहाँ से मुक्त होय जाय छै कि यहाँ आँख-मूँ बंद रखना छै, खाली काने खुल्ला रखना छै।

ई उपन्यासों में नै खाली बड़का महतो के आर्थिक शोषण देखैलौ गेलौ छै, बलुक ओकरो यौन-शोषणों के शिष्ट वर्णन छै। यही यौन-शोषणों के कारणे इयोढ़ी के एक नौकरानी झिलियो छोटका महतो के शिकार बनै छै, दुखना के आँखी के सामना। दुखना के क्रोध से छोटका महतो केन्हों के बची तै जाय छै, मतरकि दुखना इयोढ़ी छोड़ी दै छै।

इयोढ़ी से निकलला के बाद दुखना अपनी पत्नी भागवती के साथे श्रम करै छै, जेकरो श्रमे रंग लानै छै आरो फल-फूलवाला खेत दुखना के पास होय छै। दुखना के जीवन एक तरह से एकदम बदली गेलौ छै। एक तै खेती के सुख, फेनू भागवती के बाढ़ में बहतें एक गाय मिललौ छै जेकरो पुण्य-प्रताप से भागवती के दुआरी पर बाछ-बाछी बँधी जाय छै। दुखना आपनों बेटी फूलपरी के साथे बहुत सुखी छै।

मतरकि ओकरो छोटका भाय भिखना इयोढ़ी के छोटका महतो के संगत में बिगड़तें चललौ जाय छै ; भागवती के गोस्सा-विरोध के बावजूदो घरों के गाय-बैल खेत-पाथर सब भाय-भाय के बीच बँटी जाय छै ; मजकि भिखना ऊ सम्पत राखी नै पारै छै ; एक पतुरिया के पीछूँ पड़ी के नै खाली सब-कुछ बुड़ाय दै छै, बलुक जेलो के हवा खाय छै। वैसिनी बातों से दुखना टुटी के रही जाय छै।

हुन्ने, सबसे छोटों - वही 'वावन हाथ के' - वाला इयोढ़ीयो के विनाश शुरू भै जाय छै। बड़का महतो के मरला के बाद छोटका महतो के चंडाल-चौकड़ी गाँवों के घोर अनाचार के अड्डा बनावे लागलौ छै। एक दिन ऊ इयोढ़ी के



माँजो'दी (मंजरी) ड्योढी छोडी केँ गाँवों में नया चेतना रों विकास लेली 'मुक्ति-केन्द्र' खोली केँ सक्रिय होय जाय छै। घूमी-घूमी केँ अनपढ़ लोगों में शिक्षा आरो आत्मबल केँ संचार करै छै, जबकि छोटका महतो धर्म केँ नामों पर लोगों केँ शोषण मे आरो सक्रिय होय जाय छै। माँजो'दी तंत्र-मंत्र केँ घोर विरोधी छै, केन्हें कि यहें-सब केँ आड़ों में वें व्यभिचार केँ शिकार होलों जनानी केँ देखने छै। ओकरा तें एक दिन राते-राते आपनों ससुराली सेँ यहें-सब केँ कारणें भागी लेँ पडलो छेलै। रास्ता मेँ एक बैलगाड़ी केँ पुआली में नुकाय केँ ऊ नैहर ऐलों छेली आरो तैहिये सेँ नैहरे में बसी गेली छै।

है उपन्यासों केँ लेखक नेँ तीन खंडो में, तीन शीर्षकों सेँ, बाँटलें छै— 'एक गाछ तुलसी', 'जहरोँ केँ जंगल' आरो 'तुलसी मंजरी'। 'तुलसी मंजरी' खण्ड मेँ दुखना केँ आपनों बेटी केँ शादी वास्तेँ परेशानी केँ वर्णन छै ; केना केँ आपनी एकलौती बेटी केँ शादी में, तुलसी मंजरी केँ भोज कराय केँ जिद केँ कारणें, ओकरा बचलो-खुचलो जमीन-जायदादों सेँ, छोटका महतो केँ कारणें, वंचित होय लेँ लागै छै। मजकि, तुलसीयो (फूलपरी) बीहा केँ बाद सुख सेँ नै रहें पारै छै। लोभी पति केँ कारणें फूलपरी केँ ससुराल सेँ भागी केँ नैहरे में जान बचाय लेँ पडै छै। यही खण्डों मेँ ई कथा आबै छै कि केना भागवंती एक दिन जीवनोँ सेँ निराश फूलपरी केँ लैकेँ माँजो'दी केँ पास पहुँचै छै आरो केना माँजो'दी केँ कारणें फूलपरी सच्चो मेँ फूलपरी बनी जाय छै। माय केँ दुआरी पर फेनू सेँ गाय बाँधी दै छै। माँजो'दी आपनों शिष्यसिनी केँ सहयोगों सेँ नै खाली गाँवों सेँ छोटका महतो केँ चंडाल-चौपालों केँ उखाड़ी फेंकै छै, बलुक आपनों आश्रमों केँ मुख्य शिष्य अमर केँ साथें फूलपरी केँ जीवन जोड़ी दै छै, नारी केँ अर्थ केँ बतैतेँ हुवें कि खुद केँ बान्ही केँ मुक्त होय जाय केँ साधना केँ नामेँ छेकै नारी।

'तुलसी-मंजरी', एक अर्थों मेँ, अंगिका कथा-साहित्यों केँ अमूल्य कृति छेकै। ई उपन्यास होरी-संस्कृति केँ कथा छेकै तें होरी केँ उत्तरवर्ती रूपो यहाँ छै। यहाँ भागवंती प्रेमचन्द्र केँ 'धनिया' बनी केँ ही खाली नै आबै छै, ओकरों रूप, ओकरों क्रोध परवर्ती धनिया केँ ही रूप छेकै। चाहे ऊ मनोविज्ञानों केँ यथार्थ रहें, चाहे समाजों मेँ प्रचलित धर्मों केँ, चाहे अर्थ केँ रहें आँकेँ प्रकृतिवाद केँ, -- सबकेँ ई उपन्यासों मेँ बड़ी बारीकी सेँ गुँधी-गाँधी केँ खाडों करलोँ गेलोँ छै। उपन्यासकारों केँ बिम्बवाली भाषा केँ उपयोग नेँ ई उपन्यासों केँ शैली केँ चरम रूप प्रदान करी देने छै। है उपन्यासों केँ

भाषा के एक अंश नीचे है,--

“बाप रे ! सिरों से पाँव तक लाल ! रत-रत लाल साड़ी आरो वैहनें बिलौजो । गमकौआ तेलों से चुपड़लों करिया भौर केशों के बीचों में टहटह लाल माँग वाला चान रड मुखड़ा । वै पर भकभक लाल टिक्का । अपनों घोर-ऐंगना में माँजो’दी हरदम्मे एहने लाली में लबालब भरलों रहे छै जबे कि बाहर गाँव-समाजों में घूमै खनी माँग-माथा छोड़ी के बाकी सब-कुछ उजरो बगबग । मानसरोवरो के हंस नाखी ।” (पृष्ठ २०) ।

### जटायु

वन-सम्पदा के संरक्षणों के समस्या लै के लिखलें गेलों डॉ० अमरेन्द्र के उपन्यास ‘जटायु’ पर्यावरण-संकटों के कथा-वस्तु बनाय के लिखलें गेलों छै, जेकरों एक बहुत बड़ों अंशों के धारावाहिक प्रकाशन ‘नई बात’ (भागलपुर) में ३ नवम्बर १९९६ में होलें छै ।

विधाता, जे कि ई उपन्यासों के मुख्य नायक छेकै, ऊ गाँवों के कटी रहलें वन-सम्पदा से चिंतित छै आरो चाहै छै कि उजाड़ बनी रहलें गाँवों के फेनू से हरा-भरा बनैलें जाय । यै कामों में ओकरा रूपाँ, जे कि यै उपन्यासों के नायिका छेकी, काफी मदद करै छै । गाँवों के हितैषी लोगो विधाता के साथ छै, पर पारस्परिक ईर्ष्या आरो आर्थिक लोभ के कारणे गाँवों के कुछ युवक, विधाता के साथीसिनीयो, सक्रिय छै । होली के रात वही गाँवों के कुछ लोगे गाछसिनी के कटवैबों शुरू करै छै । विधाता के ओकरों भनक लगै छै तें जंगलों में आपनों साथी जोगी के साथे पहुँची जाय छै । विधाता लोगे के गाछ काटै से रोके छै । आखिर में विधाता के अड़ियल रुख के कारणे विधाता आपराधिक आक्रमणों से लहलुहान होय के वनों के रक्षा में जटायु नाखी दम तोड़ी दै छै ।

ई उपन्यासों के आखिर में रूपा के विक्षिप्त मनोदशा में अकस्मात् अलोपित होय जैबों, गाँवों के वही जंगलों के नगीच विधाता आरो रूपा के स्मृति-स्थल बनबों, गाँवों में एक योगी के ऐबों आरो अचानक एक दिन अलोपित होय जैबों आरनी प्रसंगों से एक नीरस विषय के कथानक के साहित्यों के कथा-वस्तु बनैलें गेलों छै, जेकरों शिल्प में रूपगत संरचना के साथे-साथ भाषा-शिल्प, ओरी से आखरी ताँय, मदद करते रहलें छै । ई उपन्यासों के ओरी के एक अंश यहाँ उद्धृत छै,--

“पुरबा के झोंका से आरी के किनारी-किनारी अबरलों निसुआरी के गाछसिनी हेने झूमी रहलों छेलै जेना महुआ रों निसाँव माथा पर चढी गेलों रहें। पुरबा जेन्हें कुछ तेज हुवै कि निसुआर एक-दोसरा से लिपटी-लिपटी बाँसुली के सुरों में गीत गावें लागै छेलै। आकि हेने लागै जेना निसुआरी के बीचों में बैठी के कोय बाँसुलिये टेरतें रहें। छिनमान मोहनेवाला बाँसुली - सुनतहैं तन-मन बेसुध करी दैवाला।”

### हम सुरमुख दास नैं छिकियै

‘हम सुरमुख दास नैं छिकिये’ आयकों सामाजिक-सांस्कृतिक अवमूल्यनों के रेखांकित करतें एक व्यंग्य-प्रधान उपन्यास छेकै। १९९७ ई० के ओरीये ‘नई बात’ (हिंदी दैनिक) के रविवारीय परिशिष्ट में ई उपन्यास पनरों किस्तों में धारावाहिक रूपों से प्रकाशित भेलों छै।

‘सुरमुख दास’ ई उपन्यासों के मुख्य पात्र स्वतंत्रता-सेनानी के पुत्र छेकै। आपनों बाबू नाखी सुरमुख दासों के आपनों बीहा लेली भारी परेशानी उठाय लें पड़ै छै। पड़ोसी भगवान् दास रों कनियाँय ओकरा आपनों नैहर भेजै छै, गँजेरी काका के बेटी बेला के पसंद करै लें, मतरकि बेलाँ बीहा से इन्कार करी दै छै। आखिर में सुरमुख दास के बीहा तिरपित नामों के एक आदमी के बेटी मैना रानी से होय छै।

मैट्रिक पास करला के बाद सुरमुख दास नौकरी लें परेशान होय छै। एक जगह घोखा खैला के बाद, एक शिक्षा-पदाधिकारी के सहयोगों से, ऊ एक इस्कूली में चपरासी बनी जाय छै।

दुर्गादास जाति से राजपूत छेकै, मतरकि कबीरपंथी होला के कारणे आपना के दास कहै छै। एक दिन वें आपनों खेतों में मँगरुआ के चोरी करतें देखी के पीटी दै छै। समय देखी के नवग्रह मिसिर दुर्गादास पर मँगरुआ से केस करवाय दै छै। मँगरुआ के जाति के दारोगा अमरदेव पासवाने दुर्गादासों के घोर अपमान करै छै।

सुरमुख दासो ताकों में रहै छै। एक दिन आपनों करतूतों से वें दारोगा के चोरी के इल्जामों में अपमानित करै छै। चोटैलों दारोगा बदला लै के फिराक में रहै छै।

विधान-सभा के चुनाव के समय आबै छै। आपनों बेटा के किंछा पर

दुर्गादास उम्मीदवार के रूपों में खड़ा होय है। पूर्व-विधायक बटेर सिंह के चुनाव हारी जाय के भय होय है आरो एक दिन एक ट्रेकर पर एक मुसलमान उम्मीदवारों के पोस्टर चिपकवाय के दुर्गादास के हत्या करवाय दै है। शहरों में दंगा फैली जाय है। फिरौती माँग के खेयालों से लखिन्दर पहलवान एक मुसलमानों के बच्चा के उठाय लानै है, मजकि सुरमुख दासों के ई जेन्हे मालूम होय है तेन्हे ऊ केन्हों के बचवा के निकाली के ओकरो घोर पहुँचाय ले चली दै है।

रास्ता में दारोगा अमरदेव पासवान मिली जाय है। वे ओकरा पर अपराधों के इल्जाम लगाय के तब तक मारै है, जब ताँय ऊ मरणासन्न नै होय जाय है। तभै सुरमुख दास के अस्पताल पहुँचाय है। वहाँ नर्स के रूपों में नियुक्त बेला सुरमुख के पहचानी लै है। तखनीये अस्पतालों में एक आरो मरणासन्न घायल मरीजों के लानलों जाय है जे कि सुरमुख दास से बहुत अधिक मिलै है। बेला नया मरीजों के सुरमुख के स्थान पर राखी के सुरमुख के आपनों घोर रखी आवै है। भिहाने ताँय नयका मरीज मरी जाय है आरो ओकरहै साथ ई खबर फैली जाय है कि सुरमुख दास के मौत होय गेलै।

फरू पार्टी नेतासिनी के जुटाव हुवे लागै है। हत्यारा के सजाय आरो मृतक के एक लाख रुपया दै के बातों पर आन्दोलन शान्त होय है। हुन्ने, सुरमुख आरो बेला काँहीं आरो जग्घों में चली दै है, जहाँ दोनों साधु आरो साध्वी बनी के जीवन काटे लागै है।

बार-बार अखबारों में सुरमुख के फोटो छपला से दारोगा अमरदेव शक जाहिर करै है कि ऊ स्वामी नै, सुरमुख दासे छेकै। हो-हंगामा होय है। पत्रकार सिनी स्वामी सुरमुख के पास पहुँचै है, मतरकि सुरमुख के साथे बेला भी साफ-साफ इन्कार करी जाय है कि ऊ सुरमुख दास छेकै। आखिर में मैना रानी से सुरमुख के पहचान करवैलों जाय है, मतरकि मैना रानी (सुरमुख के पत्नी) सुरमुखो के पहचान होय गेला पर एक लाख टाका नै मिलै के स्मरण करी के यही बात कहै है कि ई सुरमुख दास नै छेकै। तबे लोगहों मानी लै है कि ई सुरमुख दास नै छेकै। एक्के चेहरा के दू आदमी होला के कारणे एते बड़ों भ्रम होय गेलै। सभै सुरमुख दासों के हमेशे लेली भुलाय दै है।

'हम सुरमुख दास नै छिकियै' अंगिका में हास्य-व्यंग्य के पहिलों उपन्यास छेकै, जेकरों कै-एक पात्र जेना, सरंगपताली, गदल गुरुजी, बिनडोलिया, आपनों-आपनों नामों के पीछू के कथा आरो व्यवहरो के है उपन्यासों में

हास्य-व्यंग्यों के वातावरण बनाय में सफल होलें छै। स्वयं ई उपन्यासों के नायको यै में कम भूमिका नै निभावै छै। सौसे उपन्यासों में ग्रामीण संस्कार, जातिवाद के प्रति नया उत्साह, अपराधनीति के खेल, सांस्कृतिक मूल्यों के विघटन के साथे हृदय पर भौतिकवादी सत्ता के शिकंजा आरनी के यथार्थों के उपन्यासकार विजेता मुद्गलपुरी ने बड़ी नगीच से देखने-उठैने छै। सामाजिक यथार्थ के तिक्तता के उपन्यासकार ने हास्य-व्यंग्यों के छौंक से कम करते गेलें छै। है उपन्यासों के एक अंश नीचे छै,--

“नै महाराज! विवाह के, बियाहो के एगो उमर होय छै। ऊ खतम भे गेलै। साल के अन्तिम लगन पार भेइ गेलै, लेकिन बियाह के कोय संभावना नै बुझैलै। दुर्गादास के लागलै, जेना साँझ के पथ के इँतजार करैत रोगी के धर्मामीटर बुखार करार दै छै ओनाहिये।

फिर बियाह केना भेलै!

महापुरुष के नाम लेइ के वैतरिणी पार करै के चलन आपनों देश में पुरानों छै। एकरे फायदा लेलकै दुर्गादासे, गाँधीजी के अछूतोद्धार-आन्दोलन तखनी जोर पर रहै। दुर्गादास ऊ आन्दोलन में पत्नी-कामना से घुसलै, अछूतोद्धार लेली नै।” (‘नई बात’ ; ४ मई, १९९७ ई०)।

## गुलबिया

‘नई बात’ (दैनिक, भागलपुर) में ८ अप्रैल, १९९७ से धारावाहिक रूपों में प्रकाशित होलें ‘गुलबिया’ श्रीमती आभा पूर्व के तेसरो उपन्यास छेकै, जे कथा-वस्तु आरो शिल्प के दृष्टियों से श्रीमती पूर्व के पहिलकों दुन्नो उपन्यासों से अधिक मजबूती लैके उपस्थित होलें छै।

है उपन्यासों के मुख्य नायिका ‘गुलबिया’ केला-खेतों में काम करैवाली मजूरिन छेकी, जे वही खेतों में एक मजूर बलेसर से आसक्त छै। मालिकों से नै पटला पर जबे बलेसर ऊ खेतों से निकलै छै तें गुलबियो ऊ खेत छोड़ी दै छै आरो बलेसरे के साथ ओकरे केला-खेतों में काम करे लागै छै जेकरा बलेसरे महाजनो से कर्जा लैके शुरू करै छै।

बलेसरो के सफल खेती देखी के ओकरो पहिलकों मालिक सशक्त होय उठै छै आरो बलेसरो के मनोबल के तोरै के खेयालों से गुलबिया के भाय पर दबाव डाली के गुलबिया के बीहा गुलबियो के भाय के साला से

कराय दै छै ! महाजन आरो मालिकों के षड्यंत्रों से हिन्ने बलेसरो के खेती घाटा में लुटी जाय छै ।

हुन्ने गुलबिया ससुरालवाला के यंत्रणा सहला के बादो बलेसर के नै भुलै पारै छै । आपनों उद्देश्यों में सफलता लेली गुलबिया आपनों जीवन आपनों पति आरो ससुरालवाला के अनुकूल करी लै छै । विश्वासों के सबसे बड़ो कारण बनै छै गुलबिया के माय बनी जैबों । यही विश्वासों के लाभ उठाय के एक दिन गुलबिया आपनों पति के साथे आपनों नैहरो चली पड़ै छै ।

नैहरा पहुँचतहँ गुलबिया रास्ते में गाड़ी रोकवावै छै आरो आपनों पति के बच्चा थमाय के गाँवों के मंदिर दिस बढी जाय छै, जहाँ कभियो ऊ आरो बलेसर एक-दोसरा के होय के कसम खैने छेलै । ओकरा विश्वास छै, बलेसर आभियों वहीं होतै, ओकरो इन्तजारी में । बातो वहें छेलै । गुलबिया आपनों साथ लानलों सिनूर के बलेसर के हाथों से आपनों माँगों में डलवाय लै छै, -- भगवानों के साक्षी राखी के । फेनू, दोनों हमेशा-हमेशा लेली आपनों गाँव, आपनों समाजों से दूर होय जाय छै ।

यै उपन्यासों में लेखिका परिवेश-वर्णन आरो पात्र-चित्रण में भाषा-शैली के प्रति बहुत सावधान रहली छै । नीचे भाषा-शैली के एक उदाहरण देखलें जाय --

“मंगरू गेहुँआ रंग, नाटा कद के एक मजदूर छै । बदन भरलों आरो माथा चौड़ा रड छै । माथा पर कारों-कारों घनों बाल । नाक चौड़ा आरो मोटों । ठोर थोड़ों चौड़ा, मतरकि पतरा । आँख बड़ों-बड़ों नै, मतरकि छोटो-छोटो नै । चेहरा पर हरदम हँसी । मनो में एक-टा दंभो कि ऊ कलकत्ता शहर से घुरी ऐलों छै । ओकरो किस्मते साथ देतियै तें वें मजदूरी नै करतियै । जानै छै कि मजदूरसिनी रों की हैसियत होय छै ।”

-- 'नई बात', २२ अप्रिल, १९९७

### मरगांग

'मरगांग' श्रीकेशव के दोसरो अंगिका-उपन्यास छेकै, जेकरो एक बड़ो अंशों के प्रकाशन २८, २९, ३० मई, १९९७ के 'नई बात' में होलों छै ।

'मरगांग' के कथा-वस्तु सम्पूर्ण रूपों से ग्रामीण परिवेशों के घेरते होलों छै, जेकरा में उत्तरी अंग-जनपद (कोशी अंचल) के सामाजिक-सांस्कृतिक परिवेशों

कें चढ़ाव-उतार कें चित्र प्रस्तुत छै। लाल बाबू, है उपन्यासों कें एक पात्र, गाँवों कें एक विशाल, छायादार पीपर गाछ नाखी छै, मतरकि हुनकों बेटासिनी गाछ में खोड़र-कोटर रड सिद्ध होय छै।

लाल बाबू कें बड़का बेटा रघुराम अपनी मास्टरनी कनियाँय कें पीछें बेहाल रहै छै, कनियाँय कें नौकरी जोगै में घरों कें पैसा पदाधिकारी कें पीछें बहैंतें। दोसरो बेटा पुरू हाकिम छेकै, जेकरा पढ़ावै-लिखावै में लाल काकी कें एक-एक गहना बिकी जाय छै, मतरकि हुनी घोर कभिये-कभार आबै छै, वहू पर समय पर कभियो नैं। लाल काका कें मिरतु पर जबें रघुराम ऐलै आरो मुशहरा कें पाँच सौ टाका दैकें जे गाँव छोड़लकै तें कभियो नैं लौटलै।

मुशहरा गाँवों कें एक अजगुत आदमी छेकै। ओकरो गुरु छेकै जंगला जहाज। जंगला छेलै तें अपराधी, मतरकि ऊ गाँवों में भैसवाड़ी आरो कीर्तन आरनी सें सामान्य बनी जाय छै। मतरकि देखतहैं-देखतहैं वें आपनों पापों में सौसे गाँवों कें समेटी लै छै। जात-पाँत कें भेद-विभेदों कें बिण्डोवों उड़ें लागै छै। समाजों कें रिस्ता विखरी जाय छै।

लाल काकी कें तेसरो लड़का मनु, जेकरो महत्व ई उपन्यासों में बहुत छै, आधुनिक जीवन-जगत कें सच्चाई समझतें हुवें आखिर आपनों मांटी पकड़ी लै छै, जे मांटी कि कभियो नैं मरे छै, सृजन जेकरो धर्म छेकै।

'मरगांग' भारतीय समृद्ध गाँवों कें बनी गेलों आयकों दुर्दशा कें भयावह चित्रे छेकै, जे में मरगांग कें 'गांग' (गंगा) बनावै कें संदेश उपन्यासकार नें ई उपन्यासों कें माध्यम सें प्रस्तुत करने छै। ओकरो एक अंशों कें बानगी लेलों जाय--

"बाबू नें भी कहने रहै - 'नूनू, गंगा की कहियो मरै छै ? कहियो नैं। बस, हमरो-तोरो पापों सें डोम-डाबर बनी जाय छै ; ..... मरियो कें गंगे रहै छै। तुलसी कें पता छोटों चाहे बड़ों हुएँ, तुलसीये रहै छै ; आपनों धरमों सें आदमी कें धरम छेकै जीना आरो दोसरहौ कें जीये देना।'"

## पियावासा

'पियावासा' प्रसिद्ध गीतकार श्रीराम शर्मा 'अनल' कें उपन्यास छेकै, जेकरो कथा-वस्तु प्रेम आरो सामाजिक आदर्शों कें ताना-भरनी सें तैयार करलें गेलें छै।

रूपों, जे कि ई उपन्यासों के मुख्य नायिका छेकै, आपनों कलाकार भाय के संरक्षण उठहैं गाँवों के एक क्रूर व्यक्ति के शिकार होतें-होतें तबे बचै छै जबे वहे गाँव के गुरुजी ओकरो अपनी बेटी बनाय के घोर लै आनै छै। गाम्हे के एक समृद्ध ब्राह्मण परिवारों के लड़का अमर, जे बाहर से डाक्टरी पढ़ी के लौटलें छै, रूपो के शील-गुण के कारण ओकरा मनो से आपनों मानै छै, मतरकि जातीय कुलीनता-अकुलीनता के कारणे रूपो के शादी अमर से नै होय के एक हेनो लड़का से होय छै जे रूपों के मानसिक यंत्रणा के साथे शारीरिक यंत्रणाओ पहुँचाय छै।

विवश होय के रूपो अपनी दयालु-सास के सहयोगों से फिरू गुरुजी के घोर लौटी आबै छै।

आपनों पिता के मृत्यु के बाद अमर, जे कि रूपो द्वारा देलें जन-सेवा ले जमीन पर अस्पताल चलाय रहलें छेलै, रूपो के सब हालत से परिचित होय के ओकरा से आपनों बीहा के प्रस्ताव राखै छै। अमर के माय्यो के पै में स्वीकृति होला के कारणे रूपो आरो अमर विवाह-बंधनों में बँधी जाय छै।

'पियावासा' आपनों शीर्षकों से लैके आखिर तक प्रेम-संवेदना से संचालित होतें उपन्यास छेकै, जेकरों पूरा-पूरा प्रभाव उपन्यास-भाषाओ पर देखलें जावें सकें छै। कवि-व्यक्तित्वे के ई दबाव छेकै कि वै उपन्यासों में प्रकृति के ग्राम्य वैभव यहाँ आपनों विराटता में ऐलें छै।

## केन्द्रावती

शिल्प आरो विषय-वस्तु के दृष्टि से विवेकानन्द श्र-कृत उपन्यास 'केन्द्रावती' आधुनिक अंगिका गद्य के एक उल्लेखनीय कृति छेकै। सम्पूर्ण रूपों से अप्रकाशित है उपन्यासों में केन्द्रीय कारा के उपन्यासकार विवेकानन्द जी ने नायिका के रूपों में चित्रित करने छै, जे कि कोय अभिशापवश आपनों बिछुड़लें नायकों के आगमन में चिर-प्रतीक्षारत छै। वही क्रम में जबे कोय नया अपराधी आवै छै तें केन्द्रावती ओकरो परिचय जानै ले व्यग्र होय जाय छै। येहें ढंगों से शुरू होलें गेलें छै एक अपराध-कथा के बाद दोसरो अपराध-वृत्तान्तों के शृंखला।

ई उपन्यासों के अंत भारतीय चिन्तन में विश्वात्मा-दर्शन से होय छै, जेकरों दर्शनों के प्रतीक्षा केन्द्रावती के छै।

लोक-कथा-लेखन रूढ़ि के स्पर्श से रोमांचित-स्पन्दित ई उपन्यासे जहाँ आधुनिक समाजों के अपराध-मनोविज्ञान के समक्ष राखै छै वहाँ भारत में कारा-व्यवस्था के इतिहासो कहै में ई कृति साहित्यिक रूपों में सफल छै।



उपन्यासकार के स्वयं न्यायाधीश होला के कारणे केन्द्रावती आपनों केन्द्रीय लक्ष्य के पूर्ति में सफल रहलें छै, ई कहलें जैतै ।

\*\*\*

१९९५ ई० से १९९७ ई० के बीच देवेन्द्र, सुधाकर आरो अनिरुद्ध प्रसाद विमल के भी आपनों-आपनों अंगिका-उपन्यासों के अंश-पाठ गोष्ठीसिनी में होत रहलें छै । वैसिनी अंश-पाठों के आधारों पर कहलें जावें सकै छै कि ई तीनों उपन्यासकारों के उपन्यास नया समाजों के खाली परिवर्तित सामाजिक दशाये के चित्रित नै करै छै, बलुक पात्र-चित्रण में उपन्यासकारसिनी ने जौन मनोवैज्ञानिक शैली के स्वीकार करने छै वै से ई-सब उपन्यासों के आधुनिक कृति होय के श्रेष्ठता मिलतै ।

पिछलका कुछेक दशकों से अंगिका में उपन्यास-लेखन के प्रवृत्ति बड़ी तेजी से बढ़लें छै । विषय के दृष्टि से अगर ई-सब उपन्यासों के वैयक्तिक आरो सामाजिक वर्गों के भीतर राखलें जैतै तें शैली के दृष्टि से वैसिनी में सर्वश्री अनूपलाल मंडल, अनिरुद्ध प्रभास, श्रीकेशव, सुमन सूरु, देवेन्द्र, आभा पूर्वे, अनिरुद्ध प्रसाद विमल, सुधाकर, परशुराम ठाकुर 'ब्रह्मवादी', विजेता मुद्गलपुरी, अमरेन्द्र आरनी के अंगिका-उपन्यासों में यथार्थवादी, मनोवैज्ञानिक, चेतनप्रवाह, प्रत्यक्षज्ञान, फोटोग्राफिक आरनी अनेक आधुनिक कथा-शैली के चरम विकास मिलै छै । डायरी, पत्र, आत्मकथा-शैलियो के कलात्मक नियोग यै-सब उपन्यासों के एक वयस्क रूप प्रदान करै छै, यै में कोय वाद-विवाद के गुंजाइश नै छै ।

अंगिका के उपन्यास-साहित्यों के एक विशेष खासियत ई छेकै कि यै में खाली यथार्थ-चित्रण के नामों पर सामाजिक कूड़ा-कर्कट उठाय के राखै के प्रयास नै भेलें छै ; बल्कि ओकरो जगघों पर वैसिनी उपन्यासों में ऊ जीवन-द्रवों के दूबै के पुनर्प्रयास मिलै छै, जै से साहित्यों के कालजयी स्वरूप मिलै छै ।

अंगिका उपन्यासों के एक आरो उल्लेखनीय पक्ष ई छेकै कि अधिकांश उपन्यासों में नारी के एक खास विराटता में उभारै के कोशिश छै । चाहे ऊ आभा पूर्वे के 'परबतिया' हुवे या 'अन्तहीन वैतरिणी' आकि 'गुलबिया', सुमन सूरु के 'सुभद्रांगी' हुवे आकि श्रीकेशव के 'तुलसी मंजरी', अनिरुद्ध प्रभास के 'छाहुर' हुवे आकि अमरेन्द्र के 'जटायु' उपन्यास, सबमें स्त्री के विराट् स्वरूप प्राप्त छै । की ई सायास छेकै आकि अनायास ? अंगदेश आखिर पुराण-काल्हौ में 'स्त्री-देश' के नामों से विख्यात रहलें छै ।

## सेतुबंध

'सेतुबंध' डॉ० सीताराम शर्मा के लिखले उपन्यास छेकै जे कि पाण्डुलिपिये में पड़लें छै, मतरकि एकरों कुछ प्रकाशित अंश देखैलें मिललें छै। ई अमरपुर अंचलों के भूगोल पर घटित होयवाला दू युवक-युवती के कहानी छेकै जे कि आपनों सामाजिक काम आरो नैसर्गिक सहयोगों से वै अंचलों के नया स्वरूप दै में सक्षम होय छै आरो यै तरह से समाजों के आदर्श बनी जाय छै। यै उपन्यासों के भाषा साहित्यिक आरो उद्देश्य के अनुकूल पात्रों के चरित्र-चित्रण आरो विचार-प्रतिपादन में उपन्यासकार शर्मा जी सतत सावधान देखलें जाय छै।

## नाटक

आधुनिक समयों में अंगिका नाटकों के मंचीय आरो रेडियोधर्मी दोनों रूपों के विकास मिलै छै ; मजकि है बात सही छै कि आय जत्ते अंगिका के रेडियो-नाटकों के लोकप्रियता आरो समृद्ध विकास हासिल छै, ओत्ते मंचीय नाटकों के प्राप्त नै हुवे पारी रहलें छै। एकरों एक मुख्य कारण छेकै - रेडियो आरो दूरदर्शनों के दबाव। मंचीय नाटकों के लेली अरुचि के एक कारण आदमी के व्यस्तताओ से इन्कार नै करलें जावे सकै छै। फेरू, अर्थ आरो विस्तृत यश-लाभ के दृष्टियो से रेडियो-नाटक एक नाटककार वास्ते जत्ते उपयोगी सिद्ध होलें छै, ओत्ते आय मंचीय नाटकों से संभव नै रही गेलें छै। यहे कारण छै कि आधुनिक समयों में जत्ते रेडियो-नाटकों के लेखन-विकास हुवे पारलें छै, ओत्ते मंचीय नाटकों के नै होलें छै।

## रेडियो-नाटक

रेडियो-नाटक ध्वनि-नाटक छेकै; कैन्हें कि नाटकों के ई शैली सौसे रूपों से ध्वनिये पर आधारित होय छै। यै लेली रेडियो-नाटक आपनों रूप-स्वरूप में दृश्य याने मंचीय नाटकों से बहुत अधिक भिन्नता लेलें रहै छै।

सबसे पहिले तें ई कि रेडियो-नाटक पूर्णतः श्रव्य नाटक छेकै ; यहाँ आँखों के नै, खाली कानों के उपयोग होय छै। यही कारणे रेडियो-नाटकों में दृश्य-नाटक नाखी नै तें आंगिक अभिनय करतें पात्रों के देखैलें जावे सकै छै, नै तें वातावरण आकि परिवेशों के जानकारी ले दृश्य-विधाने करलें जावे सकै छै,

नै तें पात्रों के भेष-भूषाये दर्शौलें जावें पारें, जबें कि मंचीय नाटकों में ई-सबके सुविधा से उपयोग होय छै।

है अंतरों के साथे-साथ आरो कुछ खास अन्तर छै रेडियो आरो मंचीय नाटकों में ; जेनाकि, मंचीय नाटकों में नाटककारें जे रड ढेर पात्रों के उपयोग करी लै छै, आकि करी लियै पारें छै - सबके अलग-अलग पहचान सुरक्षित रखतें हुएँ - ऊ रेडियो-नाटकों में असंभव छै। यही लेली बड़ों-सें बड़ों रेडियो-नाटकों में पात्रों के संख्या सीमिते होय छै। यहू बात छै कि मंचीय नाटकों में कै-एक पात्र एक साथे हाजिर हुवें पारै छै, मजकि रेडियो-नाटकों में है कहाँ संभव छै ? यहाँ तें गिनलौं-गुंथलौं पात्र बारी-बारी सें आबै-जाय छै। श्रोता के, पात्र-ग्रहण लेली, है बहुत जरूरी छै।

रेडियो-नाटकों में पात्रसिनी के संख्या कम होय छै, यै लेली ओकरों कथा-वस्तुओ मंचीय नाटक नाखी लम्बा-चौड़ा आरो उलझाववाला नै होय छै, नै हुवें पारें। बड़ों-सें-बड़ों रेडियो-नाटक आधों घंटा के होय छै, अपवाद छोड़ी के। जों रेडियो-नाटकों के कथा-वस्तु अपवाद वाला होतै आरो सरल नै, तें ऊ श्रोता पर आपनों अपेक्षित प्रभाव नै छोड़ें पारतै। रेडियो-नाटकों में पेचीदा कथावस्तु के उठावै के जगहों में नाटककारों के मुख्य जोर पात्र आरो कथावस्तु के मनोवैज्ञानिक रूपों पर ज्यादा केन्द्रित रहै छै। लगभग सब अच्छा रेडियो-नाटकों में है खूबी जरूरे विराजमान रहै छै।

यहाँ रेडियो-नाटकों के ऊ खासियतो पर थोड़ों विचारी लेबों जरूरी होतै जे कि मंचीय नाटकों के नसीबों नै छै। रेडियो-नाटकों में जोंन ढंगों से गतिशील दृश्यों के देखलैलें जावें सकै छै, होनों मंचीय नाटकों में नै ; आरो, नै तें मंचीय नाटकों के ऊ सुविधे प्राप्त छै कि वहाँ सभ्भे रडों के दृश्य देखलैलें जावें सकें ; जेना कि कोय समुद्र, कोय नदी आकि नदी में चलतें नाव आरो समुद्र में उठतें ज्वार के, जोंन कि रेडियो-नाटकों में खाली ध्वनि के प्रभावों से आसानी से उपस्थित करै सकै छै।

ध्वनि रेडियो-नाटकों के प्राण होय छै आरो ध्वनिये के कुशल प्रभावों से रेडियो-नाटककार नै खाली दृश्य के रूप दै छै, बलुक दृश्योतर विधानो ध्वनिये पर आश्रित होय छै। यही से रेडियो-नाटक पूर्णरूपेण ध्वनि-नाटक होय छै।

अंगिका में रेडियो-नाटकों के शुरूआत रेडियो-रूपक 'अंगिका अंग लगेबै' (अमरेन्द्र) के प्रसारण से होय छै, जे कि पहिलों बेर १ सितम्बर, १९८२ ई० में प्रसारित करलें गेलें छेलै। अंग-जनपदों के इतिहास आरो भूगोल

कें तथ्यों पर आधारित ई रेडियो-रूपक तत्कालीन कार्यक्रम अधिशासी श्री सुरेन्द्र अग्रवाल कें प्रस्तुति में छेलै। ३० सितम्बर, १९८२ ई० में श्री उमेश कें रेडियो-नाटक 'बरतुहारी' कें प्रस्तुति श्री वीरेन्द्र शुक्ल जी करनें छेलात।

है रूपकों कें बाद रेडियो-नाटकों कें ढेरे प्रकार श्रोता कें सम्मुख ऐलै। वै में रेडियो-नाटक, रेडियो-रूपान्तर, संगीत-रूपक आरनी प्रमुख छै। यहू में कोय शक नै कि रेडियो-नाटकों कें विकास में जौन लेखकों कें खास योगदान रहलौ छै, हुनकासिनी में श्री आमोद कुमार मिश्र आरो श्री सत्य नारायण प्रकाश मुख्य छेकात। आमोद कुमार मिश्र जी कें आकाशवाणी, भागलपुर से प्रसारित होलौ नाटक छेकै - 'फुसरी', 'भोज खाय कें चस्का', 'राम-रहीम'। धारावाहिक रूपों में प्रस्तुत आमोद कुमार मिश्र जी कें रेडियो-नाटक 'जागी उठलै गाँव' बहुत लोकप्रिय रेडियो-नाटक छेकै जेकरों प्रस्तुति तेरह भागों में श्री वीरेन्द्र शुक्ल नै करलें छेलात। श्री वीरेन्द्र शुक्ले कें प्रस्तुति में डॉ० नवल किशोर सिंह कें तेरो खंडवाला धारावाहिक रेडियो-नाटक प्रसारित होलौ छेलै। सात भागों में विभाजित डॉ० रामप्रवेश सिंह कें रेडियो-नाटक 'नयका बिहान' भी वै परंपरा कें मजबूत नाटक छेकै।

रेडियो-नाटक साहित्यों कें श्रीवृद्धि में दोसरो प्रमुख नाम छेकै -- श्री सत्यनारायण प्रकाश। अब ताँय हिनकों कै-एक लोकप्रिय अंगिका नाटकों कें प्रसारण आकाशवाणी, भागलपुरों से करलौ गेलौ छै, 'अंगिया' (अगस्त, ९१), 'बड़का जिलेबी' (दिसम्बर, ९४), 'पुसभत्ता' (दिसम्बर, ९५), 'नया सुरुज' (मार्च, ९६), 'आबें कहियो नै भुलैबै' (फरवरी, ९७), 'सोचै कें फेर' (१९९७)। हैसिनी रेडियो-नाटकों कें अतिरिक्त १९९७ ई० कें अगस्त से डॉ० राम प्रवेश सिंह कें लिखलौ धारावाहिक रेडियो-नाटक 'नयका बिहान' कें प्रसारण करलौ गेलै। भागलपुर आकाशवाणी से प्रसारित कुछ आरो चर्चित रेडियो-नाटकों में -- 'धूरन पंडित' (रीता झा), 'दुलरिया' (शिवशंकर साह), 'नया समाज' (अजीत दास), 'नयका बिहान' (रामेश्वर प्रसाद सिंह) प्रमुख छै।

प्रमुख रेडियो-नाटकों से अलग रूपान्तरित रेडियो-नाटक-लेखन कें विकास जोरो पर छै। आकाशवाणी, भागलपुर से प्रसारित प्रेमचन्द्र कें कहानी 'पूस की रात' आरो 'पंच-परमेश्वर' कें रेडियो-रूपान्तर काफी लोकप्रिय रहलै। डॉ० अमरेन्द्र आरो श्री जय प्रकाश मिश्र रो रेडियो-रूपान्तर क्रमशः 'पूस कें रात' (जून, ९२) आरो 'पंच-परमेश्वर' केरो प्रसारण १९९२ ई० में करलौ गेलौ छेलै।

रेडियो-रूपान्तर वास्ते ई बहुत जरूरी छै कि मूल कथा के निर्वाह के साथे-साथ ओकरों मुख्य पात्रों के रक्षा हुवे, आरो ऊ स्थलों के प्रमुखता मिले जे कि संवेदना के दृष्टि से बडी महत्व के होय छै। ऊपर के दोनों रूपान्तरित नाटकों में एकरों मजबूती से निर्वाह होलों छै ; मतरकि 'पूस के रात' में रूपान्तरकार ने आवश्यकतानुसार गीत आरो नया संवादों के योजना से कहानी के नाटक रूपों के कुछ आरो निखारें पारलें छै। ई बात सही छेकै कि रेडियो-नाटक कोय कहानी या उपन्यासों के रेडियो रूप ही होय छै, मतरकि रूपान्तरकारें जबें कहानी आकि उपन्यासों के रेडियो के लायक बनाय छै तबें एकरों रचना-प्रक्रिया जे होय छै ऊ रूपान्तर के मौलिक रचना-प्रक्रिया होला के कारणें मूल कृति आपनों नया स्वाद के साथें श्रोता के सामने आवै छै। 'पूस के रात' आरो 'पंच-परमेश्वर' रेडियो-रूपान्तर ई बातों के सबूत रड रहलें छै। समय-समय पर भागलपुर केन्द्रे से अंगिका के साथे-साथे हिंदी में 'झलकियाँ' के प्रस्तुतियो बहुत लोकप्रिय होलों छै। 'झलकियाँ' रेडियो-नाटकों के लिखित आरो अलिखित रेडियो-भेद मानबों ठीक होतै। अंगिका रेडियो-नाटकों के मुख्य तीन प्रकार आकाशवाणी के भागलपुर केन्द्र से प्रसारित होतें रहलें छै जे कि रूपक, गंभीर प्रहसन, रूपान्तर-नाटक झलकियाँ के भेदों में आवै छै। श्री सत्यनारायण प्रकाश आरो श्री आमोद कुमार मिश्र के कै-एक रेडियो-नाटक प्रहसनों के सुन्दर रूप प्रस्तुत करै छै।

रेडियो के सीमै के कारणें विषय-वस्तु के दृष्टि से अंगिका रेडियो-नाटकों के विभिन्न भेद मिलै छै। ज्यादातर हेनों नाटक सामाजिक-आर्थिक आरो समस्या-प्रधान छै ; मतरकि मौका पैहें नाटककार राजनीतिक विसंगति पर चोटो करै में नै चुकलें छै। सब्भे प्रकारों के रेडियो-नाटकों के देखला से एक कंडिका में ई कहलें जावें सकै छै कि अंगिका के रेडियो-नाटककार रेडियो के सीमा से बाधित होतें रहतहैं आपनों रचनात्मकता के क्रियाशील बनैलें राखने छै, जेकरा से कोय रचनाकार आपनों समयों के आरो समयों के गति दैवाला भी होय छै।

## रंगमंचीय गद्य-नाटक

अंगिका रेडियो-नाटकों के तुलना में प्रकाशित रंगमंचीय नाटकों के संख्या बहुत कम छै। अबें हेकरों समृद्धि ले रेडियो-नाटके के रंगमंचीय नाटकों में बदली के प्रकाशित करैलें जाय रहलें छै। हेकरों आवश्यकता पै लेली भी होय

गेलों छेलै कि अंग-जनपदों के पिछड़लों इलाकासिनी में वैसिनी के मंचनों से नया वैज्ञानिक सोचों के रास्ता खोललों जावें सकें।

हेना के तें अंगिका भाषा में लोक-नाटकों के एक समृद्ध परम्परा मिलै छै। रामलीला, रासलीला, जातरा, नौटंकी, भगैत, डोमकच, जट-जटिन, सामा-चकेवा, जोगिड़ा आरनी हेन्हें लोकप्रिय अंगिका लोक-नाटक छेकै, मतरकि हेनों नाटकों में गद्य के छिटपुट प्रयोग होला के बादो वैसिनी सम्पूर्ण रूपों से गीति-लोक-नाटकों के उदाहरण छेकै। लोक-गीति-नाट्यों से प्रेरित होय के श्री नरेश पाण्डेय 'चकोर' के 'श्रीरामजन्मोत्सव' आरो श्री गोपालकृष्ण 'प्रज्ञ' के 'रोही दास' - हेनों गीति-नाट्यो आधुनिक काल में लिखलों गेलों छै।

आधुनिक अंगिका के अधिकांश गद्य-नाटक घोर आर्थिक संकट आरो सरकारी उपेक्षा के कारणे अमुद्रित रूपे में पड़लों होलों छै। हेनों नाटकों के मंचन समय-समय पर अवश्य होने रहलौ छै, मतरकि वैसिनी के मुद्रित रूप नै होला के कारणे व्यवस्थित ढंगों से वैसिनी के मूल्यांकन करबों मुश्किल छै। हेनों नाटकों में श्री राधाकृष्ण चौधरी के 'बलिदान', श्री उमेशजी के 'दलालों के जाल', डॉ० परमानन्द पाण्डेय के 'माँटी आरो सोना', श्री जगदीश पाठक 'मधुकर' के 'बखेरा', श्री अनिरुद्ध प्रसाद विमल के 'चमोकन' आरो 'मुखिया जी', श्री अश्विनी कुमार के 'जंगल रों हाँक' आरो 'डेगें-ड., पेत', श्री मनोज कुमार 'पंकज' के 'घुरी चलों आपनों गाँव', श्री प्रदीप प्रभात के 'नया बिहान लाना छै', श्री जनार्दन के 'महात्मा बुद्ध', 'भगवान महावीर' आरो 'स्वामी विवेकानन्द', श्री अनिरुद्ध प्रसाद विमल के 'नदी रों मोड़', श्री जयप्रकाश जयी के 'अंगिया', 'आहुति' आरो 'हमरो समाज', श्री उदय आरो श्री ललन के संयुक्त लेखन में लिखलों 'फेरी के फेरा' आरनी ये लेली उल्लेखनीय छै कि ई-सब नाटकों के मंचन दर्शकों के बान्है में सफल सिद्ध होलों छै।

मतरकि सर्वश्री सुमन सूरु, सच्चिदानंद श्रीस्नेही, भारती, अनिरुद्ध प्रभास, प्रो० कमला प्रसाद बेखबर', डॉ० तेजनारायण कुशवाहा, प्रभाष चन्द्र झा 'मतवाला', पी० एन० जायसवाल, डॉ० विजय, विजेता मुद्गलपुरी आरनी रचनाकारों के पांडुलिपि के रूपों में पड़लों नाटकों के मंचनों, मंचों के अभाव के कारणे, नै हुवें पारलें छै, जेकरों कारणे अंगिका केरों अधिकांश गद्य-नाटक गोष्ठी में पठन-पाठन के चीज-भर बनी के रही गेलों छै।

तैयो, हेनों बात नै छै कि आय अंगिका में आधुनिक नाटकों के सृजन के प्रति लेखकसिनी में उदासीनता छै, बल्कि ई बात बिना शिझक के कहलों जाबें

सकै छै कि आधुनिक फिल्म आकि नौटंकी के नंगई के प्रति दर्शकसिनी में रुझान के देखते हुवें श्रेष्ठ नाटकों के सृजन के जग्घा में आय अंगिका में सामान्य नाटको लिखलें गेलें छै।

अंगिका गद्य-नाटकों के प्रकाशन १९६० ई० के बाद हुवें लागै छै। श्री नरेश पाण्डेय 'चकोर' के किसान के जगावों' आरो 'सर्वोदय समाज' के प्रकाशन १९६१ ई० आरो १९६३ ई० में होलै। दोनों नाटक सामाजिक समस्या से जुडलें आरो सामाजिक जड़ता के विरोध में नवचेतना के समृद्ध करैवाला छेकै। किसान के जगावों' एक अंकों के आरो 'सर्वोदय समाज' तीन अंकों के शिल्प से गठित नाटक छेकै, जै में गीत-योजना के परम्पराओ संयोजित छै। अंगिका गद्य-नाटकों के बहुमुखी विकास में श्री नरेश पाण्डेय 'चकोर' के भूमिका असंदिग्ध छै। १९६३ ई० आरो १९६४ ई० में 'चकोर' जी के ही 'कोर नै तें डोर की?' आरो देश के खातिर मजदूर के त्याग' एकांकी प्रकाशित होलै। देशभक्ति से प्रभावित ई दोनों एकांकी केरों प्रकाशन पटना से प्रकाशित 'जन-जीवन' में करलें गेलें छेलै।

१९७० ई० आरो १९७१ ई० के 'अंग-माधुरी' में प्रकाशित प्रसिद्ध रेडियो-नाटककार श्री जनार्दन राय के क्रमशः 'जात आरो भात' तथा 'उधो-माघो के बात' के प्रकाशन होलें छै, जे नाटक के शिल्प में नै होला के बादो ई दोनों वार्ता संवादाधारित छै, यही से नाट्य-कृति होय में शक नै करलें जावें सकें। वार्ता में संवादों के आयोजन सशक्त नाटकों के संवाद छेकै।

अंगिका के आधुनिक गद्य-नाटकों के इतिहास मुख्यतः एकांकी नाटकों के ही इतिहास छेकै आरो ई इतिहास के समृद्ध करै में निर्विवाद रूपों से श्री राधाकृष्ण चौधरी के योगदान ऐतिहासिक रहलें छै। खास करी के एकालाप शैली के नाटकों के आधुनिक अंगिका में लोकप्रिय करै के श्रेय राधाकृष्ण चौधरी जी के ही छै। 'उद्गार' (१९७३), 'पछतावा' (१९७४) आरो १९७६ ई० में प्रकाशित 'पैरवी' हिनको बहुलोकप्रिय एकालाप शिल्प के एकांकी नाटक छेकै। 'पछतावा' में एकांकीकार ने हास्य-व्यंग्यों के बीच नया समाजों के परिवर्तित मनोविज्ञान के जे ढंगों से राखनै छै, ऊ निःसन्देह चौधरी जी के पकलें नाट्यानुभूति के प्रमाण दै छै।

१९७७ ई० में श्री उमेश के प्रसिद्ध प्रहसन 'तीरथ-जातरा' के प्रकाशन होलै तें १९७९ ई० में श्री जगदीश पाठक 'मधुकर'-कृत 'राष्ट्र के सपूत' ऐलै। 'तीरथ-जातरा' विशुद्ध हास-परिहास के नाटक छेकै, जबकि 'राष्ट्र के सपूत'

सिकन्दर आरो पोरस के युद्ध-संवाद पर आधारित लघु ऐतिहासिक एकांकी। १९८२ ई० आरो १९८९ ई० में सामाजिक अभिशाप दहेज के विषय लैके श्री भुवनेश्वर भारती के चार दृश्यों में विभाजित 'दहेज के दहाड़' के प्रकाशन होलै आरो १९८७ ई० में बहुचर्चित उपन्यासकार श्री अनिरुद्ध प्रभास के ऐतिहासिक नाटक 'चम्पा के राजकन्या' के।

अनिरुद्ध प्रभास के है नाटकों के महत्व नै खाली नाटक के सुगठित शिल्प के कारणे छै, बलुक तीर्थकर महावीरकालीन अंग-जनपदों के सामाजिक, राजनीतिक, आर्थिक आरो धार्मिक स्थितिये के दर्शावे में ई पूर्णतः सक्षम छै। तीन अंकों में विभाजित 'चम्पा के राजकन्या' अगेदश के राजकन्या वसुमति के जीवन-कथा पर आधारित ऐतिहासिक नाटक छेकै, जेकरों पूर्णता में नाटककार नें आपनों कल्पनाओ के कलात्मक सहयोग लेने छै। फरू, पाँच दृश्यों में बद्ध श्री बैकुण्ठ बिहारी-कृत 'लहुवों से महँगों सिनूर' एकांकी प्रकाशित मिलै छै। राजनीतिक-सामाजिक विसंगति के लैके १९९४ ई० में अनिरुद्ध प्रसाद विमल के नाटक 'साँप' के प्रकाशन भेलै, जेकरा में नाटककार विमल नें शैक्षिक, सामाजिक आर्थिक आरो धार्मिक विसंगति पर परिहासात्मक प्रहारों से 'साँप' के व्यंग्य-शैली दैके अतिरिक्त हेकरा लोक आरो चौराहा नाटकों के आधुनिक शिल्पों में गढलें छै। सामाजिक समस्यासिनी पर ही आधारित रेडियो-नाटकों के संग्रह 'मुठिया चाउर' के प्रकाशन १९९५ ई० में होलें छै, जेकरा में श्री आमोद कुमार मिश्र के पाँच-टा रेडियो-एकांकी, क्रमशः 'मुठिया चाउर', 'राम-रहीम', 'फुसरी', 'भोज खाय के चस्का' आरो 'निनान', संग्रहित छै।

हास्य-व्यंग्यों के पाँच-टा एकांकी के लैके डॉ० अमेरन्द्र के संग्रह 'पंचगव्य' के प्रकाशन १९९७ ई० में होलें छै, जे में 'मतदान', 'दहेज', 'अंधविश्वास', 'प्रौढ़ शिक्षा' आरो 'नारी शिक्षा' विषयों पर आधारित एकांकीकारों के क्रमशः 'करनी-भरनी', 'साथे-साथ', 'कलयुग रों सत्त', 'पुरानों भूत', 'नया इलाज', 'सा विद्या या विमुक्तये' आरो 'मुठ्ठी में धूभ' एकांकी संकलित छै। १९९७ ई० में ही श्री सोहन प्रसाद चौबे के लिखलें एकांकी 'शहीद सतीश आ' के प्रकाशनों भेलें मिलै छै।

जाहिर छै कि आधुनिक गद्य-साहित्यों में जत्ते एकांकी के सृजन होलें छै ओत्ते संपूर्ण नाटकों के नै होलें छै। 'किसान के जगावों', 'सर्वोदय समाज', 'चम्पा के राजकन्या' आरो 'साँप' - येहें चार नाटक हेनो कृति छेकै जे नाट्य-भेद - 'नाटक' - के भीतर आवै छै। बाकी सब एकांकी नाटकों के ही



रूप राखैवाला छेकै।

यहू में कोय शक नै कि एकांकी-लेखन के क्षेत्रों में अधिकांश अंगिका-नाटककार नै आपनों प्रौढ नाट्य-प्रतिभा के परिचय देने छै। एकांकी, जे कि मानव-जीवनों के कोय एक रास्ता, एक चरित्र, एक कार्य, एक भावों के कलात्मक अभिव्यंजना होय छै, ओकरो लें यहें काफी नै छै कि एकरा में एक्के अंक होना चाहियों, बलुक नाटकों के ई 'प्रकार' लें यहू जरूरी छै कि एकांकी उद्देश्य-प्रधान जरूर हुवें आरो ओकरो कथा-वस्तु विस्तृत नै रहें। एकांकी के कार्यारम्भ आरो कार्यान्त में कुछुवें-दूरी के अन्तर रहै छै। एक उत्कृष्ट एकांकी के पहचान ओकरो परिहास आरो व्यंग्यपूर्ण होय में भी होय छै। ई सर्वमान्य बात छेकै कि परिहास एकांकी के ज्योति छेकै, जेकरो नियोजन एक सावधान नाटककारे आपनों एकांकी में अवश्य करै छै। कथा-वस्तु के संक्षिप्तता, हास्य के संयोग, पात्र-विस्तार के अभाव आरो उद्देश्य के उपस्थिति -- एक श्रेष्ठ एकांकी के पहचान कहलौ जैतै।

यै में कोय शक नै कि आधुनिक युगों में कहानी नाखी एकांकी के महत्व के समझते हुवें अंगिका नाटककारसिनी नै एकांकी-साहित्यों के उत्कर्ष में काफी योग देने छै। खास करी के सर्वश्री राधाकृष्ण चौधरी, आमोद कुमार मिश्र, जगदीश पाठक 'मधुकर', सत्यनारायण प्रकाश, अनिरुद्ध प्रसाद विमल, अश्विनी कुमार, बैकुण्ठ बिहारी, जनार्दन, खुशीलाल आरनी यै दिशा में विशिष्ट सजा एकांकीकारों के रूपों में आवै छै।

ई-सब अंगिका एकांकीकारों के एकांकी नाटकों में कोय-ने-कोय सामाजिक, आर्थिक, नैतिक, शैक्षिक आकि राजनीतिक उद्देश्य अवश्य विद्यमान छै। जहाँ श्री राधाकृष्ण चौधरी नै आपनों एकांकी के एके दृश्य विधान के साथें उपस्थित करने छै, वहाँ आरोसिनी एकांकीकारों के रचना में ई दृश्य तीन सें लैके पाँच तक मिलै छै। कहै के जरूरत नै छै कि ई बहुदृश्य-विधानों सें कथा में वक्रता के समायोजन सहज ही समाविष्ट होय गेलों छै। सर्वश्री जगदीश पाठक 'मधुकर', राधाकृष्ण चौधरी, अनिरुद्ध प्रसाद विमल, आमोद कुमार मिश्र, सत्यनारायण प्रकाश, मनोज कुमार 'पंकज', अमरेन्द्र आरनी आपनों एकांकी में हास्य-परिहास लें अलग से कोय विदूषक के नै राखलें छै, बल्कि एकांकिये के कोय पात्र आपनों विदूषक-कृति सें, एकांकी में परिहास के माहौल गढ़लें छै। ईसिनी एकांकीकारों के पात्र आपनों संस्कार-परिवेशों के अनुसार संवाद बोलते पात्र छेकै, जे अधिक संख्या में अभिजात-कुलों सें नै, मध्यवर्गीय आरो निम्नवर्गीय

कुलों से आवै है।

आधुनिक समयों के अंगिका साहित्यों में नाटकों के विभिन्न प्रकारों के प्रचलन धीरे-धीरे बढ़ी रहलें है। प्रकरण, भाण, वीथी, प्रहसन आदि के लोकप्रियता तें यहाँ काफी देखलें जावें सकै है। नाटक लिखै के ओर अनेक नाटककार प्रवृत्त होलें है। नाटक, जे कि काव्य के सब गुणों से सम्पन्न होय है, के प्रकाशन आरों मंचन अंधकार में ही है। हालाँकि आय 'नाटक' के परिभाषा बदली गेलें है, जेकरों लें पात्रों के अलौकिकता, कुलीनता आरनी जरूरी नै रही गेलें है आरों यै में प्रायः तीन अंक के होबें काफी है। एकरों मोताबिक सर्वश्री नरेश पाण्डेय 'चकोर', अनिरुद्ध प्रभास, अनिरुद्ध प्रसाद विमल आरनी के कुछेक नाटक प्रकाशित हुवें पारलें है।

हेकरा से ई विश्वास बढ़ै है कि निकट भविष्य में, सरकारी मददों के सम्पूर्ण अभाव में भी, अंगिका नाटककारसिनी ने सहयोगी आर्थिक आधारों पर जेन ढंगों से नाटक-प्रकाशन पर ध्यान देने है, वै से नै खाली मौलिक नाटकों के प्रकाशन होय जैतै, बल्कि अनुवादित नाटकों के एक समृद्ध भंडारो अंगिका-साहित्य के पास होतै। आय मौलिक नाटकों के सृजन आरों प्रकाशन के साथे-साथ अंगिका में संस्कृत आरों हिंदी नाटकों के अनुवादों के प्रवृत्तियो विकसित होलें है। ई दिशा में श्री जयप्रकाश गुप्त ने भारतेन्दु के 'भारत-दुर्दशा' के सफल अंगिका-अनुवाद आरों प्रकाशन करीके अनुवादित नाटकों के नीव राखलें छेलै। ओकरों बाद जयशंकर प्रसाद -कृत 'ध्रुवस्वामिनी' के अंगिका-अनुवाद अंगिका के ही लोकप्रिय कवयित्री श्रीमती माधुरी जायसवाल द्वारा होलै। दोनों अनुवादित नाटक समय-साहित्य-सम्मेलन, पुनसिया (बाँका) से प्रकाशित होलें है। अप्रकाशित रूपों में पहिलों अनुवादित अंगिका नाटकों में शकुन्तला, यशोधरा, कामायनी, सुभद्रांगी आरनी प्रमुख छेकै। संस्कृत, हिंदी से नाटक, काव्य, उपन्यास-आर के अंगिका-अनुवाद आरों नाट्य-रूपान्तरों के प्रकाशन जो कोय तरह से संभव हुवें पारलै तें यहू में कोय शक नै कि अंगिका भाषा के आधुनिक गद्य-नाटकों के सुदृढता आरों इतिहास बढ़ियाँ से रेखांकित हुवें पारतै।

## आत्मपरक (आत्ममूलक) साहित्य

साहित्यों में व्यक्ति के प्रधानता जबे स्वीकृत हुवे लागलै तबे आत्मपरक साहित्य-सृजनों पर जोर देलें जावें लागलै। आत्मकथा, सस्मरण, डायरी, जीवनी आरनी साहित्य-विधा ओकरे परिणाम स्वरूप भेलै।

व्यक्ति के प्रमुखता पर आधारित साहित्यों के मूल्य के लैके केकरो मनो में निराशा हुए पारै है ; मतरकि यहू बातों से इन्कार नै करलो जावें सकै है कि आत्मपरक (आत्ममूलक) साहित्य-लेखक द्वारा आपनों आप-बीती के उल्लेख होय है। यही से हेनो साहित्य-लेखकों के जीवनवृत्तों के प्रामाणिक जानकारी दे के साथे-साथे लेखकों के सफलता-असफलता के कहानी जानी के पाठकों के अपना ले बहुत-कुछ सीखे के मौका मिलै है। यही से आत्ममूलक या आत्मपरक साहित्यों के विशिष्ट महत्वों से इन्कार नै करलो जावें सकै है।

## आत्म-कथा

हेना के ते आत्मकथा, डायरी, संस्मरण-आर एक्के वर्गो के साहित्य छेकै, तैयो सब्भै के आपनों-आपनों अलग-अलग खूबी है आरो यह खूबी लै के आत्ममूलक या आत्मपरक साहित्यों के ई विविध रूप एक-टा विशिष्ट विधा बनी जाय है।

आत्मकथा लेखकों के आपनों जीवनों से जुड़लो साहित्य-रूप छेकै, जै में लेखक अपना के कुछ यै ढंगों से प्रस्तुत करै है कि पाठकों पर ओकरो व्यक्तित्वों के विशेष प्रभाव पड़े। यहाँ है बातों के उल्लेख करी देबो आवश्यक है कि आत्म-कथा आरो आत्म-चरित दुन्नो अलग-अलग तरहों के शैली के आत्मकथा छेकै।

आत्म-चरितों के संबंध आत्म-विश्लेषणों से होय है, जेकरा में बुद्धि के प्रधानता होय है जबे कि आत्मकथा में जीवनों के रोचक प्रसंगसिनी पर कलमों के केंद्रित करलो जाय है, जै से रचना में रोचकता के ज्यादा-से-ज्यादा समावेश हुए पारै।

अंगिका में आत्म-चरित आरो आत्म-कथा शैली के साहित्यों के उदाहरणों के अभाव है। सच ते ई छेकै कि आत्मकथा-साहित्यों के निर्माण दिस ई भाषा के रचनाकारों में कोय विशेष रुचियों नै दिखै है। १९९५ ई० के पहले जे कुछ सृजन होलो है ऊ पुस्तक के रूपों में नै है।

यहें बात जीवनी-साहित्यों के संबंधों में कहलो जावें सकै है। जीवनी-साहित्यो आत्मकथा नाखी कोय विशिष्ट व्यक्ति के व्यक्तित्व-वर्णन-साहित्य छेकै। जो फर्क है ते ई कि आत्मकथा लेखक द्वारा आपनों संबंध में कहलो रचना होय है, मतर जीवनी लेखक द्वारा कोय दोसरा के जीवनों पर लिखलो साहित्य।

जहाँ तक अंगिका के जीवनी-साहित्यों के प्रश्न है, ओकरो संख्या, आत्मकथा-साहित्यों से अवश्य बेसी है। यही बात सही छेकै कि डॉ० अभयकान्त चौधरी के आत्मकथा 'हमरो जीवन के हिलकोर' (१९९५) -हेनो कोय महत्वपूर्ण जीवनी-पुस्तक आय तक अंगिका में प्रकाशित नै मिलै छै। एक सौ बावन पृष्ठों के ई आत्मकथा 'हमरो जीवन के हिलकोर' दू भागों में विभाजित छै। बयालीस पृष्ठों के प्रथम भागों में आत्मकथाकारों के जन्म, परिवार, खानदान, नाता-रिस्ता आरनी के उल्लेख छै। शेष पृष्ठों के भाग-दू में आत्मकथाकारों के शिक्षा, साहित्य, नौकरी आरो सार्वजनिक कार्यो के लेखा-जोखा। ऐतिहासिक शैली के ई आत्मकथा डॉ० चौधरी के परिवार आरो जीवन-इतिहास के स्वरूपों में राखै छै।

'हमरो जीवन के हिलकोर' आरो 'नैहरा केरो ओलती आरो ऐंगन' के छोड़ी के अंगिका में हेनो कोय वैज्ञानिक ढंगों के लिखलो आत्मकथा नै दिखै में ऐलो छै जेकरो उल्लेख यहाँ हुवै पारै।

'नैहरा केरो ओलती आरो ऐंगन' श्रीमती जीवनलता के एक विशिष्ट आत्मकथा-पुस्तक छेकै, जेकरा में आत्मकथा-लेखिका ने आपनों तीन पुस्तों के जीवन-कथा के राखने छै। यै पुस्तकों में सबसे बड़ो खासियत ई छेकै कि लेखिका श्रीमती जीवनलता ने नैतिक, अनैतिक के नामों पर कुछ छुपावै-छोड़ै के कोशिश नै करने छै। सौसे पुस्तकों में एक औपन्यासिक -परिवेश छै, जे 'नैहरा केरो ओलती आरो ऐंगन' आत्मकथा के रोचकता आरो औत्सुक्य प्रदान करते रहै छै। विषय आरो परिवेशों के अनुकूल भाषाओ बनते रहबो ई आत्मकथा के एक आरो विशेषता छेकै।

## जीवनी

अंगिका में जेन जीवनी-साहित्य प्राप्त होय छै ऊ आपनों आकार के ले के दू रूपों के छेकै ; एक ते छोटों-छोटों लेखों के रूपों में लिखलो, दोसरो छोटों-छोटों पुस्तिका के रूपों में लिखलो।

श्री प्रीतम कुमार 'दीप' -कृत 'नक्षत्र मालाकार' (१९७४), श्री रामरीझन रसूलपुरी - कृत 'राष्ट्रकवि डॉ० दिनकर : संक्षिप्त जीवनवृत्त' (१९७४), श्रीमती विनोदबाला सिंह-लिखित 'तीज त्योहार आरो भारतीय नारी' (१९८१), श्री उमेश - कृत 'भुवनेश जी' (१९८२), पं० शुद्धदेव झा 'उत्पल' - कृत 'लोक भाषा के महाकवि भवप्रीतानंद ओझा' (१९८२), श्री महेन्द्र प्रसाद जायसवाल - कृत 'सम्भे

रों आदमी गंगाधर' (१९८२), डॉ० रमेश शर्मा 'आत्मविश्वास' - कृत 'अनन्त दास' (१९८६) आरनी छोटों-छोटों आकारों के जीवनी-साहित्ये छेकै।

पुस्तिका के रूपों में कुछ जीवनी-साहित्यों के प्रकाशन-कार्य विशेष रूपों से श्री नरेश पाण्डेय 'चकोर' के सत्प्रयासों से संभव होलें छै, जेकरों लेखको हिनीयें छेकात। होनाके तें १९८१ ई० में डॉ० तेजनारायण कुशवाहा के लिखलें 'महर्षि मेंही से मिलें' अब तक के प्राप्त जीवनी-साहित्यों में पहिलों कोशिश छेकै, जे कि पुस्तक के रूपों में प्राप्त होय छै।

'महर्षि मेंही से मिलें' नै खाली महर्षि मेंही के जीवनवृत्त से संबध राखै छै, बलुक हुनको सम्प्रदाय, हुनको विचार, हुनको साधना आरनीयों से संबध राखै छै।

जीवन-साहित्य जीवन-चरितों के परवर्ती संक्षिप्त नाम छेकै। हेनो साहित्य आपनों नायकों के चरित्र से संबध राखै छै, जे कि आन्तरिक चरित्रो होय छै। यै लेली हेनो साहित्य में नायकों के विचारों के साथें संबद्ध लेखकीय टिप्पणी आरनी के ऐतें रहबों भी सहज स्वाभाविक छै ; मतरकि जहाँ लेखकीय टिप्पणीयें प्रबल हुवें लागै छै वहाँ जीवनी-साहित्यो छूटें लागै छै। डॉ० कुशवाहा के 'महर्षि मेंही से मिलें' शुद्ध जीवनी-साहित्यों में नै राखलें जावें सकें।

निःसंदेह १९८३ ई० में प्रकाशित श्री नरेश पाण्डेय 'चकोर'-कृत 'महात्मा भोली बाबा' ई दिशा में एक सराहनीय प्रयास के प्रारम्भ मानलें जैतै। 'चकोर'-कृत अन्य जीवनी-साहित्य छेकै 'श्री उमेश जी' (१९८९), 'श्री भुवनेश जी' (१९८९), 'एक साहित्यकार-परिवार' (१९९०), 'करील जी' (१९९१), 'विनोद जी' (१९९३), आरो 'श्री गदाधर प्रसाद अम्बष्ठ' (१९९४)।

श्री नरेश पाण्डेय 'चकोर'-कृत 'महात्मा भोली बाबा' अंगिका में प्राप्त जीवनी-साहित्यों में सर्वाधिक विस्तृत छै, जेकरों एक कारण छेकै कि है पुस्तकों के निर्माण महात्मा भोली बाबा के निर्वाणोपरान्त भेलें छै। यै लेली हुनको ओरी से लै के आखरी ताँय के जीवन-चक्र आरो क्रियाकलापों के वर्णन होय गेलें छै।

'चकोर' जी के जे जीवनी-साहित्य जीवित व्यक्ति के चरितों से संबद्ध छै, ऊ स्वाभाविक रूपों से आकार में लघु होबे करतै ; कैन्हें कि हेनो चरित-साहित्यों में सौसे जीवनवृत्त ऐबे कहाँ करै छै ? होना के तें 'चकोर' जी के 'विनोद जी' स्वर्गीय कमला प्रसाद उपाध्याय पर केंद्रित होला के बादो विनोद जी के जीवन-चरित डेढ़े पृष्ठों में सिमटलें छै, बाकी में विनोद जी के अंगिका काव्य प्रकाशित छै। एकरा से अलग 'करील जी' आरो खास करी के 'श्री गदाधर प्रसाद अम्बष्ठ'

हिनकों महत्वपूर्ण जीवनी-साहित्य छेकै।

वर्णित पात्रों के साथ अति निकटता होला के कारणे ई दुन्नो जीवनी-साहित्यों में संस्मरणों के स्फुरण छै। संस्मरणात्मक स्पर्श होला के कारणे नै खाली वर्णित व्यक्ति के व्यक्तित्व ठीकों से उभरलें छै, बल्कि यै से दोसरा के अपेक्षा ई दुन्नो जीवनी-साहित्यों के नगीच ज्यादा छै। यहे समय में श्री सुभाष चन्द्र 'भ्रमर' के भी 'प्रो० परिमल : एक संघर्षशील व्यक्तित्व' आरो श्री उचित लाल सिंह के 'कवि -; परिचय' शीर्षकों से एक जीवनी-साहित्य प्रकाशित होलै।

१९९५ ई० में प्रकाशित डॉ० डोमन साहु 'समीर' के निबंध-संग्रह 'समीक्षात्मक निबंध' आपनों शैली में साहित्यों में एक संयुक्त शैली के पुस्तक मानलें जैतै। यै में संग्रहित गद्य-रचना के डॉ० समीर ने 'समीक्षात्मक' कहने छै; मतरकि समीक्षात्मक निबंधों के है संग्रहों में ओरी के चार-टा निबंधों के छोड़ी के बाकी जीवनी-साहित्यों के सीमा में अबै छै। वैसिनी निबंध छेकै - 'अंग-गौरव आचार्य दीपंकर श्रीज्ञान अतिश', 'अंगिका भाषा के प्रारंभिक कवि - स्वर्गीय दर्शन दुबे', 'लोकप्रिय अंगिका जनकवि - सदुपाध्याय भवप्रीतानन्द ओझा', 'मन-वचन-कर्म से अंगिकानिष्ठ - डॉ० लक्ष्मीनारायण सुधांशु', 'अंगिका सपूत - पं० बुद्धिनाथ झा 'कैरव' आरो 'अंगिका-प्रतिष्ठ - डॉ० माहेश्वरी सिंह 'महेश'।

यै-सब निबंधों के निर्माण जीवनी-साहित्य के शर्तों पर होलें छै। कहानी (कथा-साहित्य) से भिन्नता लानै ले डॉ० समीर ने आपनों चरित-नायकों के वर्णन ओरीये से चमत्कार के साथे नै करलें छै, बल्कि शुद्ध जीवनी के शर्तों के अनुकूले नायकों के आरम्भिक तथ्यों के क्रमिक रूपों से प्रस्तुत करने छै। तमाम प्रकारों के जीवनी-साहित्यों के उद्देश्य होय छै - विभिन्न तथ्य-स्रोतों के माध्यमों से चरित-नायकों के विलक्षण गुण-प्रदर्शनों से समाज के बीच प्रेरणा-प्रकाश फैलैबों। ई-सब डॉ० समीर के उपरोक्त निबंधों में देखलें जावें सकै छै। आचार्य दीपंकर श्रीज्ञान अतिश के छोड़ी के बाकी सब में जीवनीकार ने ऐतिहासिक शैली के साथे काँहीं तें संस्मरणात्मक शैली के प्रयोगों से जीवनी के प्रामाणिक आरो सरस स्वरूप देलें छै आरो काँहीं चरित-नायकों के कृतित्वों के उल्लेख से हुनकों व्यक्तित्वों के उद्घाटित करने छै। स्वर्गीय दर्शन दुबे आरो पंडित बुद्धिनाथ झा 'कैरव' शीर्षक जीवनी में जीवनीकार ने यहे शिल्प अपनैने छै। 'समीक्षात्मक निबंध' के सबटा उल्लिखित जीवनी आपनों संक्षिप्तता में अपेक्षित विस्तार के समेटलें होलें वैज्ञानिक जीवनी के उदाहरण छेकै।

## संस्मरण

'संस्मरण' आत्मकथा आरु जीवनी के बीचों के साहित्य-विधा छेकै । संस्मरण आत्मकथा के नगीच यै लेली छै कि याहूँ लेखक आपनों स्मृति के आधार पर अपना से जुड़लौ बातों के लिखै छै ; मतरकि दोनों में एक मूलभूत भेदो छै । आत्मकथाकरों के दृष्टि बेसी करी के आपन्है पर केंद्रित रहै छै, बाहरी बातों के वे ओतने-टा ग्रहण करै छै जतना-टा आपनों बातों के प्रकट करै में सहायक होय छै ; मतरकि संस्मरणकार अपना से अलग बाहरी दुनियाँ के आपनों वर्णनों के विषय बनावै छै, जे कि ओकरों अनुभूति के प्रभावित करै छै ।

जीवनीकार-हेनों संस्मरणकारों के दृष्टियो बाहरी वस्तु पर केंद्रित होय छै, मतरकि जीवनी-लेखक-हेनों संस्मरणकार के शैली ऐतिहासिक ढर्रा पर तथ्यों के बटोरबों नै होय छै । याहाँ वस्तु के प्रभाव लेखकों के अनुभवों पर की होय छै, ओकरे वर्णन रहै छै, जेन्हों कि निबंधों में होय छै । ई दृष्टि से संस्मरण, आत्मकथा आरु जीवनी से ज्यादा निबंध के ही नगीच पड़ै छै । यहे कारण छेकै कि डॉ० डोमन साहु 'समीर' ने आपनों संस्मरण के जीवनी के निबंध कहने छै ।

अंगिका में संस्मरण-साहित्यों के इतिहास दू दशक से ज्यादा पुरानों नै छै । यै में कोय शक नै कि अंगिका के दोसरों-दोसरों गद्य-विधा नाखी संस्मरण के विकास में 'अंग-माधुरी'-ये के विशेष सक्रियता पहिले-पहल रहलै । येहो बात सही छै कि ई पत्रिका के शुरूआती अंकों में कुछेक संस्मरणों के प्रकाशन होलौ होतै, मतरकि ऊ-सब उपलब्ध नै होला के कारणे वैसिनी के उल्लेख याहाँ नै हुवै पारी रहलौ छै ।

संस्मरण-साहित्य के खेयालों से 'अंग-माधुरी' के मई-जून, ७४ -वाला अंक निःसंदेह ऐतिहासिक महत्व राखै छै । वै अंकों में मंजलों गद्यकार के चार संस्मरण -- 'राजयोगी सुधांशु' (मधुकर गंगाधर), 'सच्चिदानंद-विग्रह सुधांशु जी' (श्रीरंजन सूरिदेव), 'डॉ० सुधांशु : एक संस्मरण' (चकोर) आरु 'एक संस्मरण' (जगदीश मिश्र) - प्रकाशित छै । अंगिका में संस्मरण-साहित्यों के विधिवत् लेखन-प्रस्थान यहीसनी चार संस्मरणों के बीचों से होय छै ।

यै में कोय शक नै कि अंगिका के कहानी, आत्मकथा, जीवनी आरु निबंध-साहित्यों के निर्माण में संस्मरणों के बहुत बड़ों योग रहलौ छै । यै से अंगिका के विभिन्न गद्य-साहित्य संस्मरण-साहित्ये होय के बोध कराय छै । श्री उमेश, जगदीश पाठक 'मधुकर', 'गुरु जी' आरु रामावतार 'राही' के व्यंग्य-कथा

तें संस्मरण-साहित्ये के अंग बनी के आवै छै।

मतरकि, आबे संस्मरणात्मक कहानी आकि जीवन से अलग अंगिका के संस्मरण-साहित्य आपनों स्वतंत्र अस्तित्वों में आबी चुकलें छै। डॉ० चौधरी के 'अनुपेक्षनीय' (१९७४), डॉ० रामनंदन विकल के 'बाबा : एक संस्मरण' (१९९३), 'जागृति' के 'नानी माय' (१९९४), श्रीमती ओमा प्रियंवदा के 'श्री नरेश पाण्डेय 'चकोर' : संक्षिप्त परिचय' (१९८५), डॉ० आशुतोष प्रसाद के 'मनों के बोझ' (१९९७), श्री अशोक ठाकुर के 'दुःख' (१९९७) से हटी के संस्मरणों के स्वतंत्र-संग्रह दिस जौन तरीका से लेखकसिनी के ध्यान केंद्रित होय रहलें छै, वै से ई भाषा में है विद्या के गद्य-साहित्यों के प्रति काफी आस्था आरो समृद्धि के प्रमाण मिलै छै। १९९७ ई० में श्री आमोद कुमार मिश्र के संपादन में प्रकाशित 'याद आवै छै' हेनो संस्मरण-संग्रह छेकै। यै में निम्नांकित संस्मरणकारों के संस्मरण प्रकाशित करलें गेलें छै -- डॉ० परमानन्द पाण्डेय (कुछ फूल, कुछ काँटों), श्री सदानन्द मिश्र (एक नजर इन्हों), डॉ० तपेसर नाथ (डॉ० गौरी शंकर द्विजेन्द्र, यादों के दर्पण में), डॉ० तेजनारायण कुशवाहा (उज्जैनी के महाकालेश्वर), श्री सुमन सूरु (निर्णय नागार्जुन के), श्री भुवनेश्वर सिंह 'भुवन' (देशभक्त धर्मपिता), डॉ० अभयकान्त चौधरी (अंग-गौरव सतीश), श्री सच्चिदानन्द द्विवेदी 'श्रीस्नेही' (यही दिनों लेली), श्री नरेश पाण्डेय 'चकोर' (अंगिका के उन्नायक अम्बष्ठजी), श्री कलानन्द झा (यात्रा के रोमांच), डॉ० अमरेन्द्र (कणों के कवच-कुंडल नाखी), श्री गुरेश मोहन घोष 'सरल' (जो रे तहिया), श्री अंजनी कुमार शर्मा (बम्बई के दूर), श्री चन्द्रशेखर कर्ण (बडप्पन), डॉ० निर्मल (हुनकों यादों में), श्री नवीन चन्द्र शुक्ल 'पुष्प' (दृढ़ संकल्पी पं० गिरिधर शास्त्री 'भ्रमर'), आचार्य श्रीधर मिश्र 'विनोद' (न दैन्यं न पलायनम्), श्री छोटेलाल मंडल (भारतीय संस्कृति के प्रतीक - महर्षि मेंही), डॉ० शैलजानन्द झा 'अंगार' (गुरु जी), श्री महेश प्रसाद सिंह 'आनन्द' (देवदूत), श्री सोहन प्रसाद चौबे (चुनावी संस्मरण), श्री राम शर्मा 'अनल' (सरलता के प्रतीक माधवन जी), श्री मुरारी मिश्र (भूतों के खोज), श्री छोटेलाल मंडल (जिनगी के मोड़), डॉ० श्यामलाल आनन्द (बलिहारी वा गुरु की), विद्यावाचस्पति मथुरानाथ सिंह 'रानीपुरी' (याद विमला के), श्री रघुवंश झा (हिमालय तक पीछा करूंगा), श्री रामावतार 'राही' (कालजयी पं० अवध भूषण मिश्र), डॉ० नवीन प्रसाद गुप्त (आशावरी देवी), श्री ओम प्रकाश पाण्डेय (यादों के यार) आरो श्री आमोद कुमार मिश्र (हहरी गेलें छै)।



एकतीस लेखकों के संग्रहित संस्मरणों में व्यक्ति-वृत्तान्त से लैके यात्रा-साहित्य तक समेटलें होलें छै। पहिलहँ कहलें गेलें छै कि संस्मरण आत्मकथा आरो जीवनी के बीचों के साहित्य होय छै। यही से पाश्चात्य साहित्यों में आत्मकथा आरो जीवनी के संस्मरण-साहित्यों के भी भेद मानलें गेलें छै। 'याद आवै छै' में आत्मकथात्मक संस्मरण (रेमिनिसेंसेज) आरो जीवनीपरक संस्मरण (मेम्बायर्स) दोनों के सुन्दर रूप मिलै छै। सब संस्मरणों में लेखकों के अनुभूति के रास संस्मरणों के रोचक बनैलें होलें छै। भावानुभूति आरो विचार के ताना-बाना से बनलें है संग्रहों के कै-एक संस्मरण निबंध के स्वरूपों में भी उपस्थित छै। यही से जो ओकरा संस्मरणात्मक निबंधो कहलें जाय तें गलत नै होतै।

## निबंध

निबंधो कोय वस्तु आकि वस्तु के स्वरूप, प्रकृति आरनी पर लेखकों के गद्यात्मक अभिव्यक्तिये होय छै। निबंधों के कोय निश्चित स्वरूप नै बतलें जावें सकै छै, कैन्हें कि निबंध बंधनहीन होय छै। 'निबंध' के सही अर्थ यहें लागै छै। यहें कारण छै कि अंगिका में आय-काल निबंध के नामों पर जे कुछ लिखलें गेलें छै, ऊ सबके निबंधो मानी के निबंध के सूची में समेटी लेलें गेलें छै। यै में साहित्येतिहासकारों के की दोष ? निबंध-साहित्य के संबंध में तें यहें कहलें गेलें छै कि यै में पाण्डित्य-प्रदर्शन नै होय छै, स्वच्छन्दता होय छै (लेखक एक विषयों से दोसरो विषयों पर फुदके पारें)। यै में शिल्पगत प्रौढता के जगघा में सरलता आरो आत्मीयता होय छै, आरनी-आरनी।

दरअसल, अनिबन्धो के निबंध मानी लै के पीछूँ निबंधों के उपरोक्त लक्षणसिनी के अभिधार्य ग्रहण हुवें पारें। स्वच्छन्दता के अर्थ, नै तें उच्छृंखलता होय छै आरो नै तें पाण्डित्य से बचै के मोह के मतलब आपनों अल्पज्ञता के प्रकटीकरण छेकै।

अंगिका में हेनों निबंधकार के अभाव नै छै जे निबंधों के प्रौढ रूपों के राखने छै। हेनों निबंधकारों के एक सूची अंगिका-साहित्यों के इतिहासों में देलें गेलें छै जे कि है प्रकारों के छै -- सर्वश्री सुरेन्द्र मिश्र, डॉ० अभयकान्त चौधरी, रमेश चन्द्र झा, राजकुमार चौधरी, वागेश्वरी देवी, जगदीश नारायण वर्मा, स्व० गदाधर प्रसाद अम्बष्ठ, डॉ० तेजनारायण कुशवाहा, डॉ० परमानंद पाण्डेय, नरेश पाण्डेय 'चकोर', सावित्री मिश्रा, उमेश जी, मधुकर गंगाधर, जर्नादन राय,

गोपाल कृष्ण 'प्रज्ञ', कमला प्रसाद उपाध्याय, राधाकृष्ण चौधरी, जन्मेजय मिश्र, कमलेश्वरी प्रसाद तिवारी, द्रौपदी दिव्यांशु, पशुपति झा, राधाकान्त मिश्र, ओम् प्रकाश पाण्डेय 'प्रकाश', सच्चिदानंद सिन्हा, श्रीरंजन सूरीदेव, मदन मोहन प्रसाद सिन्हा, सुरेश प्रसाद यादव, अनिरुद्ध प्रभास, सुरेश मंडल 'कुसुम', विभाष चन्द्र झा, अनिल चन्द्र ठाकुर, पंकज कुमार चौधरी, डॉ० भूतनाथ तिवारी, महादेव झा, शंकर प्रसाद श्रीनिकेत, प्रद्योत कुमार चौधरी, अर्द्धेन्दु शेखर पाण्डेय, मंजुला देवी, जगदीश मिश्र, डॉ० कुमार विमल, कृष्ण मोहन मिश्र, चन्द्रमणि पांडेय, डॉ० फणिभूषण प्रसाद, मोहम्मद शमसुज्जोहा आरो उचितलाल सिंह।

नया समयों में निबंध-लेखन इस अंगिका के लेखकसिनी में पुष्ट अभिरुचि देखलें जाय रहलें छै। सर्वश्री देवेन्द्र, कुन्दन अमिताभ, विनोदबाला सिंह, डॉ० निर्मल कुमार सिंह, सुमन सूरु, अनिल चन्द्र ठाकुर, सुभाष चन्द्र भ्रमर, भुवनेश्वर सिंह 'भुवन', सुरेश मंडल 'कुसुम', महेन्द्र प्रसाद जायसवाल, आनन्दी प्रसाद ठाकुर, प्रीतम कुमार 'दीप', अश्विनी कुमार, डॉ० नीलम महतो, डॉ० डोमन साहु 'समीर', विवेकानन्द झा, डॉ० शिवचन्द्र झा, मीरा झा, डॉ० आत्मविश्वास, श्रीकेशव, डॉ० आशुतोष प्रसाद, सच्चिदानंद पोद्दार, श्रीस्नेही, आमोद कुमार मिश्र, महेश प्रसाद सिंह 'आनन्द', श्रीराम शर्मा 'अनल', विकास पाण्डेय, अचल भारती, आभा पूर्वे, डॉ० विनय प्रसाद गुप्त, भवेशनाथ पाठक, आरनी वै वक्ती के उल्लेखनीय निबंधकार छेकात।

उल्लिखित सब निबंधकारों के निबंधों में वैयक्तिकता के गुण मौजूद छै, जे कि कोय भी निबंधों के पहिलों कसौटी होय छै। जे निर्वैयक्तिक निबंध होय छै ओकरहौ में लेखकों के अभिरुचि, अनुभव, विचार आरनी के होला से वैयक्तिकता के समावेश मिलै छै। वैयक्तिक आरो निर्वैयक्तिक अंगिका निबंधों के साहित्य सचमुचे विपुल छै। यही से यहाँ मात्र निबंधकारसिनी के नामोल्लेख से ही संतोष करै लें पड़ी रहलें छै।

आधुनिक अंगिका-साहित्यों में निबंध के ऊ सब भेद प्राप्त होय छै जे कि मुख्यतया कथात्मक, वर्णनात्मक आकि चिन्तनात्मक निबंध वर्गों में आवै छै। कथात्मक निबंध पौराणिक आकि काल्पनिक कथा के आधार बनाय के लिखलें गेलों निबंध छेकै। कुमारी मृणालिनी चौधरी-कृत 'दुर्गा पूजा के झाँकी' (१९७८), बूँटों के नाक टेढ़ों केन्हें ? (१९८१) निबंध कथात्मक वर्ग के ही निबंध छेकै। मनुष्य आकि प्रकृति आरनी पर आधारित वर्णनात्मक निबंधो कम नै लिखलें गेलों छै, जे कि आपनों शैली में विवरणात्मक निबंधों के कोटि के निर्माण करै छै।

'बोलबम' (श्रीमती मंजुला देवी), 'गरीब देश' (अर्द्धेन्दु शेखर पाण्डेय), 'होर आरो गाड़ी' (डॉ० चौधरी/चकोर), 'तीज त्योहार आरो भारतीय नारी', 'बौसी मेला' (श्रीमती विनोदबाला सिंह), 'श्रीराम के प्रकृति-वर्णन' ('चकोर'), 'अंगिका लोक-गीतों में भारतीय संस्कृति के अवदान' (डॉ० निर्मल कुमार सिंह), 'अंगिका में शृंगार रस' (परशुराम ठाकुर 'ब्रह्मवादी') आरनी निबंध वर्णनात्मक आकि विवरणात्मक कोटि के छेकै।

हेना के ते डॉ० समीर, डॉ० निर्मल कुमार सिंह आरनी के निबंध आलोचनात्मक निबंध के भी एक भेद बनावै छै, मतरकि रुझान आरो बहुलता के दृष्टि में अंगिका के चिन्तनात्मक निबंधों के सृजन प्रचुरता से होलें छै। सर्वश्री जन्मेजय-कृत 'कवि' आरो 'वन्देमातरम्', शशि भूषण पाठक-कृत 'सिनेमा आरो समाज', राधाकृष्ण चौधरी-कृत 'मुखौटा', देवेन्द्र-कृत 'कविता अमर छै', 'चकोर'-कृत 'सच्चा शरणागति के रहस्य', भूतनाथ तिवारी-कृत 'प्रेम आरो संस्कार', अनिल चन्द्र ठाकुर-कृत 'मन-घटा में मनोहर छटा' आरनी निबंध अंगिका के चिन्तनात्मक निबंध के कोटि के छेकै। अनिल चन्द्र ठाकुर जी ने 'मन-घटा में मनोहर छटा' - शीर्षक से राजनीतिक नीयत, जीवन-मृत्यु आरनी विषय पर प्रभावी लघु निबंधों के रचना करनै छै।

मतरकि यहाँ ऊ दू निबंधों के चर्चा आवश्यक होतै जे कि अंगिका निबंधों के स्वरूपों के स्थिर करतें निबंध छेकै। 'समीक्षात्मक निबंध' (१९९५) में पूर्व-उल्लिखित निबंधों के अतिरिक्त डॉ० समीर के चार-टा आरो निबंध संग्रहित छै -- 'भाषा, साहित्य आरो लिपि', 'अंग-महाजनपद आरो विक्रमशिला विश्वविद्यालय', 'अंगिका भाषा आरो साहित्य' तथा 'सिद्ध कविसिनी रों रचनासिनी में अंगिका रों स्वरूप।'

दोसरो निबंध-संग्रह श्री विवेकानन्द झा के छेकै। ई संग्रहों के शीर्षक छेकै 'नर से नारायण होय के जुदा-जुदा पथ'। 'आज' (पटना, ३० जून, १९९७) के एक समाचारों से ई ज्ञात होय छै कि है संग्रहों में निबंधकार झा जी ने भारतीय दर्शन में आध्यात्मिक-लौकिक सुखों के जे अनेक मार्ग बतैने छै ओकरै पर अलग-अलग शीर्षकों से छोटों-छोटों निबंधों के निर्माण करलें गेलें छै।

सर्वमान्यता के अनुरूप डॉ० डोमन साहु 'समीर' आरो श्री विवेकानन्द झा ने आपनों-आपनों निबंधों के छोटों आकार के विशेष खेयाल राखने छै। दोनों निबंधकारों में केन्द्रीय विषयों से दूर भटकै के प्रवृत्ति नै छै, बल्कि निबंधों के मिजाजों के अनुकूल छै। हाँलाकि डॉ० समीर के निबंध-लेखन में स्वच्छंदता के प्रवृत्ति मिली जाय छै। भले ही, निबंधों के शीर्षकसिनी निबंधों के निर्वायव्यक्तक

होय के आभास करैतें रहें, मतरकि दोनों निबंधकारों के निबंधसिनी में वैयक्तिक राग से बंधलों गद्यात्मक अभिव्यक्ति छै। एकरों एकटा मुख्य कारण छेकै - वर्ण्य विषय आरो लेखक के बीच अद्वैतावस्था। सबसे बड़ों बात कि दोनों निबंधकारों के निबंधों में चिन्तन के क्रमिक, विवेकपूर्ण, सुगठित आरो कलात्मक रूप मिलै छै। ऊ निःसंदेह अंगिका निबंध साथे निबंध के स्वरूपों के ठोस पहचान दे में सक्षम छै।

१९९७ ई० में डॉ० चौधरी के एक गद्य-संग्रह 'लघु कथा आरो ललित निबंध' शीर्षकों से ऐलों छै, जै में डॉ० चौधरी के दू निबंध 'लारों' आरो 'हँकारों' प्रकाशित छै। ललित निबंध के दृष्टि से 'लारों' के अपेक्षा 'हँकारों' श्रेष्ठ निबंध ठहरै छै। 'लारों' में लालित्य विषय-प्रतिपादन के कारण नै, अन्य बातों के संस्मरण के कारण छै। यही से ई संस्मरण ज्यादा छेकै, निबंध कम।

अंगिका निबंध-साहित्यों के संपूर्ण विकास लेली यै भाषा में अनुवादित निबंधों के प्रकाशनों जोरों पर दिखै छै। 'तीर्थ की छेकै?', 'साधना के आवश्यकता', 'मनुष्य के चाह', 'आय मूर्ति बोलतै', 'कर्म आरो कृपा' आरनी अंगिका भाषा में अनुवादित हिंदी निबंध छेकै, जेकरों अनुवाद में श्री विद्यानंद किशोर ने आपनों कौशल के अच्छा परिचय देलें छै।

१९९४ ई० में श्री प्रभात रंजन सरकार के सैंतीस-टा हिंदी लघु निबंधों के अंगिका-अनुवाद-संग्रह 'आयजकों समस्या' प्रकाशित होलों छै। यैसिनी लघु निबंधों के अनुवादकर्ता छेकै श्री गुरु प्रसाद सिंह। सृष्टि, प्रकृति, सामाजिक शोषण, जातिवाद, विज्ञान, पूंजीवाद, ट्रेड यूनियन, कृषि, व्यापार, मानवताबोध, स्त्री-दशा, दहेज, सामाजिकता के हास, राष्ट्रवाद, भाषा, संस्कृति, आबादी-वृद्धि, दलगत राजनीति, लोकतंत्र, विश्व-बंधुत्व आदि विषयों पर लिखलों गेलों श्री प्रभात रंजन सरकार के ई-सब निबंधों के अनुवाद से अनुवादक गुरु प्रभात सिंह जी के विश्व-दृष्टि के पता लगै छै। 'अंगप्रिया' (मार्च, १९९४) में छपलों श्री विकास पाण्डेय के 'अंगिका-काहनी : विकास-कथा' अपनों विषयों के सूचनाप्रद निबंध छेकै।

आय अंगिका में निबंध-साहित्यों के सृजन लेली प्रबल रुचि मिली रहलों छै। तैयो ई कहै लें पड़तै कि जौन अंगिका निबंधों के जन्म अंग-जनपदों के गौरव-गान आकि एकरों अस्तित्व-स्थापना के चिंता से संभव होलै ओकरा से आभियों ई भाषा के निबंधों के मुक्ति नै मिलें पारलों छै। अधिकतर विषयगत निबंधों के सृजन के पीछू ई मुख्य प्रेरणा आरो जोर रहलों छै जेकरों कारणे वैयक्तिक निबंधों के निर्माण के प्रवृत्ति कम उभरें पारलों छै। यहें कारण छै कि यहाँ लेखक (व्यक्ति) के भावना, हर्ष, विवाद, सौन्दर्य के ललक जौन मात्रा मे उभरना चाहियों, ओतें नै उभरें पारलें छै। वस्तु के प्रति व्यक्ति (लेखक) के जे

भावनात्मक अभिव्यक्ति होली है ऊ प्रत्यक्ष नै, प्रच्छन्न रूपों में है, जब कि एक पूर्ण निबंध-विषय से काँही अधिक ई साहित्य-विधा में लेखक के व्यक्तित्वों के प्रकाशन पैलो जाय है।

## शब्दचित्र (रेखाचित्र)

शब्दचित्र आकि रेखाचित्र कम-से-कम शब्दों में एक निश्चित बिन्दु से कोय विषय के प्रतिविम्ब खडा करै के साहित्य-शैली छेकै। आपनों स्वरूप आरो रूपों से शब्दचित्र कहानी से बहुत भिन्न नै होय है। सच तें ई छेकै कि कोय कहानी कभी-कभी शब्दचित्र आरो कोय शब्दचित्र कहानी बनी के आवै है। हेनों रचना के संबंध मे कोनो एक निश्चित वर्गों में रखना एकदम कठिन होय जाय है। शब्दचित्र में जेना एक चित्रकार एकाधे रेखा खींची के कोय विषयों के स्पष्ट करी दै है होने कोय रचनाकार कुछेव शब्दों के बलों पर पात्र आकि घटना के रूपायित करी दै है। बिना रंगों के या बहुतसिनी रेखा के उपयोग के बिना, कुछेक रेखा या कुछेक शब्दों के सहारा से चित्रांकन करबों निःसंदेह रेखाचित्र, आत्मकथा या जीवनी से अलग किसिमों के साहित्य छेकै, जे आपनों साम्य अधिक-से-अधिक कहानी साहित्यों से राखै है।

अंगिका मे शब्दचित्र के प्रारम्भो है भाषा के कहानी-संग्रह 'सात फूल' (१९६२ ई०) के कहानी 'पाप लिखतौ' आरो 'राँगाधारी' में रेखाचित्र के उत्कर्ष मे देखलो जावे सकै है। 'पाप लिखतौ' में जहाँ वर्णन से चित्र-विधान है वहाँ 'राँगाधारी' मे सलाप-सयोजन से।

श्री महेन्द्र प्रसाद जायसवाल के 'शनिचरा' केरों रचना श्रेष्ठ शब्दचित्रे के उदाहरण छेकै। श्री उमेश, राधाकृष्ण चौधरी, जगदीश पाठक 'मधुकर', गुरु जी, रामावतार 'राही' के बहुते व्यंग्य-कथा व्यंग्यात्मक शब्दचित्रे के उदाहरण छेकै। श्रीकेशव के 'काकी', महेन्द्र प्रसाद जायसवाल के 'जिनगी के सत्त', आभा पूर्वे के 'नटधूराम' आरनी कहानी शब्दचित्रो छेकै।

अंगिका मे शब्दचित्र-साहित्यों के शुरूआत कथाकार श्री सुरेन्द्र प्रसाद यादव से मानलो जैते। १९८० ई० से १९९० ई० के बीच यादव जी ने अंगिका मे तीस से अधिक शब्दचित्र लिखने है। 'मगरी', 'समय-चक्र', 'स्वप्न के समाधि', 'खाली गाहक भडकावे है', 'गाँव के सोमन दा', 'भूत रो लँगोटी के करिष्मा', 'शराब के घाटी मे', 'नकली कैदी', 'खड़सिही', 'अबरी', 'अमीन-जमीन',

'सिरैतिन-कठैतिन', 'निशान', 'नारद मुनि', 'सुग्गा', 'सरोवर में विद्यालय', 'मधिया', 'विधवा रानी' आरो 'घैलिया राजा' आरनी सुरेन्द्र प्रसाद यादव जी के प्रमुख रचना हिंदी में कहानी के रूपों में १९९४ ई० में प्रकाशित होय चुकलें छै। कुछेक शब्दचित्र आपनों मूल रूपों में 'आंगी' के कयेक अंकों में प्रकाशित होलें छै। हालाँकि हुनकों ई-सब शब्दचित्र 'अंगिका कहानी' कही के छपलें छै।

यादव जी के ई-सब शब्दचित्रों में शब्दचित्रों के समस्त गुण सघनता से उपस्थित छै। शब्दचित्रों के पात्र आपनों कोय विशेष गुण के लैके बड़ी तीव्रता में पाठकों के समक्ष आवै छै, जे कि शब्दचित्रों के आपनों एक विशिष्ट पहचान होय छै। दोसरो ई कि यादव जी के ई-सब कहानी में शब्दचित्र नाखी गभीर कथात्मकता के अभाव स्पष्ट छै। अंगिका में सुरेन्द्र प्रसाद यादव निःसदेह एक कुशल शब्दचित्रकार के रूपों में आवै छै, जेहनों कि महेन्द्र प्रसाद जायसवाल आरो श्रीकेशव जी।

श्रीकेशव के सब्हे अंगिका कहानी के एक विशेषता छेकै ओकरा में रेखाचित्रों के पर्याप्त समावेश होबो। होना के तें श्रीकेशव ने शब्दचित्र कही के भी अंगिका में विपुल साहित्यों के सृजन करने छै। मई, १९९७ ई० में श्रीकेशव के पाँच-टा शब्दचित्र 'बुढवा पीपर', 'लाल बाबा', 'दुखनी दुरगा', 'महादेव' आरो 'भैस दरोगा' के प्रकाशन होलें छै। श्रीकेशव के रेखाचित्र आरो कलानी में कोय विशेष अन्तर करबो मुश्किल छै। लेखक के शब्दचित्र जो कहानी छेकै तें कहानी निःसदेह शब्दचित्रो छेकै। 'भैस दरोगा' शब्दचित्र के स्वयं आकारे एकरा कहानी के दायरा में लानी के खाडों करै छै।

आधुनिक अंगिका गद्य-साहित्यों में उपन्यास, कहानी, नाटक, संस्मरण, शब्दचित्र, जीवनी, आलोचना आरनी के अलावे 'डायरी' गद्य-साहित्यों के लेखन आम होय रहलें छै; मतरकि हेनों साहित्यों के प्रकाशित रूप आभी तांय उपलब्ध नै छै। गोष्ठीये में यै तरहों के गद्य-साहित्य के सुनबो-सुनैबो केन्द्रित छै। हेकरो एक बड़ो कारण छेकै अर्थाभाव। एको टाका के सरकारी सहयोग अंगिका के नै छै। आपनों-आपनों सीमित आय के बलों पर अंगिका मे जौन पत्रिका के प्रकाशन होय छै, पहिले तें ओकरो उमिर बहुत कम होय छै आरो जै-टा अंक निकलें सकै छै, वै में गद्य के विभिन्न विधा के समेटबो मुश्किले रहै छै। तैयो सरकारी उपेक्षा के बादो, आपनों सीमित साधन आरो ताकतों के बलों पर अंगिका में जत्ते आरो जै रडों के गद्य-साहित्य उपलब्ध छै, ऊ सचमुचे चौकावैवाला बात छेकै।

## साक्षात्कार

शब्दचित्र नाखी साक्षात्कार साहित्यों के अपूर्व विकास आधुनिक अंगिका गद्य में देखलौ जावे सकै छै।

अंगिका में साक्षात्कार विधा के विधिवत् विकास 'अंगप्रिया' के प्रकाशन से होय छै। 'अंगप्रिया' के मई, १९८९ अंक में डॉ० परमानंद पाण्डेय साथे श्रीमती मीरा झा के भेंट-वार्ता प्रकाशित होलौ छै, जे कि अंगिका में एक अच्छा साक्षात्कार नाखी मानलौ जैतै। १९८२ ई० के 'अंगप्रिया' में श्री उमेश जी के साथे श्रीमती मीरा झा के ही भेंट-वार्ता प्रकाशित करलौ गेलौ छै। बाद में 'अंगप्रिया' (१९९१) में श्री भुवनेश्वर सिंह 'भुवन' साथे श्री विकास पाण्डेय के भेंट-वार्ता, 'आंगी' (१९९६) में डॉ० डोमन साहु 'समीर' साथे श्रीमती आभा पूर्वे के बातचीत के अतिरिक्त १९९७ ई० में 'नई बात' (दैनिक, भागलपुर) में महाकवि सुमन सूरु, डॉ० तेजनारायण कुशवाहा, डॉ० श्याम सुन्दर घोष, प्रो० कमला प्रसाद बेखबर, डॉ० मधुसूदन साहा के साथे श्रीमती पूर्वे के भेंट-वार्ता प्रकाशित होलै।

साक्षात्कार साहित्यों के एक रूप 'परिसंवाद' के भी प्रचलन आय अंगिका साहित्यों के बीच होय रहलौ छै। जून, १९८२ के 'अंगप्रिया' में अंगिका भाषा-साहित्य पर आयोजित परिसंवादों के आयोजक श्री. ओंकारनाथ मिश्र ने के साथे श्री सत्येन्द्र नारायण अग्रवाल, डॉ० माहेश्वरी सिंह 'महेश' आरा श्री भुवनेश्वर सिंह 'भुवन' से पूछलौ प्रश्नों के उत्तर राखने छै।

निःसंदेह 'अंगप्रिया' के माध्यमों से संपादक सुधाकर जी ने जौन परिसंवादों के सुन्दर परम्परा शुरू करने छेलै ओकरों कोय मजबूत विकास बाद के कोनो पत्रिका में नै मिलै छै।

## आलोचना

आलोचना, जे कि कोय कृति के मूल्यांकन आकि परीक्षण होय छै अंगिका में निःसंदेह एक अत्याधुनिक गद्य-विधा छेकै। हेना के तें कोय विद्वान् भाषा में आलोचना के सूत्रपात अंगिका के रीति-साहित्य तक खींची के पीछू लै जावे सकै छै, मतरकि उन्नैसमी शताब्दी के पूर्व आकि होकरौ से बहुत पहिले देखलौ अंगिका के रीतिकार्यों में आलोचना के कोय स्वरूप नै मिलै छै। लक्षण

के अभावों में खाली उदाहरणों के कविता के आधार पर ऊ-सब रीतिकाव्यों के सैद्धान्तिक आलोचना के अन्तर्गत राखबों न्याय-संगत नै बुझावे छै।

अंगिका में आलोचना-साहित्यों के विकास के संघानों के जरूरतो तभिये से पड़ै छै, जबे से अंगिका भाषा-साहित्यों के पुनर्प्रतिष्ठा लेली १९६० ई० में सक्रिय आन्दोलनों के जन्म होय छै। महापंडित राहुल सांकृत्यायन, डॉ० माहेश्वरी सिंह 'महेश'; पं० गदाधर प्रसाद अम्बष्ठ, डॉ० लक्ष्मीनारायण सुधांशु, डॉ० वैद्यनाथ पाण्डेय, श्री राधा वल्लभ शर्मा के बाद अंगिका भाषा-साहित्य लेली जन-चेतना जागृत आरो साहित्य-सर्जना करै के काम डॉ० परमानन्द पाण्डेय, डॉ० तेजनारायण कुशवाहा, डॉ० अभयकान्त चौधरी, श्री नरेश पाण्डेय 'चकोर' आरनी साहित्यकार ने आगू बढैबों शुरू करलकै; मतरकि हिनकासिनी के जे समीक्षा-साहित्य प्राप्त होय छै ओकरों भाष्य-भाषा हिंदी (खड़ी बोली) होला के कारण पूरा-पूरा अंगिका के आलोचना-साहित्यों में नै राखलें जावें सकें। ई-सब के अंगिका-साहित्यों में मानै के पीछू के कारण यहें छेकै कि हिनकासिनी के आलोचना में उदाहरण अंगिका काव्ये के छेकै। बाबा राहुल सांकृत्यायन द्वारा देखैलों गेलों रास्ता पर हाल तक लिखलें गेलों 'अंगिका काव्य में रस-व्यंजना' (१९७९), 'अंगिका में अलंकार' (१९८१), 'अंगिका के महायात्रा-गीत' (१९८३), 'अंगिका लोकगीतो का सांस्कृतिक अध्ययन' (१९८४) आरनी आलोचना पुस्तकसिनी में ई विषय अबोध रूपों से मिलै छै।

ई रडों के आलोचना-विषयक भाषा-शैली ग्रहण करै के पीछू ढेरे कारण हुवें पारै छै। डॉ० डोमन साहु 'समीर' के अनुसार, अंगिका कृति के मूल्यांकन में खड़ी बोली के अपनैला से एक तें अंगिका-साहित्यों के समृद्धि के पता विभिन्न भाषा-भाषी विद्वानों के हुवें पारतै, दोसरो ई कि ये से अंगिका के संबध राष्ट्र-भाषा हिंदी से बनलें रहतै, कोनो विरोध के भाव नै दिखतै।

प्राप्त सामग्री के आधारों पर अंगिका में आलोचना-साहित्यों के विधिवत् लेखन १९७३ ई० से ज्ञात होय छै। द्वितीय संस्करण के 'पनसोखा' कविता-संग्रह में कृति के साथे श्री जगदीश चन्द्र झा के एक संक्षिप्त समीक्षा प्रकाशित छै। अंगिका में आलोचना के सूत्रपात यहें परिचयात्मक आलोचना से होय छै आरो ई मानना चाहियें कि ई भाषा में जे भी आरम्भिक आलोचना लिखलें गेलै ऊ अधिकांशतः परिचयात्मक रूपों के ही छेकै। 'पंचरग चोल' (१९७१) में श्री सुमन सूरु के, 'पछिया पुकारै छै' (१९८०) में डॉ० अमरेन्द्र के, 'गुमसैलो धरती'



(१९८४) में श्री सुमन सूरु के, 'गुमार' (१९८४) में श्री सुमन सूरु, डॉ० परमानन्द पाण्डेय, डॉ० तेजनारायण कुशवाहा, श्री भुवनेश्वर सिंह 'भुवन', डॉ० माहेश्वरी सिंह 'महेश' आरु श्री राजकुमार के, 'घैरकों' (१९८५) में श्री सुमन सूरु के, 'चिंता' (१९८५) में 'उत्पल' जी के, 'शनिचरा' (१९८६) में श्री सुमन सूरु के, 'चम्पा के राजकन्या' (१९८७) में डॉ० डोमन साहु 'समीर' के, 'रूप-रूप प्रतिरूप' (१९८८) में श्री अनिल शंकर झा के आरु अनिरुद्ध प्रसाद विमल के कृति 'कागा की संदेश उचारै' के मूल्यांकन परिचयात्मक आलोचना के उदाहरण छेकै। 'आंगी' (जनवरी, १९९७) में डॉ० 'समीर' के 'उधरिता' (अंगिका महाकाव्य) पर सक्षिप्त समीक्षा येहें ढंगों के छेकै।

मतरकि बहुतविध रूप आरु विकास के दृष्टि से अंगिका आलोचना पिछलका डेढ़-दू दशकों के अवधि में ही काफी विकास करी चुकलौ छै। श्री सुमन सूरु के 'अंग-माधुरी के दस वर्ष' आरु 'अंगिका काव्य के विकास रेखा' (१९८०), डॉ० अमरेन्द्र के 'अंगिका के आठमों दशक में कविता-कहानी कन्ने ?' (१९८२), अमरेन्द्र के ही 'भोर : सरड से धरती तक के यात्रा' (१९८३), देवेन्द्र के 'छाहुर, एक नया उपन्यास' (१९८३), 'पनसोखा में पावस, पावस में पनसोखा' (१९८४), 'सती-परीक्षा : स्वतंत्र भारत के रामायणी कथा' (१९८४), डॉ० तेजनारायण कुशवाहा के 'किसान के जगावों : एक समीक्षा' (१९८४), डॉ० परमानन्द पाण्डेय के 'किसान देशों के शान' (१९८४), डॉ० कुशवाहा के ही 'अंगिका के फेंकड़े और लोरियाँ' (१९८४), श्री नागेन्द्र प्रसाद सिंह के 'कहानीकार चकोर' (१९८५), श्री सुरेश मंडल 'कुसुम' के 'नाटककार चकोर' (१९८५), डॉ० अमरेन्द्र के 'प्यारे उचितलाल की कहानी रहि जायगी' (१९८५) आरु 'आधुनिक अंगिका काव्य, एक प्रवृत्त्यात्मक सर्वेक्षण' (१९८५), श्री सुमन सूरु के 'अंगिका भाषा आरु साहित्य' (१९८५), अमरेन्द्र के 'छानबीन में छाहुर' (१९८६), चिन्तन-अनुचिन्तन में 'चिंता' (१९८७), 'अंगिका काव्य के सौन्दर्य-बोध' (१९९१) आरुनी कुछेक हेनौ आलोचना छेकै, जेकरों प्रकाशन 'अंग-माधुरी', 'चम्पा', 'अंगप्रिया' में होलौ छै।

श्री सुमन सूरु- कृत 'अंगिका भाषा आरु साहित्य' भाषा-साहित्यों पर समीक्षा-पुस्तक छेकै जे गवेषणात्मक आलोचना के रूप लेलें होलौ छै, जबें कि 'अंगिका के आठमों दशक के कविता-कहानी कन्ने ?' प्रगतिवादी आलोचना, 'भोर : सरड से धरती तक के यात्रा' प्रभाववादी समीक्षा, 'पनसोखा में पावस, पावस में पनसोखा' ऐतिहासिक समीक्षा, 'सती-परीक्षा : स्वतंत्र भारत के रामायणी

कथा' मिथकीय आलोचना, 'प्यारे उचित लाल की कहानी रहि जायेगी' जीवन-वृत्तान्तीय आलोचना, 'छानबीन में छाहुर' मनोवैज्ञानिक आलोचना के उदाहरण छेकै।

आधुनिक समीक्षा-पद्धति से अलग अंगिका के आलोचना-साहित्यों में सैद्धान्तिक आलोचना के ही प्रमुखता मिलै छै, जे में लक्षण के साथे उदाहरण के भी संयोग राखलें गेलें छै। १९९१ ई० में अंगिका भाषा में लिखलें अंगिका के पहिलें सैद्धान्तिक आलोचना 'रस-मीमांसा' के प्रकाशन होलै। हे पुस्तकों के लेखक छेकै श्री गंगा प्रसाद राव। राव जी ने वैज्ञानिक दृष्टि के अपनैते हुवें है किताबों के पहिलें अध्यायों में - भाव, विभाव, अनुभाव, संचारी आरो स्थायी भावों के परिभाषा आरो भेद, दोसरो अध्यायों में दसों रसों के परिभाषा, अंग-उपांगों के परिभाषा आरो उदाहरण, तेसरो अध्यायों में विभिन्न रसों के रसाभास, चौथों अध्यायों में रस-निष्पत्ति के विभिन्न सिद्धान्त आरो पाँचमों अध्यायों में भावाभास, भाव-शान्ति, भावोदय, भाव-संधि आरो भाव-सबलता पर विस्तृत विवेचन करने छै।

'रस-मीमांसा' के बाद १९९६ ई० तक अंगिका में कोय उल्लेखनीय आलोचनात्मक पुस्तकों के अभाव मिलै छै। ये अवधि में निबंधकारों के ही कुछेक आलोचनात्मक लेख लिखलें मिलै छै, जे कि आलोचना, आलोचना के आरो-आरो भेदों के समक्ष राखै छै। डॉ० निर्मल सिंह के 'एक संस्कार-गीत : एक व्याख्या' (१९९४) टीका-आलोचना छेकै तें श्री विकास पाण्डेय के 'अंगिका कहानी : विकास-कथा' (१९९४) प्रभाववादी आलोचना के एक उदाहरण छेकै।

वहें समय में नैसर्गिक आलोचना के भी प्रचलन रहलै। नैसर्गिक आलोचना में हेकरे अभिव्यक्ति होय छै कि कोय कृति अच्छा लागलै तें 'कैन्हें अच्छा लागलै', हेकरा पर यहाँ विचार नै होय छै। हालाँकि ई नैसर्गिक आलोचना के उदाहरण स्व० अनूपलाल मंडल आरनी के पात्र-रूपों में लिखलें आलोचना 'अंग-माधुरी', दिसम्बर १९९३ ई० से बहुत पहिलें अस्तित्व में मिलें लागलें छेलै।

'अंगप्रिया', १९९४ में सुमन सूरु के आरो 'जइबै अंग-देश में' में श्री भवेशनाथ ठाकुर के समीक्षा नैसर्गिक आलोचना के ही उदाहरण छेकै। हेनो आलोचना के अधिक लोकप्रिय बनावै में सर्वश्री महेन्द्र प्रसाद जायसवाल, रघुनन्दन झा 'राही', राजकुमार, राम शर्मा 'अनल' आरनी के नाम विशेष रूपों से लेलें जावें सकै छै।

नैसर्गिक आलोचना से अलग परिचयात्मक आलोचना के ही एक रूप

पुस्तक 'रिव्यू' के भी प्रचलन अंगिका में पिछला कुछ वर्षों से मिले लागलों छैलै, मतरकि ओकरा 'रिव्यू' नै कहलों जावे सकें। पुस्तक-प्रकाशक के नाम आकि ओकरो दाम साथे एक पक्ति में प्रशंसा छापी देबों 'रिव्यू' के स्वरूप नै हुवे पारें छै। 'आंगी', १९९७ में 'अंगिका-हिंदी-शब्दकोश' पर श्रीमती आभा पूर्वे के जे दुरुस्त पुस्तक - 'रिव्यू' प्राप्त होय छै, वै रडो के 'रिव्यू' के विकास ठीक ढंगों से होलों नै मिलै छै। आधुनिक समयों में हेनों आलोचनाओ के बहुत जरूरत छै; केन्हे कि आयकों भागमभाग के समयों में हेनों आलोचना एक निगाह में पुस्तकों के पूरा परिचय दै जाय छै।

अंगिका के आलोचना-साहित्यों के अन्तर्गत कृति-विशेष में प्रकाशित कृतिकारों के आत्मकथ्यो आबै छै। हालाँकि हेनों आत्मकथ्य वाला आलोचनाओ, जे कि कृति के रचना-प्रक्रिया आरो ओकरों ऐतिहासिक आकि जीवन-वृत्तांतीय आलोचना में भारी सहायक बनै छै, के कमी अंगिका में रहलों छै। यै दिशा में बड़ों-से-बड़ों कृतिकारों के उदासीनता बेशक अखरैवाला बात छेकै। 'पंचफोरन', 'भोर?' 'गेना', 'उध्वरिता', 'पंचगव्य' आरनी - हेनों कृतियों में संबद्ध कृतिकार नै आत्मकथ्य के रूपों में आपनों कृति के रचना-प्रक्रिया पर जौन प्रकाश डालने छै, ऊ-सब अंगिका-आलोचना के समृद्धिशाली विकास के रेखांकित करै छै।

अंगिका के विभिन्न विधा के साहित्यों के विकास साथे आय ई भाषा के आलोचना-साहित्यों में अपेक्षित विस्तार मिले लागलों छै। खाली अंगिका-कहानी लैके श्री विकास पाण्डेय के आलोचना 'अंगिका कहानी : विकास-कथा' (१९९४) के प्रकाशन ऐतिहासिक महत्व राखै छै।

१९९५ ई० में डॉ० डोमन साहु 'समीर' के 'समीक्षात्मक निबंध' के प्रकाशन होलों छै, जै में अधिकांश रचना तें विवरणात्मक निबंधों के नगीच अधिक छै, मतरकि वै संग्रहों के निबंध - 'अंगिका भाषा रों प्रारम्भिक कवि - स्वर्गीय दर्शन दुबे', 'लोकप्रिय अंगिका जनकवि - सदुपाध्याय भवप्रीतानन्द ओझा' आरो 'अंगिका-सपूत पंडित बुद्धिनाथ झा 'कैरव' जरूरे समीक्षात्मक निबन्ध छेकै। सस्मरण आरो समीक्षा के संयुक्त रूपवाला आलोचना-पद्धति से अंगिका में ललित समीक्षा के सुव्यवस्थित रूपों में प्रस्तुत करै में डॉ० समीर अग्रगण्य रूपों में आवै छै। डॉ० अमरेन्द्र के 'अंगिका कहानी : दिशा, दशा आरो दर्शन' (१९९७) आरो डॉ० डामन साहु 'समीर' के 'श्री आमोद जी आरो हुनकों भोर?' (१९९७), डॉ० नीलम महतो के 'आधुनिक अंगिका कहानी रों विषय-संसार' (१९९७) आरनी

उत्कृष्ट आलोचना-लेख प्रकाश में ऐलों है। डॉ० नीलम महतो के ही लिखलों 'अंगिका-हिंदी के लघुकथा रों रचना-संसार' (१९९७) तुलनात्मक आलोचना के एक अच्छा उदाहरण है।

परिचयात्मक आलोचनाओं के क्रम अधिक विकसित रूपों में ऐलों है। 'खोरना' में श्री देवेन्द्र के, 'मुष्टियुद्ध' में श्री आमोद कुमार मिश्र के, 'अंग-सागरी' में डॉ० तेजनारायण कुशवाहा के आरो 'जड़बै अंगेदश में' डॉ० रमेश मोहन शर्मा 'आत्मविश्वास', डॉ० तेजनारायण कुशवाहा आरो श्री आनन्दी प्रसाद ठाकुर के आलोचना परिचयात्मक आलोचना के विकास के रेखांकित करते होलों आलोचना है।

१९९७ ई० अंगिका के सैद्धान्तिक आलोचना के समृद्धि के दृष्टियों से उल्लेखनीय वर्ष रहतै। प्रो० नवीन निकुंज के 'भारतीय काव्य शास्त्र' के प्रकाशन यही साल होलै। चालीस पृष्ठों के ई समीक्षा-पुस्तक के आलोचक ने काव्य-शास्त्र के परम्परा, काव्य-प्रयोजन, हेतु आरो लक्षण, शब्दशक्ति, रस आरो भेद, अलंकार आरो भेद, छंद आरो प्रमुख छंद-भेद के छों अध्यायों में बाँटी के यैसिनी विषयों पर सरल विवेचना प्रस्तुत करने है। १९९७ ई० में ही डॉ० अमरेन्द्र के तीन-टा आलोचना-पुस्तकों के प्रकाशन मिलै है। हालाँकि पृष्ठ-संख्या के दृष्टि से ई तीनों पुस्तक लघुकाये है, मतरकि अपनों विषय के खेयालों से बहुत अधिक सीमा तक पूर्ण कहलों जैतै। 'छंद-छौनी' में छंद के पूरा व्याकरण के साथे छंद-भेद आरो हिंदी में प्रचलित प्रमुख छंदों के उदाहरणों अंगिका-काव्य से ही लेलों गेलों है। 'छंद-मौनी' में छंद के व्याकरण के साथे अंगिका के कतेनी लोक-छंदों के लक्षण आरो उदाहरण प्रस्तुत करलों गेलों है, जबे कि गजल रों पिंगल अरबी-फारसी छंद के व्याकरण आरो संस्कृत छंद से ओकरो साम्य देखैलों गेलों है। फारसी छंद के उदाहरणों अंगिकाये में राखलों गेलों है। हिंदी-अंगिका-फारसी छंदों के व्याकरण पर आलोचनाओं ई पुस्तक के निर्माण से अंगिका के आलोचना-साहित्यों के उत्तरोत्तर विकास आरो समृद्धि के स्पष्ट होय है।

होना के ते ई बातों से इन्कार नै करलों जावे सकै है कि अंगिका मे सैद्धान्तिक आलोचना के जते मजबूत आरो विस्तृत विकास हुवे पारलों है होनों आलोचना के आधुनिक रूप में विकास नै हुवे पारलों है। डॉ० परमानन्द पाण्डेय, डॉ० तेजनारायण कुशवाहा, डॉ० डोमन साहु 'समीर' आरनी के जे आलोचना प्राप्त होय है, वै में प्राचीन परम्परा के ही निर्वाह पहिले है। नया पीढी के

आलोचक डॉ० श्याम सुन्दर घोष, प्रो० कमला प्रसाद 'बेखबर', डॉ० श्रीरंजन सूरिदेव, डॉ० कुमार विमल, प्रो० देवेन्द्र, डॉ० राजेन्द्र पजियार, डॉ० बहादुर मिश्र, डॉ० सकलदेव शर्मा, डॉ० सुरेन्द्र झा 'परिमल', प्रो० विद्या सिंह, डॉ० तपेस्वर नाथ, डॉ० योगेन्द्र, प्रो० मनमोहन मिश्र, डॉ० शीतल अवस्थी, डॉ० मधुसूदन साहा, डॉ० सुरेन्द्र प्रसाद साह, डॉ० निर्मल कुमार सिंह, प्रो० कृष्ण किंकर सिंह, डॉ० मनाजिर आशिक हरगानवी, डॉ० नीलमोहन सिंह, श्री धुवनारायण सिंह, श्री त्रिभुवन प्रसाद सिंह, डॉ० शंकर मोहन झा, प्राचार्या मीना रानी, डॉ० नीलम महतो आरनी आभी आलोचना लेली पूरा-पूरा सक्रिय नै हुषे पारलों छै। गोष्ठी में पढ़लौ गेलौ अंगिका रचनासिनी पर अंगिका के विद्वान् साहित्यकारों के सुलझलौ आधुनिक आलोचना अवश्य ऐतें रहलौ छै। जरूरत ई बातों के छै कि गोष्ठी में ऐलौ आलोचना के संग्रह हुवे, जेकरा से अंगिका के आधुनिक आलोचना-पद्धति पर प्रकाश पड़े पारतै।

हिन्ने डॉ० डोमन साहु 'समीर' ने अंगिका में 'समीक्षा : एक नया शैली ललित समीक्षा' के आपनों कलम से बहुत आगू बढ़ैने छै। 'समीक्षात्मक निबंध' हिनको हेने निबंध आरो आलोचना के सम्मिलित रूपवाला समीक्षा-संग्रह छेकै। संभवतः, डॉ० समीर के निबन्धात्मक समीक्षा में संक्षिप्त जीवनी के समावेश रचना-प्रक्रिया के समझ में मददगार होवै के दृष्टिये से लेलौ गेलौ छै।

अंगिका के आलोचना-साहित्यों के वैभव बहुत कुछ हिंदी में पत्र-रूपों में लिखलौ गेलौ ऊ समीक्षासिनी पर निर्भर छै जे अंगिका भाषा के आरंभिक प्रकाशित कृति पर नामी-नामी साहित्यकार-द्वारा लिखलौ गेलौ छै आरो जेकरों अनुवाद आरो प्रकाशन 'चकोर' जी ने 'अंग-माधुरी' के अंकों में करने छै। श्री अनूपलाल मंडल, डॉ० विष्णु किशोर झा 'बेचन', श्री रामरीजन रसूलपुरी, श्री बाबूलाल मधुकर, महाकवि केदारनाथ प्रभात, श्री श्यामसुन्दर बादल, डॉ० अजित नारायण सिंह 'तोमर', श्री सकलदेव शर्मा, डॉ० श्रीरंजन सूरिदेव, डॉ० कुमार विमल, डॉ० श्रीरंग शाही, बाबू वृन्दावन दास, डॉ० उदय नारायण तिवारी, श्री रमण शाडिल्य, पं० रामदयाल पाण्डेय, श्री कुलदीप नारायण राय 'झड़प', श्री गदाधर प्रसाद अम्बष्ठ, पं० हंसकुमार तिवारी, डॉ० लक्ष्मी नारायण सुधांशु, डॉ० हजारी प्रसाद द्विवेदी, डॉ० माहेश्वरी सिंह 'महेश', श्री जगदीश मिश्र आरनी के अंगिका रूपान्तरित प्रतिक्रियात्मक समीक्षा अंगिका भाषा के आलोचना-साहित्यों के एक अग छेकै, जे कि अधिकांशतः नैसर्गिक आलोचना आकि व्याख्यात्मक आलोचना के रूपों में छै।

सुकवि 'भुवन' आरो नागार्जुन के काव्य पर लिखलें गेलें समीक्षा डॉ० देवेन्द्र के तुलनात्मक समीक्षा छेकै तें 'दू पाटन के बीच में' अंगिका के दू कवि श्री सदानन्द मिश्र आरो 'सरल' जी के काव्य पर लिखलें गेलें डॉ० अमरेन्द्र के समीक्षा भी।

हिंदी में अनुवादित डॉ० अमरेन्द्र के 'कागा की सदेश उचारै ! : अंगिका विरह-काव्य का विराम चिन्ह' अंगिका में निर्णयात्मक आलोचना आरो मनोवैज्ञानिक आलोचना के उदाहरण छेकै। हिंदी में रूपान्तरित 'आधुनिक अंगिका काव्य का हिंदी व्याकरण' अंगिका में तुलनात्मक समीक्षा के प्रवृत्ति के प्रतिमान छेकै, जै में पहिलें बार हिंदी आरो अंगिका के नामी कवि/कविता के आमना-सामना राखी के आधुनिक अंगिका के प्रवृत्ति के उजागर करलें गेलें छै।

आधुनिक 'समीक्षा'-पद्धति में मिथकीय आलोचनाओ एक प्रमुख भेद छेकै, जेकरों आधार युग के अवचेतन से छै आरो जै में आलोचक कृति में आच्छादित विम्ब के माध्यमों से कवि के आधुनिक चिन्तन के स्पष्ट करै छै। ई बात सही छै कि अभी अंगिका आलोचना के समृद्ध विकास नै हुवें पारलें छै। यहे कारण छेकै कि 'सती-परीक्षा : स्वतंत्र भारत रों रामायणी कथा' - हेनोँ एकाध श्रेष्ठ मिथकीय आलोचना के छोड़ी के दोसरोँ समीक्षा के उदाहरण नै मिलै छै। अवश्ये मार्क्सवादी आरो शैलीगत आलोचना के दिस कुछेक नया आलोचकों के ध्यान मिलै छै, बहू में शैलीगत से काँहीं ज्यादा मार्क्सवादी आलोचना के प्रवृत्तिये उभरी के ऐलें छै। प्रो० कमला प्रसाद सिंह, डॉ० देवेन्द्र, डॉ० विद्या सिंह, डॉ० नीलम महतो, डॉ० योगेन्द्र, प्रो० रामचन्द्र घोष, श्रीमती मीरा झा, श्री प्रेम प्रभाकर, श्री अचल भारती, श्री गिरिजा शंकर मोदी, प्रो० श्रीकेशव नारायण सिंह, श्री महेश सिंह आनन्द, श्री आमोद कुमार मिश्र, डॉ० बहादुर मिश्र, डॉ० मनाजिर आशिक हरगानवी, डॉ० महेन्द्र प्रसाद जायसवाल, श्री ओमप्रकाश पाण्डेय, प्रो० जनार्दन, श्री विकास पाण्डेय, प्रो० नवीन निकुंज, डॉ० लखन लाल आरोही, डॉ० अमरेन्द्र आरनी मुख्य रूपों से मार्क्सवादी आलोचना के अंगिका साहित्यों में ज्यादा तेज करने छै। होना के तें श्री सच्चिदानन्द 'श्रीस्नेही', डॉ० तेजनारायण कुशवाहा, डॉ० मधुसूदन साहा, डॉ० श्यामसुन्दर घोष, प्रो० मनमोहन मिश्र आरनी के आलोचना-साहित्यों में शिल्पगत आलोचना के प्रवृत्तिये प्रखर छै।

१९९७ ई० में प्रकाशित श्रीमती जीवनलता के 'तुलसी के काव्य मे राम के रूप आरो स्वरूप' अंगिका में व्यावहारिक आलोचना पुस्तक छेकै, जै में आलोचक श्रीमती जीवनलता ने भारतीय आचार्य-वर्ग द्वारा निर्देशित सौन्दर्य के

आधार पर तुलसी-काव्य मे राम के वाह्य आरो भावगत सौन्दर्य के विस्तार से मीमांसा के विषय बनैने छै। ई आलोचना-पुस्तक के भाषा आरो व्याख्या सहज-सरल छै। ई कहलौ जावे सकै छै कि श्रीमती जीवनलता के 'तुलसी के काव्य मे राम के रूप आरो स्वरूप' अंगिका मे हेनौ पहिलौ पुस्तक छेकै, जेकरौ सीधे-सीधे संबध आलोचना से छै आरो जेकरौ समीक्षा-पद्धति मे आलोचक ने समीक्षा के विभिन्न प्रवृत्तियों के ग्रहण करते हुए महाकवि तुलसीदास के सौन्दर्य-दृष्टि के जाहिर करने छै।

ई साफ तौर से कहलौ जावे सकै छै कि अंगिका मे हेनौ आलोचना-पुस्तक लिखै/निर्माण करै के सम्मान अंगिका लेखकों मे दृष्टिगत नै होय छै। हेकरौ एक कारण येहे हुए पारै छै कि हेनौ समीक्षा-पुस्तकों के प्रकाशक के अभाव छै। हिंदी मे लिखित ई भाषा-साहित्यों के आलोचना-ग्रन्थ हिन्ने-हुन्ने मिली गेला के कारणे अंगिका-साहित्य पर जे भी महत्वपूर्ण आलोचना साहित्य प्राप्त होय छै, अंगिका मे ओकरौ अभाव छै।

अंगिका साहित्यकारों के आलोचना खड़ी बोली हिंदी मे आवै के एक दोसरो कारण ई रहलौ छै कि विभिन्न विश्वविद्यालयों मे अंगिका साहित्य पर जे शोध-प्रबन्ध प्रस्तुत करलौ जाय छै, ओकरौ भाषा खड़ी बोली के होय छै। जबतक अंगिका साहित्य पर लिखलौ जाय रहलौ पी-एच० डी०, डी० लिट्० डिग्री वास्ते शोध-प्रबन्ध अंगिका भाषा मे नै आवै छै तब ताँय अंगिका के आलोचना-साहित्यों के अपेक्षित विशालता असंभवे रहतै। परंतु, है बात पूरा विश्वास के साथ कहलौ जावे सकै छै कि अंगिका मे जौन समीक्षा-पद्धति के नीव बाबा राहुल सांकृत्यायन ने राखने छेलै ऊ आबे काफी फैली चुकलौ छै। आबे भाष्य या समीक्षा लेली खाली अंगिका के काव्ये के नै उठैलौ जाय रहलौ छै, बल्कि गद्य के दोसरो-दोसरो विधा के विकास भाधे गद्य के आरो-आरो विधा पर आलोचना लिखलौ जाय रहलौ छै, आरो अंगिका के गद्य-साहित्यों पर लिखलौ जाय रहलौ नया आलोचना के भाषा अंगिका छेकै, जे कि ई भाषा के आलोचना-साहित्यों के समृद्धि के प्रति आश्वस्त करैवाला छेकै।

## लोक-साहित्य (गद्य)

लोक-साहित्य कोय समाज के आदिम मनोविज्ञान के अभिव्यक्ति होय छै, जेकरा लोकवार्ता भी कहलौ जाय छै। आदिम समाजों के ई अभिव्यक्ति चाहे

धर्म के क्षेत्रों में हूवें आकि विज्ञान के क्षेत्रों में, सामाजिक रीति-रिवाजों के लैके हूवें आकि कला-विषयक, सब लोकवार्ता के अन्तर्गत आवै छै। साहित्य-क्षेत्रों में ऊ-सब 'लोक-साहित्य' कहावै छै।

सामाजिक विज्ञानों के विश्वकोषों में लोकवार्ता से जे ज्ञान मिलै छै ओकरों अनुसार लोकवार्ता के अन्तर्गत लोक-कला, लोक-दस्तकारी, लोक-उपकरण, लोक-वेश-भूषा, लोक-विश्वास, लोकाचार, लौकिक उपचार, लोक-गीत, लोक-कथा, लोक-संगीत, लोक-नृत्य, लोक-क्रीड़ा, लोक-चेष्टा, लोक-वाणी -आर के गिनैलें गेलों छै। यहे लोक-साहित्यों के तत्व छेकै, जेकरा लोगे आपनों-आपनों समाज से परम्परा रूपों में सीखै छै। ई काँहीं लिखित रूपों में नै होय छै। यहे लेली लोक-साहित्य लिखित साहित्य नै, मौखिक साहित्य छेकै -- हेनों मौखिक साहित्य, जेकरा में आदिकालीन समाजों के मनोविज्ञान काम करै छै। 'लोक' के मतलबे होय छै, समाज के हेनों वर्ग जे आभिजात्य समाजों के संस्कार आरो शास्त्रीयता से शून्य रहै छै, एक हेनों वर्ग जे आपनों परम्परा के प्रवाह में जीते रहै छै।

हेना के तें लोक-साहित्य मौखिक साहित्ये होय छै, मतरकि आय-काल हेनों लोक-साहित्यों के संकलन-प्रकाशनों जोरों पर छै। आयकों सभ्य समाज तैहा के अविकसित समाजों के विकास छेकै। यै लेली सामाजिक विकास के गति समझे लें आय-काल लोक-तत्वों के अध्ययनों पर काफी जोर देलें जाय रहलें छै।

यहू में कोय शक नै कि अंगिका के गाथा-काव्य भगैत, आनुष्ठानिक गीत आरनी के संकलन आरो प्रकाशन तें काफी करलें गेलें छै, मतरकि लोक-गद्य-साहित्यों के विपुल भंडारों के संकलन आरो प्रकाशन दिस कम रज्ञान रहलें छै।

अंगिका लोक-कहानीसिनी के संकलन आरो प्रकाशन तें अवश्ये होय रहलें छै, मतरकि ई भाषा के लोक-कथा के संकलन नै के बराबर हूवें पारलें छै। हेकरों एक कारण छेकै हेनों लोक-कथा के संबंध गोपनीयता से होबैं। जीतिया, तीज आरनी के कथा हेने लोक-कथा छेकै, जेकरों प्रकाशन स्त्रीसिनी कोय लोक-विश्वास के कारणे नै करै छै। तैयो हेनों अवदान या निजन्धरी कथा के संकलित करै में श्रीमती/सर्वश्री मीरा झा, जनार्दन यादव, सच्चिदानन्द 'श्रीस्नेही', खुशीलाल, मीना तिवारी, सरिता, सुहावनी, ज्ञानम् भारद्वाज, विद्यानन्द किशोर, शशिभूषण पाठक, आशुतोष घोष, माला सिन्हा, सुरेश मंडल आरनी के कोशिश काफी प्रशसनीय छै।

हेना के तें पूजा-कथा के अवदानों से अलग करते हूवें ई कहलें जाय



है कि पूजा-कथा कोय-ने-कोय आध्यात्मिक रहस्यों से जुड़लें कथा होय है आरो अवदानों के संबंध कोय संत, कोय घटना, कोय व्यक्ति, कोय स्थान से होय है, पर ई नै भूलना चाहियों कि हेनों घटना, स्थान, संत आरनी के कथाओ काँहीं-ने-काँहीं कोय रहस्यों से जरूरे जुड़े है। यही ले ई तरहों के कथा के निजन्धरी कथा के भीतरे रखना ठीक होतै।

अंग-जनपदों में संत, घटना आरो स्थान के लोक-अवदान बिखरलें पड़लें है, जेकरों संकलन-प्रकाशन नै के बराबर होलें है। आनन्द मार्ग के प्रतिष्ठापक श्री आनन्दमूर्ति जी ने आपनों प्रवचनों के क्रम में हेनों कै-एक स्थल-कथा दिस संकेत करने है, जे हुनकों 'प्रवचन-संग्रह' में संकेत के रूपों में संग्रहितो है, मजकि यै दिशा में कार्य आपनों सौसे रूपों में बाकीये कहलें जैतै।

श्री प्रदीप प्रभात ने अंग-जनपदों के कुछेक संत आरो घटना से जुड़लें कयेक-टा अवदानों के जे संग्रह करने है ऊ आर्थिक संकटों के कारणें पाण्डुलिपिये में राखलें है। हेनोंसिनी अवदानों के बहुत बड़ों भाग मौखिके रूपों में अंगिका के यशस्वी गीतकार श्री भगवान प्रलय के पासो सुरक्षित है, जेकरों प्रकाशन होबों बहुत आवश्यक है।

निजन्धरी अवदानों के जे दू भेद (साहित्यिक आरो लौकिक) करलें गेलें है वै में साधु-संतों के कथा तें साहित्यिक अवदानों के भीतर आवै है, मजकि लौकिक अवदान जे कि कोय ऐतिहासिक पुरुषों के रोमांचकारी वृतांत होय है, होनों ऐतिहासिक व्यक्ति आरो घटनाओ के कथा के विपुल भंडार श्री जनार्दन यादव, डॉ० देशभक्त, डॉ० विजय बाबू, श्री फतह बहादुर सिंह, श्री विजेता मुद्गलपुरी आरनी के पास मौखिक रूपों में सुरक्षित है।

नया समयों में हेनों अवदान-साहित्यों के साथे-साथे लोक-कहानियों के संग्रह प्रकाशित कराय के उत्साह अंगिका साहित्यकारों में बढ़लें है। यहाँ संकेत करी देबों आवश्यक होतै कि लोक-कहानी/लोक-कथा कोय अवदान नै छेकै। लोक-कथा एक हेनों वार्ता मानलें जाय है जे पूरा-पूरा केकरो द्वारा केकरो सुनैलें जाय है आरो जेकरों पीछूँ कोय-ने-कोय धार्मिक उद्देश्य अवश्य होय है, मतरकि लोक-कहानी वै से अलग सामान्य व्यक्ति, पशु-पक्षी आरनी के कहानी होय है।

हेनों कहानी के प्रवक्ता भगवान् शिव के मानलें गेलें है। की है मानलें जाय कि अंग-जनपदों में लोक-कहानी के समृद्ध भंडारों के कारण छेकै

अंग देशों के मंदराचल से भगवान् शिव के संबंध ?

ई तें अनुसंधान से स्पष्ट होय चुकलौं छै कि समस्त भारत आरो भारत से बाहर जौन संस्कृति के फैलाव होलै ऊ अंग-जनपदहै के संस्कृति छेलै। यै में कोय आचरज नै कि अंग देशों के ई सांस्कृतिक फैलाव में हेकरौ लोक-कहानी के सम्पदाओ शामिल छेलै। लोक-वार्ता के प्रसिद्ध विद्वान् जेन्नी ने तें ई सिद्ध करी देलें छै कि लोक-कहानी के प्रस्थान-स्थल भारत छेकै। हुनी तें भारतीय कहानी के विश्व-यात्रा के क्रमबद्ध मार्गो निश्चित करी देलें छै।

अंगिका लोक-कथा आरो कहानीसिनी के प्रकाशन विभिन्न भाषा/बोली में होला के बादो अंगिका भाषा में ई अभी ताँय मौलिक रूपे में प्राप्त छै। श्री विद्यानन्द किशोर के पूर्व हेनो कोय साहित्यकारों के ठोस प्रयास नै मिलै छै, जे अंगिका लोक-कथा-कहानी के संग्रहित करी के प्रकाशन करै के बात सोचलें रहें। १९८५ ई० में श्री विद्यानन्द किशोर द्वारा संकलित-संपादित 'सात पट्टा हट्टा-कट्टा' नाम के अंगिका लोक-कथा-संग्रहें निःसन्देह ऐतिहासिक महत्व राखै छै। वै संग्रहों में सम्पादक जी ने सात-टा लोक कथा - 'आदमी के देलें कुछ नै, भगवानों के देलै राज', 'महापंडित टिटही झा', 'भोपला के करतूत', 'भटपुरैन', 'धूरे मरदे, काजी कही के', 'मरदों के फेरा' आरो 'सम्मति के फौल' - संग्रहित करने छै।

संग्रह आरो सम्पादन में संपादक किशोर जी ने लोक-तत्वों के सुरक्षा के खेयाल पूरा-पूरा राखने छै। सातो-के-सातो कथा विभिन्न विषयों से जुड़लौं होला के कारणे अंग-जनपदों के मनोविज्ञान आरो सामाजिक स्थिति के उजागर करै में समर्थ छै।

'चलों, खिस्सा के गाँव' (१९९६) अंगिका लोक-कथा आरो कहानी के दोसरों महत्वपूर्ण संग्रह छेकै। ई संग्रहों के संकलन आरो संपादन अंगिका के प्रिय कवयित्री श्रीमती मीना तिवारी ने करने छै। उन्नीस-टा लोक-कथा-कहानी के है संग्रहों में श्रीमती मीना तिवारी ने अधिकांशतः हेने लोक-कथा-कहानी संग्रहित करने छै जे कि अंग-जनपदों के मौलिक प्राचीन संस्कृति -- लोक-विश्वास, रीति-रिवाज, लोक-प्रथा -आर के समझै में बहुत सहायक छै, हालांकि लोक-कथासिनी में लोक-वार्ता के एक मुख्य-तत्व, अंगिका के लोकोक्ति-मुहावरा आरनी के अभाव जरा खलै छै। जों ईसिनी कथा के संग्रह ग्रामीण अनपढ़ लोगों के बीच से होतियै तें है संग्रहों के मूल्य आरो ऐतिहासिक होतियै।

लोक-साहित्यों के अभिव्यक्ति के माध्यम आंचलिक भाषा या बोलीये होय छै आरो भाषा के ई स्वरूप मुख्य रूपों से मौखिक होला के कारण

हेनों साहित्यों के संग्रह में लिखित भाषा के उपयोग से लोक-साहित्यों के मूल स्वरूप अवरुद्ध होय छै।

अंगिका लोकोक्ति-मुहावरा के लैके डॉ० अभयकान्त चौधरी के 'अंगिका लोकोक्ति' (१९७३), डॉ० चौधरी आरो श्री 'चकोर' के 'अंगिका लोकोक्ति आरो मुहावरा (१९९०) के साथे डॉ० डोमन साहु 'समीर' - प्रणीत 'अंगिका-हिंदी-शब्दकोष' (१९९७) के प्रकाशन यै दिशा के भविष्य के प्रति सबै के आश्वस्त करै छै।

१९९० ई० में समय-साहित्य-सम्मेलन, पुनसिया (बाँका) द्वारा यै दिशा में कुछ कदम उठैलें गेलें छेलै। सम्मेलन के ओरी से एक मासिक गोष्ठी जारी करलें गेलें छेलै जै में स्थानीय ग्रामीण लोगों से लोक-कथा-पिहानी-सुनै-सुनावै के परम्परा चलैलें गेलें छेलै। श्री नारदी यादव के सहयोग यै दिशा में अच्छा रहलै, मजकि दुर्भाग्य से ऊ परम्परा अधिक दिनों ताय नै चलें पारलै।

बाँका जिला के श्री परमानन्द 'प्रेमी' आरो अ० भा० अंगिका साहित्य-विकास-परिषद् से डॉ० आत्मविश्वास उत्तरी अंग-जनपदों में अंगिका गद्य-लोक-साहित्यों के संरक्षण में काफी सजग छै। जरूरत छै ई कार्यक्रमों के आरो सक्रिय रूप दै के।

## लोकोक्ति-मुहावरा-आर

अंगिका केरों लोकोक्ति-मुहावरासिनी के संग्रह अपना-आप में एक मनोरजक कार्य नाखी होला के कारणे लोकोक्ति-मुहावरा-पिहानी-फेंकड़ा ओगैरह के संग्रह ई जनपदों में बहुत पुरानों काम रहलें छै। १९६६ ई० के आस-पास बाँका (अलीगंज) - स्थित एक होमियोपैथ डाक्टर ने तें हमरा से आपनों लुग अंगिका लोकोक्ति के एक अप्रकाशित संग्रहों के चर्चा करने छेलै जेकरा में से कते नी ठेठ लोकोक्ति-मुहावरा हुनी सुनैने रहैत।

अंगिका लोकोक्ति आरो मुहावरा के प्रकाशन डॉ० अभयकान्त चौधरी के पहिलें लोकोक्ति-संग्रह 'अंगिका-लोकोक्ति' (१९७३ ई०) में ऐलै। चौबीस पृष्ठों के यै संग्रहों में लोकोक्ति-सब के तीन भागों में राखलें गेलें छै -- एक भाग में एक-एक पंक्ति के, दोसरा में दू-दू पंक्ति के आरो तेसरा में कृषि-संबंधी लोकोक्ति राखलें गेलें छै।

फनू, डॉ० चौधरी आरो श्री नरेश पाण्डेय 'चकोर' के संयुक्त संग्रह-संपादन में कुछेक अंगिका लोकोक्ति के प्रकाशन 'अंग-माधुरी' में सितंबर, १९९० ई० से

शुरू होय के मई, १९९२ ई० तक होलें छै जे कि वर्णानुक्रम में छै। हौ संयुक्त संग्रह-संपादनो से पूर्व डॉ० मनोहर प्रसाद सिन्हा ने आपनो शोध-प्रबंध 'अंगिका लोकोक्ति और मुहावरे' पर भागलपुर विश्वविद्यालय से 'डॉक्टर' के उपाधि पाबी चुकलें छेलै। अंगिका लोकोक्ति आरु मुहावरा लोगे के समक्ष राखे के दिशा में डॉ० सिन्हा के ऊ शोध-कार्य बड़ी ऐतिहासिक महत्व के छेकै।

'अंगिकांचल' के मार्च, १९९४ के अंको में भी कुछेक कहावत आरु मुहावरा प्रस्तुत करलें गेलें छै। श्री 'चकोर' जी ने कुछेक 'फेंकड़ा और लोरियाँ' प्रकाशित करने छै जेकरें आपनो महत्व छै। पिहानी (बुझौवल) -संग्रह के दिशा में काम होबो आभी प्रतीक्षित छै।

## अभिज्ञान-साहित्य

आधुनिक समयों में हेन्हीं साहित्य लिखलें जाय रहलें छै जेकरा साहित्य के क्षेत्रों में शुद्ध रूपों से नै राखलें जावें सकै छै, तैयो ओकरों संबंध साहित्य से अप्रत्यक्ष या प्रत्यक्ष रूपों से होला के कारणे ओकरा साहित्य के इतिहास के अध्ययन-क्षेत्रों से बाहर नै राखलें जावें सकै छै। अंगिका में हेनों अभिज्ञान-साहित्यों के चौरफा विकास लेली काफी सक्रियता पैलें जाय रहलें छै।

ई अलग बात छेकै कि आभी ताँय ई भाषा में इतिहास, भूगोल-आर विषयों के जत्ते-टा साहित्य प्राप्त होय छै, ओकरों आपनो सीमा छै। इतिहास-भूगोल -आर के हेनों अभिज्ञान-साहित्य सिरजे के पीछूँ एक्के मकसद रहलें छै कि अंगवासी के आपनो इतिहास आरु जनपदों के इतिहास-भूगोलों के ज्ञान हुवें पारें। यही लेली हेनों साहित्य छोटों-छोटों लेखे के रूपों में प्रकाशित होलें छै आरु वैसिनी लेखों में इतिहास-भूगोल एक विशेष भूखंडे से खास करी के जुड़लें मिलै छै।

### (क) इतिहास-भूगोल

इतिहास-भूगोल से संबंधित अभिज्ञान-साहित्यों में सर्वश्री गोपाल कृष्ण 'प्रज' के 'अथातो अग जिज्ञासा' (१९७४) आरु 'चम्पानगरी' (१९७४), शंकर प्रसाद 'श्रीनिकेत' के 'अग रो सक्षिप्त इतिहास' (१९७४), तारिणी प्रसाद सिंह -कृत 'घोघा' (१९८०), 'प्रज' के ही 'अग राज्य' (१९७८), सुरेश मंडल 'कुसुम'

के 'सुलतानगंज' (१९८१), शशिभूषण शीतांशु के 'बिहारों के महिमा' (१९८१), अवध भूषण मिश्र के 'भागलपुर जिला : इतिहासों से पैहने' (१९८३), श्रीरंजन सूरिदेव के 'वसुदेव हिण्डी में अंग-जनपद' (१९८४), इन्दुशेखर के 'रजरप्पा के यात्रा' के अतिरिक्त आय हेनों अभिज्ञान-साहित्यों के सृजन में प्रो० विनय प्रसाद गुप्त तथा सर्वश्री परशुराम ठाकुर 'ब्रह्मवादी', चन्द्रप्रकाश 'जगप्रिय', विजयेन्द्र, डॉ० आत्मविश्वास, जनार्दन यादव आरनी लेखको मुख्य रूपों से सक्रिय छोट।

### (ख) भाषा, लिपि आरो व्याकरण

अंगिका में भाषा, लिपि आरो व्याकरण विषय पर पुस्तक लिखै लेली ओरियो से एगो विशेष प्रकार के शैली अपनैलों गेलों छै जे अंगिका आरो हिंदी (खड़ी बोली) के संयुक्त प्रयोगों पर आधारित छै। संबद्ध लेखक वैयाकरण ने उदाहरण तें अंगिका में राखलें छै, मतरकि व्याख्या लें खड़ी बोली के प्रयोग करने छै। संभवतः, ई विवेचन-शैली के निर्वाह आभियों ताँय यै लेली प्रचलन में छै कि अंगिका के भाषा, लिपि आरो व्याकरणों के बात विस्तृत विद्वान-वर्ग तक पहुँचैलें जावें सकें।

अंगिका भाषा आरो व्याकरण पर लिखै के कार्य तें संस्कृत-प्राकृत-काल में हेमचन्द्र (१०८८-११७२ ई०) से ही शुरू होय छै, केन्हें कि प्राकृत-व्याकरण तैयार करै लेली जे व्याकरण कश्मीर से मंगवैलों गेलों छेलै ओकरो लेखकों के संबन्ध सीधे अंग-जनपदों के प्राचीन विक्रमशील विश्वविद्यालयों से छेलै, जिनी अंगिका-प्राकृत के आधार पर व्याकरण-ग्रंथ तैयार करने छेलै। बाद में, हेमचन्द्र ने आपनों प्राकृत-व्याकरण के निर्माण में वहे कश्मीरी पंडितों के आंगी-प्राकृत व्याकरणों के आधार बनैलें छेलै।

मतरकि अंगिका-प्राकृतों के नाम लैके विधिवत् भाषा-वैज्ञानिक अध्ययन डॉ० कामेश्वर शर्मा के शोध-कार्य से प्रारम्भ होय छै। हिनी सबसे पहिले बिहार-विश्वविद्यालयों से आपनों शोध-प्रबंध 'भागलपुर जिले की बोली' पर पी-एच० डी० के उपाधि हासिल करने छेलै। अंगिका भाषा-व्याकरण साहित्य के दृष्टि से डॉ० माहेश्वरी सिंह 'महेश' के 'अंगिका भाषा और साहित्य' एक ऐतिहासिक मूल्य के अभिज्ञान-साहित्य छेकै। खाली यही लें नै कि डॉ० 'महेश' के ऊ अंगिका भाषा-पुस्तक १९५९ ई० में पहिलों दाफी प्रकाशित होय के ऐलै, बल्कि वै में अंगिका के ध्वनि आरो व्याकरण पर वैज्ञानिक ढंगों से विचार करला

कें साथें-साथ पहिलों दाफी बिहार कें आरो-आरो बोली कें साथें अंगिका कें तुलनात्मक अध्ययन प्रस्तुत करलें गेलों छै। भविष्य में अंगिका आरो दोसरो बोली कें साथें तुलनात्मक अध्ययन कें नीव डॉ० 'महेश' कें ही भाषा-साहित्य में पड़ै छै। बाद में डॉ० शर्मा आरो डॉ० महेश कें भाषा-अध्ययनों कें आधार पर डॉ० सुकदेव सिंह द्वारा 'भोजपुरी और हिन्दी' (१९६७) ग्रंथ में पृष्ठ १७४ से लैकें १८५ ताँय अंगिका व्याकरण पर विचार करलें गेलों छै। ओरी में खड़ी बोली में अंग आरो अंगिका के इतिहास-भूगोलों पर संक्षिप्त चर्चा छै।

१९६९ ई० में 'अंगिका का प्राचीन रूप' आरो 'अंगिका का संक्षिप्त व्याकरण' -शीर्षक से 'अंगिका संस्कार-गीत' में प्रकाशित दू-टा भाषा-लेख निःसन्देह उच्च कोर् के छेकै। दू शीर्षक कें ई दोनों लेख 'प्रस्तावना' कें अधीन लिखलें गेलों छै।

यही 'प्रस्तावना' से यहू ज्ञात होय छै कि ऊ दुन्नो अंगिका भाषा-साहित्यों कें प्रकाशन कें पहिलें श्री गदाधर प्रसाद अम्बष्ठ पंचतत्व-प्राप्त होय गेलों छेलात आरो हुनी आपनों जीवन-कालों में 'अंगिका व्याकरण' नामों कें अभिज्ञान-साहित्य कें निर्माण करने छेलात। पं० अम्बष्ठ कें समकालीन कें ई तें पता होबे करतै कि आखिर ऊ 'अंगिका व्याकरण' कहाँ कौनी रूपों में छै। आखिर, इतिहासकारद्वय कें 'अंगिका साहित्य का इतिहास' में हेकरो उल्लेख कै-हें नी आवें पारलै। 'अंगिका-संस्कार-गीत' में पं० वैद्यनाथ पाण्डेय आरो श्री राधावल्लभ शर्मा द्वारा पं० अम्बष्ठ कें अंगिका व्याकरण कें उल्लेख कें बाद हठाते ओकरो उल्लेख बंद होय जैबो आश्चर्यजनक छै !

अंगिका भाषा आरो व्याकरण कें अपेक्षित समृद्धि तक लै जाय कें श्रेय डॉ० परमानन्द पाण्डेय कें विशेष करी कें रहलें छै। अब ताँय अंगिका व्याकरणों पर हिनको तीन महत्वपूर्ण पुस्तक, 'अंगिका और भोजपुरी भाषाओं का तुलनात्मक अध्ययन' (१९७९), 'प्रथम अंगिका व्याकरण' (१९७९) आरो 'अंगिका भाषा' (१९८५) प्रकाशित होय चुकलें छै। एकरो अतिरिक्त हिनको अनेक महत्वपूर्ण भाषा-लेखो प्रकाशित होलें छै, जेसिनी में 'अंगिका' (अंक २-४, १९७१) में प्रकाशित 'अंगिका ध्वनिग्राम' प्रमुख छै। आकाशवाणी, पटना से प्रसारित श्री सीताराम यादव कें साथ हिनको बिहार की प्रमुख बोलियाँ : कितना भेद, कितना साम्य' विषय पर भेट-वार्ता आरो 'अंगप्रिया' (मई, १९८९) में प्रकाशित श्रीमती मीरा झा कें साथें अंगिका भाषा-वर्तनी पर हिनको बातचीत

अंगिका भाषा-साहित्यों के दृष्टि से बहुत महत्वपूर्ण है। आकाशवाणी, पटना से प्रसारित भेंट-वार्ता के प्रकाशन १९८४ ई० में होलें है। 'अंगिका भाषा का वैज्ञानिक अध्ययन' शोध-प्रबन्ध पर हिनका भागलपुर विश्वविद्यालयों से डी० लिट्० के उपाधि मिललें है।

'अंग-तरंगिनी' के 'प्रवेशांक' (९४) में पाण्डेय जी के 'अंगिका ज्ञान-कौमुदी' के एक अंश सम्पादक 'ब्रह्मवादी' जी ने प्रकाशित करने है। सम्पादके के अनुसार, 'अंगिका ज्ञान-कौमुदी' नामों से अंगिका-व्याकरण के निर्माण करबों श्री उमेश जी ने १९६५ ई० में शुरू करने छेलै, जेकरों समाप्ति हुनी १९७९ ई० में करलै छेलै। अंगिका आरो खड़ी बोली के संयुक्त भाषा-शैली से अलग हटी के श्री-सुमन सूरों ने १९८५ ई० में पहिलों दाफी 'अंगिका भाषा आरो साहित्य' के निर्माण, ओरी से आखरी ताँय, अंगिका भाषाये में करलें है। अंगिका भाषा के ज्ञान-प्राप्ति में ई एक सुन्दर प्रस्तुति छेके। यै में हुनी अंगिका के दुइ विशिष्ट ध्वनि लें नया लिपि-चिन्ह सुझैने छै, जेकरों समर्थन करतें हुए १९८६ ई० में 'वनपांखी' (दुमका) में श्री अचल भारती के एक भाषा-लेख 'अंगिका की स्वर-ध्वनियाँ' शीर्षक से प्रकाशित होलें छै।

अंगिका भाषा यै लेली आरो-आरो भाषा से अलग आरो विशिष्ट छै कि यै में दुइ-टा विशिष्ट ध्वनि छै, जे कोय भाषा में शायदे मिलतें रहें। ई दुन्नो ध्वनि के वैज्ञानिक आरो व्यावहारिक लिपि-चिन्ह की हुवें पारें, ई दिशा में डॉ० डोमन साहु 'समीर' के भाषा-लेख 'अंगिका व्याकरण' आरो 'अंगिका भाषा-साहित्य' में एक ऐतिहासिक अध्याय के योग छेके। 'नवकल्प' के अंक-१६ (जनवरी, १९८९) में प्रकाशित वै लेखों में डॉ० समीर ने अंगिका के आवश्यक अंश के छूतें हुए पहिलों दाफी अंगिका के दुन्नो विशिष्ट ध्वनि -- प्रसृत ए-कार आरो प्रसृत अ/ओ-कार -- के वास्तें क्रमशः एं = ~ आरो ओं = ॅ लिपि-चिन्हों के प्रयोग द्वारा अपेक्षित मार्ग प्रशस्त करने छै। डॉ० समीर द्वारा प्रवर्तित दुन्नो विशिष्ट लिपि-चिन्हों के साथे-साथ पूर्व-प्रचलित लिपि-चिन्हों के अवैज्ञानिकता आरो श्री सुमन सूरों द्वारा प्रसारित लिपि-चिन्हों के वैज्ञानिकता के सवालें पर १९९१ ई० में सूरों जी के एक वर्तनी-लेख 'अंगिका में वर्तनी की एकरूपता' के शीर्षकों से 'बांस-बांस बाँसुरी' (किताब) में प्रकाशित छै, जे कि पूर्व-प्रचलित आकि 'समीर' जी द्वारा स्थापित लिपि-चिन्हों के मान्यता के कमी दिस संकेत करै छै। हेना के तें 'समीर' जी द्वारा प्रवर्तित लिपि-चिन्ह (एं = ~ आरो ओं = ॅ)

सर्वथा वैज्ञानिक आरो व्यावहारिक है।

१९९१ ई० में ही डॉ० रमेश मोहन शर्मा 'आत्मविश्वास' के शोध-प्रबंध लोकगाथा 'बाबा बिसुराँथ' में 'भाषा-सर्वेक्षण और अंगिका' के उपशीर्षक से एक लेख प्रकाशित है, जे कि अंग-जनपदों के विभिन्न अंचलों में अंगिका के उच्चारण के स्थिति आरो अंगिका के बोली पर वैज्ञानिक प्रकाश डालै में निःसन्देह अतिभाषिक महत्व के छेकै। यहे कारणों से एकरा एक स्वतंत्र लेख के रूपों में 'अंग-तरंगिनी' (१९९४) में 'अंगिका भाषा का भौगोलिक सर्वेक्षण' आरो 'आंगी' (१९९४) के 'भाषा-अंक' में लेखक के शीर्षक से ही प्रकाशित करलौ गेलौ है।

१९९५ आकि १९९६ ई० के बीच होलौ पुस्तक-प्रकाशन संबंधी सूचना उपलब्ध नै है। तबे, श्री शंकर प्रसाद 'श्रीनिकेत' के 'अंगिका व्याकरण' कही के एक पुस्तिका के प्रकाशन होलौ है। ई पुस्तिका के महत्व ये में है कि श्रीनिकेत जी ने अंगिका व्याकरण के बात ओरी से आखरी ताँय अंगिका भाषा में करने है।

अंगिका भाषा, व्याकरण आरो लिपि के लैके खडी बोली में ही कै-एक महत्वपूर्ण लेखों के प्रकाशन पत्र-पत्रि भाओ में होलौ है; जेना डॉ० अमरेन्द्र के 'आंगी अपभ्रंश ही अर्द्धमागी' ('आंगी', जुलाई-अक्टूबर, १९९३) 'मध्यकालीन भारतीय आर्य-भाषाओं में आंगी की स्थिति और स्थान' ('आंगी', जुलाई-सितम्बर, १९९४), 'बात बोलेगी, मैं नहीं बोलूँगा' ('आंगी', १९९४), श्री परशुराम ठाकुर 'ब्रह्मवादी' के 'अंगिका भाषा का ऐतिहासिक एवं वैज्ञानिक अध्ययन' ('अंग-तरंगिनी', अंक २, १९९४)। 'अंग-तरंगिनी' के अंक ३-४ (वर्ष १९९४-९५) तें पूरा-के-पूरा अंगिका भाषा-लिपिये पर केन्द्रित है। ये में सम्पादक 'ब्रह्मवादी' जी के चार-टा भाषा-लेख -- 'अंगिका भाषा : उद्भव और विकास', 'अंगिका भाषा की प्रागैतिहासिक खोज', 'अंगिका मूल भाषा है' आरो 'अंगलिपि' -- प्रकाशित है। वैसिनी लेखों में 'ब्रह्मवादी' जी ने वैदिक अंगिका से लै के आधुनिक अंगिका के व्याकरण तक पर विचार करने है, जे कि अंगिका भाषा के विभिन्न ढंगों से शोध के आयाम खोलै है। अंग-लिपि के अन्तर्गत अंगिका ध्वनि लै लेखक द्वारा आविष्कृत एक स्वतंत्र लिपि-चिन्ह के चित्रों प्रकाशित है।

'अंगिका वर्तनी' ('अंगिकाँचल', १९९४) के अतिरिक्त 'अंगिकाँचल' के ही अंक १३ आरो १४ के सम्पादकीयो व्याकरण आरो एकरौ लिपि-चिन्हें पर केन्द्रित है। अंगिका वर्तनी-लेख से ई ज्ञात होय है कि ऊ अंगिका वर्तनी डॉ० आत्मविश्वास द्वारा रचलौ अंगिका व्याकरणे के अंश छेकै।



खडी बोली में लिखलौ डॉ० अमरेन्द्र के 'अंग : भारत का इजराइल और अंगिका की विश्व-यात्रा' ('आगी' जनवरी, १९९६), 'शेष इतिहास की कथा' ('आगी' जनवरी, १९९७) आरनी अंगिका भाषा-लिपि के प्राचीनता आरौ एकरौ विविध विस्तृत रूपों के वैज्ञानिक अध्ययन प्रस्तुत करतें लेख छेकै।

अपभ्रंश-साहित्यों में अंगिका-व्याकरण के स्वरूप-निर्धारण के लैके जे अभूतपूर्व आरौ ऐतिहासिक भाषा-अध्ययन डॉ० डोमन साहु 'समीर' द्वारा होलौ छै, ओकरा से ई ऐतिहासिक तथ्य उभरी के आबी गेलौ छै कि हिंदी के आरम्भिक अपभ्रंश-साहित्यों के भाषिक अध्ययन वास्तव में अंगिका-अपभ्रंश के भाषा-अध्ययन छेकै। सिद्ध-कवियों की रचनाओं में अंगिका का स्वरूप' हिनको ई लेख सबसे पहिले आकाशवाणी, भागलपुर से प्रसारित होलौ छेलै, जेकरौ संशोधित प्रकाशन 'आगी' (जुलाई-सितम्बर, १९९४) में होलौ छै। १९९५ ई० में प्रकाशित डॉ० समीर के पुस्तक 'समीक्षात्मक निबंध' में यही विषय पर पहिले से अधिक विस्तृत लेख अंगिका में लिखलौ संग्रहित छै, जेकरौ शीर्षक छेकै -- 'सिद्ध-कविसिनी से रक्तसिनी में अंगिका के स्वरूप'। यही पुस्तकों में डॉ० समीर के एक आरौ लेख संग्रहित छै -- 'अंगिका भाषा आरौ साहित्य'। व्याकरण के दृष्टि से ई लेख निःसन्देह बहुत उपयोगी छै। कुछुवे पृष्ठों में प्रबुद्ध भाषा-शास्त्री डॉ० समीर ने लिपि के साथ अंगिका-व्याकरण के ध्वनितत्व, रूपतत्व (संज्ञा, कारक, लिंग-भेद, वचन, सर्वनाम, क्रियापद, विधि-क्रिया, विशेषण, क्रिया-विशेषण, समुच्चय-बोधक, विन्मयादिबोधक शब्द) आरौ शब्द-भंडार के वैशिष्ट्य के गंभीरता से उद्घाटित करने छै। हेकरे संक्षिप्त रूप 'अंगिका-हिंदी-शब्दकोश' (१९९७ ई०) में प्रकाशित छै।

सिद्ध-कविसिनी के काव्य-भाषा में अंगिका के स्वरूपों पर 'समीर' जी के विस्तृत लेख 'सिद्ध-साहित्य, अंग-जनपद और अंगिका भाषा' हिंदी-साहित्य-सम्मेलन, प्रयाग केरो 'सम्मेलन-पत्रिका' (भाग-८१ : अंक-४ : आश्विन-मार्गशीर्ष, १९९८ शक) में प्रकाशित होलौ छै, जे कि हिनको गंभीर अंगिका-भाषा-अध्ययनों के पारदर्शी प्रमाण छेकै।

फनू, डॉ० समीर द्वारा अंगिका भाषा में लिखलौ 'अंगिका-व्याकरण' (१९९८ ई०), जेकरौ प्रकाशन हिंदी अकादमी हैदराबाद (आ. प्र.) से होलौ छै, अंगिका अभिज्ञान-साहित्यों के एक अमूल्य निधि छेकै। वै में अंगिका-व्याकरणों पर सांगोपांग विवेचन करलौ गेलौ छै। अंगिका में प्रकाशित ऊ एन्हौ पुस्तक छेकै जेकरौ कोष जोड़ नै। ऊ आपनो विषय के पहिलो उत्कृष्ट ग्रंथ छेकै।

सेवा-निवृत्त शिक्षा-पदाधिकारी डॉ० शिवचन्द्र झा के लिखलौ

'अंगिका-व्याकरण' (पाण्डुलिपि) आपनों सरलता आरों बोधगम्यता कें लेल एक उपयोगी कृति छेकै, जेकरों प्रकाशन प्रतीक्षित छै।

### (ग) शब्दार्थ - संकलन आरों शब्दकोश

प्रो० डॉ० बैजनाथ चतुर्वेदी (सिकन्दराबाद) कें वक्तव्यों सें पता चलै छै कि जैन-विश्व-भारती (लाडनूँ, राजस्थान) सें जौन 'देशी-शब्दकोश' प्रकाशित होलें छै वै में 'अंगविज्जा' कें शब्दों संग्रहित छै। जाहिर छै कि अंगिका शब्द, ओकरों रूप आरों अर्थों कें संग्रह-कार्य अतीत में ही शुरू होय चुकलें छेलै। बाद में पं० वैद्यनाथ पाण्डेय आरों श्री राधावल्लभ शर्मा द्वारा अंगिका-शब्दार्थ-संकलन कें जौन काम 'अंगिका-संस्कार-गीत' में शुरू होलै ओकरा सें अलग कोय शब्दकोश बनावै कें कोशिश अंगिका में नै होलें रहै। शब्दार्थ-संकलन कें सरल लीकों कें कुछ आगू बढ़लें गेलै। वै में डॉ० परमानन्द पाण्डेय कें अंगिका-शब्दार्थ-संकलन तथा डॉ० अभयकान्त चौधरी आरों श्री नरेश पाण्डेय 'चकोर' कें शब्दार्थ-संकलन (१९७४ ई०) ई दिशा में गिनैलें जावें परै छै।

होना कें तें 'अंग-तरंगिनी' कें अंको में 'अंगिका-शब्दकोश' कें नामों पर कुछेक अंगिका-शब्द आरों वैसिनी कें अर्थ हिंदी में देलें गेलें छै, मतरकि पं० पाण्डेय आरों श्री शर्मा आकि डॉ० चौधरी आरों श्री 'चकोर' कें वैसिनी 'शब्दार्थ-संकलन' सही माने में कोय 'शब्दकोश' नै छेकै। डॉ० चौधरी आरों श्री 'चकोर' भले आपनों शब्दार्थ-संकलनों कें 'अंगिका-शब्दकोश' कहलें रहें, मजकि ऊ छेकै कुछेक शब्दार्थ-संग्रह मात्र, जेन्हों कि पं० पाण्डेय आरों श्री शर्मा नें आपनों शब्दार्थ-संग्रहों कें 'अंगिका-शब्दावली'-भर कहलें छै। डॉ० चौधरी आरों श्री 'चकोर' कें तथाकथित 'अंगिका-शब्दकोश' में संग्रहित शब्दों कें व्याकरणिक पद-भेद नै देखैलें गेलें छै जबें कि ऊ शब्दकोशों कें एक अनिवार्य अंग (शर्त) होय छै। एतने नै, शब्दकोशों में तें संबद्ध शब्दों कें मूल रूप (प्रातिपदिक) देलें जाय छै, जेकरों उपेक्षा डॉ० चौधरी आरों श्री 'चकोर'-कृत पूर्वोक्त कृति में कै-एक शब्दों कें मामला में छै - अकचकाय, अकनाय, अकबकाय ओगैरह शब्द प्रातिपदिक रूपों में नै छै। एतन्हौ पर, वै में 'अ' अक्षर सें अशत 'छ' अक्षर तकें कें एकारों सौ सें दसे-पनरहे बेसी शब्द (प्रविष्टि) 'अंग-माधुरी' कें कुछेक अंकों में छपलें छै, किताबों कें रूपों में नै।।

वर्णवार शब्दक्रम तें पं० पाण्डेय आरों श्री शर्मा कें 'अंगिका-शब्दावली

में छै, शब्दों के संख्याओ सां अठारों सौ के आस-पास छै। कोय-कोय शब्दों के व्युत्पत्तियो पर विचार करलें गेलें छै, तैयो हुनकासिनी ओकरा 'अंगिका-शब्दकोश' कहै के बात नै करने छै।

१९९७ ई० में हिंदी अकादमी हैदराबाद (आ. प्र.) से प्रकाशित 'अंगिका-हिंदी-शब्दकोश' अंगिका के पहिलें वैज्ञानिक शब्दकोश छेकै, जेकरों प्रणयन प्रसिद्ध भाषा-शास्त्री डॉ० डोमन साहु 'समीर' द्वारा करलें गेलें छै। डॉ० चतुर्वेदी, डॉ० कुशवाहा आरनी नें भी एकरा अंगिका भाषा के प्रथम शब्दकोश मानलें छै।

एक सौ छियत्तर पृष्ठों के ई शब्दकोशों में सात हजार से बेसी शब्द (प्रविष्टि) आरो एक सौ से बेसी मुहावरा संग्रहित छै। डॉ० समीर नें, कोश-कला के अनुसार, पहिलें शब्द, तबें ओकरों व्याकरणिक पद-भेद आरो अर्थ (हिंदी में) प्रस्तुत करने छै। अर्द्धविराम चिह्नों के प्रयोगों से कोय-कोय शब्दों के एको से बेसी अर्थों राखने छै। है शब्दकोशों में अंगिका के आपनों विशिष्ट शब्दों के प्रमुखता से स्थान देलें गेलें छै, संस्कृत-हिंदी, अरबी-फारसी -आर के जेसिनी शब्द अंगिका में तनी-मनी बदललें रूपों में प्रयोगों में आवै छै वैसिनी के तारक-चिह्नों से निर्दिष्ट करी देलें गेलें छै। शब्दकोश-कला के अनुसार, प्रबुद्ध कोशकार डॉ० समीर नें शब्दसिनी के खाली मानक रूपे के नै राखी के ओकरों विभिन्न रूपान्तरों के स्थान देने छै आरो शब्दसिनी के अभिज्ञान में सरलता लेली है शब्दकोशों के ओरीये में संकेताक्षर-सूची दै देलें गेला से है शब्दकोशों के पूर्ण वैज्ञानिक स्वरूप स्थिर होलें छै। साथे-साथ 'प्राक्कथन' में विद्वान् कोशकार नें अंग-जनपद, अंगिका भाषा आरो व्याकरण पर विस्तृत प्रकाश डालने छै जेकरों विशिष्ट महत्व छै।

अंगिका-शब्दकोशों के अलावा 'अंग-माधुरी के लेखक आरो कवि' -शीर्षक में एक रचनाकार-कोशों के प्रकाशन शेखर प्रकाशन, पटना से १९८६ ई० में करलें गेलें छै। ओकरों संपादक श्री नरेश पाण्डेय 'चकोर' नें आधुनिक अंगिका-लेखकसिनी के नाम, जन्म-तिथि, पता आरो 'अंग-माधुरी' में प्रथम रचना प्रकाशन-तिथि के साथे अधिकांश लेखकों के फोटोओ प्रकाशित करने छै। आधुनिक अंगिका-लेखक के विकास के समझ में है किताबों के आपनों महत्व छै।

## (घ) अन्यान्य अभिज्ञान-साहित्य

आधुनिक साहित्यों में इतिहास, भूगोल, भाषा-शास्त्र -आर लिखे के अतिरिक्त कृषि, अर्थ, धर्म, चिकित्सा -आर विषयों के लैके साहित्य-सृजन होय रहलौं छै। कृषि-साहित्य के निर्माण में श्री मेवालाल शास्त्री आर श्री मदन मोहन प्रसाद सिन्हा के नाम विशेष रूपों से आवै छै। १९६३ ई० में शास्त्री जी के बेयालीस पृष्ठों के किताब 'उत्तम खेती के तरीका' के प्रकाशन होलै। केतारी, मकई, धान, गहुम आरनी फसलों के लैके सिन्हा जी के कै-एक लेख 'अंग-माधुरी' के अक्टूबर-नवम्बर १९७१ ई० आर १९७२ ई० के अंकों में प्रकाशित छै। कृषि-साहित्य के खेयाल से श्री महादेव झा के लिखलौं 'घाघ केरौ कहावत' 'अंग-माधुरी' (अप्रैल-मई, १९७३) में छपलौं छै, जे बडी रोचक आर उपयोगी छेकै।

मतरकि है कहै लें ही पड़तै कि अंगिका के कृषि, धर्म आकि चिकित्सा-साहित्य प्रकाशित रूपों में नगण्य छै। 'आज' (पटना, २० जून, '९७) में प्रकाशित एक समाचारों से जात होय छै कि द्वितीय अपर जिला एवं सत्र-न्यायाधीश श्री विवेकानन्द झा ने योग आर अघ्यात्म से संबंधित एक आध्यात्मिक अंगिका-पुस्तक लिखने छै, जेकरौ नाम विद्वान् लेखक ने 'नर से नारायण' बतलै छै। आध्यात्मिक रहस्यों के निबंधकार झा जी ने एतौ सरल आर साहित्यिक भाषा में राखलै छै कि प्रकाशन के बाद बेशक ई साहित्य के अमूल्य निधि सिद्ध होतै। श्री अनिल शंकर झा ने भी 'दुर्गा सप्तशती' के अतिरिक्त उपनिषद्-पुराण के गद्यात्मक अंगिका-अनुवाद पुस्तक तैयार करने छै, जेकरा ई लेखक ने पढ़ने भी छै। 'नर से नारायण' नाखी अंगिका के अभिज्ञान-साहित्य (गद्य) आलोचक-पाठक ने दूर अज्ञात अवस्था में ही पड़लै होलौं छै ; कहियो कोनो गोष्ठी केरौ रिपोर्ट में वै संबंधों में कुछ जानकारी मिलै छै।

विज्ञान विषय के लै के कोय पुस्तक तें प्रकाशित नै भेलौं छै, मतर 'अंगप्रिया' आर 'पुरबा' के संपादन से सुधाकर जी ने हेनौं अभिज्ञान-साहित्यों के विकास लेली अवश्य पहल करने छै आर हुनको प्रेरणा से विज्ञान-साहित्य-लेखन के प्रोत्साहनों मिली रहलौं छेलै। वही समय में 'कोलम्बिया - एक सफल अंतरिक्ष सटल' (जयप्रकाश) आर 'देशी उपग्रह इन्सैट-१/बी' (ओकार नाथ मिश्र) जेहनों विज्ञान-लेखो प्रकाशित भेलै।

'हाथ देखौं, स्वस्थ रहौं', १९८३ ई० (आर० पी० पडित), हाथ के रेखा,

जिनगी के लेखा-जोखा' (विवेकानन्द झा) हेनों ज्योतिष-ज्ञान के साहित्यो आवी चुकलौ छै।

## पत्र-साहित्य

अंगिका भाषा के साहित्यो में पत्र-साहित्यो के प्रकाशन आरो संकलन दिस विशेष उत्साह नै दिखै छै। 'अंग-माधुरी' से लैके 'आंगी' तक में ई उदासीनता साफ देखलौ जावै सकै छै। 'अंगिकाँचल' के सम्पादक डॉ० आत्मविश्वास के झुकाव ई ओर अवश्य प्रशंसनीय छै। तैयो 'अंग-माधुरी', 'अंगप्रिया', 'आंगी' आदि के माध्यमों से अंगिका के पत्र-साहित्य के प्रकाशित करै दिस जे कदम उठैलौ गेलौ छै, ओकरों ऐतिहासिक महत्वों से इन्कार नै करलौ जावै सकै छै। डॉ० लक्ष्मीनारायण सुधांशु, पं० गदाधर प्रसाद अम्बष्ठ, डॉ० परमानन्द पाण्डेय, डॉ० तेजनारायण कुशवाहा, डॉ० डोमन साहु 'समीर', प्रो० कमला प्रसाद बेखबर', डॉ० सकलदेव शर्मा, श्री महेन्द्र प्रसाद जायसवाल, श्री चन्द्रप्रकाश 'जगप्रिय', श्री गुरेश मोहन घोष 'सरल', श्री अनिल चन्द्र ठाकुर, श्री अवधेश प्रधान, श्री जितेन्द्र कुमार देशभक्त', प्रो० रामवल्लभ साहु, प्रो० सुरेन्द्र शोषण, श्री पद्म पराग राय विष्णु', श्री प्राण मोहन 'प्राण', डॉ० देशभक्त, श्री राजेन्द्र किशोर साह, श्री महेश चौरसिया आरनी के अनेक हेनों पत्रों के प्रकाशन 'अंग-माधुरी', 'अंगप्रिया', 'आंगी', 'अंगिकाँचल', 'अंग-तरंगिनी' में होलौ छै जे अंगिका भाषा के स्थिरता, विकास आरो शोध के दिशा दिस इशारा करै छै।

अंगिका के पत्र-साहित्यो के लोकप्रियता आरो समृद्धि में पटना से प्रकाशित 'आज' (हिंदी दैनिक) के भूमिका निःसन्देह ऐतिहासिक छै। १९९५ ई० के पूर्वार्द्ध से ही ई दैनिक में 'अंगिका के पतरी' स्तम्भ के शुरूआत करलौ गेलौ छै, जेकरों नियमित प्रकाशन हर रविवार के होलौ आवी रहलौ छै। 'अंगिका के पतरी' के विशेष मूल्य यै लेली छै कि हेकरों द्वारा नै खाली अंगिका भाषा आरो साहित्य के नया-नया अभिज्ञान एक विस्तृत जन-समुदाय के बीच हुवै पारलै, बल्कि अंगिका पत्रों के राष्ट्रीय सामाजिक रूपो हासिल हुवै सकलै। निःसन्देह विभिन्न बोली के साथे अंगिका पत्र-साहित्यो के एक संस्कार-स्वरूप दै में 'आज' (हिंदी दैनिक) के योगदान महत्वपूर्ण मानलौ जैतै।

तैयो ई भाषा के पत्र-साहित्यो के इतिहास तब ताँय पूरा नै हुवै पारै जब ताँय पं० बुद्धिनाथ झा 'कैरव', डॉ० लक्ष्मीनारायण सुधांशु, श्री गदाधर प्रसाद

अम्बष्ठ, डॉ० डोमन साहु 'समीर' आरनी हेनों विद्वानों के लिखलें महत्वपूर्ण पत्रों के प्रकाशन संभव नै होय छै। ई दिस काम करै के बहुत जरूरत छै।

## रिपोर्ताज

कुछ विद्वान् रिपोर्ताज के भाव-साहित्य के भीतरे राखै के इच्छुक दिखै छै, मतरकि रिपोर्ताज के संबंध रिपोर्ट से ही होला के कारण एकरा अभिज्ञान-साहित्यों के अंतर्गत राखना ज्यादा वैज्ञानिक होतै। ई अलग बात छै कि रिपोर्ट के विपरीत रिपोर्ताज में घटना या तथ्य के साहित्यिक शैली में उतारलें जाय छै। यही से ई रिपोर्ट नै, रिपोर्ताज कहावै छै। रिपोर्ताज में वस्तुगत तथ्य के शब्दचित्रों में परोसलें जाय छै।

अंगिका रिपोर्ताज-साहित्यों के सही नींव डालै आरो विकास के बहुत दूर लै जाय में श्री सुधाकर के सम्पादन में 'अंगप्रिया' आरो 'पुरबा' के उल्लेखनीय स्थान छै ; मतरु विधिवत् लेखन 'अंगप्रिया' से ही होलें छै। हेना के तें रिपोर्ताज-लेखन के प्रारम्भ श्रीमती द्रौपदी दिव्यांशु के 'डॉ० रामधरी सिंह दिनकर' (१९७४) से ही होय जाय छै। जे काम कभी आचार्य महावीर प्रसाद द्विवेदी ने 'सरस्वती' के माध्यम से हिंदी-साहित्य के विकास ले करने छेलै, 'अंगप्रिया' आरो 'पुरबा' त्रैमासिक के माध्यम से वहे काम श्री सुधाकर ने अंगिका रिपोर्ताज के शुरूआती स्वरूप ले करने छेलै। जनवरी' ८२ के 'अंगप्रिया' में छपलें 'बाबा बैजनाथ धाम' (शिवशंकर पारिजात), 'एक गाँव सपना' (पी० एन० जायसवाल), 'शहरमुहाँ कसबा भागलपुर' (श्रीचन्द्र) आरो ८३ ई० के 'पुरबा' के 'प्रवेशांक' में प्रकाशित 'शहरों के अर्थशास्त्र' (शिवशंकर पारिजात) आरो 'पवित्रर बाबाँ पूछै छै' (धीरेन्द्र छत्तहारवाला), 'फुटपाथों के तिरसंकु' (रवीन्द्र) उल्लेख्य छै। 'पुरबा' ८३ ई० में प्रकाशित रिपोर्ताज अंगिका-साहित्यों ने बिल्कुल नया अध्यायों के यात्रा-कथा छेकै। 'अंगप्रिया' के सम्पादन से सुधाकर जी के हटतहें एक देवशिशु के बाढ़ पर रोक जेना लगी गेलै। अंगिका रिपोर्ताज के पुनर्जन्म 'प्रभात खबर' (हिंदी दैनिक, पटना) के ऐला के साथे नया तेज आरो शक्ति के साथे होय छै।

'प्रभात खबर' के माध्यमों से श्री कुंदन अमिताभ ने सर्वोत्कृष्ट रिपोर्ताज अंगिका भाषा के देलकै। 'प्रभात खबर' (१५ दिसम्बर, १९९६ ई०) में प्रकाशित अमिताभ जी के 'नया घर उठो, पुरानों घर बैठो' हेकरो उदाहरण छेकै। अन्य

रिपोर्ताजों में श्री दिलीप कुमार के 'आभियों तै कुच्छू सोचों' ('आज', २४ अगस्त, १९९७) तै आबी गेलै नया साल' (श्री कुदन अमिताभ : १० जनवरी, १९९७) आरो 'कहिया देखैलै मिलतै अंगिका सिनेमा ?' ('आज' : २ फरवरी, १९९७) छेकै।

१९९७ ई० के 'प्रभात खबर' में प्रकाशित श्रीमती आभा पूर्वे के 'कहिया ऐतै ऊ बसन्त ?' रिपोर्ताज भी अंगिका के रिपोर्ताज-साहित्यों के अमूल्य निधि छेकै।

## पत्र-पत्रिका-साहित्य

आधुनिक समयों में अंगिका गद्य-साहित्यों के विकास में जे अप्रत्याशित प्रगति होलौ छै ओकरा में पत्र-पत्रिकासिनी के भूमिका महत्वपूर्ण छै। ओकरों एक कारण छेकै मुद्रण के सुविधा होबों। जदियो बेतरह महँगी के चलते प्रकाशनों में बड़ी बाधा पडी रहलौ छै तैयों यै काल-खंडों में कते नी अंगिका-पत्रिका के प्रकाशन होते रहलौ छै। जखनी मुद्रण के सुविधा नै छेलै तखनीयों है दिशा में क्येक-टा हस्तलिखित पत्रिकासिनी से काँहीं-काँहीं काम चली रहलौ छेलै। 'बाय' गामों से वन्हें एक-टा पत्रिका के निकलै के उल्लेख ऐलों छै।

अंगिका पत्रकारिता आरो गद्य-लेखन के शुरूआत डॉ० परमानन्द पाण्डेय-संपादित 'अंगिका' नामों के पत्रिका के प्रकाशनों से होलौ छै, जेकरों प्रकाशन १९७० ई० में 'अंग-भाषा-परिषद्', पटना के ओरी से होलौ रहै। आपनों चार अंकों के चारे डेगों से अंगिका-गद्य-लेखन के फैलै में वै पत्रिका के योगदान ऐतिहासिक रहलौ छै।

मतरकि अंगिका गद्य के सब्भे विधा के विकास आरो विपुलता में 'अंग-माधुरी' बढी-चढी के सक्रिय रहलौ छै। है पत्रिका के प्रकाशन शेखर प्रकाशन, पटना द्वारा दिसम्बर, १९७० ई० से शुरू होलै जे कि श्री नरेश पाण्डेय 'चकोर' के संपादनों में तखनीयें से लगातार निकलते आबी रहलौ छै। 'अंग-माधुरी' के माध्यमों से अंगिका के कते नी कवि आरो लेखकों के प्रकाश में आवै के मौका आरो सहायता मिललौ छै। यै पत्रिका के प्रकाशन से जौन रूपों में अंगिका कविता, कहानी, संस्मरण, शब्दचित्र, हास्य-व्यंग्य, निबंध, एकांकी, आलोचना आदि के साहित्यों में आवै के औसर मिललै ऊ सचमुचे 'अंग-माधुरी' के प्रकाशनों के ऐतिहासिकता सिद्ध करै छै। संपादक 'चकोर' जी ने 'अंग-माधुरी' में 'चौबे जी

कें गप' आरो 'गुरु जी' हेनो स्तंभ चलाय कें अंगिका व्यंग्य-विधा कें समृद्ध कैने छै, यै में दू मत नै।

१९७४ ई० कें दिसंबर में अखिल भारतीय अंगिका भाषा-सम्मेलन, सेमापुर (कटिहार) सें 'अंगदूत' पत्रिका कें प्रकाशन श्री शंकर प्रसाद 'श्रीनिकेत' कें संपादनों में होलै। एकरों प्रवेशांकों में संपादक जी कें लिखलें अंगिका-साहित्यों कें इतिहास पर एक-टा संक्षिप्त लेख प्रकाशित होलें छै। कविता, कहानी -आर कें भी स्थान वै में देलें गेलें छै ; मत्तुर प्रवेशांकों कें बाद 'अंगदूत' कें आरो कोय अंक प्रकाश में नै आवे पारलै।

१९७९ ई० सें 'अंगप्रिया' (भागलपुर) केरों प्रकाशन अंगिका गद्य-विधा कें प्रौढ प्रस्तुति कें दृष्टि सें बड़ी ऐतिहासिक घटना नाखी छेकै। वै पत्रिका कें प्रवेशांकों कें प्रकाशन श्री कुमार भागलपुरी कें संपादनों में होलें रहै। ओकरों बाद श्री सुधाकर, श्रीमती मीरा झा आरो प्रो० देवेन्द्र कें संपादनों में 'अंगप्रिया' एक प्रौढ अंगिका-पत्रिका बनी गेलें छै। श्री सुधाकर जी नें वै पत्रिका कें माध्यमों सें जहाँ कहानी आरो आलोचना कें साथे-साथ भेंटवार्ता, रिपोर्टाजि -हेनो गद्य-विधा कें अंगिका में लोकप्रिय बनैलकै वहाँ श्रीमती मीरा झा नें 'भाषा-अंक' आरो प्रो० देवेन्द्र नें 'कथा-विशेषांक' निकाली कें पुरानों आरो नया लेखकसिनी कें धेयान अंगिका गद्य-विधा दिस मोड़ै में सफल प्रयास करने छै। 'अंगप्रिया' अखिल भारतीय अंगिका साहित्य-कला-मंच, भागलपुर द्वारा निकलैवाली पत्रिका छेकै। अंगिका-साहित्यों कें विकास में एकरों विशेष हाथ छै।

श्री सुधाकर जीये कें संपादनों में अखिल भारतीय अंगिका विकास-मंच, भागलपुर कें ओरी सें 'पुरबा' त्रैमासिक पत्रिका कें प्रकाशन १९८० ई० में करलें गेलें छेलै, हालांकि अक्टूबर-दिसम्बर में प्रकाशित पहिलकों अकों कें बाद ओकरों कोय अंक प्रकाशित नै होलै, मत्तुरकि उच्च कोटि कें पत्रकारिता वास्ते 'पुरबा' नै भुलैलें जैतै। अंक देखला पर लागै छै कि सुधाकर जी अंगिका गद्य कें विकास लेली सक्रिय आरो सावधान रहलें छेंत। निबंध, कहानी, साहित्यिक लेख आरनी कें अतिरिक्त 'पुरबा' कें प्रवेशांकों में विज्ञान, अर्थशास्त्र, इतिहास, पर्यटन, मिनेमा आदि सें जुड़लें सामग्रियों कें प्रोत्साहन वै कें व्यवस्थित प्रयास वै अकों से उजागर होय छै। परिचर्चा आरो पत्रादियो सें जहाँ ई अंक कसलें गेलें छै वॉही राष्ट्रीय स्तरों कें लेखकों कें साथे नया लेखकों कें जोड़ै के साधु सकल्प 'पुरबा' कें संपादकीय चिंता कें स्थिर करै छै।



अंगिका गद्य के आरो आगू तै जाय में चम्पा-प्रकाशन, दुमका से प्रकाशित 'चम्पा' आपनो ढंगे से सक्रिय रहलै। वै त्रैमासिक पत्रिका के प्रकाशन श्री सुभाषचन्द्र भ्रमर के संपादनो में दिसंबर, १९८२ ई० से होबो शुरू होलें छेलै। वै पत्रिका के तीन अंको में श्री उचितलाल सिंह के 'कानै छै लोर', श्री सुमन सूरु के 'सती परीक्षा', डॉ० सुरेन्द्र झा 'परिमल' के 'गुमसैलों धरती', श्री रघुनन्दन झा 'राही' के 'चिंता' - काव्यों के प्रकाशनों के अतिरिक्त प्रवेशांको में श्री अनिरुद्ध प्रभास-लिखित उपन्यास 'छाहुर' आरो ओकरो बादों के अंको में हुनको 'चम्पा के राजकन्या' - जेन्हो मँजलों नाटको के प्रकाशनों भेलों छै। 'चम्पा' त्रैमासिको के ऐतिहासिक मूल्य यहू लें बहुत बनलों रहतै कि एकरा से आधुनिक अंगिका-कृतिसनी के विस्तृत मूल्यांकनों के बहाना से अंगिका के समीक्षा-साहित्यों के एक खास ऊँचाई तक तै जाय के प्रयास होलें छै। श्री उचितलाल सिंह के सौसे काव्यों के विवेचनों के अतिरिक्त 'सती-परीक्षा' आरो 'चिंता' -जेन्हो प्रबंध-काव्यों पर नया ढंगों के समीक्षा प्रस्तुत करलें गेलें छै, जे कि अंगिका के समीक्षा-साहित्यों के दिशा-निर्देशो करै छै। भाषा-संगम, दुमका से प्रकाशित 'वनपाँखी' में अंगिका के साथे-साथे दोसरो भाषा के रचना छपै छेलै।

अंगिका-समीक्षा-साहित्यों के बल दै में समय-साहित्य-सम्मेलन, पुनसिया (बाँका) से श्री अनिरुद्ध प्रसाद विमल आरो डॉ० देशभक्त के संयुक्त संपादनो में 'समीक्षा' द्वैमासिको के प्रकाशनो शुरू करलें गेलें छेलै, मजकि एक्के अंको के बाद ओकरो प्रकाशन आगू नै बढ़े पारलै। वै पत्रिका पर प्रकाशन-वर्ष छपलों नै रहला के कारणे दोसरो-दोसरो प्रकाशनों के आधार पर कहलें जावें सकै छै कि ई पत्रिका के प्रकाशन १९८४ ई० के पहिने होलें छेलै। लघु काया के है पत्रिका में श्री सुमन सूरु के 'वनसोखा' पर डॉ० अमरेन्द्र के समीक्षा आठ पृष्ठों में प्रकाशित करलें गेलें छै।

आधुनिक आरो प्राचीन अंगिका गद्य-साहित्यों के प्रकाशन के दिशा में 'आगी' (पत्रिका) के भूमिका के नजरअंदाज नै करलें जावें पारै छै। जनवरी, १९९३ ई० से अंगिका-संसद्, भागलपुर से प्रकाशित होय रहलें ई पत्रिका कहियो त्रैमासिक आरो कहियो अनियतकालीन रूपों में सक्रिय रहलें छै। डॉ० अमरेन्द्र के संपादनो में है पत्रिका के नौ अंक १९९७ ई० तक प्रकाशित होय चुकलें छै जबे कि एकरो सब अंक एक-एक विशेषांक छेकै। प्रवेशांको में भारतेन्दु-कृत 'भारत-दुर्दशा' के अंगिका-अनुवाद निकललै के बाद अंक-४ में महाकवि प्रसाद-कृत

'ध्रुवस्वामिनी' के अंगिका-अनुवाद प्रकाशित करलें गेलें छै। अंगिका गद्यों के विकास आरो समृद्धि लेली 'आंगी' के अंक-३ (जुलाई-अक्टूबर, १९९३ ई०), अंक-५ (अप्रिल-जून, १९९४ ई०), अंक-७ (जनवरी, १९९५ ई०), अंक-९ (अप्रिल, १९९६ ई०), अंक-१० (जनवरी, १९९७ ई०) आरो अंक-११ (जुलाई, १९९७ ई०) में क्रमशः श्रीमती आभा पूर्वे के उपन्यास 'कचनार जबे कल्पतरु भेलै', श्री अनिरुद्ध प्रसाद विमल के नाटक 'साँप', श्री केशव के उपन्यास 'तुलसी-मंजरी', श्रीमती मीना तिवारी द्वारा प्रस्तुत 'अंगिका लोक-कथा', 'समकालीन अंगिका कविता-विशेषांक' आरो 'समकालीन अंगिका कहानी-विशेषांक' छपलें छै। अंक-६ (जुलाई-सितंबर, १९९४ ई०) 'अंगिका भाषा-विशेषांक' छेकै, जेकरा में हिंदी के नामी-गिरामी भाषाविदों के हिंदी में लिखलें अंगिका भाषा संबंधी लेख प्रकाशित छै। हिंदी-संसारों के ध्यान अंगिका भाषा-साहित्यों दिस आनै लें 'आंगी' के विस्तृत 'संपादकीय' आरो समीक्षा में खड़ी बोली (हिंदी) में राखे के खेयाल राखलें गेलें छै। देशों के प्रतिष्ठित साहित्यकारों के महत्वपूर्ण पत्रों के प्रकाशन से अंगिका भाषा-साहित्य दिस हिंदी-संसारों के ध्यान खींचे में 'आंगी' के आपनों खास कोशिश छै।

अंगिका पत्रकारिता के दिशा में उत्तरी अंग-जनपदों से डॉ० रमेश आत्मविश्वास के संपादन में अ० भा० अंगिका साहित्य विकास परिषद् (जयमंगल टोला, साहु परबत्ता) से प्रकाशित 'अंगिकाँचल' के आपनों अलग ऐतिहासिक महत्व छै। वै पत्रिका के मार्च, १९९४ -अंक से ज्ञात होय छै कि एकरों प्रवेशांक-वर्ष १९९१ ई० छेकै। तबे से ले के दिसंबर, १९९६ ई० ताय है पत्रिका के १५ अंक प्रकाशित होय चुकलें छै। अंक-१४ श्री रामकिशोर जी के संपादन में प्रकाशित छै। 'अंगिकाँचल' के प्राप्त मार्च' ९४, जून' ९५, मई' ९६ आरो दिसंबर' ९६ के अंकों के आधारों पर कहलें जैतै कि है पत्रिका के प्रकाशन उत्तरी अंग-जनपदों के नया-पुरानों अंगिका साहित्य आरो साहित्यकारसिनी से लोगों के परिचित करावै में ऐतिहासिक भूमिका निभाय रहलें छै। एकरा में कविता-कहानी तें प्रकाशित होले छै, अंगिका भाषा पर लेखो छपलें छै जे कि अंगिका लेली 'अंगिकाँचल' के उल्लेख्य योगदान छेकै।

खड़ी बोली (हिंदी) के माध्यमों से अंगिका भाषा आरो इतिहास पर शोध-कार्य करै के दिशा में श्री परशुराम ठाकुर 'ब्रह्मवादी' के संपादन में प्रकाशित 'अंग-तरंगिनी' उल्लेखनीय छै। है पत्रिका के 'संपादकीय' अंगिका भाषा

में छोड़ी के, आकि खड़ी बोली में लिखलें दोसरों लेखकों के एकाध लेख छोड़ी के, बाद-बाकी ओर से छोर तक संपादक जी के शोध-लेखों से अंटलें होला के कारणे, एक पत्रिका के रूपे में आरो अंगिका भाषा-साहित्यों के विकास में विशेष उल्लेखनीय नहियो रहला पर, अंगिका के गौरवपूर्ण इतिहासों के अनुसंधान आरो अंगवासी लोगे में आपनों इतिहासों के प्रति अभिरुचि जगावै के दिशा में 'अंग-तरंगिनी' के भूमिका झुठलावै नै जावें पारें। है शोध-पत्रिका के अंक-१-२ अगस्त-सितंबर, १९९४ ई० में प्रकाशित होलें छै। जनवरी, १९९५ ई० में प्रकाशित संयुक्तांक ३-४ में संपादक-लिखित 'अंगिका भाषा की प्रागैतिहासिक खोज' एक चर्चित आलेख छेकै।

आर्थिक संसाधनों के अभाव में निकलै आरो जल्दीये बंद होय जायवाला पत्रिकासिनी में योगेश-प्रकाशन, ईशीपुर (भागलपुर) से 'अंग-धारा' (जेकरों दू अंक क्रमशः डॉ० तेजनारायण कुशवाहा आरो श्री योगेश कौशल के संपादनों में निकललें रहै) ऐला के अलावा जनवरी आरो अगस्त, १९९६ ई० में एक पत्रक 'चानन' के दू अंक, 'हाँक' पत्रक के दू अंक आरो 'जै अंगिका' के एक अंक प्रकाशित होलें रहै। डॉ० अमरेन्द्र के संपादनों में निकललें 'हाँक' एक पत्रक-कविता-अंक रहै जबे कि 'अनल' जी, 'राही' जी आरो राजकुमार जी के संपादनों में आवैवाला 'चानन' में गद्य-पद्य दुन्नो के राखै के प्रयास होय रहलें रहै। 'श्रीस्नेही' जी के संपादनों में प्रकाशित 'जै अंगिका' अर्धवार्षिकी के प्रवेशांक-वर्ग जनवरी १९९५ ई० छेकै। 'बाल-गोपाल-अंक' के नामों से प्रकाशित 'जै अंगिका' के बाल-मनोविज्ञान से जुड़लें कहानी, लेख-आर के साथे अंगिका लोक-कथा गद्य-साहित्यों के राखलें गेलें छै।

आधुनिक अंगिका गद्य-साहित्यों के प्रचार-प्रसार में अंगिका-पत्रिकासिनी के साथे लोकप्रिय दैनिक पत्रों के भागीदारी अमूल्य होय छै। हेना के ते दिसंबर, १९६४ ई० में भागलपुर से प्रकाशित अंगिका भाषा के 'अंगिका-समाचार' आरो 'अंग-वाणी' जेन्हो साप्ताहिक पत्रों के ऐतिहासिक महत्व रहलें छै। शुरू में कुछ अंक निकलला के बाद हेकरों प्रकाशन रुकी गेलै ; बादो में १९९५ ई० में 'अंगिका-समाचार' के फनू सक्रिय करै के कोशिश करलें गेलै, मतरकि एक-दू अंक निकलला के बाद फनू नै देखलें गेलै।

हिंदी के दैनिक पत्रसिनी में 'नई वात' (भागलपुर), 'आज' (पटना), 'हिन्दुस्तान' (पटना) आरो 'प्रभात खबर' (पटना) अंगिका लेली प्रमुख छै।

अंगिका कविता आरु अंगिका संबंधी समाचारों के स्थान दै में 'नई बात', 'आज' आरु 'प्रभात खबर' के ऐतिहासिक योगदान रहलौ छै । 'नई बात' के माध्यमों में नै खाली श्रीमती आभा पूर्वे के उपन्यास 'कचनार जबे कल्पतरु भेलै' के धारावाहिक प्रकाशन करलौ गेलै, बलुक १९९६-९७ ई० के बीच डॉ० अमरेन्द्र के अंगिका उपन्यास 'जटायु', श्रीमती पूर्वे के 'गुलबिया', श्री मुद्गलपुरी के 'हमें सुरमुख दास नै छेकियै', श्रीकेशव के 'मरगांग' आरु 'अनल' जी के 'पियाबामा' के प्रकाशनों करलौ गेलै । आधुनिक अंगिका साहित्यों के प्रकाशन लेली 'नई बात' में रोजाना एक स्तंभों के व्यवस्था करलौ गेलौ छै जै में पहिलों बारी धारावाहिक रूपों में श्रीकेशव के पाँच-टा शब्दचित्रों के प्रकाशन १९९७ ई० में करलौ गेलौ छै ।

'आज' (पटना) में हरेक रविवार के 'अंगिका के पतरी' के नामों से एक स्तंभ १९९५ ई० में जारी करलौ गेलौ छेलै, जेकरों प्रकाशन नियमित रूपों से होय रहलौ छेलै । वै में अंगिकाये में अंग-जनपदों के इतिहास, भूगोल आरु साहित्यों के बात लोगों के सम्मुख राखै । आरु अंगिका भाषा के प्रसार में काफी मदद मिललौ छै । वै स्तंभों के उपयोग जौ कुछेक अंगिका साहित्यकारें खाली आपनों भजन गावै लेली नै करतियै तें अंग-जनपदों के एक बड़ों वर्गों के वै स्तंभों में जुड़ै के मौका मिलतियै । वैयक्तिक प्रशंसा के कारणें वै स्तंभों के लोकप्रियता साजत होय गेलौ छै । एना के तें 'आज' के मंगलकारी 'अपान्तर' स्तंभों में अंगिका के श्रेष्ठ कविता के स्थान मिललौ ऐलौ छै ।

अंगिका रिपोर्ताज आरु ललित निबंध के खेयालों से 'प्रभात खबर' (पटना) इतिहासों के नजरी से कुछ बेसी महत्व राखै छै । 'अंगिका-सवाद' के नामों से जौन स्तंभ 'प्रभात खबर' में शुरू करलौ गेलौ छै ऊ नियमित तें नै छै, मतरकि हौ स्तंभों के बादो अनदिन्हौं आपनों विशेषांकों में अंगिका रिपोर्ताज -आरु प्रकाशित करी के 'प्रभात खबर' अंगिका के महत्व आरु प्रसार में मदद करी रहलौ छै । 'प्रभात खबर' के 'होली विशेषांक' (१९९७ ई०) में छपलौ श्रीमती आभा पूर्वे के 'कहिया ऐतै वसंत ?' रिपोर्ताज आरु ललित निबंधों के सौंदर्य राखैवाला विशिष्ट गद्य-रचना छेकै । 'प्रभात खबर' के माध्यमे से, ओकरा से पहिने, श्री कुंदन अमिताभ के कयेक-टा स्तरीय गद्य-रचना लोगों के बीच ऐलौ छै ।

जबे 'नव भारत टाइम्स' के पटना संस्करण प्रकाशन में ऐलौ रहै तबे 'अंग-जनपद से' के नामों से एक-टा स्तंभ वै में शुरू करलौ गेलौ छेलै, जेकरों

स्थायी लेखक छेलै नव भारत टाइम्स के पत्रकार श्री वेदप्रकाश बाजपेयी। खड़ी बोली में आवैवाला हौ स्तंभ अंगिका-रचना से जुड़लौ रहला के कारणे पाठकों के बीचें बड़ी लोकप्रिय छेलै।

अंगिका भाषा-साहित्य आरो एकरो गौरवपूर्ण इतिहासों के संपूर्ण प्रसार लेली आवश्यक छेलै कि एकरो साहित्य आरो इतिहासों के खड़ी बोली (हिंदी) में राखलौ जाय। यही उद्देश्यों से अंगिका भाषा के पुनर्जागरणों से जुड़लौ साहित्यकार श्री गदाधर प्रसाद अम्बष्ठ, डॉ० लक्ष्मीनारायण सुधांशु, डॉ० माहेश्वरी सिंह 'महेश', डॉ० डोमन साहु 'समीर' आरनी विद्वाने खड़ी बोली में अंगिका भाषा-साहित्यों पर आपनो-आपनो विचार प्रगट केलकै। आयको समयों में श्री जनार्दन यादव के नाम पै दिशा में प्रमुखता से लेलौ जैतै, जिनको 'अंगिका-लोक' आरो 'आधुनिक साहित्य' खड़ी बोली के माध्यमों से ऐलौ छै। खड़ी बोली के माध्यमों से प्रकाशित पत्रिका 'संकल्प' (हैदराबाद), 'शैली' (फारबिसगंज), 'पश्यन्ति' (दिल्ली), 'साहित्य-भारती' (लखनऊ), 'नवकल्प' (गया), 'भोजपुरी-लोक' (लखनऊ) -आर में अंगिका भाषा-साहित्यों पर लेख छपलौ करै छै। 'कंचन-लता' (राजस्थान), 'साहित्य-भारती' (लखनऊ) -जेन्हो पत्रिकाओं में अंगिका कविता के स्थान देलौ गेलौ छै। पै दिशा में 'शिरीष कथा' (भागलपुर) आरो 'समय' (पुनसिया) -जेन्हो पत्रिकाओ के योगदान ऐतिहासिक रहलौ छै। 'शिरीष कथा' के अंक-३ (जनवरी-फरवरी, १९८८) हिंदी में अनूदित अंगिका कहानी के विशेषांक छेलै, जेकरा में सर्वश्री मधुकर गंगाधर, सुरेश मंडल 'कुसुम', वचनदेव कुमार (डॉ०), महेन्द्र प्रसाद जायसवाल, सुमन सूरु, कुमार विमल (डॉ०), अनुज शास्त्री, श्याम सुंदर घोष (डॉ०), भुवनेश्वर सिंह 'भुवन', सच्चिदानन्द धूमकेतु, विमल वर्मा, सुरेश मोहन मिश्र, अनिरुद्ध प्रसाद विमल, डॉ० सामवे, विजय, अश्विनी, गंगा प्रसाद राव आरो अमरेन्द्र (डॉ०) के कहानी, अणु-कथा आरो व्यंग्य-कथा के साथे-साथ स्व० अनूपलाल मंडल के उपन्यास 'नया चाँद, नया सूरज' के कथा संक्षेपों में ऐलौ छै। पै अंकों में प्रख्यात समालोचक डॉ० विजयेन्द्र नारायण सिंह से, अंगिका कथा-साहित्यों पर भेंटवार्ताओ प्रकाशित करलौ गेलौ छै। पत्रकार, कथाकार, संपादक आरो प्रकाशक श्री सदाशिव सुगंध ने पै अंकों के रूप-सज्जा में काफी आर्थिक व्यय करलै छेलै। हिंदीयो लेखक के रूपों में ख्यातिप्राप्त कथाकारों के अंगिका कहानी ले के निकाललौ गेलौ 'शिरीष कथा' के हौ 'अंगिका-कथा-विशेषांक' ने हिन्दुस्तान भरी के प्रमुख साहित्यकारों के ध्यान

अंगिका भाषा-साहित्य दिस टानलें छै।

सारांश कें रूपों में कहलौं जैतै कि 'इलेक्ट्रोनिक मीडिया' कें सहारा से जो सर्वश्री यदुनन्दन सिंह, छैलबिहारी, तृप्ति शाक्या आरौ अनुराधा पोडवाल ने अंगिका लोकगीतों कें देशव्यापी पहचान देलकै तें 'प्रिन्ट मीडिया' ने अंगिका काव्यों कें साथे-साथ अंगिका गद्यों कें विविध विधा कें आवै में ओतने औसर प्रदान कैलकै, जै से अंगिका गद्य पिछलका दुइये दशकों में आपनों शिखर छूवै में सफल होय गेलों छै।

## उपसंहार

अंगिका साहित्य केरों इतिहास कें विश्लेषण से ई स्पष्ट होय छै कि ई भाषा कें साहित्य आपनों समय कें सामाजिक, धार्मिक, सांस्कृतिक, राजनीतिक-आर परिवेशों से नाभिनालबद्ध होय कें आपनों स्वरूपों कें गढ़तें ऐलों छै। सिद्ध-कविसिनी तें आपनों चर्यापदों में आपनों समयों कें समाजों कें सम्यक् स्वरूप खाड़ों करलहें छै, हुनकासिनी कें बाद महाकवि विद्यापति ने हुनकासिनी कें काव्यरूपों कें स्वीकारतें होलों आपनों समय कें भक्तिपरक शृंगार कें उजागर करने छै। यहाँ ई बात स्पष्ट करी देबों जरूरी छै कि विद्यापति कें जन्म-स्थान कें बारे में कुछ भ्रामक विचार प्रचारित-प्रसारित रहतें ऐलों छे। एक विचार एहो छै कि हुनकों जन्म उत्तरी भागलपुरों कें एक भाग सहरसा में होलों रहै जहाँ हुनकों पिता पं० गणपति ठाकुर ओईनवार वंशों कें राजा गणेश्वर जी कें सभासद रहै। येंहें रङ महात्मा कबीर कें बारे में भी कयेक बात भ्रामक छै। सच पूछों तें कबीर कें काव्य-प्रवृत्ति बिल्कुल सिद्ध-कविसिनी कें काव्य-प्रवृत्ति कें अनुकृति छेकै। यही से कबीर कें संबंध काशी > कासडी (कहलगाँव, भागलपुर) आरौ मुद्गलपुर > मुदगर > मगहर > मुगेर से रहलौं हुएँ तें कोय अतरज नै।

आधुनिक समयों में जे अंगिका-साहित्य प्रस्तुत होय रहलौं छै व्ह पर सिद्ध-कवि, कबीर-आरनी कें सामाजिक रूढि पर व्यंग्यपूर्ण अभिव्यक्ति कें प्रभाव साफ-साफ देखलौं जावें सकै छै। यही से अंगिका-साहित्य केरों इतिहासों कें 'आदि अद्वैतकाल' आकि 'आधुनिक काल' में नै विभाजित करी कें 'अंगिका साहित्य केरों अद्वैतकाल' कहबों बेसी मोनासिब लागै छै। ई जरूर छै कि कहियो कोय धारा भीतरी धारा होय गेलों छै आरौ कहियो भीतरी धारा पर बाहरी धारा।

अंगिका साहित्य केरों आधुनिक अद्वैतकाल में ई भाषा के साहित्यकारसिनी सिद्ध-कवि आरो कबीर के मुख्य रूपों से वही स्वरों के पकड़ने छै जे सामाजिक रुढि आरो अंधविश्वासों के खिलाफ छै। ई स्वर जतें कविता में गूँजै छै ओतन्हें गद्य-साहित्यों में। कवीश्वर ज्योतिरीश्वर ठाकुर ने 'वर्णरत्नाकर' लिखी के अंगिका साहित्यों में जौन गद्य-काव्य के नीव राखने छेलै ओकरों पूर्णता आधुनिक अंगिका गद्य-लेखनों में देख्लों जावें सकें छै।

आय खाली नाटके में नै, बलुक कहानी, उपन्यास, निबंध, आत्मकथा, जीवनी, साक्षात्कार, शब्दचित्र औरनीयों में गद्य-विधा के रचना ओतन्हें मजबूती से आबी रहलें छै। विधा के साथे-साथ शैली-शिल्प के आधुनिकतम रखो अंगिका भाषा के निरन्तर गतिशीलता के प्रमाणित करै छै। दुर्भाग्य के बात ई कि आय्यो अंगिका साहित्यों के एक बड़ो भाग अप्रकाशिते छै। केन्द्रीय आकि राज्य-सरकारों के कोय सरोकार अंगिका भाषा-साहित्य आरो अंग-जनपदों के संस्कृति से नै छै। ई संबंधों में राजनीतिज्ञसिनी के उदासीनता समझै में नै आबै छै कि जे अंग-जनपद ने कभी सौसे पृथ्वी के जीती के राज करलें छेलै - 'अंग समन्त सर्वतः पृथ्वी जयन परीचाया श्वेन च मध्येनेज इति' - आरो महाकवि दिनकर जी के अनुसार, 'अंगने सौसे विश्व में सांस्कृतिक उपनिवेश कायम करलें छेलै' ('संस्कृति के चार अध्याय'), ऊ आय आपनों पुरुषार्थ से चुकी रहलें छै। मजकि है बात याद रहना चाहियों कि कोय इतिहास राजनीतिज्ञे के बलों पर नै, संस्कृति-पुत्र साहित्यकारों के रचना-कौशल से युक्त होय के सुस्थिर आरो सक्रिय रहै छै। अंगिका के पक्षों में जहाँ एको-सें एक जोरगरो साहित्यकारों के अलावा दिवंगता अंग-सवासिन वाणीमुक्ता चतुर्वेदी प्रतिभा मिश्र, प्रो० डॉ० बैजनाथ चतुर्वेदी, प्रो० डॉ० वसंत चक्रवर्ती, पद्मश्री डॉ० बी० वी० राजू प्रभृति युग-पुरुषों के आशीर्वाद छै वहाँ एकरों साहित्य केरों इतिहास उज्ज्वल रहतै, एकरा में कोय दू मत नै छै। इति शुभम्।



## पद्मश्री डॉ० बी० वी० राजू



पद्मश्री डॉ० भूपति राजू विरसम राजू का जन्म १५ अक्टूबर, १९२० ई० में पश्चिमी गोदावरी जिले (आन्ध्रप्रदेश) में एक समृद्ध कृषक-परिवार में हुआ। शिक्षा में उनकी विशेष अभिरुचि देखकर उन्हें हिन्दू विश्वविद्यालय, काशी में तकनीकी शिक्षा प्राप्त करने को भेजा गया, जहाँ से उन्होंने बी० एस-सी० (तकनीकी) की उपाधि प्राप्त की। तदुपरान्त वे अमेरिका के हार्वर्ड विश्वविद्यालय से पी-एच० डी० की उपाधि ले आये। फिर तो भारत में उन्हें अनेक सम्मान मिले। एफ० आई० ई० और एम० आई० पी० एच० ई० (भारत) के बाद उन्हें अमेरिका से एम० ए० आई० ई० ई० का सम्मान मिला। जवाहरलाल तकनीकी विश्वविद्यालय ने उन्हें डॉक्टर ऑफ साइन्स और भारत-सरकार ने पद्मश्री की उपाधियाँ प्रदान कीं।

डॉ० राजू का पारिवारिक जीवन सुख और संतोष से भरपूर रहा है। उनकी धार्मिक प्रवृत्ति की गृहिणी ने उन्हें किसी प्रकार का कष्ट न होने दिया जिससे उन्हें अनेक उद्योगों में परामर्श लेने और कुछ उद्योग स्थापित करने में बड़ी सहायता मिली। डॉ० राजू के समृद्धि के शिखर पर पहुँचने के बाद उनकी सहधर्मिणी का स्वर्गवास हो गया।

बिहारवासियों के साथ, विशेष कर ग्रामीण जनता के प्रति डॉ० राजू के हृदय में अगाध प्रेम है जिसका कारण यह है कि उन्होंने अपना सेवा-कार्य डालमियानगर के पास सोन नदी की घाटी में बसे जरबला गाँव के सीमेण्ट कारखाने से प्रारंभ किया था। सीमेण्ट के अलावा उन्हें कागज, पॉलीस्टर, रिफैक्टरी, चीनी मिट्टी के सामान आदि का प्रत्यक्ष अनुभव है। इन्हीं अनुभवों को लेकर वे हैदराबाद आये और श्रीविष्णु सीमेण्ट और रासी रिफैक्टरी नामक बड़े-बड़े कारखाने उन्होंने स्थापित किये। रासी सिन्थेटिक्स नामक कारखाने को भी जन्म दिया। तेजगाना कागज कारखाना जब डूबने लगा तब उसे रासी सीमेण्ट में मिलाकर उसका उद्धार किया था। सीमेण्ट उद्योग विकास के वे भारत सरकार की ओर से पाँच साल तक अध्यक्ष रहे। इण्डोनेशिया, मलेशिया, नेपाल और भूटान सरकारों के तकनीकी सलाहकार भी वे नियुक्त हुए तथा आदिलाबाद, ताण्डूर और कडप्पा सीमेण्ट कारखानों की स्थापना में सहायता दी। आज वे अपनी चार कम्पनियों के अध्यक्ष हैं।

पद्मश्री डॉ० राजू उद्योगवीर तो हैं ही, अनेक मंदिरों, पुलों और सड़कों का निर्माण कराकर जनहित के कार्यों के कारण धर्मवीर भी हैं। कला और साहित्य के प्रति प्रेम के फलस्वरूप वे आज अपनी ७८ वर्ष की आयु में सुप्रसिद्ध हैं।

*भगवान उन्हें चिरायु करें।*